

國學基
本叢書 續行水金鑑

十



上海图书馆藏书



A541 212 0006 1530B

書叢本基學國

鑑金水行續

(十)

修纂等序世黎

行發館書印務商

續行水金鑑卷第一百四十四

永定河水章履十

嘉慶十三年正月初八日奉。上諭。國家經費有常。凡定額之外。斷不能屢議增添。前據溫承惠奏請。酌添永定河歲修搶修銀兩。業經降旨飭駁。茲據稱經費不敷。請動款豫買料物。以備另案險工支用等語。事尚可行。著准其照數於司庫內。每年豫領銀一萬兩。俾先期豫購料物。貯工備用。仍歸入歲搶修項下報銷。並著嚴飭各屬。覈實經理。毋任稍有偷減浮冒等弊。河渠志稿。

二月溫承惠奏。永定河隄岸向無加培土方銀兩。且多年均未修葺。卑矮殘缺。不足以資防禦。而北岸爲尤甚。上年查明緊要處所。奏請另案加高培厚。是以伏秋兩汛。疊次盛漲。幸仰荷鴻庥。保護無虞。惟工段縣長。尙多未經修葺之處。飭永定河道陳鳳翔。查得盧溝橋稅局後身。沙淤幾與石隄相平。須加砌石子堰二段。又南北兩岸土隄內幫。多被大溜汕刷。隄頂又爲異漲衝激。須另行加培。謹開具應修工段丈尺銀數清單。恭摺謹奏。永定河志。

是月奉上諭。溫承惠奏。詳勘永定河情形。尙有應辦要工。據稱盧溝橋稅局後身。加砌石子堰二段。又南北兩岸土隄內幫。亦須另行加培。估計共需工料銀一萬八千四百五十餘兩。此項工程。旣關緊要。自應及早修培。以資防護。著准其在藩庫項下。動支銀兩。擇吉興工。該督惟當責成。該道陳鳳翔。董率各廳營汛員弁。分投趕辦。於大汛前一律完竣。但必須料實工堅。不得稍涉草率。致滋浮冒。永定河距京密邇。將

來工竣後。朕隨時簡派大員。前往查驗。設有偷減情弊。不難查明懲治也。永定河志。

閏五月。奉上諭。德瑛等奏。勘明直隸隄河橋道開壩各工一摺。並開繕清單。繪圖貼說進呈。朕詳加披閱。此次估修千里長隄各工。經德瑛等逐一收驗。覈與原估冊報。大率相符。溫承惠飭屬承修。均能如式。所辦尙好。自此次修築之後。不惟保護民田。兼以興復水利。實於閭閻有裨。惟隄工地段。縣長。每遇大汛。盛漲之時。不能無汕刷殘缺。若不隨時修補。必致日久傾圮。既恐貽害田廬。兼且重糜帑項。殊非經久之計。朕本年春間。臨幸淀津。諭令將沿途行宮座落。派人看守。籌款黏補。原以其修理本已完善。若復勤加葺補。則所費無多。而工程益臻鞏固。况隄工關係民生。較之行宮座落。更爲緊要。豈可稍任廢弛。在地方官之意。未必不以清蹕臨鑿。輟駐止處所。倍須敬謹修葺。殊不知朕省方時巡。卽爲閱視河隄。求莫求寧起見。地方官正不得稍有疎懈也。著溫承惠將此項工程。應如何責成地方官。定期呈報。隨時修補。及防護鞏固者。如何量加獎勵。因循廢弛者。如何酌予懲處。務須悉心籌議章程。俾不致玩視要工。庶隄身永臻穩實。民田廬舍。均資利益。卽須酌籌歲修經費。諒亦爲數無多。辦理自易爲力。至格淀隄工。原係攔截子牙河渾水。不使灌入淀河。從前不惜帑金。庀工建築。自有深意。若此時不加修補。任其殘廢。則子牙渾水灌入淀河。必致受淤爲患。著溫承惠飭令地方官。再行詳查設法修補。卽使毋庸修葺。亦當將實在緣由。詳悉奏聞。以憑酌覈。所有文安。大成。天津等縣各工丈尺。與原估不符之處。著工部查覈具奏。 睿皇帝

聖訓。

六月十三日。奉上諭。甘省爲黃河上游。每遇汛期水漲。俱用皮混沌裝載文報。順流而下。知會南河東河。

各工一體加意防範。得以先期籌備。因思永定河發源於晉省渾源州。該處水勢情形。設遇汛期加長。亦應速行知會下游。豫爲防護。著該撫飭知渾源州。隨時稟報。儘察看水勢增長。卽由六百里一面具報。直隸總督。一面呈報軍機處。勿稍遲滯。並著成寧。將該省現在雨水情形。及渾源州水勢如何。速行查明具奏。以慰廑注。河渠志稿。

是年尙書德瑛劉權之奏。查此次估修千里長隄。自高陽劉家溝起。至大城南趙扶村止。環峙淀南。實爲附隄七州縣民田保障。除沿隄高阜村莊。毋庸修築老隄外。計現修隄工。共分七十段。長四萬二千三百四十六丈四尺五寸。臣等按照估冊丈勘。其頂底高寬長丈。悉屬相符。間有數段尺寸較原估寬餘。試驗做法。亦均結實。惟高陽保定。土性帶沙。歷試錐籤。間有滲水。又任邱第三段至十段。霸州第一段至第三段。隄工均兩面夾水。其隄根護土。應於原估尺寸外。加厚加寬。以防汕刷。臣等已飭汛員再加夯礮培築。並令沿隄補種柳樹蒲葦。俾資遮護。臣等查工時。近隄紳士居民等。僉稱此處隄堰。向係民修。保護田廬。自嘉慶六年大水衝刷後。小民無力修培。仰蒙皇上發帑修築。兩年來此數百里民居田廬。普慶安瀾。頂感天恩。顛懇據情轉奏。迨行至蘇家橋望窪亭一帶。遙見文安窪麥隴連雲。以積年淀水所佔之區。此日盡成沃壤。益仰聖主深仁厚澤。伏思此項隄工。向資民力。今蒙皇上發帑興築。屹峙鼎新。尤應於南隄後保護有方。除尋常浪窩水溝灌洞。飭令隨時填補。至每歲盛漲時及水退後。似此長隄。不能無一二處汕刷殘缺。應令地方官諭民通力合作。加意修培。惟奉行日久。易致懈弛。其應如何督飭經理。請敕下直隸總督。飭屬妥議章程。按時稽察結報。以裨要工。至格淀新舊隄。並格淀疊道。自文安三里灘起。至天津西

沽砲臺止。共分七十二段。通長一萬七千九百八十五丈。內惟靜海工段丈尺。與原估相符。其文安大成天津隄工。以上年水刷過甚。頂底丈尺。間與原估不符。臣等丈量時。另行分段註單。俟工部按照土方銀兩覈算題明。著落承辦之員賠交。查文安新格淀隄工。南三里灘積水寬長。中有民舍。盡被水圍。詢係去年子牙河泛漲。大城臨河民堰。被衝灌入。四無出路。該民懇求暫開格淀新隄一段。以洩積水。臣等察看積水均已澄清。不妨暫開一段。俾瀉入淀河。可無淤淺。是以卽飭文安大城兩縣。就三里灘地最低處。各挖隄數尺。以資宣洩。現在涸出十之六七。而歸入淀河之水。尚在涓涓不息。俟積窪處再有消滅。卽令於汛前補築完善。該居民踴躍樂從。無須再動官項。其迤南王家口民堰。經大城縣勸令百姓興工補足。不致再患積水。惟天津蝦蟆窪。格淀疊道長五里有奇。據天津道稟。該處地極窪下。土性又不凝結。且界在大清子牙兩河間。風水汕刷。屢築屢衝。今春該縣奉文勒限賠修。彼時兩面皆水。無計施工。迨後商用排椿葦草層層加壓。保護隄根。始克竣事。而現在尙不免缺陷。是以所修丈尺。不能與原估相符。此處工程若盛漲經臨。力難保護。臣等詳閱該處工段長九百三十餘丈。察勘隄根。實係排椿束草。是修築不易。而現在楊柳青等村居民。尙復請開涵洞。以利民田。查該處兩面瀕河。近隄地畝無多。非文安大城可比。若值水落。則南北兩面涸出之地。皆可種植。若經盛漲。皆係積水。卽開設涵洞。仍無消路。村民不過欲藉涵洞以圖小舟貿易往還。而於隄工實屬非宜。是以未經允准。且建隄之意。原爲分別清渾。免致淀河淤淺。而設。曾經裘曰修等請將靜海當城以東之隄。改爲疊道。較原隄稍低。意謂子牙河水溜沙多。盛漲時隄低易漫。隄高易缺。漫過則沙少。決口則沙多。亦豫防淀河受淤之見。今子牙河身已高三四尺不等。若無

此隄攔護。則渾水串入淀河。必致受淤。現在子牙河下游。業經督臣溫承惠於王家河以下。挑濬二千三百餘丈。導使東趨。由大紅橋匯入北運河。並於王家河添築攔水壩二道。阻其北注。大清河之路。又挑挖紅橋以下支河七道。以資分洩。計盛漲時。當不虞橫溢。就此時形勢而論。該隄於民田廬舍。不甚關係。毋庸按照原估丈尺補築。惟此隄隔別清渾。究不可少。况經興修。未使任其殘廢。請敕交直隸督臣。飭令地方官隨時察看。就現築丈尺設法修補。卽遇汛水盛漲。不致前功盡棄。非特帑項不致虛糜。且於隄防有益。至各疊道。自雄縣十里鋪至鄭州西關止。共十四段。長二千二百四十六丈。又靜海當城至楊芬港疊道。長三百九十丈。又獨流村疊道。長八百九十三丈。又天津海河疊道。自馬家口至水師營。共一百一十一段。長一萬七百二十六丈。其高寬丈尺。與原估相符。內趙北口一帶。爲南北往來衝途。不免間有墊陷。已飭地方官隨時修補平治。其當城至楊芬港疊道。查該督原奏清單。並原估細冊。均開三百九十丈。臣等履勘計長十餘里之多。且內有缺口三四處。詢稱疊道原長二千餘丈。零星逐段估修。實止三百九十丈。其烏龍口殘缺。實因海水難以施工。且隨修隨塌。春間卽用浮橋接搭。以供車馬經行。該處舊有工段。略加修築。除三百九十丈外。均不在估修之內。臣等查本非大路。卽或因伏秋盛漲。汕刷亦無庸再加修築。又挑濬河道。自任邱大清河至天津西沽。與北運河會流處。共挑成三十五段。通長二萬九千四百一十二丈。逐一測量。中泓水深七八尺不等。兩岸河底水面。較原估丈尺。有寬深而無淺窄。現在船隻過行。下游會流處。亦皆通暢。惟子牙河下游支河七道。現在水未出槽。並無分流之水。察看紅橋以西。均有挑挖河形。其橋東會入北運河處。潮汐往來。漸形淤淺。已飭該縣於汛水漲發時。卽就原挑處分道抽溝。俾暢

達以順水性。又橋梁開壩各工。均按照估冊。切實驗收。其丈尺椿料。均屬堅固如式。畿輔安瀾志。
是年。溫承惠奏。千里長隄。新舊格淀隄。及各處疊道橋開。並挑淤等工。經前署督臣裘行簡。派員勘估。奏
委清河道胡鈺。天津道沈長春等。督率各州縣。分段趕辦。上年八月。臣復親勘。間有未能如式。及被水汕
刷殘缺平墊之工。卽飭該道等。照估續加修復。查清河道承辦天津挑濬子牙河。並築攔水壩。共估銀二
萬一千五百七十兩。又天津道承辦文安。大城。靜海。天津等格淀大隄。及靜海格淀疊道。獨流等處橋座。
原續估工銀十五萬二千一百五十八兩。臣復覈與原案相符。再天津等境內。格淀隄工。前經各員。照估
修築完竣。緣地勢低窪。界在大清子牙兩河間。上年水勢浩瀚。漫過隄頂。致各工多有殘缺平墊。及水落
已值天寒。未能培補。前已奏明。今歲春融。冰泮。卽飭天津道督同各縣。趕緊加鑲補築。業已完整。惟間有
水中撈泥處所。辦理較難。且連日大風。又加汕刷。未復原估尺寸。現仍趕緊培補。畿輔安瀾志。

嘉慶十四年二月二十八日。奉上諭。昨日溫承惠奏。永定河添備料物。豫支銀一萬兩。懇請增入歲搶修
報銷。已降旨。每年加增五千兩。作爲定額。並准於例支歲搶修二項下。每年豫支一萬兩。以備工用矣。因
思上年伏秋大汛時。雨水連縣。永定河水漲發。險工疊出。經該督飭令道廳各員。支領銀兩。添備料物。堆
貯工所。隨時鑲護。得資穩固。是上年備料銀一萬兩。尙無浮冒情弊。著加恩准其另款題銷。嗣後歲搶修
已加賞銀五千兩。不得於額外復有增添。睿皇帝聖訓。

嘉慶十五年正月。溫承惠奏。永定河兩岸隄工。土性純沙。難以堅久。須隨時加高培厚。庶足以資防禦。茲
據該道王念孫。查明應辦加培工段。摺節估計。具稟請奏。臣親赴查勘。所估各工。實係應辦。謹繕具應修

工段丈尺銀數清單。敬呈仰懇聖恩。俯准辦理。俾險工得臻鞏固。永定河志。
是月奉上諭。溫承惠奏請動款加培永定河兩岸隄工。據稱該處土性純沙。經車馬往來踐踏。易致卑薄。現飭永定河道王念孫查明應辦工段。上緊加培。擲節估計。共需例價銀一萬四千八十八兩零等語。自係應辦要工。著准其照例動款培修。該督卽飭王念孫等認真妥辦。務須工堅料實。以資經久。毋任承辦之員稍有偷減情弊。永定河志。

五月初九日奉上諭。畿輔水利關係民生。必須盡力講求。通盤籌辦。今唐沙等河七十二川之水。向由西淀入東淀。分三股下注者。近年自趙北口十二連橋以外。已多淤墊。又北股中股。悉皆淤塞。僅存南股一線單渠。以洩上游諸大川之水。其勢自難容納。而東淀下游。至楊家河一帶。二百餘里。又復節節於淺。以致上游往往潰決。附近各村莊地畝。處處被淹。小民種藝無成。逃荒失業。每年議賑。補救不遑。而各處大道通衢。亦常被水淹浸。以致車馬不便。有礙經行。殊非體制。溫承惠稱約計需數百萬金。一時礙難請撥。且南河大工。尙在未竣。應俟經費充裕。再行辦理。今先委員將趙北口以下淤沙。擇其至要之處。相機疏導。並勸用民力辦理等語。所見尙淺。國家經費有常。原不可以濫用。然關係生民要務。則不容靳惜。若必俟南河一切工竣。始行興辦。則南河工程甚多。難以剋期辦竣。豈有因此而令畿輔要工延誤之理。至於民力有限。勢必不敷。徒滋科派之累。此事竟當通籌全局。發帑興辦。以籌水利而衛民生。因思天津鹽務加價一項。本爲南河辦工而設。今卽移以辦直隸河工。同係正用。此外尙有天津關稅一項。著溫承惠卽與嵩年查此兩項。每年應解戶部內務府者。共有若干。直隸籌辦水利。通計實需銀兩若干。幾年可敷辦。

竣著覈算明晰據實奏聞候朕降旨施行 睿皇帝聖訓

七月初八日奉上諭本日王念孫奏永定河汛水異漲北岸二三四工及南岸頭工同時漫溢一摺當即派令玉福馳往查勘矣前因初三四等日陰雨連綿恐清河至古北口一帶河水漲發降旨令溫承惠前往履勘道路橋梁茲永定河南北兩岸同時漫溢想俱必成爲口門工程緊要自應亟爲堵合溫承惠著不必來京並不必隨赴差次卽日馳往永定河將現在漫溢情形先行具奏並駐工督同王念孫迅速堵築完善以期鞏固所有下游被淹處所遴委委員詳細查勘如有應行蠲緩撫卹者卽分別具奏永定河志

是月十一日奉上諭昨命乾清門侍衛內閣學士玉福往永定河兩岸查看情形茲據覆奏南下頭工漫口之外又有南二南六等處北二北三北四漫口之外又有北五北六北七等處續經漫溢現今南下頭工溜勢直注西南其過水地方田畝不免漫浸等語又據單開漫口丈尺南岸下頭工一處已有三百餘丈其餘旱口各處通計共有八百餘丈之多自應先將各旱口趕緊堵築堅固再將南下頭工漫口堵合挽回故道方可順流遵軌不致有泛溢之虞此時工程浩大需費必多著溫承惠卽速前來工次督率李亨特逐一查勘將應須工料銀兩確實估計先期奏請並委員將下游被淹地方應行撫卹之處據實查明需用賑卹銀兩約計數目奏聞候撥永定河志

是月溫承惠奏臣於初八日接據永定河道王念孫稟報永定河南下頭工北二三四工同時漫溢當卽恭摺具奏初九日欽奉上諭已恭載初八日臣卽星馳前進於初十日早行抵工次復接各工報到同時

漫溢情形。隨親赴南下頭工查驗。十號十一號。接連一處。口門寬三百餘丈。水深九尺至一丈一二尺不等。已掣全河大溜。南下頭工十一號以下。北下汛八號以下。均已斷流。河身淤爲平地。現飭趕緊盤壩裹頭。以防汕刷。復周歷兩岸。南二工十五號一處。南六工十二號。接連十三號一處。北岸二工十四號。十七號。二十號四處。北三工七、八、九、十號四處。又老隄五號十號二處。北四工二十一、二十五號二處。北五工十三號一處。北六工四、五、十號三處。十六、七號各二處。共七處。北七工四號十號二處。悉係平工處所。缺口寬五六丈至六十餘丈不等。因南下頭工奪溜。俱成旱口。實因初三、四、五等日大雨連綿。水勢接續增長。至二丈外。實爲從來未有。致漲水高於隄頂。初五日夜。各工同時漫溢。實無捏報情事。查南下頭最係險工。屢次決口之處。土性純沙。隄外早成河形。最難堵合。秋汛正長。勢難施工。且現在旱口多至二十餘處。必須分別緩急。先將旱口確實估計。或止須復還原隄。或加做月隄。分晰開單奏明。趕辦堅實。再堵築漫口。惟該處口門寬三百餘丈。深至丈餘。秋水刷底。恐口門愈刷愈深。須用物料甚多。現在附近地方。舊料已購買無餘。新料尙未登場。止可先購漫麻。檁木等項。俟新料登場。令廳汛迅速購買。再同時漫溢處。所計二十餘處。每處皆積淤高仰。幾與隄平。計應挑引河一百數十里。必須挑挖寬深。方能掣溜。更須料物充足。俟秋汛過後。一氣呵成。立時堵合。方不致糜費帑項。臣已檄調清河道孫樹本。河致府知府李逢亨。來工估辦。至此次河水異漲。通工埽段。在在墊陷。欹倚亟應鑲做整齊。其被淹處所。飭藩司速查辦理。永定河志。

是月溫承惠奏。南下頭漫口。俟新料登場辦理。業經奏蒙聖鑒。臣於十五日馳回工次。永定河道李亨特。

已於十三日抵任。即督同該道悉心籌畫。先委妥實諳練之員。分赴各旱口。確實估計。茲據該道核明。開單呈送。臣查兩岸旱口。共計二十五處。寬窄淺深不一。間有盛漲時汕刷過甚。跌成坑塘之處。辦理難易。亦有不同。謹將各工丈尺銀數。分晰開具清單。恭呈御覽。永定河志。

是月奉上諭。溫承惠奏。永定河漫工。先行籌辦旱口情形。據稱兩岸旱口二十五道。估需工料銀三萬一千一百三十兩零。即於奏明動撥藩庫銀三萬兩內。先行支用等語。永定河南下頭工漫口。正當秋汛。尙難施工。其各處旱口。自應趕緊堵築。現有動撥藩庫銀三萬兩。足敷支用。該督即應督飭屬員。購集夫料。迅速趕辦。但各處工程。總期永遠鞏固。若因堵築旱口。較易爲力。稍有草率。則一遇盛漲。恐不足以資捍衛。該督惟當悉心綜覈。並責成道員李亨特、孫樹本二人。認真經理。務使工堅料實爲妥。至州縣被水地方。應行撫卹事宜。節經降旨。令溫承惠查明。該督即須派委委員。分投查勘。將實在情形。及應需銀數。迅速具奏。不可稍有諱飾。永定河志。

九月。溫承惠奏。臣遵旨督辦要工。兩月來晝夜經營。不敢稍懈。督飭清河道孫樹本。永定河道李亨特。率領員弁。集夫購料。分投趕辦。所有堵築旱口完竣。及引河壩工情形。於初六日具奏。隨將水口趕緊進占。一面將兩壩加培厚土。步步結實。以資鞏固。查勘引河均已一律挑挖深通。口門收窄。溜勢奔騰。即飭將引河頭挑開。勢若建瓴。分掣大溜。直達中泓。順機乘勢。於初九日午刻合龍。迨申酉之交。龍門大壩已漸次追壓到底。忽風雨交作。秋水搜根。大溜復側注龍門壩內。陡然過水。牽連兩壩。立時蟄陷。臣督同孫樹本、李亨特等。連夜搶護壩外水勢。仍復洶湧。臣親上龍門大壩。率同守備。指揮兵夫。加料壓土。幸天氣轉

晴。月光照耀。自戌刻至初十日卯刻。始得保護平穩。大壩邊埽均已鞏固。全河水勢順軌安流。復歸故道。復差查兩岸旱口各處。補還原隄工程。亦皆堅實。此皆仰蒙皇上洪福至誠。默相感召。並賴河神默佑。得以迅速蒞事。永慶安瀾。至大壩後餽業已跟做堅實。一切善後事宜已面屬李亨特詳細查勘稟覈。另奏辦理。永定河志。

嘉慶十六年正月。兵部議奏。據溫承惠奏。永定河南北兩岸。工段縣長。埽壩鱗比。必得添設都司一員。督率經理。臣細查通省營制。有宣化府屬蔚州路西營都司。該營地處偏僻。事務最簡。應請將該都司移駐永定河盧溝橋地方。其應支俸廉等項。均毋庸另議增添。並請將蔚州路把總一員移駐西城汛。仍歸該參將管轄。其西寧城馬步守兵六十五名。即歸該把總操防。蔚州路把總額缺。即改爲經制外委。奉硃批。該部議奏。欽此。到部。臣等查永定河工段縣長。僅止守備二員。勢難兼顧。今以事簡都司移設。該督係因地制宜。慎重河防起見。應如所奏。奉旨依議。永定河志。

二月。工部議奏。據溫承惠奏。永定河南北兩岸土隄。性係純沙。自嘉慶六年異漲後。更形卑矮。上年七月初。水長奪溜之後。河形益顯淤積。而隄身爲異漲衝刷。更形殘缺卑薄。今春必須大加疏培。以禦大汛。現據李逢亨估計。以上年盛漲水痕爲準。如隄頂高於水面一二尺者。暫緩加培。其隄面過水。及離水僅止數寸者。必須急爲修治。查南岸七汛。北岸八汛。除距河過遠之處。應從緩辦。其臨河緊要處所。或加內外幫。或加高隄頂內餞。或加埽靠。或用好土包淤。又南六工對面老坎兜灣。過水有礙。新工應行挑挖。又北四五六等新工處所。被衝順隄溝槽。跌塘過大。恐遇盛漲衝刷。隄身喫重。擬於上面添估攔水斜壩。下面

挑挖倒溝。俾免浸注之患。又石景山東岸第九第十十九二十一等號。上年異漲衝塌。應修石工四段。另築攔水壩一道。俾資捍衛。臣親歷詳勘。實係急須辦理之工。再上年水旱各口新工處所。添下埽段較多。本年大汛。修防尤爲最要。不特新埽尙須加鑲。卽舊有埽段。異漲衝激之後。亦多殘損。墊陷必須加鑲。拆修。正月二十六日。奉硃批。工部速議具奏。欽此。臣等查永定河南北兩岸隄工。向無額設加培銀兩。近年雖經該督歷次奏請。另案加培。並未普律全修。今據奏自係實在情形。應如所請辦理。永定河志。

七月。溫承惠奏。永定河營員弁。除都司守備千總把總外。向設經制外委十二名。額外外委四名。兩岸工段。縣長每值大汛。應派該弁等。率領河兵。協同防守。並隨時分委查看各汛工程。惟額外僅止四名。爲數較少。向年在目兵挑選數人。由總督及該道衙門。給與外委虛頂戴。俾其率兵防守。呼應較靈。臣因體制未符。當經裁革。第額外人少。旣不敷委用。且遇有經制缺出。又不敷考補。現據永定河道李逢亨稟請添設。臣查永定河南北兩岸十五汛。每汛應設額外外委一名。以資協防。除舊設四名外。應請添設十一名。卽在熟悉工程之目兵內選充。仍在額設兵數之內。所食糧餉。亦仍照該汛額設兵目。按名關領。無須另行增添。而差遣足資委用。實於河務有裨。奉硃批。依議。永定河志。

嘉慶十七年正月。溫承惠奏。永定河三角淀。爲全河尾閘。河流向由條河城。葛漁城。達淀。歸大清河入海。迨後河勢北趨。葛漁城等處淤爲平陸。水由北八工之黃花店下注。近年南淤北漾。每遇大汛。北八工自二十號以上。河流逼近隄根。上年秋汛後。全河大溜。忽於九號兜灣側注。逼成橫流。而八號以至二號。又有支河並注。是北八工一汛。除頭號外。多係險工。迥異向時形勢。查下口本係以堰作隄。甚爲卑薄。歷年

僅令兵夫修補。並無加培公項。一交大汛。兩水夾隄。無從取土。該工距東安縣城。僅止數里。城郭田廬。均關緊要。似此河勢情形。急須速爲籌辦。當飭永定河道李逢亨。詳細勘估。茲據稟請。自北八工二號。至二十一號頭止。大隄內外幫。分別加高培厚。以資捍衛。然全河溜勢。俱由九號隄根側注。縣長十餘里。若普律全加培鑲。需費甚鉅。擬於九號迤上。對面舊淤河形。挑挖引河。並於九號橫流上游。估做攔水草壩。挑溜東行。復接草壩。至十一號。估做圈隄。並做防風。以防水勢泛衍。俾引溜仍歸舊河。又於二號至八號。十二號至二十一號。共做挑水草壩十四道。復儲備物料。以便臨時相機應用。臣復加確覈。均係亟應趕辦之工。謹開具工段丈尺土方銀數清單。恭呈御覽。至下口河勢。漸形高仰。容收工時。親加察看。如有應需疏濬。另籌請旨辦理。永定河志。

是月。奉上諭。據溫承惠奏。永定河下口情形。請加培辦理一摺。永定河下口。近多險工。亟須籌辦。所有加培隄岸。挑挖引河。及接築草壩土壩等工。共估需銀一萬九千九百餘兩。著照所請。准其於藩庫內動支。該督卽督飭該道。分率廳汛員弁。認真修辦。勒限於大汛前。一律告竣。毋許稍有草率偷減。務令料實工堅。俾資捍衛。永定河志。

嘉慶十八年六月。溫承惠奏。步軍統領衙門具奏。武清縣民李珍。以永定河下口北九工河隄開口。賀老營河道淤塞。致東安武清二縣被水。赴京呈請。補築挑挖一案。奉旨。永定河下口隄工。著交溫承惠遴員踏勘。應否挑築。秉公查辦。欽此。將李珍咨解到臣。隨飭委永定河道李逢亨。率同務關同知田宏猷等。並帶同原告李珍。馳往勘明。查議具詳。臣詳查舊案。及該道等現勘情形。緣永定河下口北九工。向設主簿。

管轄汛務。旋於嘉慶十年前。督臣裘行簡任內。因所管隄堰。無關緊要。奏准將該主簿。移駐北岸頭工。以北九工汛務。改歸北七八工兩汛分管。該處舊有隄堰。歷來俱由本汛河兵修理。並無額設歲修錢糧。而全河水勢。向由條河頭迤南葛漁城一帶。達淀歸大清河入海。迨後河勢北趨。葛漁城等處。淤如平陸。水由北八工之黃花店下注。近來南淤北漾。每遇大汛。溜逼隄根。經臣於上年奏准。自北八工第二號至二十號止。將舊有隄堰。一律加培高厚。並挑挖引河。暨添做攔水草壩等工。以挑溜勢。向南直走中泓。自二十一號至二十四號止。長四里有餘。係河身尾閘。逼近母猪泊。爲衆水出路。若將舊有殘缺隄堰。一併築。並添做埽段。不但需費甚鉅。且水漲時高出隄頂。水落時亦仍由工尾倒漾外幫。又有減河水勢趨注隄身。腹背受敵。斷難經久。是以據該道詳明。毋庸修築。至賀老營在南岸六工。距天津海口百餘里。悉係高阜之地。若挑挖引河。不但需項甚多。難以興舉。且掘隄放水。該處數百村莊。難免淹浸。是李珍所請將北九工隄堰補築。並於賀老營挑挖引河之處。均難照辦。復提訊李珍。據稱伊實未深悉該處河道情形。祇因大汛長水。地畝間被淹浸。冒昧赴京呈訴。今蒙道廳帶同查勘指示。業已明晰。不敢再行固執。查李珍未悉河道情形。妄以私見赴京越訴。殊屬不合。應照不應重律杖八十。折責發落。交原籍地方官收管。無任復出滋事。理合將遵旨委員查勘緣由。恭摺復奏。永定河志。

嘉慶十九年閏二月。直隸總督那彥成奏。據永定河道李逢亨稟稱。上年六月。北六工舊隄。因漲水衝缺。經該處賀堯營等村民。以力難補築。稟請動帑辦理等情。隨檢查舊卷。並石刻碑記。內載乾隆二十年前。任總督方觀承。奏請聖駕親臨指示機宜。於北岸六工。賀堯營開隄放水。改爲下口。入沙家淀。會鳳河入

大清河以南坦坡堰爲南隄。北越堰爲北隄。中寬四五十里。任其蕩漾。悉爲散水。勻沙地面。查北六工原編二十號。歷來估工。總至八號爲止。緣八號以東。即接北七工頭號。迤下即屬下口。原可不必修防。又因八號至十號。可作北七工之挑水壩。每年仍令官兵防守。其餘任其蕩漾。賀堯營村。坐落十六號。向不在修防之列。惟因左近村民。圖種河灘地畝。惟恐淹浸。間或集夫修築。以資保護。歷年亦聽其便。現因漲漫塌隄。未便請動官項。致滋糜費。稟請覈示。查該處南有南坦坡堰爲南隄。北有北越堰爲北隄。居中坐落河心。若逢盛漲。水由隄尾倒漾。前後一片汪洋。修之無益。至河內村莊。原應移居隄外。乃小民圖種灘地之利。未免安土重遷。亦止可聽其自爲設法防護。此段隄工。自十號以下。向不在估修之內。自應永遠停修。並禁止村民。不許補築。致遏水道。以省糜費。而重河防。永定河志。

三月工部議奏。軍機處交出直隸總督那彥成奏稱。永定河上年伏秋盛漲。拍岸盈隄。現在石景山石工疊經衝刷。多有脫落。必須補修。加砌石子堰。南北兩岸土工。自嘉慶十六年間。段加培。時逾三載。車馬往來。風雨剝蝕。內幫多有衝刷。外幫多有殘缺。愈形卑薄。三角淀下口。水緩沙停。河底淤高。隄身愈矮。每逢盛漲。水高隄頂。若不擇要加培。均爲可慮。當即率同各員。周歷查勘。工段縣長。惟擇其必不可緩之工。石景山補修石隄。加砌石子堰。南北兩岸下口。或加培內外幫。或加高隄頂。或築越堰。或做挑水壩。摶節估計。謹開具工段丈尺土方銀數清單。敬呈御覽。奉硃批。工部速議具奏。欽此。臣等查永定河南北兩岸土隄。及石景山石工。自十六年奏明間段加培後。迄今三載。並未與修。此次奏請補修等工。自係實在情形。均應如所奏辦理。奉旨依議。永定河志。

嘉慶二十年二月。那彥成奏。永定河下口之水。向由葛漁城東南。流至三河頭。入大清河。嘉慶六年後。水勢北趨。將鳳河東隄。衝有缺口數處。其水改爲鳳河東隄。以外行走。亦歸大清河。節經前任永定河道王念孫等。勘稟毋庸堵築。以資宣洩。上年冬。據該道李逢亨面稟。有馬家口等村民。在鳳河東隄外。私築土堰。應行拆毀。臣以該處缺口。實在應否堵築。土堰應否拆毀。面諭該道。勘明稟辦。茲據該道稟稱。勘明該處缺口。已經寬深。若欲堵築。非四五萬金不可。且缺口適當迎溜頂衝。堵合後。一遇汛漲。必致復被衝缺。仍請毋庸堵築。至下口爲永定河尾閘。今鳳河又係尾閘之尾閘。必須通暢。庶可迅消盛漲。今馬家口等村民。於此處築堰。阻遏河流。是下壅也。下壅卽恐上潰。於全河頗有關係。應卽拆毀等情。查鳳河東隄。自嘉慶六年被衝缺口。迄今十有餘載。水性就下。已成全河尾閘。且地處頂衝。堵築後。必致復被衝缺。應請毋庸堵築。並將馬家口等村民。於鳳河東隄之外。私築土堰。立飭永定河道李逢亨等。卽日親往督毀。以防阻遏。永定河志。

六月那彥成奏。二十七日。接據永定河道李于培稟稱。二十二日夜北岸七工。雨大風狂。水勢疊長。黑夜之間。但見中泓水立。有似蛟水。竟不能計丈尺。竭力搶護。無如水勢有增無減。兼之狂風驟雨。人力難施。致北岸七工二十四號。於二十五日卯時。漫溢二十餘丈。都司謝成浮油。現在尙無下落。已塌去六十餘丈。全河大溜。直注口門。現在盤做裏頭。並據通判鄭以簡回稱。差人順水查看。水過口門後。卽循隄外減河。及窪處荒地。經行。仍歸本河尾閘。下注東安縣。傍水小村。間有被淹之處。臣不勝驚駭愧悚。查今漫溢之二十四號。向來因係平工。僅止疏濬中泓銀兩。並無歲修搶修之項。惟時屆大汛。該管廳汛及協防各

員雖係暴長蛟水。究屬失於防護。實屬疎玩。相應參奏請旨。臣未能先事豫防。仰聖恩交部議處。現於二十八日赴工確勘辦理。其被淹村莊。俟勘明照例請旨賑卹。二十九日奉上諭。那彥成奏永定河工漫水一摺。永定河北岸七工二十四號。因二十二日後。雨大水長。漫口場寬六十餘丈。該督現已飭令該管河道趕緊購買料物。並親赴該工查勘。此次永定河漫工。距下口甚近。過口門後。仍循隄外減河。歸入正河。尾閘現在盤做裏頭。著那彥成確實勘明。俟料物購齊。卽相機堵築。復歸故道。其失於防護之專管通判鄭以簡。主簿邱鳳梧。協防同知王履泰。通判單應魁。縣丞汪兆鵬。俱着摘去頂戴。仍留工効力。如堵築迅速。再奏請開復。永定河道李于培。到任甫逾一月。於河務情形。尙未閱歷。著加恩免其議處。那彥成自請議處。亦著寬免。俟漫工堵合。將用過工料銀兩。著落該督分賠十分之三。其被淹村莊。著迅速查明。奏請撫卹。永定河奏議。

七月初五日。那彥成奏。永定河北岸七工二十四號。因暴漲漫溢。臣於上月二十八日。自省城起程。次日馳抵履勘該處。距下口甚近。水勢側注河身。大溜掣入口門後。仍循隄外減河。歸入正河。尾閘先據報墊陷六十餘丈。及赴勘時。暴漲消落。現在口門業已掣涸。僅止四十餘丈。土性堅實。俱無汕刷。隨測量口門水深一丈七尺。漫口內水深五六七八尺不等。漫口外水深一丈一二尺不等。減河正身。尙無淤高之處。惟正河身因下游淤墊。形成高仰。通長應挑三十餘里。必須實力挑挖深通。方期順軌。日來天氣晴霽。俟稀淤曬乾。卽可先期勘辦。至都司謝成。先於漫溢時被水衝倒。旋即抱住隄邊大樹。得不漂沒。合並陳明奉硃批。依議。永定河奏議。

九月二十一日。那彥成奏。七工漫口。原寬六十四丈。及八月間。因溜勢掣澗。水口僅寬四十一丈。水深八九尺。至一丈七八尺不等。其餘二十三丈。悉成旱口。茲於二十一日。據溫承惠報稱。會同永定河道李于培。自八月二十五日開工後。引河長五千六百九丈。已一律挑完。深通如式。東西兩壩。察看大溜向背情形。以次進占。步步堅實。占占穩固。邊埽後戩。亦隨時鑲做。以資護衛。口門愈收愈窄。溜勢愈刷愈深。自初十日後。測量埽前水勢。已深二丈三四尺。至二丈四五尺不等。迨十八日。又陡長水數尺。金頭刷跌愈深。測量竟深至三丈六尺。僉稱此次永定河水勢之大。爲從來未有。於十八日戌刻。西壩陡蟄數占。勢甚危險。幸加鑲追壓。不稍停留。西壩甫經平穩。溜勢向東側注。東壩又復陡蟄。隨蟄隨鑲。亦俱保護無虞。十九日寅刻。將引河開放。卽於卯時合龍。二十日卯刻。已堅實穩固。壩前停淤。全河悉歸故道。理合飛速馳奏。仰紓聖廬。永定河奏議。

十月。吏部議得直隸總督那彥成奏。永定向設石景山同知。南岸北岸同知。並三角淀通判。共廳官四員。石景山同知。專管兩岸石工。南岸同知。專管南上南下南二南三南四南五南六共七汛。南七南八南九三汛。則歸三角淀通判管理。北岸同知。專管北上北中北下北二北三北四北五北六共八汛。北七北八二汛。亦歸三角淀通判管理。惟查石景山。向係兩岸石工。均極鞏固。別無要工。南岸同知管理七汛。北岸同知管理八汛。一遇搶險。每致鞭長莫及。至三角淀通判。駐筭北七工。管理北七北八兩汛。又須越河經管南七南八南九三汛。勢難兼顧。而北七北八從前平工。近成險要。須專員加意防守。方可不致貽誤。臣與溫承惠及道員廳員等。悉心商酌。不如量爲改移。請將石景山北岸石工。仍歸石景山同知管理。並

添管接連之北。上北中北下北二共四汛。其北三北四北五北六北七北八共六汛。請俱歸北岸同知管理。石景山南岸石工。改爲南岸同知管理。仍管接連之南。上南下南二南三南四共五汛。其南五南六南七南八南九共五汛。請均歸三角淀通判管理。如此酌改。呼應較靈。如蒙俞允。所有石景山同知一缺。查現在務關同知田宏猷。曾任北岸同知。熟悉情形。請將現任石景山同知丁寶洲。與該員田宏猷對調。三角淀通判一缺。查現任滄州通判陳春熙。原係北岸同知。降補工程甚諳。請將現任三角淀通判宋綸光。與該員陳春熙對調。人地均屬相宜。於要工實有裨益。查永定河變遷靡常。今昔平險互異。應如該督所請。撥改管理。至稱現任務關同知田宏猷。請將現任石景山同知丁寶洲。與該員對調。現任滄州通判陳春熙。請將現任三角淀通判宋綸光。與該員對調等語。查田宏猷有降級二案。與調署之例不符。應毋庸議。宋綸光係該督題請調署三角淀通判。應俟奉旨准其調署三角淀通判後。方准與天津府河務通判陳春熙對調。該督違例奏請。應照例罰俸九個月。十二月初三日。奉旨務關同知田宏猷。准其與石景山同知丁寶洲對調。所有那彥成。應得處分。著加恩寬免。餘依議。永定河奏議。

嘉慶二十四年七月二十一日。那彥寶奏。臣於二十日。行抵盧溝橋。查看南北兩岸石工。均屬鞏固。惟水漲勢未見大落。調取簽簿。與誌椿較對。尙有一丈四尺二寸。大溜湧猛。正在傳詢汛官。適永定河道李逢亨。由南岸馳到。稟稱自十八日子時至巳時。河水疊次驟長。至二丈一尺三寸。是日午時。雖漸消落數寸。二十日卯午未三時。又長水二尺一寸。兼之陰雨通宵達旦。兩岸各工。紛紛報險。其南上頭工十四五號。尤爲喫重。大溜側注埽前。十分危急。正在督率文武汛員搶護。竭三晝夜之力。尙未平穩。又據南下南二

南四南五南六北北中北下北二北三北四北七北八等工。絡繹報險。或水高隄堰。或埽鎮陡墊。卽分飭各汛搶護。十九日戌時。先聞南六南四北八北四同時水過堰頂。隄身潰墊。隨於二十日由南岸馳至盧溝橋。正欲取道北岸。查看各工。接據石景山同知馬金陞。署北二工縣丞王庚稟報。該汛二十一號埽前水勢洶湧。全河大溜。直注埽段。於二十日午時。河水漫過隄身。尙未掣動全河大溜。續又據南岸四工二十號報到。河水同時漫過隄身。亦未掣動全河大溜。其二處口門尺寸。現因溜勢猛大。一時尚不能較準。臣當卽飭令該道分飭各工。豫備盤護裹頭料物。一面札調下游兵弁。幫同趕辦。卽親赴該二處查看。俟河水漸落稍定。統歸一處。再酌定章程具奏。二十二日。奉上諭。那彥寶奏。永定河北岸二工。南岸四工。漫溢情形。前因永定河水勢盛漲。特派那彥寶前往查看。茲於二十日午刻。北二南四兩工。同時漫溢。著派吳礮。那彥寶分投籌辦。吳礮接奉諭旨。迅速先赴北二工。如那彥寶在彼籌堵。吳礮卽速赴南四工。勘辦。若那彥寶已赴南岸。吳礮卽駐北岸。辦理北二工。其南四工。交那彥寶籌辦。伊二人各帶司員。專辦一處工程。不必會商。各將水勢情形。口門丈尺。及水歸下游。淹浸何處。先行查明。各自具摺陳奏。其所需工料銀兩。亦各自約計數目。先行奏明。由部庫撥給。以便籌備料物。定期興工。永定河奏議。

是月二十四日。那彥寶奏。本日吳礮到盧溝橋。與臣公同履勘情形。查北二工。南四工。初漫之時。原係兩處分流。迨北上頭工漫開。地居上游。大溜奔騰。全歸該處漫口。其北二工。南四工。俱已斷流。現在無船。難以測量。實在丈尺。約計口門寬三百餘丈。連日晴霽。水勢漸落丈餘。自當次第經理。其趕辦料物。及挑挖引河業經。臣奏明。酌派州縣丞倅等。分投趕辦。其挑挖引河。臣等已令北岸同知張泰運。先往口門下游。

查明河身淤墊段落。分別高低。確切估計。以便奏調各員到齊。即可飭往分段開工。惟北岸上游。土性沙鬆。刻下先應派員於附近處尋覓好土。豫爲運工。以便堵築合龍之用。方能堅固。至兩岸下游。應辦之工甚多。如北二南四乾涸口門。補還原隄。其餘兩岸汕刷殘缺卑薄隄工。均需補築。所需土方高寬丈尺。應先勘估。其衝塌埽段防風。亦須補還。現已飭調永定河道。率同廳汛。逐工估計丈尺。一有確數。卽先行趕辦。至漫口以正雜料物爲第一要務。引河亦頗需時日。應請敕下督臣方受疇。札飭署藩司祥泰。迅速派員前來分投承辦。其河水下注漫溢之處。據探水外委等回報。正河大溜。向東南由黃村東安武清一帶地界淹浸。應歸於鳳河入海。尙有一分小溜。斜趨東南。由南苑高米店迤北。衝開牆垣八丈。向西紅門迤南流注。所有下游被淹村莊戶口人數。應由督臣飭屬查明。奏請撫卹。二十五日。奉上諭。據那彥寶奏。永定河北上頭工。水勢漫溢。側注口門約三百餘丈。已掣動大溜七分等語。前因永定河北二南四兩工。同時漫溢。降旨令吳璥那彥寶分往籌辦。現在北岸上頭工。漫口三百餘丈。該工地處上游。旣已掣動大溜。河不兩行。北二工漫口。自己匯歸一處。其南四工漫口。諒必水淺挂淤。此時吳璥不必前往南四工。所有北上頭工漫口。卽交吳璥那彥寶二人會同辦理。務同心共計。妥協籌商。以期迅速。該工所需工料銀十萬兩。已降旨由戶部撥往應用。如有不敷。再行奏請。張裕慶准其帶往。並揀派京察一等司員三人。交伊等一並差遣委用。其丞倅等員。已降旨令方受疇派往矣。李逢亨業已革職。其南四工漫口。易於堵築。著吳璥等卽飭知該革員。令往專辦此處工程。以贖前愆。如果愧奮出力。工竣後再行酌量施恩。吳璥等查明口門丈尺。水勢深淺。卽速購料豫備興工。每屆五六日。將辦理情形具奏一次。以紓廩注。二十六日。奉

上諭吳璈等奏永定河北岸上頭工漫口大溜全歸一處下游各口門俱已挂淤斷流商酌辦理一摺北岸上頭工漫口三百餘丈尙係約計之詞連日晴霽水勢漸消究竟寬深丈尺若干奪溜若干測量確數再行據實具奏其奏請酌派州縣丞倅各員本日復面諭該督飭知委員等迅速赴工以備差委至工需銀兩已由戶部撥銀十萬兩方受疇又飭署藩司祥泰費銀十萬兩馳赴工次應即分投購備料物此時吳璈等先將兩面裹頭盤護穩固勿令口門愈塌愈寬一俟料物齊全即可定期興工永定河奏議

八月初一日吳璈那彥寶奏上月二十六七日兩奉廷寄仰蒙皇上訓示周詳俾有所遵循曷勝感戴其時因撥船俱在下游尙未調到無從測量口門丈尺二十九日撥船牽挽到工臣等隨即飭令文武員弁赴北上頭工細加丈量計口門原寬四百四十丈今酌擬取直堵築計口門實寬四百二十六丈內已有淤灘長二百餘丈其餘俱係過水口門兩邊水深五六七尺中泓水深六七尺至丈餘不等現在盤做裹頭最爲要務現飭該廳汛趕鑲整齊可無遲誤履勘北上頭工舊隄原係灣曲而下形如弓背此次漫溢衝成缺口若照舊日隄根進築不惟現在兜溜着重且恐將來一遇盛漲尤爲可慮惟有將東西壩頭兩相針對進占時逐漸取直復於壩工後加築堅實好土裹戩與現存兩頭沙堆連成一勢工段既可節省十數丈河勢亦較前順暢卽新築壩工不致過形著重似亦補偏救弊之一法至南北兩岸各工因此次異漲溜勢猛驟衝成旱口及刷塌隄身不可勝計北二北中汛並南四南二南六等工俱有旱口應卽早爲補築完整並加鑲防風邊埽以備合龍時開放引河得收禦水之益其餘兩岸汕刷殘缺卑薄各隄身亦應一律補修完固並恐新舊湊接之土工一時不能黏蓄結實亦須補鑲防風埽段以資抵禦連日天

氣晴明，稀淤漸次曬乾。一俟估計丈尺確實，即將南四工旱口，遵旨交革員李逢亭前往，先行趕辦。其北二工及各處小旱口，並兩岸應加幫隄，身邊埽等工，亦責成該革員督率各汛員，妥速經理。統俟該廳汛估報土方埽段丈尺確數到日，即飭各員趕緊興築。奉上諭：吳璥等奏勘明永定河北上頭二口門丈尺酌籌取直堵築壩工情形一摺，昨已有旨，令吳璥馳往東河籌辦堵築漫口事宜。所有永定河漫口專交那彥寶方受疇二人會辦。著卽照此次籌議章程，妥協經理。約計萬壽前當可合龍。如屆期未能歲工，十月內必可堵築完竣。前由部庫發去銀十萬兩，直隸藩庫又撥去銀十萬兩，是否已可敷用，如尙有不足，那彥寶等酌量奏明。再於藩庫添撥，如藩庫無款可動，卽於部庫請撥，均無不可。其水勢情形及進占成數，自奉旨日爲始，每隔十日具奏一次。永定河奏議。

九月二十三日，那彥寶方受疇奏：臣等恐水澤凝冰，難於措手，親督兩壩文武員弁，晝夜儻辦。二十日，金門僅祇三丈餘，以八十餘丈之河面收束於三丈金門之內，水勢驟高至四丈五六尺，洶湧異常。兩壩俱形喫重，東壩陡墊數丈，加鑲追壓，甫臻穩固。西壩上水邊埽，又因回溜淘刷，紛紛墊陷。牽連正埽門占，隨墊隨鑲，竭兩晝夜之力，始皆保護平穩。引河均已一律深通。於二十一日丑刻，敢放旋見河水建瓴而下，大溜掣動，壩前水立消丈餘。隨於寅刻合龍，層土層柴，並力搶堵。二十二日午刻，漸次填實，金門斷流，毫無滲漏。查四百二十餘丈之壩工，一百八十餘里之引河，及兩岸數千丈之隄埽各工，將及四十日，得以普律告竣。皆由我皇上睿謨廣運，經始圖成。瀕河黎庶，共樂春臺。謹將大壩合龍，先行奏聞，仰慰聖廑。本日内閣奉上諭：此次堵築永定河北岸壩工，那彥寶督率在工人員，晝夜儻辦，興工以來，將及四旬，全河

挽歸故道。工程鞏固。辦理亦復迅速。那彥寶始終其事。甚爲出力。著交部從優議敘。方受疇往來河干。不能專力督辦。且係本管河工。有疎防之責。功過僅足相抵。著毋庸議。張泰運前令暫署永定河道。在工襄事。尙能稱職。著卽實授永定河道。其餘在工出力人員。著那彥寶再行據實保奏。永定河奏議。

十二月十六日。方受疇奏。永定河南北兩岸。分界立汛。每汛經管河隄。自十五六里至二十六七里不等。惟南岸六工。霸州州判分管。隄長三十里。當日因地處下游。河身寬展。工程平穩。故所管隄工。獨長。近年水勢南趨。每逢盛漲。汕刷隄根。在在出險。修防甚爲緊要。該州判上下奔馳。顧此失彼。查永定河隄工。險易。今昔情形不同。卽應隨時酌量改移。以裨要工。臣與永定河道。詳加商酌。查有南隄九工。霸州淀河巡檢。經管隄工十二里。離河較遠。素無險工。自當酌量調用。請將南隄九工。霸州淀河巡檢。移駐南六工。作爲南岸六工。霸州下汛巡檢。經管隄長十五里。原設南岸六工。霸州州判。作爲上汛州判。經管隄長十五里。至南九工。汛務事簡。工平。卽歸南八工。武清縣主簿。經管。其移駐之員。應支俸廉役食等項。悉照舊章。毋庸更易。如此酌量移駐。旣與定制並無更張。而於要工益資防護。所有分管隄工。分撥河兵。並南六工。上下兩汛。應換印信。及移駐之員。建蓋衙署各事宜。俟命下日。另行題咨辦理。二十日奉硃批。依議。吏部知道。永定河奏議。

續行水金鑑卷第一百四十五

永定河水工程

石景山工程。石景山同知轄巡檢經營。今按永定河奏議。嘉慶二十年。奏准石景山北岸石工。仍歸石景山同知管理。石景山南岸石工。改南岸同知管理。石景山東西石工隄工。舊係工部司員管理。兩岸通編爲天字三十九號。雍正八年。奏歸永定河。設同知經理。乾隆二十八年。始分東西兩岸。東岸長二十三里五分。編二十四號。西岸長十四里。編十四號。四十九年。河道陳琮。以隄工號數。定限一百八十丈爲一里。以便稽核。稟請咨部更正。除南北金溝石工二段。舊例爲一號外。東岸南金溝起。至北岸上頭工交界止。長二十三里九十六丈。編爲二十四號。西岸盧溝橋以北。地勢高阜。舊本無隄。自橋翅南起。至南岸頭工交界止。長十四里。編爲十四號。

東岸第一號。北金溝片石隄。長十丈。南金溝片石隄。長三十丈七尺。雍正九年以前。工部修建。乾隆十七年。築片石戩隄。共長四十丈七尺。第二號。石景山前片石隄。長六十九丈五尺。雍正九年以前。工部修建。乾隆六年。修補片石戩隄。長六十三丈。片石隄。長七丈。大石隄。長十五丈五尺。片石隄。長八十丈。土隄。長八丈。內幫砌片石戩隄。第三號。土隄。長一百三十三丈。大石隄。長四十七丈。雍正九年以前。工部修隄。乾隆元年。廟後大石隄殘缺。修補片石戩隄十五丈。三十四年。拆修。改築大石片石戩隄十六丈。內幫片石戩隄一百三十三丈五尺。第四號。大石隄。長七十三丈。雍正九年以前。工部修建。乾隆元年。修補片石隄。

十五丈。三十四年。改做十六丈。片石隄。長一百七丈。乾隆五年。加大石餞隄二十丈。又南接片石餞隄二十五丈。十八年。補修片石餞隄五十一丈五尺。雞嘴壩一座。長四丈一尺。北極廟前鐵牛一具。第五號。土隄。長一百八十丈。內幫片石餞隄。隄上橫道。通西山煤廠。及潭柘戒檀之路。隄身大石包砌。名旱橋。第六號。土隄。長一百八十丈。內幫片石餞隄。此號內舊大石片石隄。長十九丈二尺。乾隆四十六年。修築片石餞隄。長二十五丈。五十年。修築片石餞隄。長三十丈。第七號。土隄。長一百八十丈。內幫片石餞隄。第八號。土隄。長一百八十丈。內幫片石餞隄。攔河土壩一道。長八十丈。乾隆三年。築第九號。土隄。長一百八十丈。內幫片石餞隄。第十號。土隄。長三十三丈。片石隄。長六十丈。片石隄。長六十七丈。內大石護隄三十七丈。乾隆元年。修砌片石隄。長二十丈。第十一號。片石隄。長三十四丈。片石隄。長五十二丈。乾隆二十三年。築三十年。修築大石片石餞隄。三十六丈五尺。片石隄。長五十四丈。乾隆二十四年。接築土隄。長四十丈。內幫片石餞隄。第十二號。土隄。長一百八十丈。內幫片石餞隄。第十三號。土隄。長一百三十七丈。石子隄。長四十三丈。內幫片石餞隄。第十四號。石子隄。長一百七十五丈。乾隆二年。加築灰頂八十五丈。三年。內幫砌大石片石餞隄一百七十五丈。大石隄。長五丈。嘉慶六年。補還漫缺石隄一段。長七丈。高一丈六尺。第十五號。大石隄。長一百一十五丈。雍正九年以前。修建乾隆四年。修補。上有灰頂。上壩臺大石隄。六十二丈。上有灰頂。乾隆五年。築片石小餞隄十丈。第十六號。石子隄。長八十丈五尺。乾隆元年。壩臺南砌片石餞隄二十八丈五尺。三年。上下壩臺中幫砌片石餞隄五十二丈。十三年。補修片石餞隄三十二丈。下壩臺大石隄。六十一丈。大石隄。長三十八丈五尺。雞嘴壩一座。長四丈五尺。第十七號。大石隄。長三十九丈。

五尺。片石隄長八十八丈。雍正十一年築。餞隄二十丈。乾隆八年幫片石。餞隄長七十丈。大石隄長十丈。片石隄長四十二丈五尺。內加片石。餞隄四十二丈五尺。乾隆九年築。攔河壩十二丈。又接砌大石片石挑水壩五十六丈。片石橫隄長十六丈。第十八號片石隄長二十二丈五尺。內加幫片石。餞隄二十二丈五尺。大石隄長一百五十七丈五尺。內幫大石片石。餞隄五十丈。第十九號大石隄長一百八十丈。第二十號至橋北雁翅止。大石隄長六十丈五尺。接南雁翅。石子隄長一百一十九丈五尺。內加幫片石。餞隄四十五丈。片石小餞隄三十丈。片石餞隄四十三丈五尺。嘉慶十一年隄頂上加砌石子壩一段。長十三丈五尺。十二年隄頂上加砌石子壩一段。長四十四丈五尺。第二十一號石子隄長一百七十一丈。乾隆四年修砌片石斜餞六十五丈。土隄長九丈。內幫片石。餞隄九丈。此號連下號。嘉慶十二年隄頂上加石子壩一段。長一百一十丈五尺。雞嘴壩一座。兵鋪一所。第二十二號土隄長一百八十丈。內幫片石。餞隄一百八十丈。嘉慶十一年隄頂上加石子壩一段。長七十三丈。第二十三號土隄長一百八十丈。內幫片石。餞隄一百八十丈。此號嘉慶六年補還漫缺。石隄一段。長一百八十六丈五尺。高一丈五尺。又添砌月牙壩一道。長三十三丈。高一丈五尺。十一年隄頂上加石子壩一段。長九十九丈五尺。第二十四號土隄長九十六丈。內幫片石。餞隄九十六丈。嘉慶十二年隄頂上加石子壩一段。長二十八丈。雞嘴壩一座。西岸第一號盧溝橋南雁翅起。石子隄長一百八十丈。雍正九年以前部員修建。乾隆二年修補九十九丈。七年修補六十丈。嘉慶六年稅局後身補還漫缺。石隄一段。長六十八丈。高一丈六尺。十三年盧溝橋西北雁翅稅局後身加砌石子壩一段。長四十三丈五尺。又接連前工一段。加石子壩一段。長五十六丈。

第二號大石隄長一百八十丈。乾隆五年自玉露庵起接連下號。修補大石隄。共長四百二十丈。嘉慶六年補還漫缺石隄一段。長六十二丈五尺。高一丈六尺。第三號大石隄長一百八十丈。第四號大石隄長一百八十丈。乾隆十二年築片石戩隄六十二丈五尺。十九年築片石戩隄四十五丈。兵鋪一所。第五號大石隄長一百八十丈。乾隆十五年築片石戩隄五十四丈。二十年築片石戩隄四十二丈。第六號大石隄長一百三十丈。乾隆十六年修補片石隄三丈。土隄長五十丈。第七號土隄長一百八十丈。兵鋪一所。第七號土隄長一百三十丈。第九號大寧村第十號第十一號第十二號後高店第十三號前高店第十四號第九號至十四號地勢高阜。尙未建隄。今仍接丈分里編號。南北兩岸工程。南岸同知轄七汛。北岸同知轄八汛。經管。今按永定河奏議。嘉慶二十年奏准。南上南下南二南三南四共五汛。南岸同知管理。南五南六共二汛。改三角淀通判管理。北上北中北下北二共四汛。改石景山同知管理。康熙三十七年挑河。自良鄉縣老君堂舊河口起。經固安縣北。至永清縣郭家務止。長八十二里有奇。北岸築大隄。自良鄉縣張廟場起。至永清縣盧家莊止。長一百二里有奇。並於舊河口建竹絡壩。使水并流東注。復自南岸高店村土坡下起。至壩止。堆接沙隄三十五里。連大隄。通常一百七十七里四分。北岸復自盧溝橋南石隄下起。至利垡村南止。堆築沙隄二十二里。利垡至張廟場大隄五里。地皆高阜。後於康熙四十年接築。連大隄。通長一百二十九里二分。康熙三十九年。因安瀾城河口淤墊。遵旨於南岸另挑一河。以南岸爲北岸。遂自郭家務改河。出霸州柳岔口。入辛章淀。達天津歸海。接築兩岸大隄。南岸接郭家務大隄尾起。至霸州柳岔口止。連上共長一百七十九里。北岸自盧家莊西。何麻子營接大隄起。至柳岔口迤東止。連上

共長一百八十里。雍正三年，因辛章勝勞一帶，淀河淤墊，有礙清水達津之路，遵旨引渾河別由一道，遂於柳岔口稍北改河，由郭家務挑河，計長七十四里。經永清縣冰窖村東，入三角淀，達津歸海。接築兩岸大隄，南岸自冰窖起，至武清縣之王慶坨止，長四十四里。連上共長一百九十六里九十五丈五尺。北岸自何麻子營起，至武清縣范甕口止，長七十四里有奇。連上共長二百三十三里六十二丈。兩岸分八工，分隸南北岸同知管轄。其冰窖至柳岔口隄工，遂廢。卽今之東西老隄也。雍正八年，因南七北七兩工險要，各分上下汛。十年，北岸以天地、黃宇、宙洪、日、盈、九字分工編號。南岸以景、辰、宿、列、張、寒、來、暑、往、九字分工編號。乾隆三年，接西老隄起，築坦坡堰，至武清縣龍尾止，長四十九里九分。分隸南岸七八工兼管。四年，自北岸六工十六號起，築北隄，至東安縣賀家新莊止，長三十六里。五年，又接北隄尾起，築北堰，至武清縣東蕭家莊止，長四十七里一百二十六丈。分隸北岸七八工兼管。十六年，由冰窖草壩改河，以坦坡堰爲南堰。北隄改爲北堰，各分上中下三汛。撥隸三角淀通判管轄。并南北岸七八工舊管之南北大隄，分隸南岸上中兩汛兼管。卽今之舊南北隄也。南北兩岸同知，遂止各管六汛。計自石景山同知所管交界起，南岸至南堰上汛交界止，隄長一百五十四里。北岸至北堰上汛交界止，隄長一百五十五里七十二丈。二十年，冰窖河口以北，淤成南高北低，仰蒙聖駕臨視，將北六工洪字二十號以下，開隄放水，改爲下口。由沙家淀入海。自河口以下十一里，撥隸南岸六七工兼管。北岸隄工，止長一百六十六里七十二丈。二十九年，刪除舊編天地、黃等十八字，各依本工里數編號。四十三年，河出下口，逆折北趨。北岸六工十九號以上，隄身裏外汕刷，因就水勢改洪字十八號出口，俾得向東邁流。遂於南岸六工十七號頭，建築

順水壩一道。斜接北岸六工十九號下隄頭。並將北岸六工二十號舊河一律培築。上接順水壩。下至南隄七工交界編號。共長二十九里。仍隸南六工兼管。南岸六汛隄工。通長一百五十三里。北岸六工編號十八里。連上六汛隄工。通長一百五十三里。七十二丈。四十六年。北岸頭工。分爲上下兩汛。調南隄九工汛員管理北頭工。上汛嘉慶五年。南岸頭工。分爲上下兩汛。十年。北岸頭工。上汛改爲中汛。其上汛以南九工汛員移駐。現在南北分防十五汛。

南岸頭工。上汛霸州州同經管。隄長十七里。分十七號。俱宛平縣境。第一號。隄頭接石景山西岸。十四號。工尾。土坡兵鋪一所。謹按各汛每里立一民鋪。不具載。岡凹村。茨頭村。獨義村。趙新店。第二號。兵鋪一所。稻田村。第三號。兵鋪一所。第四號。兵鋪一所。第五號。兵鋪一所。籬笆房。第六號。埽工四段。兵鋪一所。黃官屯。長洋村。軍留莊。高陵村。第七號。兵鋪一所。張家場。第八號。兵鋪一所。第九號。兵鋪一所。第十號。兵鋪一所。第十一號。兵鋪一所。第十二號。埽工八段。汛署一所。兵鋪一所。朱家岡。第十三號。埽工三十段。兵鋪一所。輒瓦汛房三間。凡輒瓦汛房俱係嘉慶十八年新蓋。第十四號。埽工三十八段。兵鋪一所。汛房一所。閻仙袋。第十五號。埽工三十二段。兵鋪一所。汛房一所。第十六號。兵鋪一。第十七號。兵鋪一所。南岸頭工。下汛宛平縣縣丞經管。隄長十一里三分十一號。第一號。兵鋪一所。第二號。兵鋪一所。前葫蘆袋村。後葫蘆袋村。第三號。兵鋪一所。第四號。埽工十七段。兵鋪一所。汛房一所。利村。第五號。埽工三十七段。兵鋪一所。第六號。埽工三十段。兵鋪一所。汛房一所。下廠村。第七號。埽工三十七段。兵鋪一所。第八號。汛署一所。兵鋪一所。汛房一所。滿洲村。趙家莊。第九號。埽工三十一段。兵鋪一所。汛房一所。公義莊。第

十號埽工三十一段。兵鋪一所。甄瓦汛房三間。第十一號埽工二十六段。兵鋪一所。汛房一所。南岸二工。良鄉縣縣丞經管。隄長二十二里七分。編二十二號。一號至二號。七十二丈。宛平縣境。二號七十三丈。至十八號。良鄉縣境。十九號以下。涿州境。第一號。隄頭接南岸下頭工。十一號。工尾。兵鋪一所。東石羊村。西石羊村。後石羊村。第二號。第三號。第四號。兵鋪一所。任家營。第五號。第六號。兵鋪一所。第七號。第八號。老君堂村。興隆莊。第九號。兵鋪一所。第十號。埽工二段。務子村。審上村。第十一號。埽工三十六段。兵鋪一所。汛房一所。第十二號。埽工三十七段。兵鋪一所。賈河村。陶村。第十三號。第十四號。金門閘一座。乾隆三年建。北壩臺埽工十一段。南壩臺埽工十段。龍王廟前灰堰一道。長十八丈。廟後雁翅埽。長五十三丈。汛房一所。辛立莊。鮑家莊。五間房村。第十五號。第十六號。兵鋪一所。第十七號。第十八號。汛署一所。兵鋪一所。官莊村。韓家營。第十九號。埽工二十一段。安瀾亭一座。甄瓦汛房三間。兵鋪一所。古城村。四柳樹村。大興莊。鄧渠村。第二十號。埽工二十五段。兵鋪一所。北蔡李渠村。第二十一號。第二十二號。兵鋪一所。南蔡。

南岸三工。涿州州判經管。隄長二十里七分。分二十號。一號至五號。一百二十丈。涿州境。五號至九號。一百六十三丈。宛平縣境。以下固安縣境。第一號。隄頭。接南岸二工。二十二號。工尾。兵鋪一所。白家莊。第二號。渠落村。第三號。兵鋪一所。閻常屯。第四號。兵鋪一所。范家莊。第五號。屯子頭。第六號。埽工七段。兵鋪一所。丁各莊。河道汛署一所。第七號。埽工八段。汛房一所。長安城總督防汛署一所。第八號。南定村。第九號。埽工七段。兵鋪一所。汛房一所。南召村。北召村。第十號。兵鋪一所。馬村。第十一號。兵鋪一所。門村。此號舊

減水草壩一座。乾隆三十七年。因壩下減水不順。改向南移五十丈。建灰壩一座。第十二號。兵鋪一所。北村第十三號。兵鋪一所。西楊村第十四號。兵鋪一所。東徐村第十五號。兵鋪一所。東楊村。西徐村。南岸同知防汛署一所。此號至十八號。月隄一道。長五百九十丈。乾隆二年築。四十四年。因南北三工兩隄緊束。河身逼窄。奏准展寬。加培舊月隄爲大隄。將舊隄疏通。以暢河流。第十六號。兵鋪一所。西它頭村。第十七號。位村。第十八號。兵鋪一所。齊家莊。相各莊。第十九號。兵鋪一所。後西玉村。第二十號。前西玉村。南岸四工。固安縣縣丞經營。隄長二十七里七分。編二十八號。俱固安縣境。第一號。隄頭接南岸三工。二十號。工尾。兵鋪一所。官莊。此號上接南岸三工。二十號。工尾。至本工三號。直隄一道。長四百十五丈。乾隆五十一年築。第二號。兵鋪一所。第三號。埽工。二十六段。兵鋪一所。此號至五號。月隄一道。長三百七十九丈。乾隆三十八年築。第四號。埽工。五段。兵鋪一所。白村。第五號。河道防汛署一所。汛署一所。甃瓦汛房三間。東玉鋪村。第六號。北街。第七號。兵鋪一所。第八號。兵鋪一所。第九號。高家莊。小西湖村。第十號。兵鋪一所。孫郭村。第十一號。兵鋪一所。第十二號。孝城村。大西湖村。第十三號。兵鋪一所。第十四號。兵鋪一所。第十五號。兵鋪一所。第十六號。兵鋪一所。第十七號。兵鋪一所。第十八號。兵鋪一村。第十九號。第二十號。兵鋪一所。知子營。第二十一號。第二十二號。兵鋪一所。第二十三號。兵鋪一所。汛房一所。河津村。第二十四號。兵鋪一所。第二十五號。第二十六號。第二十七號。兵鋪一所。第二十八號。黃堡。

南岸五工。永清縣縣丞經營。隄長二十四里六分。編二十五號。一號至三號。上段固安縣境。以下永清縣境。第一號。隄頭接南四工二十八號。工尾。兵鋪一所。辛務村。太平莊。第二號。白袋。第三號。兵鋪一所。南解

家務村第四號。孫楊莊北小營第五號。北解家務村第六號。兵鋪一所。順民屯第七號。兵鋪一所。汛房一所。大王莊第八號。許辛莊南戈奕村。此號至九號。月隄一道。長五百二十丈。乾隆三十年築。第九號。兵鋪一所。曹內管營下七村第十號。張家務大孟各莊。小孟各莊第十一號。兵鋪一所。馮各莊第十二號。兵鋪一所。後仲和第十三號。兵鋪一所。前仲和第十四號。南曹家務北曹家務胡其營。此號至十六號。月隄一道。長五百五十丈。乾隆五年築。第十五號。埽工二十九段。汛房一所。東桑園第十六號。埽工四段。汛房一所。西桑園第十七號。郭家務第十八號。兵鋪一所。談其營第十九號。龍家務。此號隄南接西老隄一道。經南岸六七工界止。霸州牛眼村。長五十八里。康熙三十九年改河所築排椿隄也。第二十號。大良村。第二十一號。小良村。此號至二十三號。月隄一道。長五百丈。雍正四年築。乾隆三十七年加培。第二十二號。埽工十九段。兵鋪一所。靛瓦汛房三間。第二十三號。曹家莊第二十四號。兵鋪一所。臺子莊第二十五號。兵鋪一所。

南岸六工。霸州州判經管。隄長三十里。編三十號。四十二年。自本工南岸十七號隄頭起。至北岸十九號下隄頭。接築順水壩一道。並培築兼管之北岸二十號缺口。接連至南隄七工之舊北隄交界止。連南岸上十六里。通長三十里。編三十號。俱永清縣境。第一號。隄頭接南岸五工二十五號工尾。董家務村。官場。第二號。兵鋪一所。賈家務村。韓家莊。東莊。第三號。菜園村。王佃莊。第四號。第五號。兵鋪一所。第六號。李黃莊。劉總其營。胡家莊。三間房。荆岱。楊家莊。第七號。兵鋪一所。第八號。兵鋪一所。大麻子村。東北馬。西北馬。第九號。兵鋪一所。第十號。兵鋪一所。第十一號。總督防汛署一所。雙營村。第十二號。埽工十四段。汛署一

所兵鋪一所。小麻子莊佃莊第十三號。埽工十段。汛房一所。第十四號。埽工二十二段。兵鋪一所。減楊村。張先務村第十五號。魯村第十六號。第十七號。惠元村第十八號。埽工十段。汛房一所。辛莊東西鎮。大黃村第十九號。第二十號。兵鋪一所。沈家莊。小營村第二十一號。龐各莊。陳佃莊第二十二號。第二十三號。馬家鋪。韓家莊第二十四號。兵鋪一所。小惠家莊。王虎莊。小黃村第二十五號。大劉家莊。鄧家務。第二十六號。窩村第二十七號。小劉家莊第二十八號。兵鋪一所。冰窖第二十九號。李奉先村。西武家莊。劉家楊。武家窖第四里。第三十號。此號順水壩。接南岸十七號頭。今按嘉慶二十四年十二月。奏請將南隄九工。霸州淀河巡檢。移駐南六工。作為南岸六工。霸州下汛巡檢。經管隄長十五里。原設南岸六工。霸州州判。作為上汛州判。經管隄長十五里。

北岸頭工上汛。武清縣縣丞經管。隄長十五里。分十五號。俱宛平縣境。第一號。隄頭接石景山東岸。第二十四號。工尾。兵鋪一所。挑水壩八段。埽工十四段。彰義村第二號。埽工三十七段。兵鋪一所。汛房一所。第三號。埽工三十八段。兵鋪一所。看丹口。第四號。埽工十六段。兵鋪一所。第五號。兵鋪一所。第六號。胡家莊。第七號。兵鋪一所。第八號。埽工十三段。兵鋪一所。第九號。兵鋪一所。第十號。埽工二十一段。兵鋪一所。汛房一所。第十一號。兵鋪一所。第十二號。兵鋪一所。第十三號。埽工十六段。兵鋪一所。甄瓦汛房三間。第十四號。兵鋪一所。立岱。狼岱。第十五號。兵鋪一所。

北岸頭工中汛。武清縣縣丞經管。隄長十六里。分十六號。俱宛平縣境。第一號。埽工二十一段。兵鋪一所。汛房一所。第二號。埽工二十六段。兵鋪一所。第三號。埽工三十七段。兵鋪一所。第四號。埽工十二段。兵鋪

一所。汛房一所。鵝房村第五號。兵鋪一所。第六號。埽工六段。兵鋪一所。後辛莊第七號。埽工三十六段。兵鋪一所。甄瓦汛房三間。老隄莊第八號。埽工十七段。兵鋪一所。汛房一所。前辛莊第九號。埽工二十一段。兵鋪一所。汛房一所。胡家莊第十號。兵鋪一所。太平莊第十一號。兵鋪一所。第十二號。兵鋪一所。第十三號。兵鋪一所。第十四號。兵鋪一所。第十五號。兵鋪一所。第十六號。兵鋪一所。

北岸頭工下汛。宛平縣縣丞經管。隄長十六里三分。編十六號。一號至九號。宛平縣境。以下良鄉縣境。第一號。第二號。兵鋪一所。甄瓦汛房三間。第三號。汛房一所。馬房村第四號。汛房一所。大營村第五號。兵鋪一所。皮各莊第六號。兵鋪一所。第七號。兵鋪一所。第八號。兵鋪一所。朱家營。此號月隄一道。長六十二丈。乾隆三十三年築。第九號。兵鋪一所。王家莊第十號。兵鋪一所。前官營。此號乾隆四十五年築。月隄一道。長一百十三丈。第十一號。汛署一所。小高各莊。此號至十三號。尾止。月隄一道。長五百一十七丈。乾隆五年築。第十二號。埽工十一段。兵鋪一所。汛房一所。北張客第十三號。兵鋪一所。大高各莊第十四號。兵鋪一所。留各莊第十五號。埽工十五段。兵鋪一所。汛房一所。南張客第十六號。埽工五段。汛房一所。

北岸二工。良鄉縣縣丞經管。隄長二十三里四分。編二十三號。一號至四號。良鄉縣境。以下俱宛平縣境。第一號。隄頭接下頭工十五號。工尾。兵鋪一所。保安莊第二號。兵鋪一所。定福莊第三號。兵鋪一所。丁村第四號。兵鋪一所。梁家務第五號。埽工三十二段。兵鋪一所。汛房一所。趙村第六號。埽工三十五段。兵鋪一所。南莊子第七號。埽工十五段。汛署一所。兵鋪一所。常各莊。此號至八號。月隄一道。長一百九十丈。第八號。兵鋪一所。第九號。兵鋪一所。第十號。兵鋪一所。第十一號。兵鋪一所。第十二號。兵鋪一所。第十三號。

兵鋪一所。第十四號。埽工八段。兵鋪一所。石岱村。此號至十五號頭。舊月隄一道。長一百丈。第十五號。兵鋪一所。里河村。第十六號。兵鋪一所。魏家莊。第十七號。兵鋪一所。劉家莊。此號直隄一道。長五十五丈。第十八號。兵鋪一所。西柳村。第十九號。兵鋪一所。麻各莊。第二十號。埽工三十段。兵鋪一所。第二十一號。兵鋪一所。輒瓦汛房三間。第二十二號。兵鋪一所。北莊子村。第二十三號。兵鋪一所。黃各莊。

北岸三工。涿州州判經管。隄長十八里三分。編十八號。一號至十二號。宛平縣境。以下固安縣境。第一號。隄頭接北二工二十三號工尾。兵鋪一所。辛莊。第二號。兵鋪一所。第三號。兵鋪一所。此號舊減水草壩一座。乾隆二十七年築。三十七年閉。移於號首。建築灰壩。第四號。兵鋪一所。求賢村。第五號。兵鋪一所。第六號。兵鋪一所。練莊村。第七號。兵鋪一所。甕各莊。第八號。兵鋪一所。第九號。兵鋪一所。于岱。第十號。兵鋪一所。西胡林村。第十一號。埽工十四段。兵鋪一所。汛房一所。第十二號。埽工三十段。兵鋪一所。東胡林村。第十三號。兵鋪一所。此號舊月隄一道。長一百三十丈。雍正三年建。第十四號。北十里鋪。第十五號。兵鋪一所。汛署一所。北岸同知防汛署一所。第十六號。兵鋪一所。南張化村。第十七號。埽工八段。兵鋪一所。第十八號。埽工十一段。兵鋪一所。輒瓦房汛三間。辛安莊。

北岸四工。固安縣縣丞經管。隄長二十四里九分。編二十五號。一號至二十號。固安縣境。二十一號。東安縣境。二十二號。固安縣境。二十四五號。東安縣境。第一號。隄頭接北三工十八號工尾。兵鋪一所。第二號。張化村。第三號。兵鋪一所。馬家屯。第四號。王家屯。第五號。北張化村。第六號。兵鋪一所。康家張化村。第七號。曹辛莊。第八號。汛房一所。黑岱村。第九號。兵鋪一所。西押隄村。第十號。東押隄村。第十一號。兵鋪一

所第十二號。北小店村第十三號。兵鋪一所。馮百戶營第十四號。石家堡。郭家務第十五號。兵鋪一所。石佛寺村第十六號。賈家屯第十七號。聚福屯第十八號。兵鋪一所。西化各莊第十九號。崔指揮營第二十號。東化各莊第二十一號。兵鋪一所。洪家辛莊第二十二號。兵鋪一所。梁各莊第二十三號。第二十四號。兵鋪一所。眼照屯第二十五號。張家莊。

北岸五工。永清縣縣丞經管隄長二十一里四分。編二十一號。俱永清縣境第一號。隄頭接北四工二十五號。工尾。兵鋪一所。張野雞莊第二號。兵鋪一所。宋家莊。邱家務第三號。紀家莊第四號。兵鋪一所。王居村第五號。池口第六號。北戈奕第七號。兵鋪一所。西營第八號。吳家莊第九號。韓臺村第十號。埽工二十五段。兵鋪一所。仁和鋪第十一號。埽工四段。泥安村第十二號。兵鋪一所。倉上村第十三號。兵鋪一所。支各莊第十四號。泥塘村第十五號。汛署一所。何麻子營第十六號。兵鋪一所。姚家馬房村第十七號。樓臺村第十八號。兵鋪一所。盧家莊第十九號。張家茹葦村第二十號。兵鋪一所。王家茹葦村第二十一號。兵鋪一所。張家莊。沈于靳村。楊家營。

北岸六工。霸州州判經管隄長三十里。乾隆二十年。二十號開隄放水。改爲下口。以下隄工十里。撥隄南岸六七工分管。四十三年。自南岸六工十七號。建築順水壩。接至本汛十九號。下隄頭河。從十九號出口。現管隄長十八里。編十八號。俱永清縣境第一號。隄頭接北五工二十一號。工尾。兵鋪一所。柴家莊第二號。兵鋪一所。董家務第三號。苑家莊第四號。埽工八段。兵鋪一所。賈家務村第五號。埽工十三段。兵鋪一所。辛屯第六號。小荆堡第七號。第八號。兵鋪一所。此號重隄之東。於乾隆二十八年。接築月堰一道。即今

北隄隸三角淀屬。四十五年。自本汛大隄八號。接築至北隄工頭。長四十九丈。歸北隄七工經營。第九號第十號埽工九段。汛署一所。兵鋪一所。半截河村第十一號第十二號第十三號兵鋪一所。趙百戶營第十四號第十五號第十六號兵鋪一所。賀堯營第十七號第十八號。

三角淀工程。三角淀通判轄五汛經營。今按永定河奏議。嘉慶二十年。奏淮南七南八南九。仍歸三角淀通判管理。其北七北八。改北岸同知管理。南隄北隄下口之兩岸也。乾隆十六年。南岸七工。冰窖草壩。改河。將南北岸六工以下之南坦坡堰。北大隄北堰。改爲南北堰。各分上中下三汛。隸三角淀通判轄。三十八年。改南北堰爲南北隄。上中下三汛。改爲南北隄七八九工。四十七年。南隄九工汛員。調管北岸頭工。上汛。淀河州判。移駐九工。兼管汛務。嘉慶十一年。北隄九工汛員。調管北岸頭工。上汛。原上汛。改爲中汛。其北隄九工隄工。歸北八工兼管。南堰。舊名坦坡堰。乾隆三年築。以格淀水。西自霸州牛眼村。接西老隄起。東至武清縣龍尾止。長四十九里九分八年。於東西老隄工尾。接築橫堰。長六十一丈。十六年。將冰窖以下廢東老隄。連坦坡堰。普律加培。並自龍尾接坦坡堰。築至天津縣青光村止。東老隄自南六工二十八號岔頭起。至橫堰。長十八里八分。坦坡堰接橫堰起。至青光村止。長六十一里十四丈。改坦坡堰爲南堰。分上中下三汛。其南北岸上下七工舊隄。分隸南堰上汛兼管。南北岸八工舊隄。分隸南堰中汛兼管。即今之舊南北隄。三十八年。南堰改爲南隄。上中下三汛。改爲七八九工。四十七年。南隄九工汛員。調管北岸頭工。上汛。其南九工隄工。以淀河汛員兼管。北堰上段。舊名北大隄。乾隆四年築。西接北岸六工十六號重隄起。至東安縣賀家新莊止。長三十六里一百二十六丈。五年。自北大隄三十四號。至武清

縣東蕭家莊鳳河邊止。接築北堰。長四十七里一百二十六丈。以禦渾河北漲。至十六年。上段亦改稱北堰。共長八十一里一百二十六丈。分爲北堰上中下三汛。二十年。北岸六工二十號。改爲下口。河循北堰歸沙家淀。二十一年。於北堰之北。築遙堰一道。西自永清縣趙百戶營村。前接北岸六工十六號。重隄起。東至武清縣南宮村北鳳河邊止。長八十四里九丈二十七尺。十八號以下。渾流蕩淤十餘里。二十八年。取直接築。共長八十一里九十五丈。是年奏明。河出北堰十七號外。循遙堰內行。將遙堰分交上中下三汛經管。又於遙堰之北。築越堰一道。西自永清縣半截河村後。接北岸六工八號。重隄起。東至武清縣劉家莊後止。長四十九里一百二十八丈三十二尺。十二年。河出遙堰外行。遂以越堰爲北堰。分交上中下三汛經管。三十八年。改北堰爲南隄。上中下三汛。改爲七八九工。四十五年。北隄七工。工頭西至北岸六工大隄八號。接築北隄。長四十九丈。歸七工經管。嘉慶十一年。以北隄九工汛員。移駐北岸頭工上汛。其北九工隄工。歸北八工兼管。

鳳河東隄。於雍正十一年。築下段。自天津縣韓家樹起。至雙口村止。長十二里。以防渾水東注。乾隆五年。接築中段。自雙口起。至武清縣龐各莊止。長十四里十九年。調石景山水關外委。移駐經管。並將天津縣韓家樹接東隄尾起。至桃花寺止。築斜堰一道。長七里三十六丈。撥歸外委兼管。二十一年。接築上段。自武清縣陳辛莊起。至龐各莊止。長三十三里九分。通長五十九里一百六十五丈三十七尺。建涵洞二處。洩斜堰以北瀝水。四十六年。因斜堰逼近清河。常被汕刷。改由東隄四十八號起。至天津桃花口北運河西岸止。築斜堰長七里三十丈。其東隄四十九號以下。及舊斜堰均廢。五十六年。鳳河東隄外委。仍歸石

景山管理石工。以濟船把總。經管鳳河東隄工。

南隄七工。東安縣主簿經管。南隄長二十里。編二十號。一號至十八號。中霸州境。以下東安縣境。第一號。隄頭接東老隄橫堰尾。兵鋪一所。牛眼。即柳岔口。第二號。第三號。兵鋪一所。第四號。崔家鋪。信安鎮。第五號。兵鋪一所。馬家鋪。南北城上。第六號。第七號。第八號。兵鋪一所。第九號。兵鋪一所。堂二鋪。何趙鋪。宋家鋪。第十號。王家鋪。第十一號。兵鋪一所。范家鋪。第十二號。第十三號。第十四號。兵鋪一所。董家鋪。黃家鋪。外安瀾城。第十五號。第十六號。第十七號。兵鋪一所。佛城圪塔。第十八號。楊家鋪。胡家莊。第十九號。李家鋪。第二十號。兵鋪一所。樊家鋪。兼管東老隄。長十八里八分。編十九號。一號至十六號。永清縣境。以下霸州境。附隄村莊。莊窠。商人莊。甄家莊。尹家場。張家場。四勝口。三勝口。武家莊。吳家場。朱家莊。趙家場。五道口。唐家鋪。四間房。兼管舊南隄。長二十一里一百四十三丈。編二十一號。一號至十五號。中永清縣境。以下東安縣境。第十五號。汛署一所。附隄村莊。南二鋪。安瀾城。即耶城。柳園村。兼管舊北隄。長十九里十六丈。編二十號。一號至十四號。永清縣境。以下東安縣境。兵鋪五所。附隄村莊。新安莊。趙家樓。開口。惠家場。九家鋪。郭家場。

南隄八工。武清縣主簿經管。隄長二十里。編二十號。一號至六號。二十二丈。東安縣境。六號二十三丈。至八號九丈五尺。霸州境。八號九丈六尺。至十一號四十五丈。靜海縣境。十一號四十六丈。至二十號工尾。武清縣境。今按永定河奏議。嘉慶二十四年。奏將南九工汛務。歸於南八工。武清縣主簿經管。第一號。隄頭接七工南隄二十號工尾。策城。王家圈。得勝口。第二號。寨上。磨汊港。馬家口。第三號。褚河港。于家鋪。第

四號陳家鋪第五號兵鋪一所大黃莊第六號第七號第八號第九號第十號東沽港第十一號兵鋪一所第十二號第十三號第十四號第十五號第十六號兵鋪一所第十七號王慶坨第十八號第十九號第二十號兼管舊南隄長十九里七丈編二十號一號至十四號五十丈東安縣境以下武清縣境兵鋪三所附隄村莊宋流口小范壘口兼管舊北隄長十七里十五丈編十八號一號至十四號三十丈東安縣境以下武清縣境兵鋪三所附隄村莊洵河新村大范壘口鄭家樓

南隄九工原設武清縣縣丞經管隄長二十一里十四丈十二號以下舊係淀池地勢窪下南近大清河北鄰葉淀東逼鳳河下口歷被蕩刷乾隆三十年詳廢止管隄長十二里編十二號一號至四號中武清縣境四號中至工尾天津縣境四十七年武清縣縣丞調管北岸頭工上汛以淀河霸州州判移駐九工兼管汛務嘉慶十二年州判改爲巡檢今按永定河奏議嘉慶二十四年奏准南隄九工霸州淀河巡檢移駐南六工作爲南岸六工霸州下汛巡檢其南九工汛務即歸南八工武清縣主簿經管第一號兵鋪

一所第二號第三號明家場第四號綫兒河第五號兵鋪一所曹家鋪第六號第七號第八號第九號第十號郝家鋪第十一號兵鋪一所第十二號汛署一所安光三河頭杖夫房楊家河青光

北隄七工東安縣主簿經管隄長二十五里三分編二十五號一號至十五號七十二丈永清縣境以下東安縣境第一號隄頭原接北岸六工重隄八號乾隆四十五年接連北岸六工大隄八號築北隄至本工頭長四十九丈兵鋪一所第二號陳各莊第三號兵鋪一所第四號大站此號有月隄一道長八十五丈第五號第六號兵鋪一所第七號東西橫亭第八號兵鋪一所東溜第九號小站第十號劉趙莊第十

一號兵鋪一所。小營第十二號兵鋪一所。塹上此號有月隄一道長一百六丈。第十三號兵鋪一所。別古莊第十四號第十五號辛立莊第十六號第十七號第十八號兵鋪一所。北馬子莊南馬子莊第十九號張家鋪第二十號兵鋪一所。朱官屯第二十一號第二十二號兵鋪一所。灰城洛圖莊第二十三號第二十四號兵鋪一所。大益留屯小益留屯此號至工尾有土壩五段第二十五號兼管舊北堰原長三十四里改管二十五里附隄村莊小賀堯營河西營柳坨第五里村兼管舊遙堰長二十里甄家莊後第六號村曹家莊胡家莊李家莊。

北隄八工東安縣主簿經管原管隄長二十四里七分嘉慶十八年奏明請廢四里現管二十里七分計二十一號一號至十九號八十八丈東安縣境以下武清縣境第一號崔家莊大鄭莊土壩一道計長十五丈第二號兵鋪一所趙家莊濟南屯草壩一道計長十五丈第三號大小麻莊北崔屯高莊張家莊馬頭村草壩一道計長十五丈土壩二道計長十五丈第四號谷家莊大紀莊小紀莊田家莊草壩一道計長十五丈土壩一道計長十五丈第五號兵鋪一所汛署一所楊官屯金官屯草壩一道計長十五丈第六號馬神廟莊麻子屯范家莊第七號孔家窪東栗莊艾萬莊史家莊第八號孟東屯屯東莊孫東莊許東莊惠家鋪小鄭莊神家營南關土壩一道計長十五丈第九號前所營前後羅官屯土壩一道計長十四丈草壩一道計長十五丈此號至十一號頭止嘉慶十七年添築月隄一道長四百二十丈第十號大麻家莊北崔莊第十一號莊窠東西安莊第十二號邢官營白草窪豐盛店第十三號劉七隄廬七隄響口村第十四號兵鋪一所八里橋土壩一道計長十五丈第十五號第十六號第十七號兵鋪一所落袋

青坨蠻子營。胡家營。羅古判。解口。東安辛莊。武清辛莊。第十八號。周六營。東安曹莊。第十九號。馬家營。三田莊。草壩一道。計長十五丈。第二十號。包家營。岸胡營。第二十一號。雙廟。南雙廟。眷茲村。楊家營。甄家營。龔家營。李家營。列家莊。黃花店。東張莊。條河頭。

鳳河東隄。把總經管。原長五十九里。一百六十丈。原編六十號。並兼管斜堰七里二分。乾隆四十七年。因舊斜堰被清河汕刷。改從東隄第四十八號。接築至天津桃花口。北運河西隄。計長七里三十丈。其四十九號以下隄堰遂廢。東隄編四十八號。一號至三十七號。一百七十七丈。武清縣境。以下俱天津縣境。淀河汛管轄村莊附孫家坨。沈家莊。老隄頭。于家隄。葛漁城。穆家口。以上六村東安縣屬。定子務。石各莊。敖家嘴。梁各莊。西南莊。李各莊。以上六村武清縣境。

疏濬下口河淀。雍正九年。添設疏濬下口銀五千兩。每年雇募民船民夫。疏撈永定河下節淀池河道。十二年。設三角淀通判。將文安縣左各莊。以東之石溝臺頭。揚芬港。楊家河。至三河頭以下一帶淀河。東子牙新河。撥歸管理。並設武清縣縣丞。東安縣主簿二員。隸通判管轄。以資分理。乾隆三年。三角淀添設堡船二百隻。並添設霸州州同。州判二員。把總四員。外委二十名。杖夫六百名。七年。裁祁河通判。改設子牙河通判。將堡船並員弁。杖夫。各半分隸。十年。又添設土槽船二百隻。杖夫六百名。千總二員。亦各半分隸。十一年。又將堡船員弁。杖夫。新舊。搭配分隸。保定天津兩同知。三角淀子牙河兩通判。經管。三角淀通判。分管堡船一百隻。州判一員。千總一員。外委五名。杖夫三百名。並原管縣丞主簿二員。疏通三角淀一帶淤淺。十三年。又裁堡船內之牛舌頭船二十隻。杖夫六十名。十五年。十八河員。俱兼巡檢銜。分管附隄十

里村莊於枯河時調集附隄民夫分段挑挖淤淺。按日給與米菜錢文。十六年改移下口。將三角淀武清縣縣丞調管南堰下汛。東安縣主簿調管北堰下汛。二十九年因船塋疏濬功效有限。糜費實多。將塋船並千總外委。全行裁汰。嗣後河淀工程。如需用夫船。臨時雇覓。其淀河霸州州判一員。仍循其舊。三十七年添設濬船三角淀通判。分管五艙船四隻。並三艙船三十隻。並器具。督率霸州州判。並調格淀隄把總一員。添設船外委二名。撥兵管駕。疏排下口淤淺。以暢河流。又將北隄七八兩汛兼管之廢北堰五十六里七分。並附隄村莊十二處。撥隸霸州淀河州判管轄調撥。如遇工大土多。照例給價。四十六年淀河州判兼管南隄九工汛務。移駐三河頭。所管廢北隄。交還北隄七八兩工兼管。村莊十二處。仍隸淀河汛專司疏濬。四十七年裁汰濬船。其州判一員。把總一員。外委二名。仍令督率兵夫。隨時疏濬下口河淀。嘉慶十二年淀河州判改爲巡檢。濬船把總改管鳳河東隄。

疏濬中泓。乾隆十五年兩岸歲修項下。奏准添設銀五千兩。疏濬中泓。如有餘剩。卽留爲下年之用。如或不足。前後通融辦理。並奏准十八汛河員。皆兼巡檢銜。分管附隄十里村莊。勘明應挑中泓淤灘。於河枯時。調集附隄民夫。分段挑挖。按日給與米菜錢文。三十七年設立濬船一百二十隻。除分撥三角淀疏下口外。南岸分撥五艙船四十隻。三艙船五隻。北岸分撥五艙船三十六隻。三艙船五隻。並器具。分交各汛經管。撥兵撐駕。汛前汛後。遇有新淤嫩灘沙嘴。乘時撈濬。裁截。如或工大土多。添雇民夫。照例給價。四十七年。因濬船已滿十年。例應再行排造。奏請裁汰。以省糜費。如遇應行疏淤之時。飭令廳汛雇募渡船民夫。同河兵實力妥辦。以上皆永定河志。

續行水金鑑卷第一百四十六

江水原委一 三大源

大江源出四川松潘廳邊外之岷山羊膊嶺。有二源。皇朝通志。

大江源出四川松潘衛邊外西番地之岷山羊膊嶺。有二源。北源曰岡出阿林。水從東麓東南流。當黃河源之東南。千六百里。山甚高峻。其西北麓水。卽多拉昆都侖河。西北流。折而西。又北入河。當河之折向西北流處者也。南源曰那哥多母精阿林。從南麓南流。山勢廣博。其脈西自金沙北岸。河源西岸之巴顏喀喇山。連接而東。屈曲蜿蜒。數千里不斷。其甚高可名者。河源東南之烏哈部哈達山。又東曰拉母拖羅海山。又東曰哈拉几達拉克山。正在星宿海南。又南曰薩喀勒拉克。又東曰雜普。通古查哈蘇拖羅海山。又東南曰茶哈里巴顏哈拉山。曰馬木哥吞達巴罕嶺。其北水皆入黃河。其南水皆入鴉龍江也。又東南曰巴顏禿呼馬達巴罕。曰匝巴顏哈拉山。又東南曰年尼芒起山。又東曰九里古拉達巴罕。卽黑水河東流入江之上源也。又東而北而東北。爲那哥多母精山。其西水西南流。折而西北。曰多母打禿昆都倫河。北入黃河者。其南麓水。卽岷江南源也。此山連接而東。爲岡出山。又北而西北七百里。爲西傾。自河以南之大祖山也。水道提綱。

大江自徽外流入南逕松潘廳城。又南逕疊溪營。西又南入茂州界。一名汝江。亦曰岷江。俗名潘州河。書禹貢。岷山導江。荀卿曰。江出岷山。其源可以濫觴。漢書地理志。岷山在西徽外。江水所出。東南

至都江入海。過七郡。行三千六百六十里。水經注引益州記曰。大江泉源。卽今所聞始發羊膊嶺下。緣崖散漫。小大百數。殆未濫觴。東南下百餘里。至白馬嶺。而歷天彭關。自此以上。至微弱。所謂發源濫觴者也。自白馬嶺。回行二十餘里。至龍涸。又八十里。至蠶陵縣。又南下六十里。至石鏡。又六十餘里。而至北部。始廣百步許。杜佑通典。甘松嶺。江水所發源。元和志。翼州西。杭大江。又大江。水經翼水縣西二百步。太平寰宇記。江源記云。羊膊山下有二神湫。乃大江始發之所。范成大吳船錄。江源自西戎中來。由岷山澗壑中出。而合於都江。今世所云。止自中國言耳。明統志。潘州河在松潘司城西北六十里。又汝江在疊溪所城西三里。經所西南。與黑水合流。入茂州。舊志。潘州河源出西夷哈嗎鼻浪架嶺。分二派。一派西南流。合出竈溝。一派南流。歷東砦。至尖橐。合滴漏水。大清一統志。

合流入邊界黃勝關內。至漳臘營。有一水來會。皇朝通志。

曲曲二百餘里。東流。北源自西北來會。又東流。折而東南。入邊界黃勝關。至漳臘營西。有一小水。東北自邊外入弓楨口來注之。水道提綱。

水山滴漏山嶺。亦分二派。一西南爲出竈溝。入西番界。一東流。逕鵝落村。至尖橐。與浪架水合流。入黃勝關下。又四十里。至虹橋關北。合漳臘營河。其河源出生番弓楨。其山嶺水亦分二派。一東流。入上羊峒生番界。一西南流。至漳臘境。又南流四十里。經漳臘城西南。合玻璃泉。又十里。至虹橋關北。與潘州河合流。大清一統志。

經廳東南。有茂州鐵豹嶺水來會。皇朝通志。

又南經松潘衛東。有東勝河自東來注之。衛西北重山雜沓。自黃勝關外不斷。皆曰岷山。折東南流。有窟河自西北來注之。出邊界山。卽那哥多母精之支峯。相連而東南者。又南流經歸化堡。西有雲長溝。自東北來注之。又南經北定關。西左受二小水。右受一小水。曰山壩溪。南經平番營。西又南至靖夷堡。西左右各受一水。又南經平定關。普安堡。疊溪營。至長寧堡。西有黑水河自西北來會。亦岷江別源也。黑水河卽古所指茂州鐵豹嶺水也。源出邊外番地。有兩源。北源出九里古拉達巴罕嶺。在岷南源之西南二百餘里。水東北流。折而東南。曲曲行二百餘里。其南源西南自山中東北流。二百數十里來會。又東南百里入邊。又東南百餘里。折南流八十里。又折東南流九十里。至堡西北。與大江會。此水源遠。略與松潘等。水道提綱。

曲流二十八里。至松潘城東入城。出城西而南折。又東南流一百八十里。合衆山溪水。過平番營。入疊溪營界。是爲岷江。又南五十里。合黑水。經營城西。又東南曲流四十里。入茂州界。按輿圖。今江源在黃勝關外西北。有東南二派。在東者出岡出山。東南曲流二百餘里。合流。又百里許。入黃勝關岡出山。卽舊志所名滴漏那哥。卽浪架也。二山之北。又各有一派。出岡出山者。名多拉昆都倫。出那哥山者。名多母打禿昆都倫。皆西北流數百里。合流匯衆山溪水。入黃河。卽舊志之出竈溝。元史所名奇爾瑪爾楚二水也。奇爾瑪爾楚。舊作乞兒馬出。今俱改正。大清一統志。

又東南經茂州城西北。皇朝通志。

折東南流。經堡南。又東南。有黑水寨河。自西來注之。又東南。左受一小水。至魏門關南。有小水自東

北來注之。折西南流。經茂州城西北。水道提綱。

自松潘鎮疊溪營流入。南流經州城西。黑水河在州西北六十里。源出生番界東南流。大清一統志。

西南經保縣西北。皇朝通志。

又西南有白水河。自東南來注之。又西南一小水。自北來注之。又西南經威州城西北。有保縣水自西北來注之。保縣水曰孟董溝。自西北邊界。東南流百餘里。至縣北。有雜谷鬧河。自西來會。經城北折南流。經城東而南。合二小水。又南至州西北入大江。水道提綱。

又西南經保縣汝川二縣西。白水河在州南。源出龍泉山。西流入江。居民引以灌溉。大清一統志。今按保縣已裁。

汝川縣西。皇朝通志。

經城西而南。有大溪口。水自東來注之。又西南有登溪。自北來注之。又南流經汝川縣城西。又西南有草坡河。自西北合三水來注之。龍潭溝出西邊界。東南流百餘里。至加渴瓦司西南。有天赦水。自西來。經東流。有沙派河。北自保縣西南雪山來會。爲草坡河。又東南注大江。水道提綱。

水經注。江水至汝山故郡。乃廣二百餘步。又西南百八十里。至濕坂江稍大矣。元和志。汝江北至翼州。南流經汝山縣西二里。舊志。岷山自疊溪營入茂州境。南流五十里。合黑水。又東南三十里。至州城西。又折而西南六十里。過汝川縣地十餘里。入威州界。西流一里。經城北。合泥水。又西南十里。仍

過汝川縣界。又三十里。至縣城西。又南曲流一百三十里。入灌縣界。大清一統志。

又東南經灌縣西。有納凹河。三江口河來會。皇朝通志。

又東南經娘子嶺。左受一小水。南流至灌縣西北境。有納凹河。西北自邊界大雪山東南流二百里來會。又南有三江口河。西北自邊界龍池。合數水東南流二百數十里來會。江流益盛。二水亦古所指別源也。納凹河源之大雪山。在龍潭溝西六十里。其脈即番地噶又哥拉達巴罕嶺之東南山。其北行即黑水河南源之山。其西水皆注鴉龍江者也。三江口河源出邊界大雪山之龍潭。潭廣二十里。在納凹源西八十里。東南流。有一水合三源自西來。一水自西南並會。曰二江口。又東南有一水。自西南來注之。又東南流折而東。與大江會。水道提綱。

源出岷山。北自茂州汝川縣。流入東南。經灌縣西。大清一統志。

又東南曰灌口。曰湔江。分爲二派。一支東流爲沱江。經郫縣。新繁。成都。新都。金堂。南經簡州。資陽。資州。富順。至瀘州。復合於江。皇朝通志。

折而南曰灌口。經縣城西。曰湔江。亦曰都江。即古離堆地。至此分爲二派。支渠縱橫。其南流者正流也。其東流經郫縣。新繁。成都。新都。金堂。南經簡州。資陽。資州。富順。至瀘州。復合者。沱江也。水道提綱。

沱江自灌縣南。分大江東流。經崇寧縣南。郫縣北。又東經新繁縣南。成都縣北。又東經新都。金堂二縣南。又東合湔水。禹貢岷山導江。東別爲沱。孔安國傳。江東南流。沱東行。漢書地理志。郫縣。禹貢江

沱在西東入大江。郭璞爾雅音義。沱水自蜀郡都水縣瀘山與江別而東流。水經注。江水歷都安縣。李冰作大堰於此。益州記曰。江至都安堰。其左正流遂東。河圖括地志。新繁縣有繁江。首受郫江。卽禹貢江沱也。大清一統志。

一支正南流。又分二派。經崇慶州而合。又東南有自溫江縣分出之水來會。皇朝通志。

正流南二十里。又分二派。東南流曰黑石河。又南有支渠與西流通。又南經崇慶州東。爲白馬河。其西南派數十里。有小水自西北來會。經白塔山東而南。又分二派。一派東南流。經州城西曰酉河。又東南流。而白馬河自東北來會。又東南曰白西河。有自溫江縣西分出之羊馬河。自東北來會。水道提綱。

又東南經溫江縣西。崇慶州東。白馬江。在州東北十里。自灌縣味江。分流入州界。又分爲黑石溪河。又東南流九十里。入新津縣界。與西河合。謂之白西河。東南至縣北。又會羊馬河。入於大江。舊志以此爲岷江正流也。大清一統志。

經新津縣東北。又南流。有自崇慶州分出之水。合大邑。邛州。蒲江。諸水來會。皇朝通志。

經新津縣城東北。有金馬河。自東北來會。南流經城東而南。有崇慶州西北所分之西南派。南流又分二支。東曰溪水河。西曰乾溪河者。東南復合。至縣城南。會大邑。邛州。蒲江。三水來會。大邑縣水。出西北霧中山。山甚高險。其西水卽小金川。爲大渡河上源也。水東南流。經縣西南境。又東南百里。南河合蒲江。自西南來會。南河三源。出邛州西北。覺山者。北源出牛心山者。西源出伏牛山者。西

南源也。流至州西境而合。東經州城南。又東南北各受一水。曰南河。東南流至新津西南境。蒲江水自西南來會。蒲江縣水有二。一西北出百丈驛西山。東流百五十里。至縣東北境。一西南出丹稜北境山。兩源東北流。經縣城東南。又東北與百丈驛水合。又東北與邛州南河合。又東北與溪水乾溪河合。經新津城南而東。與大江正派合。水道提綱。

西南分者。又分二支。東曰溪水河。西曰乾溪河。至新津縣西合流。入文井江。斜江水在大邑縣南。寰宇記。水自大邑縣鶴鳴山東。委曲斜流。過安仁縣。又東至新津縣。文井江在新津縣南。自邛州流入大江。卽古僕千水也。漢書地理志。臨邛縣僕千水。東至武陽入江。水經注。文井江自臨邛縣東。經江源縣。又東至武陽天社山下。入江。舊志。文井江。今日南河。自邛州流入新津縣。又東經縣城南。轉東入江。蒲江水在蒲江縣南。舊志。東北至州界。合邛水入新津縣界。大清一統志。

又東南有沱江支渠。環成都府城西流來會。皇朝通志。

稍東沱江支渠。曰石魚河。楊柳河。俱北自溫江來會。南流江心。有石灘。又南。左受一小水。又東南沱江支渠。曰新開渠。東北自府城南。合黃龍溪水。西流來會。成都府城環以沱江。自北而東南者。曰外江。一名清遠江。自北而經城西。又東經城南者。曰內江。亦名石犀渠。皆西北從郫江而分者也。至城南外內二渠。復合而西南流。有新開河。北自郫縣之南。溫江縣之北。東南流來會。又西南流百餘里。有龍溪。自東來注之。又西南入大江。自灌縣滿口支流分三道。東南流。其經郫縣北者。卽郫江。亦曰北江。俗曰由子河。至府城西北。依城而東而南。卽外江也。其經郫縣南。溫江縣北。至犀浦南。而東經

府城西而東南者。卽內江。俗曰走馬河也。其由郫縣西南而東。經溫江城北而東南。至府之南境。會內外江而西南者。新開河也。溫江以西曰石魚河。自西北分江水東南流。至雙流縣。折西南流。有楊柳河。自溫江城南來會。又西南會北來之金馬河。又南流至新津東南。入大江。右郫縣成都之內外江。新開河。皆分沱江之支渠。先西南於新津之南。復與江合。其東經新繁新都。北會緜維諸水。南至瀘州。入江之沱水見後。水道提綱。

稍南。分一支入崇慶州界。其流又分二派。一經州東。爲白馬河。一經州西。爲西河。卽珠江也。江水又東南。東分爲油子走馬二河。卽成都之二江也。其南分者曰洋馬河。亦入崇慶州界。江水又東南。至溫江縣西。爲金馬河。南流入新津縣金馬河之東。又分一支。歷溫江縣南。雙流縣西。爲楊柳河。河之東。又分一支。經雙流縣城西。數派分流。皆合於新津東北。大清一統志。

又南經彭山縣東眉州城東。皇朝通志。

又南折東南流。有水自西北來注之。水出州北境山南流。經西境。東南流入江。又西南流。有水自東北來注之。水出仁壽縣東北境山西南流。百餘里入江。水道提綱。

府河在仁壽縣西北百里。自成都府華陽縣流入。蟠溪在仁壽縣東。源出大泉山下。大清一統志。

又南經青神縣東南。皇朝通志。

又南經青神縣東南。左受周家山水。水出井研北山西流入江。水道提綱。

自新津縣流入。經彭山縣東。又南經青神縣東。舊志。大江經彭山縣。有龍爪灘。鼓樓灘。又經州東。蟻

頤山下。波流澄縈。亦曰玻璃江。又至青神縣東南。大清一統志。
有新磨河。自丹稜縣來會。皇朝通志。

右受丹稜之新磨河。新磨河出丹稜縣西南山。東流經城南。又東南流。有赤崖山。水自北來注之。又東南入江。水道提綱。

思濛江。在眉州南五十里。源出丹稜縣東南。流經州南。又南經青神縣。南入大江。元和志。思濛水在丹稜縣西北二十五里。寰宇記。思濛水源出蒲州山。東流入通義縣。又有夷郎川。在丹稜縣東三十里。與通義縣相連。舊志。龍鵠溪。源出龍鵠山。經縣西北流。繞城南東。出思濛入州界。又名芙蓉溪。經州南五十里。又南經青神縣南二里。又五里入江。按輿圖。有斯磨河。發丹稜縣西。東南流至青神縣西北。有水。水自丹稜縣東。赤崖山南發源。東南流經州界入焉。卽寰宇記夷郎川也。斯磨卽思濛之訛。舊志謂夷郎川卽思濛江誤。大清一統志。

又南有金牛河。自夾江河來會。皇朝通志。

又南。右受金牛河。河出夾江縣北之萬松山。東南流折東入江。水道提綱。

灘甘水。在眉州西南八十里。一名金流江。源出丹稜縣。流經州界。至青神縣入江。寰宇記。灘甘水源出洪雅縣可募山。入丹稜縣。按舊志。金流江在州南八十里。源出丹稜縣獨孤山。東南流二十里。經州。又二十里。入青神縣界。經縣南二十里入江。大清一統志。

又南出重山。至嘉定府東北。有尼溪。自井研縣竹公溪。自樂山縣來會。皇朝通志。

又南出重山西南至嘉定府東北左右各受一水并研縣尼溪東北自東川溝西南流合諸水來注之竹公溪出嘉定府治樂山縣北石牛山東南流來注之水道提綱

擁思茫水在榮縣西自井研縣流入寰宇記擁思水在資官縣西二十里從陵州建始縣界南流至縣西又入宜賓縣界按輿圖今自井研古建始地發源者止有泥溪流至府東不入宜賓界寰宇記與今不合大清一統志

至府西南有陽江即大渡河自灌縣大邑縣經美諾阿爾古境又南會打箭鑪之瀘河又東南會越嶲廳河經峨眉縣西南會青衣江入於大江青衣江由蘆山縣經雅州府西會榮經水經石山縣南洪雅縣南夾江縣西峨眉縣東會三峨水至嘉定府西合陽江以入於大江皇朝通志

南經府城東南有陽江西自大渡河東北經峨眉合北來之青衣水東流繞城南來注之陽江即大渡河源自灌縣西南境大邑縣邛州西北境霧中圓覺牛心三山以西諸山數水西南流經小金川司大金川司南北合數小水至土下魚匣曰大渡河又南有格蠶河自東來會折西流有瀘河西南自打箭鑪來會西藏貢道所必由之地打箭鑪瀘河源出西南大雪山三池泉水匯而北流合西二小水東北流經瀘南有木鴉河自西界山來會又東北有東波河西北自邊界山來會又東北經楊柳南北受一水又東流南受一水至大岡北與大渡河會大渡河會瀘河折東南流至安定橋折西南流又折而南至化林營西左右受小水甚多又南稍西右受什月河水又南折東南流有松林河鹿子河自西南來注之始折東流源至此已七百里此水外即邊界西即諸水入鴉龍江者

有老鴉河。自西南來注之。又東北至嚙經關北。有水自南來注之。經關家營南。有流沙河。西北自飛越山仙人洞。合黎大所諸水來注之。又東流。北受金水河。折東南流。北受一水。又東南有越鴉河。自西南來會。越鴉河。源出越鴉衛南山。兩水北流。至陶家營。合而北流。經衛東東北流。有獾獾河。自西來會。又北會臘梅營水。又東北百數十里。有寧越營。水自西來會。又東北百餘里。會大渡河。大渡河。又東南流。經峨眉縣西南境。大峨山前。河在山之南六十里。有小水二。自西南山合而來注之。折東北流。有水西北。自大峨南麓來注之。又東經三峨山麓。又東北至嘉定府西南境。有青衣江。自西北來會。青衣江。源出蘆山縣東蘆山。今日伏牛山西麓。其東水卽邛州之南河也。數水合。西南經縣東。又西南有木磬司。水自西北經縣城西而南。有彌所城。數水。自西合而東。並會曰三江渡。南流經飛仙關。有水自西來。合榮經水來會於雅州府西境。榮經水。出榮經縣東南瓦屋山。二源合西北流。曰周公水。卽榮經水也。至城東北有水西南。自黎大所北山。三源東北流。合。經城西。與西北來之榮水會而東北合焉。俗曰長濱河。邛崃九折坂。在縣界。青衣江。既會榮經水。折東流。經雅州府城北。又東有白崖山水。自東北來注之。折東南流。有夾佳溪。西南自州南境來注之。又東南經名山縣南境。有百丈山及蒙山水。自縣東北合而南流來注之。又東南百數里。至洪雅縣城南。左右受小水。稍東折而南。有兩大灘。經百松山麓。有川溪河。西南自大峨北麓東北流。合一水來注之。又南經山峽中數十里。至夾江縣西。又東南有嶽。自縣東北來注之。至此始名青衣江。經峨眉縣東境。有粗石河。自西北來注之。又東南有三峨水。自西北合而來會。三峨水三源。北源出大峨東麓東北。

流經縣城北。折東南流。二峨北麓水。自西南來會。又東南三峨北麓水。東北流來會。曰羅目江。又東會青衣江。青衣江又東南。經嘉定府四境。而陽江自西南來會。陽江即大渡河。既會青衣江於城西。雙湖東流。經城南。東至烏尤山下。入大江。按大渡河自北而西。而西南而東。而東北。曲行千五百里。水道提綱。

陽江即大渡河。自夷界流入。經峨眉縣南界。又東經樂山縣界。至府城西南。合青衣水入江。漢書地理志。汶江縣。汶水南。至南安。東入江。水經注。汶水出徼外。經水江道南。至南安。入大渡河水。寰宇記。大渡河一名沫水。在羅目縣南一百八十步。源自嵩州界來。東入龍游縣界。出歙金龍游縣。有沫水。自陽山縣流入。方輿覽。勝嘉定府有陽江。蜀南方之水所交會。明統志。陽江在州治水西。舊志。大渡河自黎大所。穿野夷界。至中鎮。入峨眉縣。土人有名中鎮河。經縣西南百四十里。凡一百二十里。入嘉定州界。爲陽江。至州西南。合青衣水。又東北流十五里。至州東南。合岷江。青衣江自雅州府雅安縣人。經洪雅縣南。又東南。經夾江縣西南。又東南。經府城西。合大渡河入江。名平羌水。又名洪雅江。即古大渡水也。漢書地理志。青衣縣。大渡水。東南至南安縣。入汶水。水經注。青衣水。逕平鄉。謂之平鄉江。東逕峨眉山。又東。流注入大江。又昔沫水自蒙山。至南安洞崖水脈。漂疾。破害舟船。歷代爲患。李冰發卒。鑿平洞崖。通正水路。又南安縣有蒙水。即大渡河也。水發蒙漢。東南流。與汶水合。又東入江。元和志。青衣水一名平羌水。經洪雅縣南一里。又經夾江縣西。又經龍游縣南。去縣三里。寰宇記。洪雅縣有洪雅川。東西曲屈一百三十里。入嘉定州夾江界。又洪雅江在夾江縣六十里。又龍游

縣在大江之西。卽青衣水合江之所。青衣水。濯衣卽青。故名。方輿覽勝。青衣水以縣名。曰蒙水。以山名。一曰大渡。以溪名。又曰雅江。以州名。舊志。青衣江自雅州由峽而下。入洪雅界。合龍溪。至止戈鎮。與花溪合。又經縣南隱蒙山。又東合洞溪。盧溪。入夾江。自隱蒙而西。有龍吟灘。黃豆灘。葫蘆洞。龍鼻嘴。自隱蒙而東。有豬圈門。猴子崖。皆多石梁。爲行舟患。又經夾江縣西南。其分流至城南而注。爲潭。土人呼曰縣沱。下流爲三大堰。繞城而東。又有八小堰。每一里許。築土爲閘。擁水上田。又經觀音灘。入州界二十里。合蘇溪。至州西合大渡江。羅目江。在峨眉縣南。明統志。源出峨眉山麓。右溪自小天池以東。左溪自黃茅坪以北。至羅目廢縣之上。合二溪之委。爲江水。石甚奇險。舊志。在峨眉縣南二十里。下流至嘉定州界。爲臨江溪。入陽江。大清一統志。

大江東南流。至犍爲縣北。皇朝通志。

又東南流。至犍爲縣北境。有四望溪。合數小水。自東北來注之。曰溪口。稍南。有小水自西來注之。又東南流。有羅葉溪。自西來注之。又東南。經縣城東北而南。有水自東北來注之。又有清水溪。西自馬邊營來注之。溪行三百里。又南有大沫溪。自西來注之。卽朮川司南水。折東南流。有龍溪。自西南來注之。又東南。其東岸有水三。自東北來注之。又有真溪。河自西北來注之。水道提綱。

又東南逕犍爲縣東。大清一統志。

又東南。經敘州府北。又東南。有金沙江來會。此禹貢之岷山江源也。皇朝通志。

又東南。經敘州府治。宜賓縣西北境之朝陽崖下。又東南。經府城北。又東南。金沙江。合鴉龍江諸水。

西南自馬湖府來會。於是江流大盛矣。計岷江自源至此。南行一千七百里。水道提綱。又東南入敘州府宜賓縣界。大清一統志。

臣等謹按南紀大川。以江水爲最鉅。其所經由之域。及包納諸水。縣亘四川、雲南、貴州、湖南、湖北、江西、安徽、江蘇七省之地。與河水同稱巨瀆。禹貢岷山導江。在今四川松潘廳邊外。崇山千里。皆爲岷江東源。至其西南一源。稱金沙江者。則自西藏衛地發源。經喀木諸境。入雲南。以合於四川。其未入邊之前。已四五千里。從來地志。未能詳載。恭惟我聖朝德威廣被。西藏山水。久入版圖。伏覲欽定輿地全圖。欽定大清一統志。西藏江源。有喀七烏蘭布賴楚河巴楚河諸名。道里曲折。皆可縷述。足以補從前志書敘江源者之所未及。茲謹述岷山江源於前。而以西藏諸川。爲大江之西南源者。載於篇中。以紀其實。皇朝通志。

大江源出岷山。山自邊外地。縣數千里。禹貢導江之岷山。亦曰汝山。今四川松潘衛西北也。又有北源岷山。在陝西岷州衛。南源又有二岷山。一在茂州。一在灌縣。皆不如據漢志。湍氏道。卽在今松潘者。爲是其最遠之西南源。直在河源之西者。曰金沙江。所合水亦與河源相近。曰鴉龍江。皆曲折數千里。始與馬湖水會而入江。其爲大江真源乎。大江水盛。遠過黃河。所受納巨川無數。自秦隴終南。太白商雒。房鄖唐鄧以南。滇黔五嶺以北。靡不並會。以東注大海。實四瀆第一瀆也。金沙鴉龍二源。今特詳著於篇。次岷山源之後。水道提綱。

金沙江。卽古麗水。亦曰繩水。曰犁牛河。出藏衛地之犁石山。皇朝通志。

金沙江。卽古麗水。亦曰繩水。亦曰犁牛河。番名木魯烏蘇。亦曰母轟烏素。音之轉也。岷江最上源也。出西藏衛地之巴薩通拉木山東麓。山形高大類乳牛。卽古犁石山也。在黃河源之西。徑一千五百里。若岷江源。則相去二千八百里。山脈自岡底斯山。蜿蜒而東。至此爲諸山祖。其西麓水爲牙爾加藏布河。西流入喀齊國。東麓水爲金沙江。土人一名犁牛河。一名布賴楚河。又名巴楚河。水道提綱。

金沙江。古名麗水。一名神川。一名犁牛河。今番名木魯烏蘇。一名布賴楚河。又名巴楚河。源出衛之喇薩西北八百餘里。有山形如牛。番名巴薩通拉木山。譯言乳牛也。大清一統志。

自後藏西南。溫都斯坦各國雪水。經番地流入中國川江。益東匯爲揚子江也。西域聞見錄。

東北流。有喀七烏蘭水來會。皇朝通志。

東北流。折而東南。又東北流。凡三百餘里。其西北一源最遠。出巴薩通拉木之西五百里。山曰勒斜爾烏藍達普蘇阿林。山高。大石多赤色。兩崖產紫色鹽。在黃河源西二千餘里也。水曰喀七烏蘭水。倫東南流。曲凡九百里。東流來會。水道提綱。

喀七烏蘭水。倫河。源出巴薩通拉木山西北四百餘里。爾什達爾烏蘭達布遜山。東南流五百餘里。入木魯烏蘇。大清一統志。

又東北。有拜都河來會。皇朝通志。

又東北流。其南一源出拜都嶺。北流曰拜都河。自南行三百里來會。水勢始盛。拜都嶺在巴薩通拉

木山東南三百里。其西爲噶爾占古。又嶺。又西卽巴薩山。水道提綱。

又東南會諸水無數。行二千餘里。入喀木境。名布賴楚河。皇朝通志。

三源既合。東北曲曲流。有阿克打木河。合二水自南來注之。阿克打木河。源出布哈山東北。衣克諾木渾烏巴什嶺北之忒門他拉二池。東北流百餘里。有二水。一自東北來。名衣克阿克打木。一自西來。名巴哈阿克打木。合爲一水。西北曲曲東北流五百數十里。入金沙江。北流稍折而西北。有托克托乃烏藍木倫。自西北九百餘里。曲曲流來會。托克托乃烏藍木倫。源出勒斜爾山東北四百里之西。金烏藍拖羅海山。東流曲曲八百里。與金沙江會。自此山繇亘而東。繞木魯烏蘇之北。千數百里。皆名巴顏喀喇山。又北百餘里。折而東流。又東南。有波羅必拉。會枯藍諸水。自南來注之。波羅必拉。源出衣克阿克打木河北之察蘇拉圖山。二水西流而合。又西北而北流。二百里。有烏藍必拉。及枯博渾必拉。自東南合而來會。烏藍必拉。出格爾吉匝噶那山之西麓。有烏藍池。池周七十餘里。自西流出爲必拉。曲曲流百餘里。有巴圖拉水。南自多倫巴土兒嶺來會。又北流。有枯博渾必拉。東北自二池南流。合而西南而西。百餘里來會。又西北。會波羅必拉。又西北五十里。有郭汝克必拉。南自察蘇拉圖山之西北麓。北流來注之。又西北折而東北流。曲曲四百餘里。入金沙江。烏蘭池。東格爾吉匝噶那山。其東卽瀾滄源也。又北而西北。折向東流。有洞布倫山。左右二水。北流合而來注之。洞布倫山。在枯博渾二池之東北。自格爾吉匝噶那山而北。有賽因枯博渾山。連岡相接。其北卽洞布倫山。蜿蜒而北。二百餘里。有二水。一出其西。一出其東。夾山而北。數百里合而西北流。入金沙江。

又東百餘里。至那木唐龍山北。孤羅版波羅濟山之西南。自源東北流至此。已徑一千四百里。始折東南流。有土虎爾河。及烏捏河。自南合諸水來注之。此水三源。西南源出格爾吉匝噶那山之東北。同布勒西洛西山。一曰空楚河。一曰和秦河。兩水北流而合。東北經好勒嶺。及活呵洛好勒查罕峯之東。有水南自卓爾長山之北麓來注之。此山西南麓。卽瀾滄北源也。又北流百餘里。東南源出厄爾几根嶺。西流折而北。合一水。北百餘里。西流來會。曰烏捏必拉。北流經巴木巴拉嶺西。曲折流至薩拉龍搭拉山北。入金沙江。又東南屈曲流。有那木七圖烏藍木倫。西北自巴顏哈拉得里奔山。東南曲曲流。八百餘里。折西南流來會。巴顏哈拉得里奔山。在西金烏藍拖羅海山之東北四百餘里。山甚高大。水東南流。其北岸連山疊嶺。相接不斷。至阿木齊齊山之西南。孤羅版波羅濟山之東北。折而南。有小水自東北來注之。又南折而西南。與金沙江會。金沙北岸。有三大水來會。指喀七烏藍木倫。及托克托乃烏藍木倫。與此河也。水皆深闊難渡。又東南流。折而西南。又南。岐爲數派。二十里復合。東南有濟渡。土人曰多倫鄂羅穆衣多昏水。至此分爲七岐。故名衣多昏。華言濟渡。又東流有枯枯烏蘇。東北自巴顏喀喇西倫衣山來注之。山西北自阿木齊齊山來。甚高大。卽崑崙之祖山也。山南有池。泉水西流。曲曲西南流二百里。入金沙江。又東有濟渡。土人曰巴木布勒衣多昏。此及金沙源之呼爾哈渡拜都渡。及阿合打木河之哈拉烏朱爾渡。皆馬渡也。折而西南。有小水自西南來注之。又南。岐爲二派。三十里復合。南流。左受一小水。當殷得勒圖西勒圖山。及特門烏朱山之西南麓。山脈自巴顏山東南行百餘里。一支西南爲殷得勒圖。又南而西爲特門烏朱。皆高大相

連。又一支東南爲古爾版。有水東自古爾版圖爾哈圖山合諸水來注之。古爾版拖兒哈圖山南麓。有水西流。曰圖哈爾圖哈拉烏蘇。西南流九十里。折西北。曲曲六十餘里。有可蘇七老河。東南自阿拉兒巴顏喀喇達巴罕之西北麓來注之。此水西北流百二十餘里。合北流折而西南。有毛伸和爾和河。自南來注之。又西南五十里。有噶布拉河。自東北來注之。又西南三十里。入金沙江。此二水源。在崑崙西麓。與黃河二源。止隔一山。折南流。有水自西來注之。曰衣克苦苦色必拉。二源合東流入金沙江。有船濟渡。曰衣克苦苦賽爾衣多昏。又南百里。有水自西南來注之。又東南折而東。有池水自東北來注之。又東南。有水自西南來注之。有船濟渡。水曰巴哈苦苦賽必拉。濟渡處冬春用馬。夏秋用皮船。又東折而南。曲曲百餘里。又折向東百五十里。有水東北自雜佛洛巴顏喀喇達巴罕來注之。水曰你林爾喀喇蘇。此山西北。卽拉木拖羅海山。又西卽烏哈那哈達。此山之東北。卽哈拉几達拉克阿林。其東南卽薩喀勒拉克山。北隔星宿海者。又東七十里。有七七爾哈納苦苦烏蘇。自南合諸水來注之。蘇克布蘇克木山。自瀾滄源諸嶺。驟亘而東南。至此有七大山。流出七大水。又有威衣母楂鄂模色勒醋鄂模二池之水。俱東北流。近者八九十里。遠者百餘里。會而爲一。名齊齊爾哈納苦苦烏蘇。又三十里。入金沙江。又東五十餘里。有忒墨圖水。自南來注之。水出打克木喀木維噶山。二源俱西北流。六十餘里。合而北。七十餘里。入金沙江。又東三十餘里。折東南流百里。有小水自北來注之。水出巴顏喀喇達巴罕之東南山。東南流。折而北。而西南。入金沙江。又南有小水。自南來注之。水西南出查蘭打租山東麓。又東南百里。有小水自北來注之。水出匝巴顏喀喇山之西南麓。

南流百餘里。入金沙江。此水隔山。東北卽鴉龍江源。西去達巴罕百五十里。又南流百七十里。東北有小水。西北有角拉克池。水來會。角拉克池。周六十餘里。在蘇噶奔河屯北百六十里。水南流。折東流。七十餘里。入金沙江。水如十字。又東南二百數十里。入喀木境。有水兩源。自西北合而來。會始名布賴楚河。亦曰巴里楚必拉。自那木唐龍山東南至此。約千二百里。所會水二源。西南源在蘇噶奔河屯之東山。噶拉達巴罕之北。有泉十數泓。匯爲一水。東流。曲曲百五十餘里。西北水二源。東南流。合而東南二百里來會。又東二十餘里。入金沙江。亦曰布倫楚必拉。水道提綱。

東北九百餘里。至那木唐龍山北。轉東南流八百餘里。入喀木境。名布拉楚河。那木七圖烏蘭木倫河。源出錫津烏蘭拖羅海山。東北三百餘里。巴顏喀喇得爾奔山。東南流六百餘里。入木魯蘇。以上三水。皆在金沙江源之北岸。甚深闊難渡。大清一統志。

又東南千里。名巴楚河。皇朝通志。

又東南六十里。依山麓。折西南流。一百四十里。又東南流二百里。經衝郭里廟北。有水自北來注之。水出朗朗普格山。東南流。折而西南。曲折三百里。入金沙江。又東七十里。折而南。有濟渡。曰單衝郭里多昏。其西卽衝郭里廟境。又南二百里。有水自東北來注之。水出里達達巴罕。西南流。折而西北。又西南。共二百餘里。入金沙江。始少折而西南流。二百餘里。至里木山之西南。拉都格巴之東北。有水自西北合。二水東南流來會。水流四百餘里。入金沙江。又正南流三百里。至達拉呵達之東。越里拉達巴罕之西。又少折西南流。二百餘里。至巴塘城西境。有水自東北合。二水來會。一水出越里拉

達嶺南麓西南流二百餘里其東南一水西流來會經巴河屯南西入金沙江又南經巴塘他拉西折西南流始名巴楚河有濟渡曰華多昏亦曰巴出必拉多昏自巴里楚至此南流稍西一千四百餘里水道提綱

又南流少西八百餘里至巴塘西六十里名巴楚河大清一統志

又東南六百里入雲南麗江府西北邊界折東北始名金沙江皇朝通志

折南而東稍北而南而西南百數十里有水自西北合三水來注之水出巴河屯西北百里重山中西南曲曲流三百里有一水自東北山來會又南折東南流百餘里有一水自西南山來會又東南稍南九十里入金沙江又東南流百里有敦楚麻楚碩楚三河自東北合而來注之敦楚河亦名登出必拉源出岡里拉麻爾山西南曲曲流二百里折東南流百數十里有札木哈達山流出之馬出必拉即麻楚河也自東北來會又南百餘里有碩楚河自東北來會碩楚河即縮初必拉源出岡里拉麻爾山東北之噶木布乃哈達山東北麓南流曲曲二百數十里經薩木品靈廟東有池水自東北來注之又南百餘里折西南百五十里又西九十里與敦楚河會又西南八十餘里入金沙江今按一統志載西藏金沙江有敦楚河在裏塘城西南一百八十里碩楚河在裏塘城西南一百五十里而無麻楚河又東南九十里有水自東北來注之在布木匝喇叭西南又東南有水自東北來注之水源出八突馬敦楚山西南流經東噶里河屯南架達馬他拉北又西南匯爲圓池又西南流南入金沙江又東南百數十里流入雲南麗江府西北邊界塔城關之東自巴楚渡東南流至此計六

而餘里。又東南。右受一小水。又東南。經巨甸汛。橋頭汛。東。右受小水二。一西北自魯甸北山東南流。經巨甸汛南。東注之。一自橋頭汛西南。東流注之。又東南。至石鼓汛北。右受一小水。水二源。一出拉巴山東南流。有一水自西南來會。東流數十里。又受南來一水。東北流。經石鼓汛西北。入金沙江。正當江之曲處。始折而東北流。經阿喜汛北。又東北。經麗江府北境雪山之北。曰金沙江。自塔城關東南至石鼓。二百數十里。自石鼓東北至雪山。又百餘里。水道提綱。

又轉東南流。六百餘里。至雲南麗江府界。爲金沙江。在府城西北三百二十里。源出吐番界。自舊巨津州。流入府境。環府境三面。流入廢寶山州境。繞而南。入鶴慶州界。又南流。而東折。入大理府界。卽古若水也。又名神川。山海經。南海之內。黑水之間。有木名曰若木。若水出焉。水經注。若水之生。非一水也。黑水之間。厥木所植。水出其下。故水受其稱焉。若水沿流。間關蜀土。唐書南蠻傳。貞元九年。南詔異牟尋大破吐番於神川。遂斷鐵橋。又吐番破麟州。韋臯督諸將分道出。或經神川。納川。元史地理志。麗江路。因江爲名。謂金沙江出金沙。故云。源出吐番界。在會澤縣西一百五十里。自四川會理州流入。又東北入昭通府界。卽古繩若水也。水經注。若水東南流。鮮水注之。一名州江。大渡出徼外。至髦牛道。南流入於若水。又逕越嶲大笮縣。入繩明統志。金沙江一名納夷江。又名黑水。源自武定府下流。入濟慮部。今麗江卽古麗水。元憲宗三年。征大理。從金沙江濟。明統志。古名麗水。源出吐番界。犁石下名犁水。明張機金沙江源流考。金沙源出吐番。共隴川犁牛石下。謂之犁牛河。卽古麗水。其流經吐番鐵城橋。東經麗江府巨津寶山二州。大清一統志。

有無量河。合里楚河。自永北廳來會。皇朝通志。

始折而東南八十里。左受小水。又南流。經府東南境。有無量河。北合里楚河諸水。東自永北府來會。無量河上源。曰多克楚河。亦曰多喀朔河。源出陽頂文廟西北之沙里楚諾爾池。東南流。折而東北。百七十里。又東南數十里。折西南流。三百餘里。折東南流。百餘里。有里楚河。自東北來會。里楚河最遠源。北出里母山東麓。東流。折而南。而東南。二百餘里。有沙魯齊山之水。自西南來會。又東流。百折而南。九十里。又折東流。而東南。二百數十里。至裏塘城東南。有二水。北出波多拉達巴罕。一東南流。一西南流。凡數百里。合而南。又百餘里來會。又西南流。四百里。至米黎拉岡地。會無量河。又東南七十里。入雲南邊界。經永定上府西北之波羅西南之大地。凡二百里。其西岸爲蒙番界也。又東南折而南。有小水。自西來會。折東流。而東南。俗曰五郎河。有六河。合爲一水。自東來會於永北府之北境。六河在府東北境。曰走馬河。三源合西南流。曰站河。大松河。西北流來會。曰清水河。西流而北來會。曰西卜河。南流注之。又西南入無量河也。又西南流。有觀音河。南自府城。東合諸水。繞城北流來會。又西南入金沙江。水道提綱。

自麗江府雪山之北。折而東南。經永北武定二府。至四川會川衛。入四川界。與打衝河合。又南經府境東。東北受無量河之水。里楚河。在裏塘城北三里。源出裏塘城西北一百五十餘里。里母山。沙魯衣山。二水合而東南流。至裏塘城東南。有二水。自北合流注之。轉西南流。三百餘里。至米黎拉岡地。會無量河。入雲南界。大清一統志。

又南有漾共江。自鶴慶州來會。皇朝通志。

又南百里。一水東北。自土順州來。一水西北。自鶴慶府來並會。鶴慶府水。卽鶴川。亦曰漾共江。源出麗江府西北之玉龍山。卽雪山也。南流經府城西。折而東。經城南。有一水北自雪山東麓。南經城東來會。折西南流。經鶴慶府城東而南。有一水西自城南來會。東南流。經落水洞。有二水自西南來注之。又折東北。至江邊村。流入金沙江。至對順州水口。水道提綱。

漾共江。在鶴慶州城東五里。一名鶴川。闊十餘丈。自麗江之清溪。入州東北。盤折五十餘里。溪流衆水。趨赴於此。其自西北來會者。曰石耳河。自東北來會者。曰大小漾泉。自西來會者。曰落鍾河。長庚河。溫水河。銀河。桃樹河。至象眠山麓。羣峯環合。瀾而爲湖。名漾共河。入石穴中。伏流三里而出。名腰江。東流入金沙江。大清一統志。

又東。經賓川州北。有三道河。答旦河來會。皇朝通志。

又東。經賓川州北境。陶營巡司前。有三道河。自西北合來注之。三道河源。一曰程海。在土順州東南境。海腰鋪之西。長四十里。闊二十里。水南流。有北水東北來。與東來之大衝河會。而西流與合。又西南流。合一小水。又南於巡司之東南。入金沙江。曰三道河。稍東。有答旦河。南自州城來注之。答旦河上源。曰綠溪河。出賓川州南境山。兩水北流。合而東北。經州城西。又北。經蔡官營。西北有雞足山。水自西南來會。雞足山。卽九曲巖也。又北至片角西。有一水自東來會。又北有一水自西來會。經答旦東北。入金沙江。水道提綱。

金沙江在賓川州東北一百五十里自鶴慶州流入大清一統志

經姚州北有泡江自雲南縣來會皇朝通志

又東流折而東南經姚安府北境有一泡江西南自雲南縣來注之一泡江源出雲南縣西北梁山東南流經縣城北又東南數十里折東北流二百餘里有你甸河西南自賓川州東南境合數水東北流至人投關南來會又北流六十里有白鹽井水東南自大姚縣西北境來會又折西北流經鐵鎖營西又折東北流入金沙江此水於梁山南流處又分一派經雲南縣城西而南爲河底江之上源水道提綱

一泡江在大姚縣西北一百四十里自大理府雲南縣界流入經姚州之西北注金沙江大清一統志

經大姚縣北又東北有大羅河自永北廳來會皇朝通志

又東經大姚縣北境有小水二皆自南來注之又東北經苴却營北山有大羅河自北合永北土府東南境諸水東南流注之大羅河出永北府東境山東南流有一水自西南來會東北流百里有此那河自西北合四小水曰泚那河東南流來會又東南流入金沙江此水東北岸即四川界水道提綱

金沙江在永北廳城西源自旄牛徼外流入廢瓦魯長官司界繞喇石山西流經卜羅村入永寧土府界又東流至下脚入麗江府由西而東環繞廳治會四川折衝河東流入武定府大清一統志

又東有鴉龍江。自北來會。皇朝通志。

又東三十里。鴉龍江自北來會。南岸雲南界。北岸四川會川衛界也。水道提綱。

自發源處至入內地。流四千餘里。受大水數十。小水無數。水深流急。沿江煙瘴最多。以江出沙金。故名。西域傳。多彌本西羌屬。吐番號難磨濱犁牛河。土多黃金。又地理志。渡西月河二百一十里。至多彌國西界。又經犁牛河。渡籐橋。百里至列驛。明統志。金沙江古名麗水。源出吐番界犁石下。名犁水。訛犁爲麗。流經巨津。通安。寶山三州。按犁石者。以其石如牛也。其水因之得名。故有犁牛之稱。舊志謂此卽古若水。不知若水卽今鴉龍江。其下名打衝河。非金沙江也。或謂此卽繩水。按水經注。若水逕越嶲大笮縣。入繩。繩水出徼外。山海經曰。巴遂之山。繩水出焉。東南流分爲二水。其一水支流東出。逕廣縣。東流注於江。其一水南逕旄牛道。至大笮。與若水合。自下亦通謂之繩水矣。今金沙江大流。正與打衝河合。其說似之。唐樊綽以麗水爲禹貢之黑水。云瀾若江合。經驃國。東入南海。程大昌疑其源流狹小。不足以合雍梁二州疆境。然金沙江自與大江合。不入南海。非黑水也。明僧宗泐望河源詩。自記云。河源出自抹必力赤巴山。番人呼黃河爲抹處犁牛河。爲必力處赤巴者。分界也。其山西南所出之水。則流入犁牛河。東北之水。是爲河源。今自黃河源至金沙江源。僅三百六十餘里。中隔巴顏喀喇山。河源在山之東。金沙江源在山之西南。宗泐之言。與今頗合。必力處卽布賴楚聲相近也。又徐宏祖溯江記源云。禹貢言岷山導江。乃汎濫中國之始。非發源也。中國入河之水。爲省五。入江之水。爲省十一。計其吐納。江倍於河。按其發源。河自崑崙之北。江亦自崑崙之南。非江源。

短而河源長也。宏祖蓋以金沙江爲大江之正源。前人已有言之者。第非出於周覽。其言雖是。而未能條晰。凡水之源。必以遠者大者爲主。而近者小者附之。金沙自發源歷雲南。至敘州府。行七千里。始與岷江合。較岷江之源遠三四倍。大亦倍之。昔人守禹貢岷山導江之文。不敢別有異詞。然岷山特導江所始。非卽江源。猶導河積石。非卽河源也。以今考之。江凡三源。最遠而大者。莫如金沙。次則鴉龍。又次則岷江。三源金沙最西。中爲鴉龍。東爲岷江。鴉龍江流至四川會川。衛西先合。金沙江流至敘州府。又與岷江合。斯爲大江也。按徐宏祖所言江源考之輿圖。頗得原委。至云河自崑崙之北。江自崑崙之西。則以巴顏喀喇山爲崑崙。以星宿海卽爲河源。不知崑崙在回部極西。河源初發在葱嶺和闐諸山。其南境與阿里地之岡底斯山相接。計其道里。在金沙江源之西。尙四千餘里。巴顏喀喇山正當大河伏流重發之地。故所云非江源短而河源長者。未及見今日輿圖。沿舊說而云然也。明僧宗泐所言。亦同此誤。今辨正其說如此。大清一統志。

鴉龍江卽古若水。又名打衝河。源出西番裏塘城西北山中。曰雜楚河。皇朝通志。

鴉龍江卽古若水。一名瀘水。又名打衝河。源出西番裏塘城西北九百里之匝巴顏喀喇山。東南流曰雜楚必拉。其山西北自金沙北岸。黃河源南岸之阿拉巴煙喀喇嶺。東爲雜佛洛巴顏喀喇嶺。又東南此山高大。東麓水南流數十里。折而東。而東南流。二百餘里。有一水自西來會。亦出此山之南。阜實南源也。又東南有一水自東北來會。番人呼爲匝七其哈納必拉。亦曰齊齊爾哈納河也。此山西北去河源僅一度五分。其西北卽薩喀勒拉克山。其正北卽雜普通古查哈蘇拖羅海山。自北而

東千餘里。山北水皆入黃河。山南水皆入此江。水道提綱。

鴉龍江。在裏塘城東二百四十里。源出裏塘城西北八百餘里巴顏喀喇山。番名齊齊爾哈納河。東北流五百餘里。兩傍十餘水注之。至麻木巴顏喀喇山下。有水名麻穆齊齊爾哈納河。西南流與此水會。又流百餘里。東有年尼茫起山所出之謝楚河。西有澤塞岡嶺所出之鄂宜楚爾古河。二水分流入此。名尼雅克楚河。大清一統志。

東南流。合諸水無數。行千三百餘里。至打箭鑪邊外。始名鴉龍江。皇朝通志。

又南流百里。一小水自西山來注之。自此而東南。凡西南岸山相連。西南流者。入金沙。東北流者。俱入此江。又曲曲東南百餘里。有二水自北來注之。其東水曰馬木七其拉哈納必拉。水頗大。又東流八十里。有水自南山中三池東北流注之。水在朧期普格山之西南。其山脈西北自鴉龍江源。南行曲曲而東南。七百餘里。當巴里楚河。折向西南之東岸山中。一水東北匯爲拉木楚池。廣五十餘里。東北流出。爲囊必池。廣六十里。西北流出。爲噶拉木池。廣五十餘里。兩旁皆山。東北流百里。有一水自西南來會。又東北數十里。入鴉龍江。又東有小水自北來注之。又東南流。有水自西南來注之。又東南有水自西北來注之。水出巴顏禿呼馬達巴罕之西重山中。東南流二百餘里來注之。又東南有水自南來注之。又東南百數十里。有一水自西北來注之。水出巴顏禿呼馬嶺之東山。南流折而東南。曲曲行三百餘里來注之。又東南至巴顏喀拉巴林之南。山西南百餘里。折而南流。又東南百餘里。有二水自西南合而來會。又東流百餘里。土人名爲匝楚七其拉哈納必拉。折東南流。至馬木

巴顏哈拉山之西南地。有一水自北合諸水來會。水曰馬木齊齊爾哈納河。一源出山東。南流百數十里。有兩源。水西南流合。自東北來會。又東南流百數十里。有彌那。出必拉。自東北來會。又西南流七十里。入鴉龍江。又南稍東百五十里。有謝楚河。自東北來會。謝楚河。出年尼茫起山。南流曲曲三百里。折西南流百餘里。入鴉龍江。折西南流四十里。有鄂宜楚爾古河。自西來會。鄂宜楚爾古河。亦曰敖楚里必拉。源出澤塞岡嶺之北。大南山流。曲曲西南流二百餘里。折東流二十里。有尼雅克楚河。自東北來會。又曲曲東南流三百餘里。折東北流八十里。入鴉龍江。又東南流百六十里。有水東北自噶叉哥拉嶺來會。噶叉哥拉嶺甚高。水南流。折西南二百里。與東南來一水會。又西南百里。入鴉龍江。折西南流百七十里。有水自西北來注之。又南流八十里。至馬拉木岡嶺之東北地。折東南流百餘里。又折西南流七十餘里。至濟渡處。曰八拉馬朱蘇多渾。亦曰畢爾麻。諸速穆渡。即喀木諸番人。東往打箭鑪販茶路也。渡在打箭鑪邊外。西二百七里。又西南百里。曰鴉龍江。水道提綱。

又南流三百餘里。至四川打箭鑪。瞻對安撫司西。名鴉龍江。大清一統志。

南入四川瞻對土司界。又東南有一水。亦名打衝河。即古瀘水。自雲南順寧府來會。東流。有鹽井河來會。皇朝通志。

南入四川瞻對界。有小水自東北來注之。南經安撫司西而南。自此而南。江之東岸爲四川邊界。江之西岸爲番地。有三小水。自東北來注之。又南有霸泄河。自東北合諸水來注之。水出打箭鑪西南境山西。南流合南北數小水。經瞻對東南境。西南流注之。又南經喇滾司西。有水自東來注之。又西

南流折而東南。有二水合。自東來注之。又南有二水。俱自東北來注之。又東南。自源至此。已徑一千八百里。自瞻對至此。南北徑五百里。有打衝河。自西來會。折而東流。鹽井河亦自西南來會。俗俱名打衝河。打衝河有四源。南源出雲南永寧土府南境山。東北流曰開基河。行百里。折而北流。經甲母山西麓。有一水自西南來會。又北至府城東南。又有一水自西南來會。曰三岔河北。經城東而北。有一水西自無量河東岸高山來會。東北流。經烏角寺東南。入四川鹽井衛西北界。甲母山之北。東數十里。有水西北自番界來。又有瀘枯湖水。自西南來並會。又東數十里。入鴉龍江。瀘枯湖。如曲項葫蘆。在永寧土府東南境。甲母山之東尾。廣二十五里。迤而東北。經川界甲母山之南。左所山之東。中有三洲。東北曲流百餘里。入打衝河。打衝河。卽古瀘水。其北卽西番界。番人名黑惠江。一名納夷江。旣入鴉龍。又名鴉龍江。爲打衝河也。鹽井河。源出鹽井衛南境山之龍塘。西北流。折而東北。六十餘里。至衛西南有二小水。東北自衛東山合。經衛南西流來會。又西流百三十里。會南來一水。折西北流。有水自雲南浪渠土州界。合三水來會。又北八十里。有水自東來會。又東北流百餘里。入鴉龍江。浪渠土州。東南二水合流。曰麥架河。西北流。經州西境而北。合三小水。又西北流。曰挖開河。有小水自西來會。東北入四川界。數十里。有別列河。西自永寧南界。東流來會。又東北有一水。自西來會。又東北數十里。與東來之鹽井河會。水道提綱。

又三百餘里。至四川鹽井衛西北界。名打衝河。大清一統志。

東南流。經永昌府西南境。皇朝通志。

自鹽井衛西北界折而東流。曰三渡水。又東有二水自北合而東南流注之。又東有瓦尾山。水自東北來注之。折東南流。經建昌府西南境。右受小水二。左受小水二。東流至此。二百餘里。水道提綱。有安寧河。自冕寧縣合諸水來會。皇朝通志。

折正南流。三百餘里。左受一水。右受五水。左所河得石河。淑崖河。那噶河。紅果河。皆東南注之。又東南有安寧河。北自寧番衛。經建昌合諸水南流來會。安寧河三源。北源出寧番衛北山。南流合三水。曰瓦那河。又南合西北來一水。南經衛東而南。其西源自衛西南來會。西源三水。一東南流。一東流。一東北流。約二百里始合。曰小村河。東北流。折而東。經衛南與北源會。又南經三家營。東冕山營。西至松林。西北有東南源水。自東來會。東源二水。一西南流。一西北流。百餘里合西流。經冕山營。東南有小相嶺水。自北來注之。又西南流。曰瀘沽。至松林北。與二源會。又南源曰安寧河。右受一小水。又南經禮州所。西有熱水河。自東北來會。又南經建昌西境。有水自東北來。經府城南。合南來之熱水塘。北來之城西水。而西來會。又折東流。復南流。經河西所。東祿馬站西。又南有高橋河。合三水。自東北來注之。又南經德昌所。東南有苦馬河。自西南來注之。折向東南流。一小水自北來注之。又東南有落腰河。自東北來注之。又折西南流。有梁山河。東北自阿尼來注之。又西南至公母營。西北有水。自東來注之。又西南經會川衛。西北有一碗水。東自分水嶺來注之。又西南經迷易所。東。又西南與打衝河會。此水南流八百里。自大渡河以南。越鴛河以西。諸山之水並會。水道提綱。

自冕寧縣北發源南流。經縣東。又南經西昌縣西。又南至會理州西。合若水。一名長河。又名安寧河。

漢書地理志。臺登縣孫水。南至會無。入若水。行七百五十里。又司馬相如傳。橋孫水以通邛笮。水經注。出臺登縣。一名白沙江。南流經邛都縣。又南至會無。入若水。元和志。長河水本名孫水。出臺登縣西北。胡浪山下。明統志。長河在寧蕃衛城東源。水西番界。南流會瀘水。經建昌城。西入金沙江。舊志。長河出寧蕃衛北架州窩下。東南流有蘇州小河源。出架州西番山。流入之。又南流有南河。在衛南二里。源自凹烏西番山。箐流入之。又東流合呷瓜河。太平橋河。總名安寧河。入建昌衛界。經衛西十五里。又南經德昌所東。又東流折西南。經會川衛。西至迷易所。西南合打衝河。大清一統志。

折西南入金沙江。皇朝通志。
打衝河既會安寧河。折西南流。經烏喇渠。南金沙江。自西南來會。會處在會川衛西百十里南岸。雲南大姚縣東北界也。水道提綱。

折東流。一百五十餘里。又折而南。二百餘里。會金沙江。大清一統志。

東南流。東北爲四川界。西南爲雲南界。皇朝通志。

金沙江既會鴉龍。水勢甚盛。又東南流百餘里。東北岸四川會川界。西南岸雲南大姚界。水道提綱。

今以此江爲邊界。江之東屬四川。打箭鑪地。江之西爲番。大清一統志。

有大姚河。自姚州來會。皇朝通志。

有大姚河。自西南來注之。大姚河出姚安府南境山。北流經府城東。而北西北流。至光祿鄉。有小水。

自西來注之。亦曰螳螂川。折東北流。有小關口水。自東南來會。又東北至大姚縣。南有蛟龍江。自西北山經城西來會。又東北流百七十里。有一水自西來會。又東北八十里。折東南流。入金沙江。水道提綱。

在大姚縣城南一里。與姚州蜻蛉河之水合流。經縣東書案山下。又東合蛟龍江之水。又東入金沙江。大清一統志。

經武定州西北。有龍川江。自鎮南州。經楚雄府定遠廣通縣。合諸水來會。皇朝通志。

又東南數十里。有黎溪水。自北來注之。水出會川衛西南山。經黎溪站口。西南流注之。又折南流。經姜驛西南。折而東流。經和曲州西北之巡司。北有龍川江。西南自鎮南州楚雄府定遠廣通。合諸水來注之。龍川江出鎮南州西北山。二源合東南流。經州城南。又東南至呂合。西有紫甸河。二源合。自東北來會。又東南有一水。自西南來會。東南經楚雄府城北而東。有青龍河。南自南安府西南來。經府城東而北注之。折東北流。至腰站北。一水自東南來注之。折北流。至環井東南。有定遠縣西北水。自西來會。又東北經廣通縣北。有水南自縣城西來注之。又東北九十里。有一水。西自山中來會。又北流。至元謀縣西境。又北。有水自縣城北。西北流注之。又北數十里。有水合兩澗。自西南來注之。亦曰西溪河。又北至龍街子。西北折東北流。入金沙江。水道提綱。

龍川江。番名薄藏布河。在薄宗城南二里。有二源。一源發於薄宗城東北三百餘里春多嶺。名鴨龍河。合六水西南流。一源發於薄宗城西北五百餘里東拉嶺。名厄楚河。合十餘水東南流。至薄宗城。

前二水合流。名薄藏布河。西南流。經噶克卜部落。及羅克卜札所屬之們布部落。入雲南騰越州界。爲龍川江。明統志。龍川江源出娥昌蠻地。七藏甸。傍高黎共山北渡口。有籐索橋。下流至太公城。合大盈江。雲南通志。其源有三。一出光明山。一出阿幸山。一出南香甸山。三水合流。名龍川江。下流至虎踞關。入緬甸。大清一統志。

經武定州北。有武定州水。四川會理州水。並來會。皇朝通志。

又東。經武定府北境之白馬口。南岸有和曲州水。自西南來。北岸有會川衛水。自北來。並會。大環州水。出南境。大麥地。西北流。折而東北。合東南來一水。東北流百餘里。經州城東。有暮連水。自東來。會折而東北。數十里。至白馬口。入金沙江。會川衛水。出衛北分水嶺。兩源。一南流。一西南流。合而南。經衛東。又曲曲南流。合西北來一水。又南有東安河。東北自魯魁山。姜州堡來注之。又南流入金沙江。又東北。經獅子廠南府境。及祿勸州境之北洒馬基。南岸雲南界。北岸四川界。水道提綱。

金沙江在州北三百八十里。自姚州東流。經元謀縣境。又流入州北界。又東達四川會理州界之舊黎溪州。蒙氏封爲四瀆之一。沿江多嵐瘴。行人以雨中及夜渡可無虞。大清一統志。

又東北有普渡河。自雲南府治昆明縣之滇池。匯呈貢縣。晉寧州。昆陽州諸水。北流會安寧州。富民縣。及武定州。祿勸縣諸水來會。皇朝通志。

又東北有普渡河。南自雲南府治昆明縣之滇池。匯呈貢。晉寧。昆陽諸水。北流會安寧。富民。及武定。祿勸諸水來會。滇池在雲南府南。自府城西迤東南。至呈貢縣西南。折而西南。經晉寧州北。又西南。

至昆陽州東北斜長百二十餘里。東西廣三四十里不等。其上源卽府城東二河源。出東北嵩明州。接界之山。二水合南流。又分爲二。俱南流。經城東而南注滇池。又一源在府西境山中。東南流入池。在碧雞關北三十里。關之南卽太華山。當池西岸。滇池卽古黑水。亦曰昆明池也。呈貢縣北有水西。南流。經板橋驛西。又南折而西。受北來一小水。又西南入池。池經縣城西稍南。又有二小水自東來。合注之池。又西南經晉寧州北。而西。有一水自西南山北流。經城西而北注之池。又西南經昆陽州東北。有小水自南來。經城東而北注之池。於州東折而北。經六街子東。始西北流。出一河。至安寧州東南。有一水自西南。經三泊廢縣南。又東北流來會。又北。經州城東。又北。經太華山西。又北。循西岸山麓。曲折稍東。經富民縣城東南。又東北百里。至祿勸州東南境。有烏龍江合掌鳩河。自西來會。烏龍江卽武定府西南水。掌鳩河卽府北境白馬口東山所出。南流。經上撒甸南杉松營東。而南。經州城之東者也。又北。曲曲曰普渡河。行二百餘里。入金沙江。正武定府東北。與四川東川府接界處。水道提綱。

普渡河。在會澤縣西北二百五十里。源出武定府。流入金沙江。大清一統志。今按武定府。今降爲州。

東北入東川府界。有玉虹河。會通河。自會理州來會。皇朝通志。

金沙江。既會滇池水。東北入四川東川府界。經雪山北。有玉虹河。西北自苦竹壩來注之。水出會理州西北山。合數水。又東數十里。折而北流。八十里。有會通河。西北自會理州城。合諸水來注之。水兩

源出州北山南流百五十里其西北一水東南來會又東南流八十里至州北有蘆那山水自西南來會經城而東南流四十里有一水自東北來會於梁山之麓又東南七十餘里入金沙江水道提綱

玉虹河在會理州東自州東北發源南流經苦竹壩又東南入金沙江會通河在會理州東舊州城東有二源出州東北山箐中流百餘里合流經舊州東至涼山西合一水東南入金沙江大清一統志

又東北有小江自尋甸州來會皇朝通志

又北折而東流有小江自南來注之小江源出雲南尋甸州西南之清水海形如懸瓠周二十餘里東北流經州西境百里至空山西有小水自東來會又東北入東川府南界經涼水塘西北折西北流經阿汪東又西北有滄溪自南來花溝自西南來俱會滄溪南出尋甸西北界山北流經花溝村東花溝出南山北經玉龍村東者也三水既合經必古壩西又西北流受西南來一水又折北流經府西北境有小水自則補汛西流來會西北入金沙江江亦折而西北流也水道提綱

璧谷江在會澤縣西南一百三十里源出曲靖府尋甸州之白澤河匯果馬車湖倘甸倉溪諸水流爲江陡峻深峽土人結籐爲橋以通往來西北流入金沙江大清一統志

又東北有以禮河自東川府來會皇朝通志

又折西北流四十餘里折東北流六十里有以禮河東南自東川府城來注之以禮河源出府南境

有池泉西北流折而東北有反補地南北二水自東南來會曰以濯河北流又有洛泥河自東來會折西北流經府南境而北經城西又北百餘里入金沙江水道提綱

矣濯河在會澤縣南十里受縣南各箐溪水流入金沙江義通河在會澤縣西北十餘里源出矣濯河匯小龍潭水經府治西門又經北門轉舊土城東過石嘴矣式梅子箐抵華宜寨入中右兩河本朝乾隆二十一年知府義寧建分水堰引以禮河水注之大清一統志

又東北有雲南貴州界上水來會皇朝通志

又東北五十餘里折西北流百餘里有牛欄江自東南合雲南貴州界上諸水來注之牛欄江上源即雲南尋甸州南之車洪江也車洪江源出雲南府東北之嵩明州有數水西南有四源西一源西北一源東北一源或經州城東或經城西至東南境河口合而東流折東北百餘里至尋甸州東南有一水西自城南來會又東北有龍潭河東南自曲靖府馬龍州合一水來會又東北百餘里至潯益州北界有沙河東西自東川界東流注之又東北爲兩省界百餘里折而西北入東川界又北經者海汛東江邊塘西又北有水自東來注之自此東岸爲貴州界百餘里有水自東來注之又北至烏蒙土府南境曰牛欄江西北流有小水自東北來注之又有頭道河西南自東川東北之墨土溪合數水來會又西曲曲數十里至索橋南受一小水又西北百五十里入金沙江出貴州界者南曰瓦擦河出威寧州西南境兩水合西流入沙河又有松樹河西北流入沙河北曰烏蒙箐河自府西北境二水合西流入沙河以下爲牛欄江水道提綱

車洪江。在會澤縣東一百二十里。源出曲靖府尋甸州車湖。又受馬龍州城外嵩明洲秀嵩湖水。並匯於此流。與牛欄金沙二江合。牛欄江。在會澤縣北一百二十里。源出曲靖府尋甸州下流。合金沙江。舊志。牛欄江。源出雲南縣楊林海子。自霑益州流入。大清一統志。

經昭通府西北。有馬湖水來會。皇朝通志。

又北三百餘里。左右受數小水。經烏蒙西北境。馬湖府西南境。折東北流。二百七十里。至蠻夷司南。有馬湖水自西北來注之。馬湖。西自黎州山東南流。八十里。有水自西南來會。曰黃鐘溪。東北流百里有二水。自西北合。而東南流來會。又東北百餘里。曰芭蕉溪。折東南流。至中都西南。有水自北來注之。又東南七十里。至蠻夷司北。有水自北來注之。又南經司東南。入金沙江。在府西八十里。水道提綱。

金沙江。在恩安縣西北。自東川府流入境。逕永善縣城西。又東北入四川敘州府。水經注。繩水自合卑水。又東北至朱提縣西。爲瀘江水。明統志。江在府西南二百六十里。流折東北。經東川府西。馬湖府南。大清一統志。

又東有橫江。自昭通府。經四川筠連。慶符縣來會。皇朝通志。

折東南流三十里。經平彝司南。有大鹿溪。自西南合。二水來注之。又東流六十里。經尼溪司南。又東至府城南。有三渡水。自南來注之。又稍東北流。北岸受小水二。俱府東水。南岸受小水一。又東至安邊鋪南。有橫江。西南自烏蒙土府合。諸水來會。敘州府治。宜賓縣西南境也。橫江。源出烏蒙土府東。

南龍洞山下之大湖。西南迤延五十餘里。西流折而北。有二水。自西南合而來會。又北匯爲一湖。經府西南。又西北流。有梁山。水自西來會。折東北流。百餘里。又北流。曰撒油河。經雪山東百餘里。有一水自西南來。一水合二溪。自東南來。曰各魁河。並會。又北流數十里。有會通溪。自西來會。又折東北流。經筠連縣。高縣西境。曰大文溪。有小文溪。自西來會。又東北經慶符縣西境。始曰橫江。又東北九十里。至安邊鋪。南北入金沙江。此水源流曲折。行五百餘里。亦曰石門江。水道提綱。

自昭通府界流入東北。逕慶符縣西。又東北至宜賓縣界。入馬湖江。明統志。石門江在府西南一百三十里。俗呼橫江。又名小江。源出烏蒙蠻部。經府境。與馬湖江合。大清一統志。

又東北經敘州府城。東會岷江。此大江之西南源也。皇朝通志。

又東北八十餘里。經府城南。又東北。岷江自西北來會。會口在城東數里。其南有來復渡水。自西南來注之。來復渡水。上源曰宋江。有六溪皆出南大山。流至平寨而合。東北流經高縣城東。折西流而北。有羊落溝。黑桃灣。二水。自西南來。東北流經筠連縣城西北。又東北流。至高縣城西北來會。又西北。曲曲經慶符縣城南。而西而北。又東北。曲曲百五十里。入江。正對岷江口。按金沙自犁石發源。東北流。折而東南。又西南。折而東南。至麗江府界。已四千二百餘里。自雪山北折而南。經鶴慶東。又南折而東。經永北南。姚安北。又折而南。而東北。經會川南。武定北。東川西。又折而北。至馬湖南。又折而東北。至敘州府城東。與岷江會。又二千五百餘里。源遠流長。所受大水數十。小水無數。雖灘多石險。舟楫難行。其爲大江上源無疑也。水道提綱。

至敘州府與川江合。按此卽古若水。一名瀘水。亦大江之一源也。史記五帝紀黃帝子昌意降居若水。山海經南海之內黑水青水之間有木名曰若木。若水出焉。漢書地理志若水出旄牛縣徼外。南至大笮入繩水。明統志打衝河蠻名黑惠江。又名納夷江。源出吐番下流合金沙江。大清一統志。

此
页
空
白

續行水金鑑卷第一百四十七

江水原委二 四川

大江東北流。有福溪自富順縣來會。皇朝通志。

自敘州府城東東北流。有福溪自北來注之。福溪出富順縣西南境山。南流約百數十里。至府東北境。折東南入江。水道提綱。

大江自嘉定府犍爲縣流入。東南流逕宣化故城北。又東遶府城北而東南出合馬湖江。大清一統志。

經南溪縣西南。皇朝通志。

又東北經南溪縣西南。有桂溪自西北來注之。桂溪出南溪縣西北山。東南流至縣城西南入江。水道提綱。

又東逕南溪縣南。大清一統志。

有安寧江合琪縣。長寧、興文諸縣水來會。皇朝通志。

又東數里折南流。中有巨灘。又南十數里有小灘。又折東流。有安寧江西南合琪縣。長寧、興文諸水來注之。南溪縣西江心有石筍灘。其東一巨灘。當江流曲處。銅鼓灘也。又南十數里。又有石灘。當江安縣之西北。灘南卽安寧河口。河口之東卽江安城。安寧江卽綿水。琪縣西南之琪溪。其一流也。

東北流百餘里。至安寧鎮。南有長寧縣。東西二水。至縣北。東北流。合東南來一水。又東北。合興文縣東北流之一水。又北。至鎮南來會。經梅嶺西。又東北百餘里。至江安城西北入江。興文縣水。卽三渡河南。出八望山北流者。水道提綱。

綿水。今名綿陽河。源出綿竹縣西北。東南流入德陽縣界。又南。入漢州界。漢書地理志。綿竹縣紫巖山。綿水所出。東至新都。北入雒。大清一統志。

經江安縣北。納溪縣西。有納溪。自永寧縣。及貴州之永寧州來會。皇朝通志。

東經江安縣城北。折東南流。有怡樂溪。自西南來注之。又折而北。十數里。有上下二溪。自北來注之。又折而東。二十餘里。有清溪水。自南來注之。又東北流。有二巨灘。北受小溪水。又東北。經納溪縣西。有納溪。南自永寧衛來注之。曰納溪口。納溪俗曰清水河。源出永寧衛。有兩源。一東南出貴州永寧縣摩泥站界。一南出雪山山。北流經唐家灣。與吼西關北水。曰道場溪者。合東北流。至衛東南。與貴州界水合。而北數十里。東受二小水。又北有落巖河二水。北至大壩寺。合東北流。又南受一水。經瀘衛東。又北。受西來一水。又東流來會。又北。曲曲二百餘里。至納溪縣南境。折西北流。入江。水道提綱。

大江自南溪入江安境。東南流三十五里。至縣城北。又東折。北流四十五里。入納溪縣界。大清一統志。

經瀘州城南。前自灌口分出之沱江。合綿竹縣。德陽縣之綿水。石亭江。什邡縣之白魚河。漢州之雒水。資陽縣之楊花溪。仁壽縣之珠溪。富順縣之觀音河。榮縣之榮河。隆昌縣之隆橋河。先後合流來會。皇朝通

又北有小水。自東南來注之。又北折東北流。經瀘州城南而東。沱江合諸水。自西北經州城北而東。南來會。沱水自灌口東。分爲三渠。北曰太平二河。南曰柏木河。俱東流。太平二河。經崇寧縣北而合。又東有濛水。自西北來注之。又分爲三派。柏木河。東南流。稍折而東北。至焦沙尾之南四渠。俱合東。南流。會北來綿維諸水而南也。支港縱橫。數百里間。皆成澤國。指其要領。西自灌口。東經郫縣之北。新繁縣之南。成都府治華陽縣之北。新都縣。金堂縣之南。前後支流。皆沱江也。亦曰瀟江。亦曰郫江。其所會北來之水。最大者一曰綿水。合名綿陽河。源出綿竹縣西北境之紫巖山。東南流。經縣北境百八十餘里。至德陽縣東北境。折南流。經縣東至漢州東境。凡百七十里。折西南流。與西北來之雒水會而南。曰雁水。一曰石亭江。有三源。一名陡子河。東南流。合北來之白水河。南流。經綿竹縣城西。南。又東南數十里。會西北來之水。一名射水河。東南流。合北來之龍蟬河。又東南經縣西境。又東南與陡子河會。又南流。有一水自西來會。曰石亭江。又東南流。經德陽西南。漢州東境。又南與西來之雒水會。而合綿水。一曰白魚河。源出什邡縣北境山。東南流。經縣東境。及漢州東北。有平橋河。合雒水來會。一曰雒水。源出什邡縣西北之章山。亦曰雒通山。東南流。經縣南境。俗曰鴨子河。又東南流。至漢州城北而東。有平橋河。西北自什邡城北。東南流來會。又東南會石亭水。又南會綿水。總名雁水。又南有濛水支渠。自西而東。經彭縣北。又東經漢州南。曰馬水河者。又東南合沱江支渠之清白江。南流來會。又東南至焦沙尾東。金堂新都之沱江支渠。並合而來會。自此而南曰瀟雒。亦曰雁水。

亦曰中水。實沱江也。當新都縣東南。有龍泉水。南自龍泉山東北。流入沱江。沱江自焦沙尾東南流。八十餘里。折西南流。百二十餘里。至簡州東北。有赤水河。自西北合。二水來注之。卽絳水。亦名牛鞞水也。又南經州城東。又東南百里。至資陽縣東北。有楊花溪。東北自樂至縣西境山。合二水來注之。又南經縣城東而南。有資溪。自縣西北山來注之。又南五十餘里。有珠溪。自西北來注之。珠溪二源。一西北出仁壽縣東北境。資陽縣西境二山。水東南流而合。一西南出仁壽南之龍回山。青石鋪。東北流百餘里。與西北源合。東流。又南合一水。又東南入沱江。至此曰珠江。亦曰資江也。又東南百里。經資陽城西而東。經其南。有唐明渡。又東有小溪。自北來注之。又東南百餘里。至內江縣西北境。折東北流。經縣城西北。又東北折而南。經其東。又南有高橋溪。及東清流溪。自東北來合注之。經雄木鎮西稍。曲曲西南流。百五十里。至富順縣東北。有觀音河。卽鼈水。自東北來注之。又南經城東。折而西。經其南。而西南流。有榮溪。西北自榮縣東南流。合諸河水。鹽井水。東南注之。至此雒江名金川。亦曰中水。又折而東。流數十里。折南流。曲曲而東。有隆橋河。東北承際昌縣水。及石橋河。西南流來注之。又東南百里。至瀘州西北。有沔水河。自東北來注之。又東經州城北。而東南與大江會於州東也。自灌口至復入處。曲折行九百餘里。富順縣西南所合之榮河。源出榮縣西北之東川溝。東南流。經城西而南。與城東北之梧桐溝會。東南流。曰中溪河。折而東。經貫井。及自流井之南。有威遠縣北之付家河。東南流。合北來之跳石河。黨木溪。及龍令河三水。南流注之。又東經火井南。有西牛河。自北合三小水。有胡家河。自西南來並注之。又東南流。經沿灘場。東折西南流。曰之溪。經富順之西。

南折而東與沱江會。水道提綱。

大江經納溪縣城北入瀘州境三十里至州東北合沱江名曰合江。沱江見前。綿水在漢州東自德陽縣流入又南入洛水元和志在雒縣東三十里舊志俗稱綿陽河入州境東南流二十里有土溪河亦自德陽流入焉又二十五里入石亭江。石亭水自成都縣流逕什邡縣又逕綿竹縣西南又東南逕德陽西南又東南入漢州界舊志自什邡逕綿竹縣西南火燒堰又東南三十里抵石亭鋪又東三十里至德陽去縣二十里與漢州南北爲界又東南三十里至漢州晉永康二年李流軍綿竹趙叡使費遠斷北道屯綿竹之石亭卽此。白魚河自什邡縣發源東南流百餘里至漢州東南入沈犀河。雒江自什邡縣西北發源東南流經綿竹德陽二縣界又南經漢州中江自簡州流入資陽縣界謂之雁江東南流七十里經縣東一里轉南合資溪孔子溪又七十里入資陽縣爲資江亦曰珠江。大清一統志。

東南流經合江縣北有赤水河自鎮雄州經貴州之畢節縣入四川境合梓潼縣水仁懷廳水來會皇朝通志。

大江既會沱江自瀘州東稍北受北來龍溪水東有巨灘稍北折東南流又一巨灘有大河溪大橋溪俱自西南來注之又東南流經合溪縣城北而東北流有赤水河西南自鎮雄土府東北合諸水經合江城東而北注之赤水河出鎮雄土府西北山東流折而東北經府北境曰綿陽河有阿朗河及北來一水自西北來會折東南流入貴州界經永寧縣南境百五十里有小河西南自畢節縣北

境合孫家河板橋河諸水。東北流來會。又東北流四十里。入四川界。又東北七十里。經龍場營西北。折而東流。有獬子關水。自西南來會。又東百三十里。過鄆家渡。至黎民鎮北。有一水。西南自清水塘來注之。又東有沙鎮河。南合三水。北流來會。又東北流七十里。有鹽井河。東南白楓香鎮來注之。又北流。東受一水。折西北流七十餘里。有齋鄆河。東自梓潼縣東北山水。合龍巖山水。西流經縣城南。西行百七十里。又北合一水。西南流來會。又西有九溪河。自南合西南來之乘龍山水。北流注之。西經脈困塘。北有古蘭河。自西南來注之。又西北五十里。至土城西。有水思河。自東來。儒溪泥溪。自西來。並注之。又西北有盤橋溪。自東猿猴溪。自西南來。先後注之。折東北流六十餘里。有金沙溪。自東來。葫蘆溪。自東北來。先後注之。又折西流。稍北百餘里。北受堯壩溪。沙壩溪。二水。後溪一水。至仁懷縣西南境。有風溪。自西南來注之。折北流。有永壽橋水。自西來注之。又北經縣城。西折而經其北。又東北流百四十里。經丁山西麓。又東北七十里。經合江縣城東。又北入大江。此水曲折行。受數小水。幾及千里。水道提綱。

又南經合江北。赤水河。在縣東一百八十里。源出鎮雄州界水腦洞。流經赤水衛。又東北合永寧河。明初郭英等出永寧。敗賊於赤水河。卽此。大清一統志。

又東北有大麓溪。自榮昌縣來會。皇朝通志。

又有高洞河。自東南來注之。又東北有坪坦河。自東來注之。又北曲曲流。有巨灘。有大鹿溪。自西北來注之。水出榮昌縣南境山。東南流入江。水道提綱。

又東北有洙溶溪。自永川縣來會。皇朝通志。

又東北流有洙溶溪。北自永川縣來注之。洙溶溪。卽車對河。源有二。一出永川縣東北山。西南流至縣城東南。有一水自西來會。遂南而稍西流百餘里。折東南流。九十里入大江。水道提綱。

侯溪。在永川縣南。元和志。縣東西北三面皆枕侯溪。寰宇記。溪在縣西南一百八十步。舊志。有文曲水。繞縣城。盤旋四面流。連松子澗。蓋卽侯水也。其松子澗。在縣南一百里。源出龍洞山。別流東入大江口。按輿圖。此水上流曰車對河。下流曰洙溶溪。自縣南流入江。大清一統志。

又東北有油溪。自璧山縣江津縣來會。皇朝通志。

有對溪。自南來注之。又東折而北。而東。而北。而西北流。有五洞溪。自西來注之。又北有油溪。自北合二水來注之。油溪出璧山縣城北。南流曲曲。經來鳳驛西。又東南流。至江津縣北境。折西南流。有馬坊河。西北自永川縣東北山。東南流來會。又南流入江。水道提綱。

油溪。在璧山西。源出湯峽口。南流三十里。出馬坊橋。又六十里。至鬪牛石。入江津縣界。與來鳳橋溪合流。爲油溪。又三十里。至縣西四十里。油溪口入大江。王存九域志。璧山縣有油溪。又來鳳橋溪。在璧山縣東。源亦出湯峽口。東南流八十里。出來鳳橋。四十里。亦至鬪牛石。與馬坊橋合。大清一統志。經江津縣西北有綦江。自桐梓縣綦江縣來會。皇朝通志。

又曲曲而東而南。有藥城溪。自南來注之。又東北經江津縣城西北。江自合江東北至此。凡九折。皆數十里。一曲。徑二百里。中紆折流。至三百數十里。又東北流數十里。有綦江。自南合諸水來注之。曰

夔溪口。綦江源出桐梓縣北境山，兩源合北流，百數十里，曰松坎河，受西南來一小水，又北數十里，有坡頭河，自東北山來注之，又北流西受一水，又北九十里，有三溪河，自東來會，又北七十里，經綦江縣城東而北，有龍角溪，自東合三小水來會，又折西流，經城北，又西北流，有沙溪溝，自東北來，有清溪河，自西南合三岔溝，及魚子溪水，東北流三百餘里來會，又西北百里，北受一水，又北有孫溪河，西南合棋盤山水來會，又北至江津東境，又北入江。水道提綱。

南江，在綦江縣東，自貴州遵義府桐梓縣流入，又西北流入江津縣，東入大江。古名夔溪，今名綦江。元和志：三溪縣內有夔溪、東溪、葛溪，其夔溪在三溪縣西，又經南川縣南四十步。寰宇記：夔溪自三溪縣西北流，經丹溪廢縣，又北流，經南川縣東南四十步，又北至江津縣南十四里，西北流入大江。輿地紀勝：夔溪，亦名夜郎溪，從夜郎境流入南平軍城下，又東溪在軍之西北。元統志：南江在南川縣衆溪會合，至三溪口，可通舟楫，行三十里，至綦市，又至南江口入江。名勝志：南江入綦縣界，其色蒼白，名曰綦江。又夔江在江津縣東南三十里，來自夜郎境，濶三十里，深七尺，可通二十石舟。府志：綦江有三源，一自桐梓縣坡頭河流四十里，至綦江縣界捍水鎮，一自桐梓縣松坎流五十里，一自仁懷縣李漢壩流六十里，亦皆至捍水鎮。三派合流，名三岔河，又順流一百十里，入縣界，爲綦江，又順流四十里，至縣城東，又西北三十里，至白渡口，入江津縣界，又一百二十里，南江口入大江。大清

一統志。

又北至重慶府巴縣南，有涪江，合白水、嘉陵江，渠河來會。皇朝通志。

又北八十里。有小水。自西來。有甘蔗溪。自東南來注之。中有巨灘。又北稍東九十里。受東南來小水。二至重慶府治巴縣南。經明月峽。折而東。抱城東而北。有涪江。合白水嘉陵渠河三巨川。盡並龍安。潼川。保寧。順慶四府諸州縣之水。自西北出魚鹿峽。經府城北而東來會。水道提綱。

涪江。出松潘廳東北之小分水嶺。東南流。經龍安府治平武縣西北。有白馬河來會。又南經江油縣東南。又經彰明縣。分流經城之左右而合。有小江河。卽廉讓水。出平武縣。經江油縣來會。又南有石板河。自石泉縣合諸水來會。經綿州東南。有茶坪河。自安縣來會。又東南經潼川府三臺縣西北。有中江水。自中江縣來會。經射洪縣。有唐溪溪來會。又東有梓潼水。自鹽亭縣來會。又南有鄴江來會。折東南。有馬桑溪。自蓬溪縣來會。經遂寧縣東。又南流。有關箭溪。合樂至縣水。安居場水來會。經合州西南。有立石河。自永川壁山銅梁縣來會。又東嘉陵江渠河來會。東南流。至重慶府治巴縣西北。折東流入大江。皇朝通志。

涪江。古涪水。出松潘衛東稍北之小分水嶺。西水皆入岷江。嶺東二源。合而東北流。又有二源。出西北山。合而東南流來會。卽邊界弓橫口之南山水也。東經三合堡南。有一水。北自弓橫口東南大山南流。經堡東來會。三水會於三合堡南。東南流六十里。有一水自東北來會。又南八十里。經小河營。西曰小河。又南有木瓜河。自西來會。水出松潘衛之東大山東南流。又東南流五十里。北有水進河。南有黑水溝。並來會。水進河出小河營東北山。黑水溝出西南山。又東過鐵索橋。橋曰永濟。龍安西達松潘道也。凡六十里。有仙女山水。自北來注之。又東南經龍安府治平武縣西北境之璋塔壩南。有一水自西南來注之。又東五十里。經鐵龍堡南。有白馬河。自東北合二水來會。一西北出北邊界。

山東南流百餘里折而南至陽地隘西其一出青川所西北與陝西界之摩天嶺西山西南流八十餘里至隘北來會又西南曲曲流注之又南流經府城西而南折東南流經古城南又東南有一水自北來注之即青川溪源山西北麓水也至此始曰涪江又東南八十餘里至舊州東有白支河自東北來注之又折西南流經煽惑溝東又南經江油縣城東南自舊州南至此一百三十里又西南流至中壩北分爲二派至壩南復合稍南至彭明縣城又分而經城之東西有小江河即古廉讓水自西北來會小江河源出平武縣西南山一出縣南藥叢山會於大郢堡之南東南流百餘里至平通堡西折西南流數十里經江油縣西境又南合縣西一水又南經中壩西又南至彭明縣城之西北會涪江至城南復合又南經漫波渡有石板河西北自石泉縣合諸水來會石板河二源西北源出平番營東南山東南流百餘里至白草壩南又東南七十里合石泉北山之龍安水南流五十里經石泉縣城西又南而神溪河自西南來會西南源神溪河出茂州東北山東北流百里有水北自壩底堡來會又東北五十里會龍安水東流經縣南九十里有都壩河自東北來注之折南流經兩山間曰石板河折東南流至漫波渡南入涪江龍安水即安昌水又南折而東經綿州北境有東河自東北來注之東河即古瀑水又南經州城東而南有茶坪河西北自安縣來注之茶坪河出安縣西境茶坪山東流經桑棗園北又東北至縣城西南有水自西北來經城西而南注之又東南流經義興場花衙子北又東南經州城南又東南入涪江又東南百五十里至潼川府治三臺縣西北境又東南經府城東北又東南有中江水西自中江縣北合羅江縣諸水來注之中江今曰羅江河

源有二。北曰黑水。河南曰冷水河。地在茶坪山之南。綿竹水之北。重山連接。俱東南流。百餘里。至羅江縣城北。合而南流。經城東。又東南。百數十里。經中江縣城西。有小水自西南來注之。折東。經城南而東。有小水自北來注之。又東。曲曲百四十里。經府城南。又東入涪江。此水自羅江以西。隔重山。其西水卽綿陽河。南合沱江者也。又東南有桃花河。自北來注之。水三源。出北山。合而南流。入涪。又東南經射洪縣城北。折而南。經其東。又南有唐橋溪。自西來注之。唐橋溪出射洪縣西境山。東流至縣南境。入涪江。折而東。十餘里。有梓潼水。北自鹽亭縣。合諸水來注之。梓潼水卽射江。亦曰瀾江。源出白支河源之東南。劍州西北五子山之西。大山。南流山中百里。折東南流六十里。受東北一小水。折而西南流。經梓潼縣城西。又東南流。曰梓潼河。折而南。有鷺溪水。自東北來會。又南至鹽亭縣西北境。有石牛鋪水。合魏城驛水。自西北來會。又東南流。經鹽亭縣城西。南。又東南有少沙河。自東北來會。又折西南流。有鬼溪河。自東北來會。又南至射洪東南之獨坐山。入涪江。又曲而南。而東折。西南流數十里。復東南流。有楊桃溪。自東北來注之。又南經清隄渡。曲曲而南。有鄭江。合諸水自西來注之。鄭江三源。東南流。有水西南自河邊場之西南山。東北流。經蓬萊鎮南。而東來會。又東至黃龍鋪之西北。入涪江。涪江自此亦折向東也。折東流而南。有馬桑溪。東北自蓬溪縣來注之。溪出縣西北文井場之西。高鳳山。東流。經場南。折南流。又西南。經縣城西。北。又西南。數十里。折而南流。至遂寧縣北境。入涪江。又東南。經遂寧縣城東。又南流。折而東南。有兜溪。自北來注之。又東南百三十里。折而西南三十里。又南流。有關箭溪。自西合安岳。安居場諸水來注之。安居場水。出樂至縣東境山。三源

合東北流。經場北。又合一水。折東南流。有魚海河。西南自安岳縣來會。安岳縣城。東會西北來。及西南來二水。東北流。又合北來二小水。折而東流。與安居場水會。又東南流。有灌子河。自西南合白水。河來會。又東南曰關箭溪。東入涪江。又折東稍北流數十里。至合州西北境。折而南流。經州城西而南。有立石河。西南自永川璧山銅梁來注之。立石河。出永川縣西南山。東北流。有雙石河。自北合二水來會。又東北經縣北境。又東北百餘里。經璧山縣北境。又東北百里有晏渡河。西自銅梁縣東北流來會。又東北至合州城之西南。入涪江。東經城南嘉陵江。合渠河。自東北來會。涪江源流。幾及千里。水道提綱。

涪江。自潼川府遂寧縣。流入合州界。至州城東南。與漢渠諸水合流。卽內江也。漢書地理志。剛氏道涪水。南至墊江。入漢水。經注。涪水西南。至小廣魏縣南。入於墊江。亦謂之內水。元和志。涪江水在銅梁縣東北四十里。又經石鏡縣南二百步。舊志。涪江自遂寧縣入安居廢縣界。東南流五十步。合兜溪。又三百里。經縣北門外。又十里。入合州界。又一百四十里。至州東南合嘉陵江。大清一統志。

嘉陵江。卽西漢水。出秦州西南之蟠冢山。山在漢源蟠冢之西北四百餘里。非禹貢之蟠冢也。西漢水西南流。有橫水嶺。水自西和縣來會。折西流。至禮縣東南。又西經西和縣西北。有岷峨江水來會。經階州東北。成縣西南。有潭水來會。經成縣南界。略陽縣西北。有黑峪江。自秦州來會。又東南有九龍池水。自徽縣來會。又南有嘉陵谷水。自鳳縣經兩當縣。合諸水來會。始名嘉陵江。南流。經略陽縣西。又經寧羌州西北。又南經四川廣元縣北界。有七盤關水來會。經廣元縣西。昭化縣東北。有白水江來會。白水江。卽古桓水。

亦曰墊江。出邊外洮源東南之西傾山。東南流。入甘肅邊武都關南。有白龍江。自岷州分水嶺東南流。合諸水來會。經階州西南。又經文縣北。又南入四川界。經昭化縣北。有黃沙江來會。又東南入於嘉陵江。嘉陵江西南流。有劍水。自劍州來會。經蒼溪縣西。又經保寧府西南。有東河。自寧羌州。經廣元縣來會。經南部縣西北。蓬州西北。有西河。自劍州。經閬中南部縣來會。經南充縣東北。有蠻子河。自西充縣來會。又東南有西溪。自岳池縣來會。經定遠縣東北。折而東。至合州東北。有渠河來會。又南流。入於涪江。皇朝通志

嘉陵江。卽西漢水下流。合白水江而益大。白龍江。出陝西岷州衛東南楊滿城西北分水嶺。嶺西

北水。皆流入洮河者。墊江之北源也。俗曰岷江。一出嶺下。南流經城東。稍西南。其一出嶺南之分水

嶺。東南流來會。稍南有荔川河。自東來會。南數十里。有臨江東北。自岷峨西南流來會。岷峨山在分

水嶺東南百里。其東北水流入西漢水者。折東南流。經臨江鋪西。俗曰白龍江。亦曰臨江。又東南。有

武都山水。自東北來注之。又東南經朝陽山西。西固所東南。有白水江。西自邊外來會。白水江。卽

古桓水。亦曰墊江。源出邊外洮源東南之西傾山。山在洮州衛西南三百四十里。一名西嶺山。亦名

強臺山。番語曰羅插普喇山。近黃河。折向西北之東岸山。綿亘千餘里。源曰裴雜塔拉泉澤。十數泓

湧成二渠。滙東南。曲曲流百五十里。折而南流九十里。又東流。曲曲三百里。曰香出必拉。入陝西邊

經武都關南。又東經西固所南。又東南與白龍江會。水勢始盛。又東南流。有清江。西南自邊外來

會。清江源在白水江之南。合哥普山東北流。百餘里入邊。至階州西境。入白水江。稍東。有兩水。北自

朝陽山東麓來注之。又東南至階州西南。有東川水。西自邊外來會。清江源之西南山。其西岡阜連

接南與四川弓橫口北之大山相近。東川東南流，曲曲折折而東北，數百里入邊，注白水江。又東經州城南，有北谷河，合赤沙水，自北經城西來會。又東南百餘里，有紫水，自東北來注之。又南流九十里，經臨江驛西，西岸即古頂山、金珠山、八盤山。又東南有紫泥山水，自東北來注之。又南經文縣東境，俗曰黑水江，有乾溝水，自東北來注之。又南經玉壘關東，有一水，西自文縣合諸水來注之。水出文縣西境山，曰毛溝河，東流合北來之烏兒河、火燒關水。南來之立志山水，又東經縣城南，又東南流，合南來一水，北來西番溝水。又東南至玉壘關南，東入白水江。又東南受北來一水，又南入四川界。經昭化縣北境之余山鋪西，又南有溪河，自西北來注之。又東南數十里，至昭化縣城北，有黃沙江，西北自摩天嶺，合青川及劍門水來，而嘉陵江合諸水。東北自朝天關來並會。黃沙江源出摩天嶺，南流百餘里，有青川所二水，自西合來會。又南折東南流百里，受南北二小水，又東流經劍閣山北，有水西南，自劍門驛來會。又東至昭化縣北，入白水江。此江即古葭萌水也。西漢水亦曰沔水，即漢志誤指爲禹貢之嶓冢導漾者。源出秦州西南之嶓冢山，即漢隴西郡西縣之嶓冢山也。在寧羌州。漢源嶓冢之西北四百餘里，脈自白水江源山，曲曲而東，爲分水嶺。又東爲岷峨山。又東北爲箭杆山、柏林山、青陽山。又東爲老君山，爲朱圉山，爲溫泉山、刑馬山。其北伏羌縣。其東南即西漢水源之嶓冢山。連互而南，西南流曰漾水，有小水自東南來會。又西北曲曲流，曰鹽官水，稍北有橫水嶺。水南自西河縣城東來會。又北有永平水，東北自刑馬山來會。折西流至禮縣東，有水西北自柏林。青陽東南流，經縣城東北來注之。又西經縣城南，又西折西南流數十里，曰長道河，經西和縣西北。

境折東南流過仇池山西麓。仇池山在西和縣西南成縣之西北界。脈自嶧冢綿互而南至成縣西
北界爲壽山爲青崖山。西爲橫水嶺。又西爲西和南山。又西爲仇池。有岷峨江。自西北岷峨山東麓
來注之。其西麓水卽流合白水江者。又東南流曰犀牛江。經階州東北境。成縣西南境之祁山麓。有
石碛關水。自西北來注之。卽橫水嶺之南水也。又東南有潭河。西南自階州北之米倉山東北流。經
甘泉驛來會。曰兩河口。西漢自發源西流。而南而東。至此流如旋規。又東至成縣南境。略陽縣西北
境。有長家河。自南來注之。又東有黑峪江。北自秦州南山來會。黑峪江源出吳紫山南之九眼泉。在
嶧冢東北七十里。二澗合而南。經街子鎮。大門鎮。又南合東來之烏油江。又南東合麻沿河。又西南
流至雞冠口。西受西北來之建安洛谷二水。又南經青泥嶺。仙人關。西。又南經成縣城東南。有濁水
自西來注之。又東南數十里。入西漢水。又東有青泥嶺水。自北經仙人關東來注之。俗亦曰白水江。
折東南流。有九龍池水。東北自徽縣合三水來注之。又南流至略陽縣北之八渡山西。嘉陵江東北。
自鳳縣合諸水來會。嘉陵江出鳳縣東北之嘉陵谷。此山之東北卽寶雞縣渭水也。西流經東河
驛。橫牛堡。紅花鋪。北折西南流。經草涼驛。白家店。西。此水旁卽北自陳倉南入漢中川蜀驛路。又南
有大散水。斜谷河。自東北來會。折西北。又西南流。經縣城西北。又西南有魚河。自北合紅犀單河。二
水來注之。一北出臧家嶺。一西北出黃交谷南。又西南經兩當縣南境。有下邳水。自城西南來注之。
此水於永寧堡之東南。入嘉陵江。又南流有高橋河。自西北合永寧河來會。高橋河出兩當縣西北
山。東南流。有永寧河。自東北來會。又東南流。經太白池東南。入嘉陵江。又南有野羊北河。合諸水東

自鳳縣東南境來會野羊北河出松林驛東南山西北流經驛西又西北至廢丘堡合東北來一水又西流有蜜蜂溝自南來會又西北折西南經藍安關山北又西南入嘉陵江又西南經徽縣南境百餘里至八渡山西北西漢水自西來會嘉陵江既會西漢水南流稍西折東南流有橫壩河紫泥山水自西來合注之又東南經略陽縣城西又東南有八渡河自東北合諸水經城東來會八渡河出紫柏山西北流曰中川有三川自東北來會西南流八十餘里有水自東南來會又西流折而南經略陽東南注之又南有白石溝自東北來注之又西南流經寧羌州西北境之陽平關西陽平關東南六十里有大山即禹貢之嶓冢導漾東流爲漢者也又西南有洛索河自西來注之又南流百里經四川廣元縣北界有小水西北來注之水出陝西界山南經大小漫天嶺山麓又南至朝天關西有水東北自七盤嶺關南來注之七盤關川陝分界其北水即東北經寧羌州北合漢水者也此水自關下西南流經神宣驛北又西經大山麓至朝天關西北入嘉陵江又西南九十里經廣元縣城西又西南有稻壩河北來經城南西注之至昭化縣東北白水江自西北來會嘉陵江既會白水江於昭化城東北南流經城東又南稍西曲曲流百五十里有劍水西北自劍州來注之大劍水出劍州西北山東南流至州北有小劍水自北來會經州城東北又東南百餘里入嘉陵江又南八十里經蒼溪縣西稍南折而東經其南稍東又折而西而西南又東南經保寧府城西有北溪河自西北來注之北溪出蒼溪縣西北山東南流入嘉陵江稍南折而東經府南境稍東有東河東北自陝西寧羌州界西南經重山四百里來注之東河源出寧羌州東九眼泉南流折而西南入四川

廣元縣東北界行兩山中。曲曲數百里。曰東河。至百尺關西。又西南至蒼溪縣東之雲臺山麓。又南流至府東境。入嘉陵江。又南有苟溪。東北塘合溪來注之。塘溪出觀音場北七十里山。南流至場北。折西南流。有苟溪。自北來會。西經廣閣樓北。又西南入嘉陵江。又南稍西六十里。至南部縣西北。折東流。經縣城北。又東南流。有禹跡山水。自縣北境來注之。稍南折南流數十里。有安居場水。自東北來注之。又南至蓬州西北。有西河。西北自劍州西北來注之。西河上源曰武連河。出劍州西北境五子山。西南流九十里。折而東南。經武連驛南。又東南數十里。有柳池溝水。自北來會。又東南曲曲經保寧府治。閬中縣西境。又東南至南部縣南境。有袁家河。自東來注之。又東南折而東流。入嘉陵江。此水流行四百餘里。又東南經州城北。東南如玦。至州西南。向南流。有清溪。自東北來注之。又西南流百餘里。至順慶府治南充縣東北境。折南流。經府城東而南。有蠻子河。西北自西充縣來注之。河出西充縣東北山。西南流。經縣東南。又西南流數十里。折東南流。經府城西南。又東南入嘉陵江。又南流八十里。有曲水河。自西來注之。折東流。有清水河。自北來注之。又東南五十里。有西溪。東北自岳池縣北境來注之。又西南。曲曲東南。至定遠縣城東北。有岳池水。東北自城左右合西南流。又合一水來注之。經縣城東而西南。又東南。旋折如帶。有苦竹溪。自西來注之。又東南流八十里。至合州東北。渠江自東北來會。曰嘉渠口。又南流。涪江自西來。經州城之西而東。來會於城之東南。曰三江口。釣魚山在涪江之北。嘉陵江之南。嘉陵自源至此。徑一千七百餘里。水道提綱。

嘉陵江。自順慶府南充縣。流入定遠縣界。又南經合州界。合渠江涪江。東南流入巴縣界。至府城東。

合大江。卽西漢水也。自合涪江以下。俗統名曰涪江。亦曰內江。漢書地理志。西漢水南入廣漢白水。東南至江州入江。水經注。漢水經宕渠縣東。又東南合宕渠水。又東南經江州東南。入於江。涪水注之。故庾仲雍謂涪內水者也。方輿勝覽。西漢水在石照縣東一百步。又杜甫詩。百丈內江船。注。水自渝上合州者。謂之內江。自渝由戎瀘上蜀者。謂之外江。舊志。嘉陵江自南充縣李渡場流入定遠縣界五十里。至縣城東門外。又十里。至南溪江。入合州界。又一百九十里。合渠江曰嘉渠江。又十里。至州城東南。合涪江曰三江口。又南流四十里。入巴縣界。又東南九十里。至府城東。合岷江。自合州以下。本涪漢強白宕渠五水合流。其別名尤紛出不一。五水之中。漢名最古。班固漢志。以爲經流而涪。以一水獨當四流。且逼近會城。漢晉以來。用兵者多由之。故庾仲雍稱內水。而獨係以涪。自後遂稱爲涪江。然據漢志水經注。終當以西漢爲正流也。白水源出南川縣南。東北流入涪江界。卽今大溪河也。輿地紀勝。白水在涪州南二百二十里。源出天衆山。其色如練。又白水去隆化縣十里。自夷界龍泉鄉流出。入縣界。合黔江。舊志。大溪河。源出南川縣南方竹箐山谷。北流四十里。經鎮河橋。名鎮河橋溪。又十五里。至熨水橋。又二十里。至水東橋。又十五里。至涪州界。名大溪河。又東北流一百里。至州南八十里。入涪陵江。大清一統志。

渠河爲巴水渠水二源之合名。巴水出陝西西鄉縣西南之大巴山。西流入四川通江縣界。有洪口河。自陝西界來會。又西南有西河來會。至巴州東。有南江水。自陝西界合諸水。經儀隴縣來會。又東南至渠縣。合渠河三源。俱出太平縣。經東鄉縣而合。經達州城東。有蹬子河。自新寧縣來會。又西南有清溪河。自大

竹縣來會。至渠縣東北。有巴江來會。西南流。有流江河。自儀隴營山二縣來會。經廣安州東北。至合州之嘉渠口。會嘉陵江。以入於涪江。皇朝通志。

渠江。卽古巴水。今日渠河。實巴渠二水之合也。巴水出陝西西鄉縣西南之大巴山。自漢中府治

南鄭縣南境之巴嶺東連孤雲兩角米倉諸水其南卽巴州北界也。自米倉山而東爲大巴山。又東稍南爲小巴山。巴江水出大巴山之麓。西流入四川通江縣北界。折西南流。西流入四川通江縣東北界。俗曰東河。折西南流百餘里。有洪口河。東北自陝西界西南流來會。洪口河二源。東源出關壩北大山。西南流。西源出竹絡關山。東南流。合而西南。數十里。又西北流。又數十里。折西南流。與巴水會。又南八十里。經通巴營西。而南有小水。東北自黑灘子來注之。又西南經縣東南。有西河。自西北經城南來會。西河卽巴水西源也。亦曰宕水源。出南鄭南界米倉山之南。通江北界之羊圈關。南流有南岔河。自東來會。又南流有朱家河。自東北來會。又南小水。自西來注之。又南西受板橋河。東受夜叉河水。又南經新長壩西。有水自西來注之。又南東受流溪河水。又南數十里。經縣西境。折而東。經縣南而東。與東河會。此水源流與東河等。又西南七十里。有楊柏河。自西北來注之。又西南百三十里。至巴州東南境。有南江水合諸溪西北。自州城及升渡河來會。南江水二源。西北源出陝西羊卷林關。南界曰蟒潭河。東南流八十里。東北有關壩河。西南流來會。又南六十餘里。經南江縣城東南。亦曰難江。又西南流七十餘里。有羅溪河。西北自三角山來會。又南經羅坪鋪。東南有沙河。自西來會。又南六十里。有南屯河。東北自關壩東南山。西南流。合東來之三溪河。及開田壩水。又西南百

數十里來會。又南稍西，曲曲流百餘里，經巴州城東。又南折，東南流六十里，有青趕渡河，自東北來會。又南五十里，有恩羊河，自西北來會。又東南流六十餘里，折而南，五十餘里，有升渡河，西合花叢煙西及觀音場東水。東經儀隴縣北境，東南流來會。折東流四十里，巴水東北，自通江縣來會。此水合諸溪澗水勢，與巴水合。東西河亦相等。又南稍東流百二十里，至渠縣東北境，渠河合後中前三江水。東北自達州來會。渠河三大源，最北曰後江，次曰中江，次曰前江。後江又有三源，最北者出太平縣北，與陝西星子山連之大橫山。西南流六十里，經縣城西北。又西南流九十里，其東源曰白沙河，出縣東北華岳頂之萬頃池。東南流，依山麓折而西南，經縣南境百餘里。又西南與北源會。曰後江。又西南六十里，折而南流九十里，至普光西。中江自東北來會。中江源出太平縣東境之白支山，黃墩山。黃墩山北麓水，即北江北流，入陝西合諸河入漢水者也。西南流百餘里，有石塘溪。北自石塘壩東南流來會。石塘壩在縣南境白沙河南岸山南。又西南有廠溪，自東南來注之。又西南九十里，至普光北。西會後江。又南，曲曲九十里，經東鄉縣東稍南。前江自東北來會。前江源出太平縣東，與陝西雙河關界之金城山。關北水，即紫陽縣之任河，北流入漢者也。此山西自白支黃墩來，東與九龍山及分水嶺相接。其水曰五溪河，曰分水河，皆南至夔入江。南流，折而西南，曲曲行山中，三百數十里，至東鄉縣東南。後江合中江，自北來會。又西南百里，經張家埠北，折而南，經達州城。東有蹬子河，東南自新寧縣合諸水來注之。蹬子河出新寧縣東境山中，西南流數十里，經縣南境。天子殿山北，又西南合東南來一小水，折西北流，有水自西南來會。又北至風洞鋪，新寧縣河。

三水合而西北折西南流來會。又北受西來一小水。又北受西南來一小水。折而西流。至張家埠南。西入渠河。又南折西流。經城南。又西南數十里。有通巴河。自南來注之。通巴河二源。出月口山。狐狸山北麓。合北流山中百五十里。折西北流五十里。入渠河。又西南七十里。有清溪河。西南自大竹縣。合諸水來注之。清溪水。卽東流溪。出大竹縣東南月城山。東北流。有竹溪。自縣西北。合九盤山諸水。東流。經城北。有水自南來會。又東北受南來一水。又東北會青溪河。又北流數十里。折西北入渠河。又西南至渠縣東北境。與西北來之巴江會。渠河旣會巴江。西南流。過白水洞山北。又西南受東來一小水。西至渠縣城之東。有流江河。西北自儀隴營山二縣來注之。流江河。出儀隴縣西北山。西南流。折而東南。經縣南境之金鉤場北。有允家山水。自東北來會。又東南百里。受西來一水。又東南至營山縣東境。有蘭溪河。西自縣城西。東北曲曲流來會。又東南百九十里。經渠縣城東北。入渠河。又南十餘里。折西南。曲曲過雲霧山。西麓百餘里。至廣安州東北。曰篆江。經三十六灘。亦名河水。南經州城東。有西河。自城西及南東流來會。西河。卽環水。出州北山。又東南折而西南。百三十里。至合州東北之嘉渠口。嘉陵江西北。自定遠來會。巴江渠河。自源至此。俱徑千里。又西南經州城東南。涪江自西來會。曰三江口。水道提綱。

渠江。自順慶府廣安州流。至合州東北。入嘉陵江。卽宕渠水。水經注。宕渠水。經宕渠縣。又東南入漢。寰宇記。渠江源自萬頃池。經巴達渠等州。廣安軍界。至合州東北十里。與嘉陵江合。大清一統志。

大江。又東北。有海溪。自大竹鄰水二縣來會。皇朝通志。

涪江既會嘉陵江渠河。又東北十餘里。折而南。曲曲流百里。至重慶府治巴縣西北境。有虎耳河。自西來注之。又南有青水關河。自西來。南合萬壽水。東流注之。又南折東南流。經白巖北。過魚鹿峽。又東流。經府城北。稍東入大江。大江既會涪江。又東北受東北來一水。折東流百里。有小水自南來注之。又東北流有梅溪。北自大竹鄰水二縣。東合寶石河南流注之。梅溪源出大竹縣西九盤山南麓。西南流。經廟輿場西。折東流。又東南有一水。自縣南西南流來會。又西南流。受西北來一小水。又南有土橋河。合一水自西北來會。又西南至鄰水縣東南境。有水自縣城北繞。而東南來會。曰芭蕉河。又南流八十里。折東南流。有寶石河。東北自月城山西南流。二百八十餘里。西合一水來會。又南流百餘里。經大洪岡。鐵山關。東南入江。水道提綱。

梅溪在長壽縣西北七十里。卽鄰水。自順慶府鄰水縣流入縣境。名五溪。又西南流七十里。至巴縣界。名交龍溪。以溪側舊有古木盤曲如交龍。因名。又南流七十里。入大江。大清一統志。

經長壽縣東南。皇朝通志。

又東折而東北。南受一小水。又東北經溫樂山。有灘。經長壽縣城南而東。有桃花溪。自東北來注之。溪出縣北山。東南流。折西南。經崑尖山西。又西南流。經長壽縣城東南入江。水道提綱。

桃花溪。在長壽縣東二里。源出老龍洞。南流三十里。至桃花洞。又五里。過新橋入江。大清一統志。

有龍溪河。自長壽墊江二縣來會。皇朝通志。

又有龍溪河。東北自梁山墊江二縣。合諸水來注之。龍溪河源出梁山縣東南山。西北流。經縣北境。

有一水。南自城北流來會。又西流合南來一水。又西南流有沙河。自西北來會。又南流有七間河。自西來會。又南流折而西南。有狐狸山二水。自西北合而來會。又西南經墊江縣東境。有羅干河。西自縣城北合。三水東流來會。又西南行兩山中。曰高灘河。有兩水。自西北合而來會。又南流有大沙河。東北自梁山縣西南山中。西南流來會。又西南百餘里。至長壽縣東桃花口之南入江。其南即黃草山也。水道提綱。

龍溪在長壽縣東。自忠州墊江縣流入。又西南入江。古名容溪。寰宇記。溫樂縣有容溪。源出縣境北。南流經縣東。又南至永安縣東北二里。注大江。按此水即墊江南灘溪之下流。舊志謂即桃花溪。大清一統志。

又東南經涪州城東。有黔江。即烏江來會。皇朝通志。

又折南流。經黃草峽而東南。有梨河。自南來注之。俗曰離鄉河。江心有沙洲。長十餘里。又東過鐵櫃山。又東經涪州城北而東。有黔江。亦曰涪江。南自貴州合諸水來會於銅柱灘口。水道提綱。

黔江。即烏江。出貴州威寧州東北山。東北流。有則底河。自雲南鎮雄州來會。又東南伏而復出。經畢節縣南。又伏二十餘里。復出。曰天生橋。有落脚河。自大定府來會。又東北經黔西州南。有楊柳河。以麥河。自平遠州來會。又東有三岔河。自安順府合威寧州安平清鎮縣諸水來會。經修文縣西北。有雞公河。自廣順州合諸水來會。經開州西。有以濟河。自黔西州來會。經遵義府南境。有清水江。自貴陽府治合龍里貴定縣諸水來會。經甕安縣北。有湘江。自遵義府合綏陽縣諸水來會。又東南有涓潭縣水。甕安縣水來會。經

餘慶縣西北。又經石阡府西。龍泉縣南。又經思南府西南。有清江溪來會。經印江縣西南。婺川縣東北。折西北入四川。西陽州西南界。又北有南溪河。自湖北施南府來會。經彭水縣南。有長溪。自貴州婺川界來會。又西北有中清河。自湖北利川縣來會。折西南。有渡頭河。自綏陽縣正安州合諸水來會。又西北有大溪河。自南川縣來會。又北至涪州城東北。入於大江。皇朝通志

黔江亦曰涪江。卽貴州之烏江也。源出威寧州東北山。東流數十里。一水自南來會。東南流經黑章汛北。稍東。有一河。合三水自南來會。三水。一出歇涼亭北東流。一出南山北流而合。一出東南山。西北來會。又北合焉。折北流。曲曲而東八十里。有則底河。合後所河。自北來會。則底河出四川鎮雄土府西境山。南流八十餘里。入貴州界。有後所河。東自七星關北大山來會。南入黔江口。又東南伏大山下二十里。於南麓流出。經七星關南。又東南流。曲曲百三十里。至畢節縣南境之大山。而伏二十餘里。於東麓復出。曰天生橋。東稍北流。有落腳河北。自大定府西北。合畢節諸水來會。畢節縣西南有二水。東南流。合而東。經縣南境。又南合一水。東流。有縣北水。自西北山東南流。經城東北。又東南合北來一水。又東合北來之裸羅河。又東南經沙子哨。北合東北來一水。又南曰落腳河。經大定府西境百數十里。曲而西南。又東南流入黔江。又東經府南境八十里。有烏西河。自北來注之。烏西河出府東北山。東南流。折而南。而西南。曲曲百四十里。經北渡坡西。又南流入黔江。俗曰六歸河。又東稍北五十里。有西溪河。自北合二水來注之。又東流至黔西州南境。有裸隴河。高家河。俱自西南來。各注之。又東南有楊柳河。西南自平遠州。合諸水來注之。楊柳河出平遠州西南境山。曰卜牛河。東

流至州南境。有豬場水。自南來會。東北流。經州城稍北。有二小水。自西北來注之。又東北經大山。又東北七十餘里。入黔江。又東南有以麥河。自西南來注之。河出平遠州東境山。東北流。又東有三岔河。西南自安順府西合。以且海諸水來會。以且海在威寧州東南二百里。阿遮汛之東南。水城汛之西北也。池周二十里。東北流。有一水自西北來會。東南流。至扒瓦汛。南有水城汛河。自西南來會。又南折而東。有以固汛。前河水自東北來會。俗曰簸渡河。又東南百數十里。至西堡司北。折東北。流百。里。至安順府西北境之定南汛。北有古北河。自北平遠南境。豬場南界山。合四水南流注之。稍東。有三岔河。東南自府西境山西北流。合三水。經定南汛西。而北注之。自此東北俱曰三岔河也。又東北百數十里。經安平縣西北境。又東北。經清鎮縣西北境。折西北流。合西南來之牛場河。又北百里。至鴨池汛。西南與西來之黔江會。此水自源至此。流七百里。與黔江等實黔江之南一源也。又北折而東。經鴨池汛北。有池水自南來注之。又東稍南。有跳蹬河。南自鎮西衛來注之。又東北。經修文縣西北境。有雞公河。南合廣順州及安平清鎮二縣水來注之。雞公河上流曰麻線河。出廣順州西境山。東南流。合西南來一水。東經州城南折北。經其東。又北。經象鼻關之西。又北曰麻線河。經廣興鎮西。又北。經安平縣東境。有縣河左右二水。合南而東北流。八十餘里來會。又東北。經清鎮縣城西。折經其北。而東。有一水。南自城東來會。又東北。至修文縣西境。有縣南水。經城南東折西北流來注之。又北。有那奢河。自東來注之。又西北入黔江。又東北。經六廣汛西北。又東北。經開州西境之修文所西。曰六廣河。又東北。曲曲至烏江城南。有息蒙所水。自東南來注之。其西岸有以濟河。西南自黔西州合。

諸水及北境之沙溪河來會。黔西卽舊水西也。以濟河出州西北山。南流經城西。折而東南流。合西南來經打鼓寨之水。折東北流百四十里。曰以壩河。有渭河。西自山中來會。又曰以馬河。又東北七十里。有烏慶河。西自州西北境。合三水東流百五十里來會。又東北與西來之沙溪河會。東入黔江。沙溪河出州西北。與四川界山東流。經清水塘南。又東依山麓。合西南來一水。又東稍南。會以濟河。入黔江。又東北經烏江城。北鎮南關南。有小水自北來注之。南岸爲開州北境。北岸爲遵化府西南境。又東北有小水自南來注之。又北一小水自西北來注之。卽楓香壩東南水。折東南流。經雞溪口南。有小水自南來注之。又東南經遵義府南境。有樂閩河。自西北來注之。水出府西南之雷變山。又東有清水江。南自貴陽府治貴筑。合龍里貴定諸水。北流來會。清水江三源。一曰牛路河。出貴筑縣西南境山。東北流曰四方河。至中曹司東。有兩江河。自西來會。又東有一水。北自老鴉關來會。又東經府城南。又東北流。有龍洞河。自南來。經黎兒關西來注之。又東北曰牛路河。又東北經虎墜司西。又東北曰千壩河。經巴香汛西。而東北龍里貴定二縣水。自東南合而來會。龍里縣西南二水。東北流。合而東。經縣北境。又東。有西堡水。自南來。合東南定水壩水。北流經城東而北來會。又東南一水。北經龍頭營之西而北注之。又東折東北流。九十里。至喇啞村西。有貴定縣水。自東南來會。貴定縣水源。較諸水最遠。出舊縣西南百四十里。谷壤汛西北大山東北流。經平伐司北。又東北至舊縣西。有一水。西南自谷壤汛北。東北曲曲流。經太平司南。又折而北來會。又有一水。自東南來會。又北流折而西北。經把平小平二司。西至山麓。折正北流。經新安堡東。曰甕城河。又北經貴定縣西境。

有水東南自城西來。一水東自城北來會。又北經茅添司西。又西北至喇啞村西南。與龍里縣水會。又北流折東北數十里。復西北流。至巴香汛東北。與府城之牛路河會。又北流七十里。有洗泥河。自西稍南來會。又北折西北流。經開州東境。又北開州東西二水。自州城北東北流來注之。又東北曲曲百餘里。入烏江。此水源流五百里。自此俗曰烏江。又東南流。曲曲經甕安縣北境。北岸。遵義府東南境也。有湘江。西北自遵義府城東。合綏陽縣諸水。南流來注之。湘江。出府治遵義縣北境。桐梓縣南境之龍巖山。兩源一東南流。一南流而合。曲曲東南經府城東北。又東南。有桃溪。自西北山東南流。經城南而東來會。又東流數十里。有洪江。自北來會。洪江出婁山關南山。東南流至遵義東境之清乘橋北。有鳳凰溪。東北自綏陽西山。西南流來會。又東南入湘江。湘江又東南數十里。有鹿塘河。北自綏陽縣來會。鹿塘河二源。一出綏陽縣西北山。一出東北山。流至城南。合而南。數十里。有一水自東北來會。又南八十里。會湘江。湘江又南流九十里。折東南流。五十里入烏江。此湘江與沅湘不同。又東南有眉潭河。自北來。甕安河自南來。並會眉潭河。出眉潭縣北境。龍泉縣西境山。東南流至眉潭縣東北山。折西南流。受北來一水。又西南經縣城北。折南流。經其西。有一水自東南。經城南來會。又西流北受一水。又南稍西流百三十里。有一水。自北來會。又西南八十里。折南流。入烏江。甕安河。出甕安縣南境山。兩源俱西流。而合折東北流。曰乾溪河。又北。受東來一水。又北。經縣城西北。又北。有坪橋河。自東南經城東來注之。又北。受東南來之紅頭鋪河。又北。受東來之草塘司河。又北。九十里。入烏江江口。正北與眉潭口相。烏江又東南至餘慶縣西北境。折東北流。

有餘慶司水自北來注之。水在眉潭河，東隔重山，又東北百里，有牛場河，合小江，自南來注之。牛場河出餘慶縣西南境山，東北流百里，經縣城東南，又北八十里，有小江，西南自縣西之清水洞來會。又北稍東六十里，入烏江，又東北，北受落花屯水。水在眉潭縣南境山，又東北，經石阡府西境，龍泉縣南境，有巖頭河，自南來注之。巖頭河北流，經石阡府西境，又東北，至府北境，思南府西南境，有白巖河，南自石阡府城來注之。自巖河出府南二源，一出南山，北流經鐵廠西，一出東南山，西流與合。又北流，曲曲經府城西南，又西北折而東，經城西北，又北有一水，自東來會，又北稍東，曲曲百餘里，入烏江。又東北，有清江溪，合諸水，西自龍泉縣來注之。清江溪出龍泉縣西北山，東南流，有羊子河，自北山南流，有石貫河，自西南山北流來會，東流經縣城北，又東流百里，有松溪河，合數小水，自北來會。又東南，至思南府西南境，有板坪河，自北合二水來會，又東南，入烏江。又東北，至思南府城東南，有小水三，自東合來注之。卽印江縣南朗溪司東南三水，西南流者，折北，經城東，又北，有猛溪河，自東南來，麻海溪自西南來，各注之。又北稍東，經印江縣西北境，有清水江，東南自縣城來注之。清水江三源，一出印江縣東北山，西南流，二出東南山，俱北流，合而西，經朗溪司北，又西，經縣城南，折西北流，有一水自東北，經城北來會，又西北流，入烏江。又北稍東，百餘里，至婺川縣東北境之沿河司，東折西北流，入四川酉陽州西南界，有三岔河，東北來注之。三岔河二源，出酉陽州西境山，一西兩流，一東南流，數十里，合而西南，又西北，入烏江。又北稍西，百餘里，東爲四川界，西爲貴州界，有南溪河，東北自湖廣施南府，合諸水西南流，至龔灘來會。南溪河上源，卽北河也。北河出湖北施南

府南境忠洞之北山。南流八十里。至忠洞。東南折西流。有白龍潭水。西北自高羅司來會。又東南流。有車峒河。自東北合一水來會。又西南流。經忠建司南。有川弔河。爛河諸小水。自西北來會。又西南。至來鳳縣境。有大旺諸水。自西來會。又西南。合左右諸溪。曲曲二百餘里。西流入四川界。經西陽州。東北境之西嶺。顧北。又西有唐崖河。北自黔江縣來會。又西南流。受數小水。曲曲流百五十里。至州西界之雙灘。東。又西南入烏江。此水源流五百餘里。唐崖河。源出金峒之西北山。東南流八十里。折而西南。七十里有南河。合馬河。自西來會。有大田水。自東來會。又南受東來之馬家山水。又西南入四川黔江縣東北界之界山嶺。東。又西南。經縣東南境之石牙關。西。亦曰大水溪。又西南。有梅子關水。自西北來會。又南有金山崖水。自西來會。又南入南溪河。自龔灘之西而北。有洪渡河。自西南入。合諸水來注之。洪渡河。源出婺川縣西南境龍泉縣北境山。東流。經綏陽場。南折而東北流。有大水河。自西北合一水來會。又東北有小水河。自西來會。又東北。經簡家溝。東。又東北。經豐樂壩。東。受西來一水。又東北。受西北來之龍登河。又東北。經縣城東南。又北。受西北來一水。自源至此。二百餘里。曰洪渡河。又東北。百六十餘里。入烏江。自此以後。全入四川界矣。又北稍西。百二十里。至彭水縣南境。有長溪。自西南來注之。長溪出正安東界山。東北流。經貴州婺川北界入境。又東北入烏江。又西北。經縣西。又北。有中清河。東北自湖廣利川縣西南流。合諸水。經城北而西注之。中清河上源。即龍鬚河也。龍鬚河出利川縣之忠路北山。有二源。至洞源漕之西北。合而南流。又受西來一水。南經忠路東。又西南。曲曲。西受胡家塘水。東受沙溪水。東南受活龍坪水。又南百里。入四川

北崖關之北。西南流曰中清河。受東南來二水。經郁山鎮北。有後江河。自東北來會。又西南流。有水洞河。自北來會。又西南。至彭水東北。有一水自東南來注之。又西南。經縣城北。又西入烏江。又北。有合溪口水。自西南來注之。又西北。有木宗河。北自射香溪。合二水來注之。射香溪出石碛司東南八十里山。南流。合西北來一水。經鹽田壩東。又西南。曲曲二百里。合西北來一水。南入烏江。折西南流。至江口鎮北。曰黔江河。有渡頭河。南自綏陽縣正安州。合清溪河。三江諸水。北流來注之。渡頭河出綏陽縣西北境。婁山關之東北。東流。合西北來一水。東經桑木關北。合南來一水。又東北流。有關渡河。自西來會。又東北。曰米糧渡。西受一小水。又東北。有牛渡河。自東南來會。又北流。有青溪河。自西南來會。又東北。經正安州城東南。又東北。有橋溪河。自西來注之。又東北。有二水合流。自東南來注之。又東北。有三江河。自西來會。三江河者。一曰安泗溪。自西南來。一曰羊心溪。自西來。一曰河九溪。合黃泥河。又有白魚河。合一水。俱自西北來。合而東南。故曰三江河也。又東北。經舊正安州西。又北。而東百餘里。有大花溪。自西南來注之。折西北流百餘里。至江口鎮之西。入烏江。此水源流六百里。又西流。經武隆廢縣南。折西北流。有一水自東北來注之。經白馬鎮北。有石梁河。合三水。西南自方竹箐都家壩北流。東合後溪河來注之。又北流稍西。有大溪河。西南自南川縣合諸水來注之。大溪河出南川縣南大山。二源。合西北流。經縣城西。折東北流。於城北。受東南來之流金水。又東北流。有石牛河。合西南來一水。西北來一水。東北流來會。又東北流。有坪壩河。南自陶家營來注之。又東北。經楊柳壩。西鳳凰山東麓。又東北。入烏江。又北。有百灘溪。自東來注之。又北。折西而北流。受西

南來一水。又北曲曲至涪州城東北銅柱灘。入大江。亦曰涪陵江也。此水自西而東而北。源流二千三百里。會貴州大定貴陽遵義平越石阡思南六府及湖廣施南半府四川酉陽黔江彭水南川涪州諸水。實巨川也。水道提綱。

涪陵江在涪州東。自彭水縣流入。又北入大江。水經注。江水至枳州西延江。從牂牁郡北流。西屈注之。此水乃延江之支津。分水北流。經涪陵入江。故亦云涪陵水也。其水南經武陵郡。昔司馬錯泝舟。此水取黔中郡。元和志。涪江水在武隆縣南。屈北流。注於蜀江。寰宇記。涪陵江自萬寧縣西北二百八十里。至關頭灘。長百步。懸崖倒水。舟楫莫通。舊志。自彭水江口鎮西流。入武隆廢縣界。一百二十里。至關頭灘。五里。至城西南。又五里。至石牀灘。又十里。至白馬鎮。入涪州界。又折北流。一百二十里。至州東入大江。大清一統志。

大江又東北有渠溪河。自忠州經酆都縣來會。皇朝通志。

大江既會黔江。又東北至南沱。折西北流二十里。復東北。又東南而東流。北岸受小水二。曰渠溪河。出忠州西北山。西南流二百餘里。經酆都縣北境。又西南至北涪鎮之西入江。曰馬灘河。出酆都北山。西南流入江。南岸受小水二。曰羅雲溪。北流入江。其口正對北岸之馬灘河。曰白水溪。在羅雲溪東。東北流入江。水道提綱。

大江自重慶府涪州。流入忠州。經酆都縣南。大清一統志。
經酆都縣南。有葫蘆溪。自湖南界上。經石砧廳來會。皇朝通志。

又東稍北經鄆都縣城南有葫蘆溪自東石碛司合諸水來注之葫蘆溪有兩源東出湖廣界上山北源曰龍背溪二水合西南流南源曰冷清溪亦二水合西流而會曰後河又西經石碛司北有漆關溪自北來注之又折西南流有江池溪自西北來注之又西南流折而西北又折西流入江在縣東南水道提綱

三江溪在廳治東北八十里有三源一出桂子洞一出冷清溪一出龍背山皆在中路司界西流七十里至沙子關三溪合流又八十里遶廳治北又西北流七十里經鄆都縣界漩孔山龍洞出鄆都縣南曰葫蘆溪又西入江大清一統志

經忠州南有滄溪河塗井河自梁山縣來會皇朝通志

又東北有龍停溪自城北來注之又東北流百二十餘里經倒鬚灘北岸受小水七至忠州城南南岸受小水二北岸所受水自龍停溪而東北曰赤溪曰丁溪曰挫溪溪口正南對石灘曰灘子池二水合而注江當灘之尾曰泉水溪曰漕溪即忠州西南也諸溪皆出西大山東南流入江正當州城之南曰鐘溪出方斗山西北流入江正當州城東南又東北有滄溪河自西北來注之滄溪河即鳴玉溪出梁山縣南境山東南曲曲流經忠州北境滄井之南又東南至州東北入江有沿溪自東南來注之沿溪二水合流西北入江又東北有塗井河自西北來注之塗井河出梁山縣東境山東南流經塗井之南折而東流入江水道提綱

大江又東北經州南又逕虎鬚灘舊志州西二里有石梁互三十丈橫截江中俗呼倒鬚灘即水經

注所謂虎鬚灘也。大清一統志。

經萬縣南有西河水。小江水來會。皇朝通志。

經西界沱西。四方山東麓。西界沱在東岸。四方山在西岸。又東北有合溪。自西來注之。合溪亦曰跳
蹬溪。又東北北岸受二水。曰壤河溪。稍長曰楊河溪。俱東南流入江。又東北折正北流。東岸受二水。
曰白水溪。西北流入江。曰渡口溪。北流折而西入江。稍西北至萬縣城南。有西河自西北來。合北一
水。經城西而東南注之。西河卽荳溪。出西北山。南流折而東。又東南流有一水。卽彭溪。北自山中南
流來會。經縣城西而南東入江。折東流而東北。自忠州東北。至於萬縣東。二百餘里。於鐵鳳山南折
而東流。至小江口。自萬縣東稍北。至此一百數十里。有小江北自開縣。合諸水來注之。小江有數源。
一出開州東北山。曰板橋溪。西南流。有謝家壩。水自東南來會。又西北流。有石家溪。自東北來會。折
西流至舊縣壩南。有北源觀面山。一水自西北來會。又西南流。有跳蹬河。自西來注之。又南經縣東
南境。有西源曰臨江。自西北山。經縣城南來會。折東南流。有墊江。自西南來會。始曰小江。亦曰清水
江。又東南百里。至小江口之西南入江。自小江口東。至雲陽城七十餘里。水道提綱。

大江又東北入夔州府萬縣界。大清一統志。

經雲陽縣南有新軍河。自湖北施南府界來會。皇朝通志。

又東經山麓。又東經雲陽縣城南。而東有新軍河。自西南來注之。新軍河源出湖廣施南府界。兩水
西源出支羅所塘東北流。東源出磁洞。北流入石龍關。西北界合而東北流。凡二百餘里。東經雲陽

之南境。至城南。北入江。水道提綱。

新軍河在雲陽縣東南三十里。源出湖北恩施縣界。東北流二百里。入大江。大清一統志。

東瀼河自開縣來會。皇朝通志。

有東瀼河北自縣城東來注之。東瀼河源曰五溪河。出北與陝西界南九龍山之南麓。南流山中。經開縣東北境。凡二百餘里。至五溪關東。有石土河。自東來會。又東南曲曲流。曰東瀼河。又百餘里。經雲陽縣城東北。又東南入江。正對南岸新軍河口。水道提綱。

湯溪水在雲陽縣東。卽今東瀼河也。水經注。湯溪水源出胸臆縣北六百里上庸界。南流歷縣翼帶鹽井下。與檀溪水合。又南入於江。名曰湯口。舊志東瀼河在縣東一里。源出縣北九龍池。按輿圖。東瀼河上流曰五溪關。東至雲陽縣東。入大江。其源流之長。與奉節之大瀼相等。自雲陽以東。奉節以西。惟有此水。其卽古之湯溪無疑。舊志以東瀼湯溪分爲二誤。大清一統志。

又東北有頭塘溪。自奉節縣來會。皇朝通志。

又東稍北。經山麓。東流數灘。南岸受老馬五龍二溪水。北岸受頭塘溪水。頭塘洪出夔州府治。奉節縣西北山。東南流經縣西境。南入江。自雲陽東至此百里。水道提綱。

清瀼水在奉節縣西二十里。卽北崖口溪。瀉出兩山間。東入大江。亦稱頭塘溪。大清一統志。

至夔州府城南。經八陣磧。東出爲瞿塘峽。經白帝城南。爲灩澦堆。有小河鐵柱河來。皇朝通志。

又東經南鄉峽。虎鬚灘。至夔州府城南。經八陣磧。東出爲瞿塘峽。有小河西北自分水嶺。經城東來。

注之。又東經白帝城南。當瞿塘峽口。爲灑瀆堆。江流至險處也。北岸受鐵柱溪水。南岸受大溪河水。灑瀆堆石當奉節東南。在大江中流。惟西南近岸。其東爲龍脊灘。小河北出陝西南界之分水嶺。南流曲曲。隨山麓。東南曰分水河。二百餘里。至鳳寧山東。又東南百里。西受一水。又東南流。北受一水。又東南經夔府城東北。又南入江。鐵柱河自北山南流。經白帝城東南入江。大溪河出西南境山。東北流百餘里入江。水道提綱。

明統志。岷江經本府入瞿塘峽。過巫山。夏秋水大。峽流百里間。灘如竹節。波濤洶湧。舟楫多驚。舊志。自瞿塘而下。謂之峽江。又謂之鎖江。大瀼水在奉節縣。入蜀記。山間之流。凡通江者。土人多謂之瀼。方輿勝覽。十頃池一道。南流爲西瀼水。明統志。大瀼水在府地東。自達州萬頃發源。經此流入大江。舊志。在縣東一里。按輿圖。此水源出太平縣分水嶺。曰分水河。東南流三百里許。至府城東入江。大清一統志。

至巫山縣南。有大寧河。自湖北竹山縣。合諸水來會。皇朝通志。

稍南而東。經南岸山麓。八十里。至巫山縣城南。有大寧河。合諸溪水。自北來。經縣城東北而南注之。大寧河東北。出湖北竹山縣西南境。蕭家坡之西北山。二水合。西南流。入縣東北界。出山西流百六十里。曰東溪河。至鹽井東北。有西溪河。西北自陝西界山東南流來會。又南至鹽井東南。有後溪河。自西南來會。折東南流數十里。又折西南至大寧縣東南。有白楊河。自西北山東南流。合西南來之水。涇小溪二河。經縣南而東來會。又南流數十里。折而東南。有龍溪上田二河。先後自西南來會。又

東南數十里。經大昌廢縣南。有楊溪河。東北自竹山南界麥場埡。西南流二百里。北合一水。經廢縣東南來會。遂南百餘里。依山麓東南。經巫山西麓。至巫山縣城。東南入江。水道提綱。

巫溪水。今曰大寧河。一名昌江。水經注。巫溪水。導源梁州。晉興郡之宜漢縣東。又南經建平郡秦昌縣南。又經北井縣。西東轉歷。其縣北水南有鹽井。按輿圖。此水源出大寧縣西北。接陝西平利縣界。曰西溪。東南流百里許。有東溪。自湖北竹山縣界。西流合焉。折西南經鹽井。東有後溪河。東流入焉。又轉東南。經大寧縣界東。又南有白楊河。合水浪小溪二水。經縣西流入焉。又南會西來之龍溪。上田二水。至廢大昌縣南。有楊溪。會湖北房縣之水。自縣東西流入焉。又南流百餘里。經巫山縣東。入大江。大清一統志。

經巫峽。有白古水河。自建始縣來會。皇朝通志。

又東經巫山南麓。曰巫峽。南岸受小水二。曰觀渡河。東流經水坪北。折東北流。循江南岸大山南麓。而東北入江。土人亦曰巫山。以在縣東者爲十二峯也。曰白古水河。自建始縣東北境山。東北流入江。北岸受小水一。曰邊魚溪。北自巫山十二峯東麓。南流入江。水道提綱。

折東南流。入湖北界。皇朝通志。

又東南流。入湖北界。計自敘州府東。東北至巫山縣。徑一千四百餘里。自巫山縣始折而東南流。水道提綱。

大江自忠州流入東北。經萬縣、雲陽、奉節、巫山四縣南。又東流入湖北。大清一統志。

續行水金鑑卷第一百四十八

江水原委三 湖南 洞庭

經巴東縣西北而東合諸小水。皇朝通志。

經巴東縣西北界之萬流驛南。驛西卽邊魚溪也。又東八十里。經門扇。東奔破石三灘。至巴東縣城北。曰巴東三峽。北岸受小水二。南岸受小水一。稍大者曰元渡河。出巴東縣西北界山。西南流。合左右二水。又南有坪陽壩水。自東來會。經大峯鋪東。又南入江。在巴東縣西北四十里。折東南流。經縣東。其北岸有小水三。自北來合注之。南岸有水。自西南來注之。水出縣西南境山。三源合東流。折而東北。經縣城之東北。流入江。水道提綱。

大江自四川夔州府巫山縣流入巴東縣。大清一統志。

經歸州城南。有香溪。自興山縣來會。皇朝通志。

又東南流。經數灘七十餘里。至歸州城南。歸州西有吐灘、蓮花灘、新灘。皆山石險峻。南岸受沙鎮溪水。北岸受叱溪水。沙鎮溪二源。一西南出召化堡山。東北流。有歸坪河。東南自勸農村來會。又東北流入江。在州西南三十里。叱溪出州北境武家坪之西北山。南流。又東南折而南。經兩山間。南至州城北。折西南流入江。入江之口卽叱灘也。又東一小水。自南來注之。又東有茅坪溪。自南來注之。溪東北流。合東來一小水。經荒口鋪。西北流入江。稍東。有香溪。東北自興山縣合諸水來注之。香溪出

高雞寨西山西南流曰深波河經苦口洞南又西南至興山縣北有南陽河自西北來會又南合西來一小水又南經縣城西而南有小水東北自城來會又東南流有建陽河自東北來西南流二百餘里來會又西南經茅坪鋪東南入江又東有花橋水自南來注之花橋水出花橋鋪東白沙驛西北流會西來之九灣及周坪二水又北入江又東有杉木溪自西北山來注之又東有白水溪自北來衢溪自南來並會水道提綱

大江自宜昌府巴東縣東流入歸州界南陽河在興山縣西北發源當陽村東流會深波河繞縣城流入香溪深波河在興山縣北西南流入南陽河大清一統志香溪在州東十里源出興山縣寧都南流入江乾隆府廳州縣圖志

過黃陵廟經宜昌府境至彝陵南始出峽皇朝通志

過黃陵廟又東南經宜昌府境山峽曲曲有馬肝白狗空舫三峽尤險自秭歸而東南者甚爲危慮經下牢關折南爲大石灘至彝陵南始出峽就平地安流而東也自歸州東之三峽東南至下牢峽江爲險有西陵明月黃牛三峽中有使君虎頭狼尾鹿角等灘皆至險處自盟唐至彝陵計五百里彝陵至白水溪而東北岸又受羅鈿河上紅溪二小水至江折向南處有長橋溪南流合東北來之梁村河水又南合東來一水折西南流入江稍爲源長灘口西岸有桃花鋪水自西來注之又東南至沈家店有臨江河自東北合三水來注之臨江河出龍泉鋪之東北山西南流經鋪南有二水自西北合而來會又西南流至店南西入江又東南經雞子山虎腦背南過荊門山山之對岸卽虎牙

山 水道提綱

水經注。江水東經宜昌縣北。又東經狼尾灘。又東經黃牛山。又東經西陵峽。歷禹斷江出峽。東流經故城洲。又東經故城北。又東經白鹿巖。又東歷荆門虎牙之間。大清一統志。

至宜都縣北。有清江。自施南府合諸水。經長陽縣來會。皇朝通志。

南至宜都縣城北。有清江。西自長陽縣西南。承施南府諸水來注之。清江源出施南府西北境。與四川之石龍關東交界之山。東南曲曲流百餘里。有水西南自張家村山西北。曲曲折而東流。曰大跳敦河。經官渡壩南。又東至忠孝司北。有一水自東南。一自西南。並來會。北流至火鋪塘西北山伏焉。北踰重山。復流出。折而東流。與清江會。又東流數十里。至施南府治。恩施縣北境。有龍馬河。自西北山有大河。東北自水田壩南流。合而西南來會。又有乾平溪。自西南來。經沙子門嶺。東北流來會。清江。又南經三龍壩。西受一小水。又東南經府城東北。東受一小水。又東南有冷水河。自西南經出水洞來會。折東北流數十里。經三岔口塘南。又東北數十里。有一河西南自施南司之南山。東北流經司北。又東北流。受南來之楊二溪水。經東鄉司北。又東北八十里來會。清江。又東有龍溪河。自西北來。合建始縣之小河諸水來會。水勢大盛。又東百餘里。合北來一水。又東北數十里。合北來一小水。又東北至桃符塘南。有水西南自桃山東北流。經金雞口西北。合西來三叉口南之水。東北經紅沙堡。東北來會。清江。又東北九十里。有四都河。自西北經黃家灣來會。折東南流六十里。有一水。西南自栗子坪東北流。與石梁司東南山水北流。經五峯司西者。合東北流至天池口來會。又東北流。

七十里。有石門南水。自西北來注之。又東南流五十里。經長陽縣城南。又東北流。受北一小水。又東少北。受北來博靳溪塘水。折而南。經灣市西。有十八堰溪。西自楊柳池來會。又東南至宜都縣城西。北。會西南來之漢洋河。東入大江。清江卽古夷水。行六百餘里。受數縣諸小水無數。龍溪河所會。建始縣之小河。源出縣北境。灑潑南岸大山。東南流。經水坪東南。曰蒲潭溪。折西南流。有桐木溪。自西來會。又南有木瓜河。合二水。自西北來會。南經縣東南。有西溪。自城南來會。曰小河。又南折西流。又南與龍溪河二水會。龍溪河源出十三關大山者。南流折而東南八十里。其南源東北流來會。又東流七十里。會小河。又東折而南流。經雙耳洞東。又南。經南里渡西。又東南數十里。與清江會。漢洋河。源出施南府東界五峯司之東北大山。東南流七十餘里。經百年關北。漁洋關南。有一水自南山來會。又東北流百三十里。至宜都縣西南境。有二水。西自梁山馬鞍山。先後來會。折東流。稍北。至城北。會清江入大江。稍東有善溪。自北來注之。曰白羊渡口。正當宜都縣城東北。水道提綱。

大江東入歸州界。又東入長陽縣界。又東入東湖縣界。又東入荊州府宜都縣界。夷水在恩施縣北。源出縣西北羅鉅堰。東南流。經縣城東北。又東流入建始縣界。又東流入宜昌府長陽縣界。又東流入荊州府宜都縣界。今名清江。後漢書西南夷傳。廩君乘土船。從夷水至鹽陽。注。今施州清江縣水。一名鹽水。源出清江縣西都定山。酈道元水經注。夷水出巴郡魚復縣江。東南過狼山縣。南夷水。卽狼山清江也。水色清照十丈分沙。蜀人見其澄清。因名清江。大清一統志。

經枝江縣東北。松滋縣西南。有瑪瑙河。自當陽縣來會。皇朝通志。

又東南數十里。經枝江縣城東北。有白水港溪。自西南合一小水。東北流。經城西北。東注之。又東南數十里。有洋溪。自南來注之。洋溪村夾溪。折東北流。至松滋縣西南。中有沙洲相聯。有瑪瑙河。北自當陽縣西南境。合三水南流注之。瑪瑙河二源。東源二水。出當陽西南之玉泉山。南流。合而西南。數十里。與西源出雙店鋪東南流者合。又南。曲曲百餘里。至松滋西境。南入江。又東北。經縣城北。折而東南。有珠市水。自西來注之。又東南。經江亭草坪北。水道提綱。

大江自宜昌府東湖縣。流入宜都縣界。又東南入枝江縣界。又東至松滋縣界。荊州府志。大江自虎牙灘入宜都縣界。至清江嘴。過縣城北六十五里。至白水港。入枝江縣界。過清夾洲。經枝江城。歷洲漏羊角洲。過松滋縣北。又東爲上下百里洲。自枝江縣界至此。凡一百六十里。中分三派。下流復合爲一。入江陵縣界。大清一統志。

又東經荊州府治江陵縣西南。有沮河。漳河。自遠安縣。經當陽縣來會。皇朝通志。

又東至荊州府治江陵縣西南境之澗口北。北岸有沮河。漳河北。自古麥城合而南流注之。沮河源出遠安縣北境之北風山。南流。曲曲百餘里。曰潮水河。西受一小水。南經縣城西。折東南流。七十里。至當陽縣西北境。有鞏河。自東北來會。折東流。而南。而東南。經當陽城北。又東南流。西受縣南一小水。經紫蓋寺南。又東南至古麥城西。又東南。漳河。自東北來會。又南百五十里。入大江。當未入江時。有支津。東流八十餘里。至荊州府城西南周寅店。入江。漳河。源出沮河東北五十里之勸湯巖。南流。至漳河司清水鋪西。曰清溪河。又東南流。至河溶西。麥城東。又南與沮河會。二水自源至江。行四

百餘里。漳河司東北連山東爲荆門山。麥城在當陽縣東南七十里。東南至府城百六十餘里。當陽西南六十里。卽玉泉山。北風山東北百餘里。至漳南縣。又東至虎渡口北。南岸有支津。南通公安諸湖水。北岸有沮漳支流來會。又東稍北。經府城南沙市。折東南流。自巴東至此。徑六百餘里。前稱川江。至此又稱荆江。水道提綱。

大江東至松滋縣界。又東至江陵縣界。沮水在江陵縣西。自襄陽府漳縣。流入遠安縣界。又南入安陸府當陽縣界。又東南經驢城西。磨城東。又南經麥城西。又南經楚昭王墓。又南與漳水合。又東南經長坂東。水經注。沮水東南。汝陽郡北。卽高安縣界。南經臨沮縣西。又屈經其縣南。又東南經當陽縣北。又南經麥城西。與漳水合。又東南經長坂東。又東南流。注謂之沮口。荆州府志。沮水入遠安縣。南流會福河溪水。西會通天樓河。繞縣南流。會老龍洞溪水。至當陽縣。合溶市合漳水。至江陵。入大江。其入江處。謂之兩河口。卽沮口也。寰宇記。沮水經當陽縣北十餘里。水南流一百里。入沱江。荆州府志。沮與漳合。俗名河溶。案沮水舊分二支。一支自江陵入江。一支自枝江入江。萬歷二十五年。因沮水泛溢。甃堵塞之。沮水遂逕從江陵入江。其塞處謂之瓦剎河。通天樓河在遠安縣西二十里。源出通天樓洞。東入沮水。漳水在當陽縣東北。自襄陽府南漳縣南流。經縣東。又南合於沮水。水經注。漳水西南。經編縣南。又南歷臨沮縣之章鄉南。又南經當陽縣。又南經麥城東。於當陽縣之東南一百餘里。而右會沮水。當陽縣志。漳水出沙倒灣。入沮水。下流合二支。一支南經枝江縣界。與沱水合入江。一支經萬城。由江陵縣入江。大清一統志。

經公安縣東北石首縣西北至監利縣西有支津會澧水見後入洞庭湖見後 皇朝通志

經公安縣東北境又東南稍折而西而南至石首縣西境折向東稍北經縣城北又東有沙洲過調絃口又東北折而東南至監利縣西境有支津南會澧水入洞庭湖水道提綱

大江既至江陵縣又東南至公安縣界又東南至石首縣界又東入監利縣界荆州府志大江入江陵縣界經鴨子口龍洲新淤洲新泥州凡二百里抵二聖洲入公安縣界又四十里入石首縣界過天生洲萬石灣至陽岐山經縣城北逕團河洲劉發洲蔡家洲赭要洲凡一百九十里抵塔市口入監利縣界過金斗洲殷家洲兔兒洲凡一百三十里至荆河口會洞庭湖水大清一統志

澧水一源出湖南桑植縣境一源出永順府西北大山一源出桑植縣之太平鎮合流經安福縣西南又東南經永定縣南東流經慈利縣西有九谿河自施南府東境宣恩縣會長樂縣之霧江經安福縣來會東流有鐵水河自長樂縣來會經石門縣南又東經澧州城南分爲二派一東北流有大江支津自江陵縣西南合三岡湖諸水自公安縣來會一支東南流合石門縣道溪水東流又分數支至安鄉縣西北羣流並合有從河自常德府武陵縣來會又東分爲二派一東南流入洞庭湖一東北流合公安縣東北之白蓮湖水至華容縣西南境入洞庭湖皇朝通志

藪澤莫大於洞庭自黔江以東五嶺自始安萌渚都龐騎田以北羣流悉匯源流遠者不止於漸无辰敘西資足當九江之目其最巨能合百川南曰湘西南曰沅西北曰澧實洞庭上源也澧較沅湘稍遜今以江支津先會入湖敘首澧水澧水源有二南源出桑植縣境又有三源出縣西北界者

曰綠水河。自奇峯關前東南流。合西來白巖一水。東南流經縣城南。其南源合數水來會。南源曰上洞河。出永順府治西北境大山。東北流至上洞司南田谷凹北。有官壩河。合田谷河。自南來會。又東北經謝家塔北。下洞司南。有下洞河。自西來會。又東北至桑植縣城南。會綠水河。又東北經舊村寨北。其北源來會。北源曰兩家源河。出太平鎮舊建城北山南流。此水及綠水河源西北之山。卽施南府東南境之車岡河。諸水皆會爲北河西入涪江者。曲曲經縣東境南。與綠水上洞會。折東南流。有安福溪。自東北來會於南分山之北。又東南至安福縣城西北。有王家坪水。合三小溪。自東來注之。折南流。經城西而南。八十里。折西南流。經茅岡司西。又南有眉虎溪。南自永順東北境來注之。又東經大庸所北。有龍爪溪。西南自龍爪關。合五溪河來注之。稍東南。經崇山北。南北各受一小水。又東經永定縣城南南岸。卽天門山也。又東受北來一水。又東北有天堂寺前水。自東北來注之。自此曰陵江河。東流。受西南來一大溪。北來一小溪。又東北流。南北受二小水。北至慈利縣城西數里。其北源之九谿河。自西北合諸水來會。自源至此。曲折行七百餘里。北源九谿河。出施南府東境。宣恩縣東鄉鎮之東北山。曰鶯鶯荒。又東曰白蠟荒。其山西北水。皆入清江者。二荒之北。卽四川巫山縣界。三水合東南流。經平山寨南。有茅角洞水。自東北合溪坪河。西流來會。又西南流。經容美司南。有小水自東來注之。稍西。有水西北自兩河口來會。折東南流。有水自西來會。曰平溪。東南流。至飛沙口。南有霧江。自北來注之。霧江。出長樂縣西南境之栗子坪南山。兩源合西南流。伏大山下。西至白水洞流出。有水西北自桃山來會。曰桃子口。經霧江村西。又南有燕子坪水。自北來會。又南流至

飛沙口入平溪。又東南有鑿扇溪。自西來注之。大線溪。自北來注之。又東南百餘里。至九谿衛西。卽安福縣之東境也。南受小水四。曰冷水溪。曰響夾溪。曰輸羸溪。曰潦水溪。皆自大山東流來注之。北受小水二。曰和豹溪。曰張馬溪。皆自北山南流來注之。又南有茶溪。自西南來注之。茶溪西南出道堂寺之北。東南流。經巖門南。南北俱合一水。又東北。經胡家坪。東南。又北有瀉牛坡水。自西來會。又東流。南受官塘橋水。又東流。至衛西南入平溪。折東流。有任石溪。舒堰溪。自北來各注之。又東南受北來之通津鋪水。俗曰九谿河。又東南。與陵江河會。此水行五百里。陵江河既會九谿河於慈利縣西北。東流經城北。又東北流。受南來之零溪。鬼邦溪。又東北受西北來二水。高橋之北。又東經花山埠。北會西北來之鐵水河。經石門縣城南。鐵水河出長樂縣西南境。石梁司栗子坪之南山。兩水東南流。合西南來一水。東流經沙泥塘北。又東至添坪所西。折而南流。有一水。自西來會。又東南受東北來一水。又東南受西北來一水。受北來一水。又東南經石門西境。南會陵江河。此水行三百餘里。有九渡溪。合瓦溪。自南來注之。正當石門縣之南。又東北經銅山北。有雙溪。自北來注之。又北而東。經新安市東南。有刻木山水。自北來會於合口。又東經高橋南。又東經澧州城南。新渡之北。又東分爲二派。一東北流。受西北來之楊潭河。又東經津市北。折而南。而東。有後河。卽涔河。自西北來注之。又東。大江支津北。自江陵西南岸之虎渡口南流。合三岡湖諸水。自公安縣來會。古江直從虎渡口東南會澧水。又東南。南會洞庭湖。後以徒流。存虎渡口支津。南經公安東北境之孱陵驛東。又南曰陳張湖。又南曰蕪藤湖。又南有支津。東北通白蓮湖。又南。當公安東南。有三岡湖諸水來會。

又西南有牛浪湖。合二溪水自西來會。又東南曰烏汛湖。其西卽澧州東北界之順林驛也。又南經澧河鋪東。又東南與澧水之東北派會。三岡湖在松滋縣東南。其上游曰楊子溪。自西北來入湖。曰竺圓溪。自西來入湖。曰裕家河。自西南來入湖。湖周百餘里。東有三洲。曰湖中岡。王家岡。鐵鷲岡。故以名湖。北有高莊。西南有場莊。亦洲也。自東南流出。有桂河水。自東來會。又東通公安北之均湖。又西經公安西境。有裴家河。合二溪。自西東流百餘里來注之。又南有界溪河。自西東流二百里來注之。又東南經縣城南。而縣北均湖亦南流。經城東來會。又東南與大江支津會也。澧水東北派。既會公安河湖水。又西南至王家營。與東南派支流會。一東南流。有道溪河。西南來注之。道溪河出石門南境。東北流。經州南境。新渡東南。入澧水。又東流。分一支。通東北派。其一南流。經嘉山鋪西關山之東。又分一支。東南流。至田湖。一支。南爲七里湖。又南至匯口。有白湖南湖諸水。自西南來會。又東南分爲數派。至安鄉縣西北之西台瓦。羣流畢合。有從河。西南自常德府治武陵縣北境來注之。從河三源。一出武陵西北山。東流。經府城東北七里鋪之南。折東北流。一曰善橋河。又出其西北。東南流。一曰自生橋河。又出其西北陽山。亦東南流。合而東北。百數十里。至馬家洲南。分爲數派。北會澧水支津。又東北至安鄉縣西南。爲江西湖北承竹湖之委。經安鄉城南而東也。又南經安鄉城西折。經其南。又東分爲二派。一派南流。又東南入洞庭湖。湖口正北。水口東南。正對湖中之雞子團山。一派東北流。數十里。至新堰驛南。白蓮湖水。自北南流來會。白蓮湖在公安東北。卽江支津之東派所通者也。南流。西合王茂湖水。又南。合東一湖水。又南至安鄉東北之新堰驛南。會澧水。此湖

自北而南流。經石首西境。至安鄉。凡二百五十餘里。又東南於華容之西南境。入洞庭湖。水口正對湖中明山。在南口之北七十里。自慈利至入湖。四百餘里。源流共千一百餘里。至澧州。亦名關江。

九溪河。卽澧水。亦名後江。水道提綱。

澧水在澧州南。源出永定縣西。東北流。經慈利縣。又東北流。經石門縣。又東南流。經安福縣北。又東北流。經州南。又東南流。經安鄉縣。又東流。入岳州府華容縣界。入洞庭湖。漢書地理志。武陵郡充歷山。澧水所出。東至下雋。入沅。過郡西行一千二百里。桑欽水。經澧水出武陵充縣。西歷山東。過其縣南。又東過零陽縣之北。又東過作唐縣北。註。澧水自充縣東。經臨澧寧陽二縣。故界。又東。茹水注之。東與溫泉水會。又東。合零溪水。又東。九渡水注之。又東。婁水入焉。又東。經零陽縣南。又經澧陽縣石會。澧水。又東。經澧陽縣南。又東。歷層步山。入作唐縣。再合潒水。又東。澹水出焉。又南。經故郡城東。轉經作唐縣南。輿地紀勝。楚辭。沉有芷兮。澧有蘭。故名蘭江。又云。遺予佩兮。澧浦。故又稱佩浦。澧州志。澧水之源有三。一出桑植縣七眼泉。一出桑植縣栗山坡。一出永順縣十萬坪。至龍江口。東流入永定縣。東流南合茹水。又東。武溪水注之。又東。經大庸所。西水注之。又東。左合溫湯水。右合大庸水。又東。經永定縣南。又東。仙人掌溪注之。又東。焦溪注之。又東。鯉魚溪注之。又東。入慈利縣界。圍布溪注之。又東。九渡水注之。又東。團崖溪注之。又東。至觀嘉渚。會婁水。繞縣治北。楊夜溪注之。又東。零溪注之。又東。遺筆溪注之。又東。英溪注之。又東。桂榛溪注之。又東。茶陵溪注之。又東。過陽山下。爲東陽潭。爲界溪河。抵石門縣界。至三江口。會澧水。過縣南。爲零陽河。又東。至州東二里。旋折如繡紋。亦名繡水。

東流合潯水入安鄉縣境。至縣城西。名所前潭。又名縣前河。亦稱長河。一支東流。入華容縣界。入洞庭湖。一支東南流於縣界內。入洞庭湖。又舊志。澧水經州城下。瀦爲大池。秋冬則涸。明參政劉庭諾濬之。名新開河。又澧水流注洞庭湖。俗謂之澧江口。岳陽風土紀。據水經注。澧水會於沅。然後入湖。今澧水注於洞庭。謂之澧口。豈歲月之久。遂遷變至此耶。荊州府志。案禹貢。導江。東別爲沱。又東至於澧。而今澧水北去江二百餘里。說者遂以禹貢之文爲不可解。考水經注云。江水又東經上明城北。北江沱支分。東入大江。縣治洲上。故以枝江爲稱。江水又南經江陵縣南。縣北有洲。號曰枝回洲。江水自此兩分。而爲南北江。寰宇記云。百里洲首派別。南爲外江。北爲內江。王晦叔云。枝江縣百里洲。夾江沱二水之間。其與江分處。謂之上沱。與江合處。謂之下沱。蓋南江在古時爲岷江之正流。江陵縣之西南二十里。有虎渡口。南江從此東南流。注於澧水。而北江則沱水也。其後北江漸盛。南江漸微。世反以南爲沱。北爲江矣。大清一統志。

洞庭湖。亘岳州。常德。荊州。澧州。三府一州。巴陵。臨湘。監利。沅江。益陽。龍陽。安鄉。華容。八縣。周圍八九百里。至岳州府西北。入於大江。皇朝通志。

洞庭湖。東南隅。曰青草湖。自湘口磊山之東北。有河塘湖。數十里相通。正西對湖中之石泉山。又北數十里。有昌磯洲。洲在石泉山之北。去東岸十餘里。長數十里。西北稍闊。形如鯽魚。又北經鹿角司。西岳州府治。巴陵縣之南稍西境也。又北稍東。有新牆河。自東來注之。新牆河上源曰土城河。出通城縣西北境。龍角山。西南流有簪姑山水。合土門司水。自東南來會。又西南會東來之龍窖山水。又

西南經新牆市北。又西北流。受東北來青岡驛前一水。又西北入湖。此水口西南對常德之沅口。經三百里。自水口而北數十里。爲府南水口之雞窩山。湖中爲扁舟山。近岸。此水口卽府城南湖。西接徐家嶺者也。又北經府城西。正對湖中之君山。府城西門卽岳陽樓。又東北流出。至府東北之七里坡。北與大江會。湖與江會。南岸爲臨湘縣西南之城陵司。北岸爲荊州府監利縣東南之白螺司。湖自湘口而西數十里。折而西南。百餘里。至沅江縣東北境之資江支津。一水口。自水口北稍東。至北岸墨山鋪。徑二百餘里。又西稍北四十里。至長坡口。又西折而南。六十餘里。至李家蓬口。沅江縣西北境以上。三口皆資水支津。又西折而南。數十里。有河港溪。南自益陽縣西境之迎風鋪。北流注之。又西四十里。有一水。南自龍潭橋來注之。又西折而北。經龍陽縣東南境。有五洋港水。自西來注之。口正東對李家蓬。八十里。曰天心湖。五洋港上源。出龍陽縣西南之金牛山。東北流。合西北來一水。折東流。經縣南境。又東有小塘谿。自南來會。又東經游汛塘南。又東入湖。又西北九十里。至常德府東南之沅水口。口在正西。與東南湘江口對。徑二百餘里。又西北四十里。折而北。而東北而東。百六十里。至澧州安鄉縣東南之澧水西口。口南對長坡口。徑百五十里。又北五十里。爲澧水支津。東北口。此口東對岳州。徑百六十餘里。口南有明山、鳳山、雞子團山。與東北之君山。東南之石泉山。遙相望。湖水又北數十里。至華容縣南。有華容河。首北受大江南流。經縣東而西南來會。又縣西有場西湖。東北受九湖水。西南經縣西境。又南曰白泥湖。每雨漲。亦南入洞庭。又東三十里。折而南。二十餘里。又折東北。經禹山東麓。八十里。至層山南麓。於墨山鋪前折而東南。五十里。又東過圍湖之南數

十里。又東南至岳州府東西北。遂東北會大江也。自圍湖之東南數十里。湖與大江隔一綫地。而未相合。湖曰青草。曰赤沙。實一水。周圍八九百里。爲海內藪澤之冠。水道提綱。

洞庭湖。岳陽風土記。樂史言大江在巴陵縣東北。流入洞庭。今洞庭水會於江。非江流入洞庭也。岳陽井邑。舊在瀕江郡城西數百步。屢年湖水激嚙。今去城數十步。卽江岸。父老相傳。今江心。舊闌闔也。大清一統志。

洞庭湖在巴陵縣西南。爲湖南衆水之匯。縣居其東。華容及澧州之安鄉二縣居其北。常德府之龍陽居其西南。沅江縣居其南。長沙府湘陰縣居其東南。夏秋水漲。周圍八百餘里。其沿邊則有青草湖。翁湖。赤沙湖。黃驛湖。安南湖。大通湖。并名合爲洞庭。水經。湘水又北。過下雋縣西。微水從東來流注之。又北至巴邱。北入於江。酈道元云。湘水左會小青口資水也。世謂之益陽江。湘水左經鹿角山。又北合茶浦。又北得萬浦。湘水左則沅水注之。謂之橫房口。右屬微水。西流注於江。謂之麋湖口水。湘水左則澧水注之。世謂之武陵江。凡此四水。同注洞庭。北會大江。名爲五渚。戰國策云。秦與荊戰。大破之。取洞庭五渚也。乾隆府廳州縣圖志。

大江經湖南華容縣東。至岳州府治巴陵縣西北。洞庭湖匯沅湘見後。諸水來會。皇朝通志。

又東經監利南境。至車灣西。折南流。屈曲經華容東境。至岳州府治巴陵縣西北境。始折而東北流。洞庭湖南匯沅湘諸水。自府城西北東北流來會。江自夔州府始東南流。至此凡一千二百里也。自

監利至巴陵。凡八曲折。始會洞庭而東北。水道提綱。

大江東入監利縣界南岸。與岳州府華容、巴陵、臨湘三縣分界。又大江流入經華容縣，與監利縣分界。又東南流，經巴陵縣，會洞庭諸水。大清一統志。

沅水一源曰澠水，卽鎮陽江。出貴州平越府東北，經施秉縣南，又經鎮遠府城南而北，又經思州府南，有思州河來會。經玉屏縣西南，有戶谿江自思州府來會。折東南入湖南沅州府芷江縣西南界。又經黔陽縣北，有清水江自貴州平越府之豬梁江，都勻府之馬尾河，合諸水及靖州之渠河來會。既合清水江東流，有竹舟江自綏寧縣合城步縣諸水來會。又東北經辰谿縣東南，有雙龍江卽激水自激浦縣來會。又有麻陽河卽辰水自銅仁府來會。經瀘溪縣東南，有武谿自乾州來會。北流有藍谿自辰州府沅陵縣來會。至府城而南，有酉水自四川酉陽州合諸水來會。又東北有馬底河自沅陵縣來會。又東北經桃源縣東南，又經常德府武陵縣南，又東分數支，經龍陽縣北而合。又東北入洞庭湖。皇朝通志。

沅水數源曰鎮陽江，亦名洪江，亦曰澠水，出貴州平越府東北之黃平州南金鳳山，北流源在金鳳北麓，石頭堡東南，兩水合流，亦曰兩岔江，三十餘里，經州城東，又北折東流而東北，至舊興隆衛南，有一水自西來會。又北經飛雲洞東，有一水自西北來會。飛雲巖在舊興隆衛東當驛路，其水自西北山來經其北，亦一源也。東經楊柳營南，又東北經施秉縣南，又東北至沙坪鋪南，有三水自北合來會。西水出施秉縣西境山，東流經偏橋驛南，又東經縣城北，又東至沙坪鋪南，會沅水北水，出縣北境山，南流至鋪西南，會沅水東北水兩源，出鎮遠府西北山，西南流，合至鋪東南，會沅水，始名鎮陽江。折東南流，北受一小水，又東北流，一水自北來注之，卽鎮遠府城西河也。又東經鎮遠府城南。

鎮遠縣城北。府縣城。南北隔水相望。爲湖南入黔滇孔道。又東北流。南受一小水。水自鎮遠縣城東。東北流注之。又東北經思州府南境。水南卽鎮遠縣東北之焦谿塘也。之清谿縣清浪驛南。城西有山。又東北。南受一小水。又北有思州河。合數水西北。自思州府來會。思州河亦曰平谿。亦曰異谿。上源出鎮遠府西北界大山。曰路賴河。東流數十里。合南北二水。經鐵廠南山之南。東北曲曲百里。至思州府西北境。有鐵廠。東北水東南流來會。此水以西。水卽入白巖河。經石阡府。北注烏江者也。又東南流八十餘里。經府城北。又東合北來一水。又南合西來經城南一水。又南至中陽坪之北。入沅水。又東北。至玉屏縣平谿驛西南。一小水自東南來注之。又北經城西。又東北至大魚塘北。有戶谿江。合數水。北自黃道司來注之。戶谿江亦曰黃道谿。源出思州府北境山。東流九十里。折東南五十里。至司西南。折東流。有一水東北自銅鼓塘西南流。合一水來會。經司南東。入沅水。折東南流。入湖南沅州府治芷江縣西南界之晃州驛南。又東經波州鋪南。又東折而北。至便水驛西。有小水自西北來注之。折東北流。至明山南。折東南。經府城南。有楊谿。西南自冷水鋪來注之。又東北至巴州西。受西來一小水。又東經羅舊驛南。又東北至漁水灣。東南有一水東北自懷化驛合兩谿來注之。折南流。至竹站西南。又折西南流。經桐木北。西南百餘里。經黔陽縣城北。稍西之牛角鋪南。清水江西。南自貴州平越都勻東北流。合諸水及靖州之渠河來會。黔陽縣城之西。鎮陽江自東北來。經城之北。而會西來之清水江。俱南折。經城南東流也。清水江實沅水之上源。較黃平尤遠。其源有二。北曰平越府西北之豬梁江。南曰都勻府西南南之馬尾河。豬梁江出平越府西北大山。東南曲曲

流百餘里。至府南境。有一水。西南自貴定縣東南山東北流。經黃絲驛。合數小水來會。兩源合東北流。至府西南境黃絲驛。東受西北來二水。又東北至府南十餘里。會豬梁江。稍北。府城水自西來會。正當城南東北流。府城東水又來會。府城水本一水出西北山。東南流至府西北五十里。分爲二派。一南流。稍東。經城西折東。經西南。會豬梁於城南。一東流。折而東南。經城東北。又東南來會。又東北。卡龍河西北自牛場來會。牛場在府北界其東北大山北麓水。卽甕安之乾溪河。北入烏江者也。南麓兩水。西南流。經場東南會西來一水。折東南流百餘里。會豬梁江。此河源與豬梁江源之山。東西相去五十里。其北二百里。卽遵義府南之烏江也。古稱沅水出故且蘭。必指豬梁卡龍。又東。麻哈江。西南自州來會。麻哈州西水有三源。一西出貴定縣東南之樂平司。兩谿至司東合而東流。至州西南。一出州西南者。東北流。一出州南者。西北流。俱會北流。經州西。又北。合東來一水。又北而東北。至楊老驛北。又北至林老寨西北。入豬梁江。又東北流。折而東。經清平縣北境之大風洞北。又東。經香鑪山北。重安驛南。亦曰重安江。重安司北。卽金鳳山。山北卽鎮陽江之源。若豬梁江至此。已流三百餘里矣。稍東。馬尾河自西南來會。馬尾河出都勻府西馬境山。在邦水司西南九十里山中。本名板河。亦曰邦水河。東北流。經府西南境。折東南流。有一水自西南經大河鋪來會。又東有龍潭河。自北合三水南流。經府城西而東南來會。龍潭河在都勻府西北山。東南流至府北十餘里。有一水自北山來。一水自東北來。一水自東南來。並會。南流。經府城西。折東南流。入馬尾河。又東南。經楊安汛南。又東南至吳家司東南。折而北流。自大河鋪東至吳家司百餘里。自吳家司以北水東岸爲生苗。

界經巖坦寨平定司東凡百二十里折而東北經益城南巖城南岸爲生苗界又東北經凱里營北營卽清平縣東南境又東折而西北經臻洞司西翁壩營東又北至重安司東南豬梁江自西來會馬尾河自源至此曲折行四百餘里二水旣合曰清水江東流經巖門司南又東至平召寨北入生苗界寨之南卽苗界又東南百餘里至黎平府西北鎮遠府東南界之清江廳東流有烏下江南自古州司西南合生苗中諸水來會又東稍北九十里東北流有邛水西北自鎮遠縣來會有潭谿南自黎平府來並會邛水亦曰德明河出鎮遠縣東南二谿合東南流有長忌河自西南來會又東經邛水司南又東南有一水自東北合二谿來會折南流數十里又東南流受北一小水又東南經南洞西又東南百里至毛坪之南入清水江潭谿二源一出黎平府西山曰少寨河東北流經八舟司南亦曰八舟河又東經府北境一源出府西南東北流經府城西北與八舟河會又東經老潭司北又東北經新化所西曰新化江又北經銅鼓衛西又北至明耳司之西北入清水江水口正與邛水相對又東北至毛坪東入岔處汛界又東北至天柱縣東南之遠口西北有水西自縣城來會天柱縣直銀水出西界邛水司之東大山東流曰等谿折東北流經直銀村西北又東北折南流至縣北分流夾城左右有一水西自幞頭堡至縣西來會又東稍南流至遠口北入清水江又北至江東司西又北折東北流至大口西北有渠河南自靖州南合永從通道二縣水北流來會渠河兩源西南源出貴州黎平之南永從縣西東流經縣城南折北流經其東又北折東流受南來一水又東北流經長春堡東至五開衛東南中朝所之南曰六衝江又折東南流曰潘老河又折東北流至洪

州司西北入湖南中右所界。又東北經中中所東。又東北至播揚司東。曰播揚河。又北有雙谿。司西水。南自金坑山來會。又北稍東。至通道縣城西南。其東南一源來會。東南一源。又有二水。一南出通道南。與廣西界山東北。曲曲百里。一東南出長安堡西南。與廣西界山北流。將百里至臨口司西。合而西北。至江口南。又西北至縣城西南。與永從水合。北流經城西而北。有平茶所水。自西來會。折東流。經城北。又東折北流。經石家驛東。又北折而東。而東北。經州城東南。又北。經其東北。又北。至土溪堡東。又北。曲曲經會同縣城西而北。有洒溪。自東來合北一水。經城北來會。又西北流。有一水自西南合歐陽村。西樓村二溪來會。又北流。有水東南自五招館來注之。又北至大口西北。入清水江。此水行四百餘里。其東南源卽郎水。清水江於大口合渠河。又東至竹灘浦。西折而北。又東流至黔陽縣西之牛角鋪南。田谿鋪北。鎮陽江自東北來會。東南流。經縣西南而東也。清水江會鎮陽江處。自源至此。已千一百餘里。沅江自黔陽城南東經洪江司南。有竹舟江。卽巫水。南自綏寧縣合城步縣諸水來會。竹舟江出城步縣東南百餘里山。兩水合北流。經小平寨西。又北有關牛寨水。東自花山來會。又西北流。有水自東北來會。曰清溪。又西經縣城南。又西稍南。折西北流。有京涼橋水。土橋水。白竹山水。自東合來注之。又西北經關陝鋪。西黃石鋪。北折西南流。經綏寧縣城北。有硤河。南自城西來會。硤河出城步縣西南界長平寨西山。北流。有一水自東來會。經硤河村北。又西北流。經鋪頭寨東。又北折西北流。經黃桑坪西。又北經縣城西。又北與清溪會焉。東北流至竹舟村西。曰竹舟江。有長溪。沙溪。自西北來分注之。又東北受東南來一水。又西北流。有龍寶溪。自西南來注之。又北

經若水。南東。又北至洪江口之東北入沅。又東北經安江。司北。又東北受南來一水。又東北經銅灣南。又東北受東南一水。又北流受西南來一水。又北稍西。至辰谿縣東南之大江口。西有雙龍江。即澱水。東自澱浦縣來注之。雙龍江二源。南源曰龍潭河。出龍潭司南山。西北流六十里。合東南來一水。又西北曲曲百餘里。至澱浦縣南境。與東源會。東源曰龍灣河。出畚刀界北。西北流。有一溪自東北來會。又西流數十里。折西北。流八十里。與龍潭河會。又北流至縣城東南。有四都河。自東北山西南。流百餘里。合北來之三都河。南經縣城東而南會焉。雙龍河。經城南而西。六十里。爲小江口。又西三十里。爲大江口。與沅江會。又西數十里。折而北。而西。經辰谿縣城南。有麻陽河。西自銅仁府合諸水來注之。麻陽河數源。最遠者出貴州銅仁府西北界。曰順溪。其山北水。即期溪司水。西入烏江者也。順溪兩源。合而南流。有一水自西來會。經巖門東。提溪司西。有一水自東北來會。又南折而東。經江口汛南。有省溪。自東北來會。又東北流。有凱洪溪。自南來會。又東北折東流。而東南。有小江。自北山東南流百餘里。合東一水。經府城西北而南來會。又東經府城南。又東稍北。經黃蜡關南。施溪司北。受西南來一水。東入湖南麻陽縣界。又東八十里。至縣西折而南。有小江河。自西南來會。又東南經縣城南。折而北。經城東。又北。復折東南流。數十里。又東北流。百餘里。經濫泥村南。又東北折而東南。南受中和鋪水。又東北。南受山塘水。又北。至辰溪縣城西南。入沅江。此水當卽古辰水。又北流數十里。折東北流。經鋪市東。又北。有舒溪。自東來注之。卽船溪驛南水也。又北至瀘溪縣城東南。有武漢。卽灘溪。西自乾州城。合諸水來注之。武漢數源。名稱不一。其最遠者。出貴州銅山府北界。印江

縣東南界。烏羅司南山。其西麓水。卽清水江。入烏江者也。此水源東南流。又折而東北。經龍頭營。太平營北。共百餘里。東入湖南界。經乾州衛西境。曰木葉潭溪。有泡水溪。自北來會。又東有得勝營水。合二溪。自西南來會。又北至衛城南。有灣溪。自西北來會。又東北流。北受一小水。又東流。有鎮溪所水。合三溪。自北來注之。又東有舟溪。自北喜鵲營來會。又東南經河溪塘北。有烏巢江。自西南來會。水勢始盛。烏巢江。出於貴州界之鳳凰營。南北二源。合而東。經營南東北流。折而南。經鎮竿鎮北。又東折東北流。百三十里。至河溪塘東。與武溪會。又東南受小能大能二溪水。北受潭溪二水。又東北受仲溪水。南受洗溪二水。又東經瀘溪城南。東入沅江。此水與綏寧之竹舟江。及麻陽河皆源流。行四百餘里。又北經城東。又北折。東南流。受南來之土橋水。又東北流。麻溪自東南來注之。俗曰辰河。實沅江也。又東北受東南來一水。又北有藍溪。自辰州府治沅陵縣東南境西流。曲曲經新安塘南而西來注之。又北至府城西南。有北河。卽酉水。西北自四川酉陽州合諸水南經府城西來會。北河數源。西南源出四川酉陽州西南。與貴州烏江界之平茶司兩溪。東北流而合。經司北。又東北數十里。俗曰嘉塘河。有一水。自南來注之。又東南。其南源來會。南源出湖南貴州三省交界之邑梅司。二水。北合於司之北。北流。折而西北百餘里。合西南來一水。北經石郎司東。亦曰石郎河。又北與西南源會。又東流。有眉子河。合容溪西北。自州之東南來注之。東入湖南永順府西界。曰北河。有後溪河。西北自西陽州北界。合二水。東南流百六十里來會。亦一源也。又東。折東北流數十里。折而東流。經大刺司南。又東經小江口北。有小江。自西南來會。又東經保靖縣城北。又東稍北。有世溪河。自西

北合四水東南流二百餘里來注之。又東受南來關山河水。又東有靈溪。東北自永順府城之北山東合榔溪。經城南。合白水溪。西南流。合刺濟溪來會。又東南受麥子溪水。經王村南。東受一水。又東南流。有溶溪。自東來注之。又南有明溪。自東北來注之。又南稍西。至烏宿東南。有酉溪。西自喜鵲營之北山。東南流百數十里。合南來一小水。又合北來之蓮花池。詩溪二水來會。又東南。經辰州府城西南。入沅江。卽古之酉水也。此水行五百餘里。辰州府三面臨水。回環如帶。又東經府城東南。折而北流十餘里。折東北流。經諸灘。有百曳。高湧。九磯。清浪等名。皆險峻。數十里。折東流。又東北。有馬底河。自南來。東合來溪。及清捷河北流注之。馬底河在沅陵縣東南境。馬底驛西。東北流。來溪自南來會。又東北。經楠木塘。又東北。有清捷河。自南來。至界亭驛西。合東南來之板橋溪。西流來會。北流數十里。入沅江。又東稍北。有大淤溪。翦家溪。自北來注之。又東。有渡河。自南合三渡水來注之。一渡水。自東南來百餘里。有二渡水。自南。三渡水。自北。合於辰龍關之東。東流來會。經寧鄉鋪西。又西北流十餘里。折而東北。入沅江。又東。小淤溪。自北來注之。又東北流。有新店溪。自南合三水來注之。一水在寧鄉鋪。一水在太平鋪東。一水在新店驛東。皆自南北流。合而東北。入沅江。稍東。有新湘溪。自北來注之。又東南。有楊溪。自南來注之。又東。經鄭家驛北。有小溪。自西南合沈渡溪。北流注之。其東岸。爲桃源洞。小溪出南山中。西北流八十里。折東北流。經楊溪灣。東。羯羊塘北。又東。經鄭家驛南。又東。有沈渡溪。自東南來會。其東岸卽桃源洞。又北。入沅江。又東稍北。受東南來一水。又東。經白馬渡東。北。經桃源縣城東南。又東北。有延溪。西自縣西境來注之。又東北。有白洋河。合漆家河。自西北來注。

之分爲二派。東北至陬市南。復合。有一水自西北來注之。東流。經常德府治武陵縣西南境。河汊山南。又東。經府南。折東南流。有德山港水。自南來注之。又東。分爲二派。一東北流。又分二支。俱東南流。一南流。至滄港塘北。折東北流。會前二支。津。經龍陽縣城北。又東。會前一支。津。曲曲東北入洞庭湖。在常德府正東八十里。自黔陽縣二江合處。至此。又千二百里。共前實二千三百餘里。古所謂辰酉。敘无漸五水。俱爲所并。惟漸水未明耳。此水合鎮遠平越都勻黎平思州銅仁沅州辰州永順常德十府。及靖州之水。所受小水無數。水道提綱。

沅水。沅州府志。在黔陽縣西南。源出貴州遵義府境。自靖州會同縣東北流入。至托口。與朗江合。又東。至縣西。與瀨水合。又東。經城南。至縣東。與洪江合。又至縣東北一百八十里銅灣。入辰溪界。靖州志。沅水在會同縣西。自貴州鎮遠府天柱縣流入。又東北入沅州府黔陽縣界。一名沅溪。杜佑通典。朗溪縣有沅溪。明統志。源出西南番界。靖州志。自貴州黎平府流入。過長潭。雲潭。文溪。金溪。至托口。入朗江。辰州志。沅水在沅陵縣南。一名沅江。自靖州會同縣東北流。入沅州府黔陽縣界。又東北流。入辰溪界。又北流。入瀘溪縣界。又東北流。入沅陵縣界。又東北流。入常德府桃源縣界。元和志。沅水在沅陵縣南六十步。又沅江水在辰溪縣南二百步。府志。沅江自會同縣流入黔陽縣。至縣東北一百里銅灣。入辰溪縣界。合激水。至縣東南。折而西北。至縣城西南。合辰水。又北流。至瀘溪縣東。合武溪。折而東。至府城東。過百曳。高湧。九磯。橫石諸灘。又東。過北斗灘。又東。過清浪。雷河二灘。入桃源縣界。常德府志。沅水在武陵縣南。今謂之沅江。自辰州府沅陵縣東流。入桃源縣界。又東。入武陵縣界。

又東入龍陽縣界。又東入沅江縣界。入洞庭湖。漢書地理志。武陵郡臨沅。注。應劭曰。沅水出群舸。入於江。水經注。沅水東北過臨沅縣南。與沅南縣分水。有夷望水注之。又東經關下山。又東歷臨沅縣。西爲明月池。白璧灣。又東歷三石澗。又東帶綠蘿山。又東經平山西。又東經臨沅縣南。又東歷小灣。謂之枉渚。又東歷龍陽縣。又東經龍陽縣北。又東合壽溪。又東至長沙下雋縣西北。下注洞庭湖。入於江。常德府志。沅水入桃源。合大小敷溪。夷望。沈水諸溪。經白馬洞。爲白馬江。亦名桃川江。又東合延溪。邵溪。又自沅江縣富池。經新窖。至倒水港。大清一統志。

湘水源出廣西桂林府興安縣南。曰海陽江。北流分爲二復合。有六洞山水。自湖南城步縣來會。又東北始名湘江。經全州城西南。有羅江。自湖南新寧縣界來會。有灌水。自灌陽縣來會。又東北入湖南界。經東安縣東南。有右江來會。經永州府治零陵縣西北。有瀟水。自道州。合永明。江華。寧遠。三縣諸水。名曰沅江。經府城西來會。北流。經祁陽縣西。有盧洪江。自東安縣來會。經常寧縣北。有舂陵水。合歸水。自藍山。嘉禾。新田。桂陽州來會。經衡州府治衡陽縣東南。有蒸水來會。北流。有郴江。自耒陽縣。合桂東。桂陽。興寧。郴州。永興諸水來會。經衡山縣南。有洙水。合攸水。自酃縣。茶陵州攸縣。及安仁縣之小江來會。又北有水。自衡山來會。又東北有淥江。合泗汾河。自醴陵。瀏陽。合江西之萍鄉。萬載縣諸水來會。經湘潭縣東南。有漣水。自湘鄉縣來會。經長沙府治善化縣西南。有瀏陽河。自瀏陽縣來會。稍北有黃泥江。自東北來會。又北有瀟河。自寧鄉縣來會。又北有資江。自益陽縣。合武岡州。新寧。邵陽。新化。安化諸縣水分支。經湘陰縣。沅陵縣。先後入洞庭湖。其正支東流來會。經湘陰西南。有汨水。自平江縣合諸水分流來會。湘水分爲二派。復

合入洞庭湖。皇朝通志。

湘水源出廣西桂林興安縣南之海陽山。兩源合北流。有桃花源水。自東來會。又北曰海陽江。受西南一小水。經鳴玉洞東麓。折東北。流數十里。至縣東南。左右俱受一小水。遂北。爲分湘灘灑。其北抱縣城之東。折而西。經城北而西南。至桂林府城者。灘水也。湘水則分爲二。北流三十里。復合。東北流。有龍蟠山水。南自九龍巖之陰。合數小水。北流稍西來會。又東北。經光華鋪東。有六洞山水。西北自湖南城步縣東南之大猴寨黃水巖來會。興安縣北之越城嶺。卽古始安嶺。亦曰始安嶠。五嶺最西者。其水下流入灘。又東。受南之界牌山水。又東北。有咸水。自西北來注之。水口在奇石山之北岸。又東北。有小水。合自北來注之。俗至此曰湘江。又東北。至全州城西南。有楊子江。西南自石塘塔板田村。合二水來注之。其北有羅江。合數水。自西北來。其南有灌水。亦曰灌江。南合十數水。自灌陽縣來。並會。湘流始盛。羅江出州西北。與湖南新寧縣界之覆釜山。南流合二溪。又合東北之鈎鐔潭水。東南流。數十里。有鍾樂水。自西來會。又東。有一水。自北來會。又東南。數十里。受北來二小水。折而南流。數十里。至州城西南。入湘江。灌水。源出興安縣東南境。曰龍川水。南流。有西北源來會。又南合市溪水。折而東流。數十里。至白竹鋪西南。有一水。自西南合。二水東南流。九十里。折而北流來會。又東北。經鋪東而北。會西北來之九龍巖陽水。東經黃牛寨南。又東。受南一小水。折而北。有吳川水。自東南來注之。又北。有鐘水。自東來注之。又北。經灌陽縣城東。又北。折而東。受南來之麒麟山水。又北。有沙羅江。合二水。自西來注之。又東北。受東來之永安關水。又北。受西南來一水。又東北。受東來之白

水又西北流。至全州城南稍西。與湘江會。此水源流曲折。四百餘里。水勢與湘江同。又東。經城南東北流。俗曰合江。經銀石白雨。飛山西麓。又北。有黃沙河。自西來注之。又東北。至三角司。東有洸水。西自文山東流。合二小水來注之。又東北。入湖南界。經東安縣東南境之淥埠市南。水口村北。又東。有右江。自北來。西合縣南清溪水。東南流注之。右江出東安縣北境大山。東南流百里。至右江鋪東。又南。有清溪。自縣西北山東南流。經城南而東北。合西來一水。於白牙鋪南。又東稍南。與右江會。又東南。至大江口。西石期市之北。入湘江。又東南。至龍塘鋪北。折東北流。至永州府治零陵縣西北之湘口村。有瀟水。南自道州。合永明。江華。寧遠三縣諸水。曰泥江。北流經府城西。而北來會。泥江。即古瀟水。出九疑山。朱明峯。北流。與涇水之出石城娥皇二峯。砾水之出女英峯。舜源水合。今泥江。源在寧遠縣南境九疑山者。有回西水。自南界山西。流三十里。經九疑司南。又北折而東流。又東北。受東南來一水。又東北六十里。至縣城南。折而西流。有分水坳。南水西南流九十里。至白馬鋪西。而南受東南來一水。又西南。經縣西南合焉。又西。至把截村北。有石城峯北水。自白草領東北流。經孟塘東。至把截南。又西北。與回西水會。即古涇水也。又西北。至道州東北之青口。有水西自州來會。州南之水。出江華縣南者。源稍遠。縣南白芒嶺而南。有冬冷山。開山壕界東北。有白石關。皆與廣東接壤。即古之萌渚嶺也。南即連山橫水。東即連州天堂嶺。分界南北。州西南之水。出永明縣南。亦遠縣西南。與廣西富川界之龍虎關。古調清溪。搖山。即古都龐嶺。其西南水。皆入桂江者也。江華水出縣東南境大馬營南山。西南流。經大橋。及長平寨東。又南。受西北來之麻江水。又南。有平衝水。西南自

連山縣界山東北流。合白石關水來會。折西北流。經錦田所南。至土塘寨東。折向北流。有老梅營水。自北來會。又北。經白芒營東。又西北。至縣東南。有梅花村水。自西南來會。又北。經城東。又北。數十里。至道州南境之曲溪口。有永明縣水。自西南來會。永明縣水。卽古遼水。源出廣西富川縣北境之平山川也。東北流。至龍虎關。北入界。又東北。經鎮峽關冷水鋪南。又北。經馬蹄營西。又東北。至縣城南。有小水自西北來會。又東北。八十里。至道州南。與江華水會。二水既會。東北流。有營水。西自永安關來會。又東北。經州城東南。又東北。有濂溪。西自安定山東北。合宜水來會。卽出州西界之春陵山者也。又東北。總名泥江。至青口之北。寧遠縣水。自東南來會。又北流百七十里。折東北。曲曲流數十里。至永州府治零陵縣東南境。折向西流三十里。折向南流五十里。又折西北流。受南來一水。至府城西南。有永水。西自永山東北流注之。北。經城西。又北二十里。至湘口。入湘江。湘江得此水始盛大。故稱瀟湘也。平山川西南流者。下入桂江。湘水既會瀟水於零陵北。北流百餘里。至祁陽縣西境之黃羊鋪。南有盧洪江。自西北來注之。盧洪江出東安縣北境山。東南流。經盧洪司南。又東南。至黃羊鋪之西南。東入湘江。折向東南流。經哲周灘北。又東。受東南來一溪水。又東。稍南。經縣城南。又東。折向北流。有騰雲嶺水。合西北一溪。自北來注之。又北。折而東南流。經古洲北。至白水司北。又南流。至歸陽司南。又折東北流。百里。至糧船埠南。又東。折南。至常寧北境之白坊鋪北。又東北流。至松柏鋪東。有水南自常寧縣。合二溪來注之。一水出常寧縣西南境之塔山。東北流百餘里。經縣城西。北。又東。稍北。至金塘鋪北。有一水自南來會。一水出南境三口山。東北流。經彌勒鋪西。又東北。有一

水自西南來會。又東合南來一水。又北流經縣東境。至金塘鋪東北。西流會前一水。又東北流。入湘。又東北有春陵水。合歸水。南自藍山。嘉禾。新田。桂陽州北流來會。歸水即舜水也。歸水源出藍山縣西南界九疑山之柘林峯。東北流過三分石。至寧溪所南。其南即廣東界也。又東北經縣城南。又東北依山至古城南。有毛俊堡水。自東南界西北流來會。又東北流九十里。經嘉禾縣城南。東北至石口東。春陵水自西來會。春陵水源出新田縣西北。與寧遠縣界之春陵山。俗曰烏江源也。東南流數十里。經縣城西南。又東有一水。自東北經城東來會。又東南經張富村。白面司南。又東至石口。與歸水會。二水既合。北流七十里。至柏家渡西。折東北流。經大山下。又東北經桂陽州西北境。至斗下渡。又東北百里。至野落灘。又北百里。至白沙市東。折西北流。數十里。又北經白馬渡西。衝頭市陽隔洲東。又東北與湘江合。即常寧縣東北界也。此水源流長六百數十里。又北流經衡州府治衡陽縣東南境。折西北流。至東江北。折正北流。經府城東稍北。有烝水。自西南經城北來會。曰烝口。烝水數源。遠者出衡陽縣西南界之大雲山。東流過石灣浦南。東北流百餘里。至陰陂市南。有西來之雷公寨水。北來之烝水。合而東南流來會。又東流八十里。過府城西北。又東北至烝口。入湘江。稍北有郴江。南自耒陽東南。合桂東。桂陽。興寧。郴州。永興諸水來會。曰耒口。耒水。即郴江也。郴水與耒水合。總名耒水。其上源最遠者。桂東縣之桂水也。桂水源出桂東縣西北之小桂山。東南流經縣城西。南又東南有漚江一源。出縣北屏水山。南流。一源出東境三都村。西流合而來會。曰增口。又南稍西。經三峯山。泥湖山。有一水自西北來會。又南受東來新坑水。又南受西來石磨嶺水。又南數十里。折

而西流。至梅洋橋。受北一小水。又西。經田莊南。又西。有西水。北自縣西境山南流。經西水橋百數十里來會。經桂陽縣北境銀嶺之北。又西。至豐溪村南。有耒水自東南來會。耒水出桂陽縣南山。其南水皆入廣東者。耒水二源。皆在山的北。一東流。一西流。合而西北流。會二小水。經縣城西。又西北有廊江。西南自白巖來會。自此而西北。俱稱耒水矣。又西北有文明村東水。南自廣東界鎮安司北流。曲曲折折東北。經百丈嶺西。而北來注之。又西北。經滁口司南。又西北。經興寧縣南境。有資興江。合東北來之西板橋水。西自城東來之坪石水。南流來會。又西北。受南來之雷溪。又西。受南來之鴉溪。又西北。有烏石江。自西南來注之。又西北。至郴州東北之郴江口。郴江自南來會。郴江出州南境之黃岑山。北流。其南即章水。流入廣東界者也。郴水出北麓。北流百餘里。經州城東南。受西來一小水。又北。經城東。又東北。受西南來一水。又東北。與耒水會。以下總曰郴江。又北。折而東北流。數十里。至永興縣東南境。有廖江。東自七寶山。牛頭嶺西南。流百餘里。經石壁村南來會。又西北。有注江。東北自乾溪來會。又西北。經永興縣城西。又北稍西。有黑山口水。南自郴州西南境之黃盆嶺。東北曲流二百餘里來會。即古白豹水也。又北。經郴州灘東。又北。經上堡市東。又北。至耒陽縣之西南。折而東北流。經縣城東。而北稍西北。又折正北流。經新鎮市西。又西北。經衡陽縣東南境。百餘里。至府東之泉溪市西。又西北。受南來一小水。又西北。與湘江會。此水源流曲折。約七百餘里。郴水所出之黃岑嶺。即古騎田嶺。爲五嶺第二。湘水又北。至插木市東。折東北流。至衡山縣南境。數十里。自南而北。曲曲流。皆繞南岳支峯之麓。有涑水。合攸水。南自酃縣茶陵州攸縣。及安仁小江。西北流來會。曰茶

陵口。泚水源出酃縣南，與桂東縣界烟竹堡南山，曰米泉，北流數十里，經黃那潭，又西北七十里，左右各受一小水，北經斜瀨渡，又北有雲秋水，西南自竹坑橋山，東北流百數十里來會，又北有水，西自順風嶺來會，曰泚江，凡酃縣西南北境，水皆注之，又折東北流，至縣北境之河口，有沔渡河，東南自縣東南界山，北流，經縣東百餘里，而西北來會泚江，又西北流百里，折而北流，數十里，至茶陵州南境，折而東北，經州東南，有沙坡河，合二溪，自東南來注之，又北經城東，有巖溝河，合二溪，東南自和尙莊來注之，折西北流，有潛江，東自高龍司來注之，又西，經城北，稍西，有背江，東自江西界之皇零山，九路衝，有浦江，東北自太和山，西流合而來會，又西至把集鋪北，受南來一水，又西稍北，至黃石鋪北，受西南來一水，又北稍西，六十里，至攸縣之東南境，攸水自東北來會，背江，即古茶水，出於江西永新縣界之景陽山，其東南即皇零山，九路衝村也，西流百餘里，與北來之浦江合，又西南會泚江，攸水源出江西界之瀘瀟山，其東水，即安福之瀘水河，東南至吉安府，入豫章江者也，攸水，自山西麓西南流，會柴嶺水，又西南有水頭村，東西二溪，合而西北流來會，又西南流，有斷江橋，東西二溪，自南來合而來會，又西南，有溪，自南來注之，又西至新市鋪東，折而南流，七十餘里，至縣東北，又西南流，會泚江於縣之東南，二水合，西流，經縣城南，又西百里，至草市北稍西，有小江南，自安仁縣來會，小江二源，一南出尺灘北流百三十里，至安平司東東源來會，東源，出酃縣西北界之尖山鋪山，西流，曲曲，經太安檣橋二鋪之北，亦百餘里，至仙口鋪南，與南源會，西北流，受東北來自大石嶺一水，又西北，經青路北，安仁縣城南，又西北，有一水，南自觀音關，合同塘小臂二溪，北流

來會。又北流，曲曲百五十里，至草市西北，會涿江攸水。攸水，涿江自草市西北流，百五十里，至衡山縣南之茶陵口，入湘江。涿水，源流自南而北，而西北行六百餘里，湘水又北流，至衡山縣城東南，有水西北，自衡山來注之。南岳在縣西，縣巨數百里，水自南麓會諸溪澗，東南流，經南岳司北，又東，過師姑橋，又東南，經縣城西南，烏石鋪之北，又東，入湘江。又北，經城東，東北，經石橋鋪東，有水自西來注之。水亦西出，南岳東麓，又東北，曲曲二百里，經涿口市西，有涿江，合泗汾河，東自醴陵縣，會江西萍鄉諸水來注之。涿水源有二，東源出袁州府西萍鄉縣東北境大山，二澗，一西南流，一東南流，合而南，所謂萍川也。稍西南，有小水自東來會，曰新江，折西南流，經縣城東南，又西南至湘東鋪南，有馬跡嶺水，北流，合二溪，自東南來會，又西，受北來之五金山水，又西流，曰湘東江，又西北流，入湖南界，插嶺關南，又西北，北源來會。北源出瀏陽縣東南，與江西萬載縣界之鐵山南二澗合，經王家橋，西流，經聞家市北，又西南流，至渠城司北，吳甲市東，又西南，受北來之路口橋水，又東南流，經金剛渡東，又南，受東來一水，又南，曲曲經明瀾鋪東，又南，折西南流，百餘里，與東源會，曰雙江口。二水既合，曰涿江，西流，經醴陵縣城南，又西北流，折而西，至鐵河口之北，泗汾河自東南來會。泗汾河源出江西萍鄉縣西南境之婆婆巖，西流入湖南界，西北流，數十里，折北流，有丹陵橋水，自西南來會，又西北，至船灣東，北流，數十里，至泗汾鋪東北，折西流，數十里，又西北流，至鐵河口東北，會涿江。既會泗汾河，又西流，八十里，至涿口市北，西入湘。此水行四百餘里，湘水又北流，至湘潭縣東南之渚洲鋪，折而西，稍北流，有茶園水，自南來會，又西北，至下攝司南，飛羊鋪北，有涓水，自西南山

東北流百餘里來注之。又北有漣水。西自湘鄉縣。合諸溪東流。經城南來注之。漣水數源。西南源出賈慶東北境之大龍山北阜。東北流。又曲曲而北。二百餘里。受西北來一水。折東北流。至關王廟西。南。其西源水。出新化縣北境山中。東流。經桂子巖。南獨山北。又東折。東南流。有伏溪口二水。自北合而南來會。又東南。至關王廟南。與西南源會。源流亦二百餘里。又東南數十里。至潭市南。有豐溪。南自黃龍山北流。折而西北。經永豐橋東。凡二百餘里來會。又東南至大江口南。有水南自山中。北流百數十里來會。又南。折東北流。數十里。有小水。自南來。又有豆溪河。東北自縣北之夏陰燒磚二橋。西南流來會。又東流。有花橋水。南自衡岳北麓。經望岳山而北來會。又東經湘鄉縣城東南。又東稍北。有官步河。自西北來注之。又東北。受北來二水。又東。經玉托鋪。羸湖鋪南。受北來一水。稍北。至薑奢市南。又東流。經湘潭縣城南。入湘江。此水自寶慶東北。衡岳以北。諸水皆會。源流五百餘里。湘水於湘潭城東南北流。又東北。受東南一水。折北而西。又北流。經回龍鋪西。又北。經下托鋪西。受西南來一水。又北。至長沙府治善化縣西南。有水西南自岳麓山來注之。岳麓南去衡山三百里。隔於湘潭一水。實不相連。又東北。經府城西南。有水東自城南來注之。北經城西。又北稍東。有瀏陽河。東自瀏陽縣來注之。曰瀏口。瀏陽河出縣東界。二源。一曰大溪。自大圍山西南。曲曲二百里。一曰小溪。在大溪源之東南山。亦西南流。合北一小水。西經鐵山之北。亦二百餘里。會而西流。至縣城東南。受北來城東一水。又西。經城南。受南來一水。又西稍北。受北來。城西北之水。過百子橋。又西。有焦溪。東北自焦嶺西南流。合數水來注之。又西。經永安市南。又西。過百家山北。又西北流。經丁家鋪。楊林鋪南。

又西北至長沙府城北十里入湘江。稍北有黃泥江。自東北來注之。黃泥江出平江縣南界。長田市山西南流。經黃泥界。又西南有社港水。自東來會。又西南九十里。有瀏陽北境二溪。合而西南流來。曾。又西折而西北。曰勞刀河。又西南數十里。流入湘江。其水口在瀏口稍北。湘水折西北流。有水西南自岳麓來注之。此岳麓西水。東北流。經驚馬橋而北者也。又西北有建港溪。自西南來注之。建港溪出建港橋南山。東北流百五十里。入湘江。此水源隔山。卽湘潭豆溪源也。有清水。合二溪。自東來注之。一溪自山西流八十里。一溪自腰站東山。西南曲曲流六十餘里。合而西流。經橋頭鋪。又西入湘江。又北有圍河。合玉堂諸水。西南自寧鄉縣來注之。圍河數源。出寧鄉縣西。與安化縣界之十泉風大山。及南曬穀石二水。東流合而東。經黃枋鋪南。有芭蕉嶺二水。皆北流來會。又東經長橋南。曰圍河。又東稍北。至玉堂鋪東南。有玉堂河。自西北來會。又東至石土南。受南來一水。又東至縣南。有譚家橋水。自西南來注之。折而北流。經縣城東。又北。受西來一水。又東北。受西來青化衝龍二鋪北之水。又東數十里。入湘江。又北。資江西自益陽縣。合西南武岡。新寧。寶慶。邵陽。新化。安化諸水來會。曰喬口。資水卽都梁水。源出武岡州西南。有楓門嶺水。東南流。高坪南山水。東北流。合而東。經山口南。又東。有一水。南自水東鋪來會。資源及此水。隔山之水。皆南至城步縣西。入竹舟江者也。又東。經浪石北。至西筵橋。受南來一水。又東稍北。經州城南。又東北流。至赤溪橋。有龍溪。自東南合二水來會。龍溪出州南境。東北流。有二水。又出其東南。北流而合。折西北流。會龍溪。又西北至赤溪橋。入資。北經石羊橋西。折東北流。經斗溪。荆竹西北。有蓼溪。西自蓼溪司東流來會。又東北。經西橋五里。

排西。又北有水西自碇石司合二溪東流二百餘里來會。又東北經龍潭鋪西。又東北受北來一水。折東南流經紫陽司南。又東南曲曲而東。曰紫陽江。經寶慶府治邵陽縣西南境。有羅江。即古夫夷水。南自新寧縣合諸溪來會。水勢始盛。羅江源出新寧縣南。與廣西界之羅江巖北流數十里。有長木山水。自西南來會。又有縣西一水。合北一水。自北來會。折東北流。經縣城南。又東北有大雲山水。自南來會於黃龍塘北。又北流折而東。至油溪橋北。有香溪。南自大龍山北流來會。又東至木山鋪北。楊田鋪南。有楊家山水。南自廣西界之三山鋪來會。又受東來一水。又北流至田堂寺西。折東北。曲曲流百五十里。會資水。此水源流數百里。與資水等。既會羅江。又東北經楓林鋪南。又東經府城北。有邵水。南自城東來會。邵水即花橋。及洪橋官橋三水也。花橋水出南境思鋪之西南山。其隔山水。即盧洪河源也。此水北流。東北過小花橋西。又北數十里。經谷州鋪西。又北。至府東南。有官橋水。東南自獅子山北流。經南市東。又西北。會北來之洪橋水。折西南流。經官橋鋪北。又西流。至府東南。與花橋水會。二水既合。北流。經府東而北。入資水。資水自東入邵陽北境。流數十里。有五十三灘。既合邵水。又有四十八灘。又東。折而北流。百里。至申家塘西。又北。折而西流。七十里。有潮水。合田心水。自西南來注之。折北流。有連溪。東北自石柱寨西南流。至蔣家壩來會。又西北流。數十里。經新化縣城東北。又西北至牛婆壩北。有洋溪。合思豐溪。女溪。自西南來會。洋溪。出新化縣西南境大山。一源東流。一源出望雲山東北流。合而東北數十里。至三姓口。有女溪。南自龍源山來會。又北。有思豐溪。西自鐵山來會。又東北。至牛婆壩西北。入資水。又西北。數十里。有油溪。自東北獨山來注之。又

西北數十里。至蘇溪司東。折東北流。百八十里。受西北來一水。經安化縣西境。又東北二百餘里。至縣東北境。有敷溪河。合二水自西南來注之。敷溪河出安化縣西南之黃柏山。東北流。曰石城溪。一出縣南境之桂子巖。北流。曰大木溪。至縣城南。合而東北流。經縣東北境山中。百餘里入資水。又東。經益陽縣西境。曰資江。有四里河。西南自安化東南境山來注之。此水源在清塘鋪之南。其隔山水。即伏溪口水。南經湘鄉者。又東。受南來三小水。曰占溪。曰桃花溪。曰誌溪。俱自西南山東北流注之。又東。至益陽縣南。分爲二派。一東北。至城東南。折而東。一東流。受西南來之七里溪。又東二十里。至小江口。復合。東流。又分爲二派。一東北流。十餘里。又分二支。正北一支。經王家村。瓦口磯。又北。分數派。一汊東。至湘陰縣。林子口。黃花洲之北。入湘江。一汊北。折而西。經沅陵縣南之瓦陽塘。東。折北流。經縣城東。又分二汊。一東北流。入洞庭湖。一西北流。數里。又分二汊。一北流。於縣正北境白沙塘之東。長坡入湖。口東南。去前汊口四十里。一西南流。至兔子哨。折而北。至李家蓬。西入湖。口東。去前口長坡。約六十里。正當沅陵西北。自王家村東南。一支曰青草港。東南二十里。與一支東流者。合爲資水。正派。又東南。有關龍河。合西北仙清二水。自西南來會。關龍河源在衡龍鋪北。俗曰玉堂江。又東流。至喬口。與湘江會。此水源流約千七百里。其入湘之口有二。於喬口入湘者。其東流正派。於湘陰縣北入湘者。其支津也。其支派。西北至沅陵縣境入湖之口。有三。又支津之津也。湘水既會資水於喬口。東北流。至湘陰縣西南境。有支津。西通資水之支津者二。稍北。有哀江。東自東南境。合數水來注之。過城西黃花洲。又北。有資水支津。西南自林子口來會。又東流。折而東北。有汨水。東南自

平江縣合諸水來至汨羅山分流而西注之曰汨羅口汨水即平江出平江縣東與江西界之黃洞嶺西南流經寧陽村南又西南經長壽司北又南有一水自東來會又西南經義口北又南有一水南自連雲山來會西流經銅坪及圍灣之南有一水東南自盧洞西至滑石橋江口合西一溪東北流來會又北經橫槎東又西北至縣東北境折西南流經城東南及西三面又西北流至楊梅江有昌水河自北來會又西流數十里稍北分爲二派西南流復合又西南至新市北折西北流至歸義驛西北有一水自東北伏井驛之東南來會又西北分爲二支一支西流稍北於山麓西入湘一支北流數十里西北入湘曰屈潭亦曰汨羅口湘水至磊山洲分爲二派又北復合入湖曰湘口正對湖中之石泉湘水自源至此行二千餘里會桂林永州寶慶衡州長沙五府道郴武岡桂陽諸州水爲洞庭上源水道提綱

湘水源出廣西桂林府全州九十里鐘石山匯羣山之水東流至黃沙河入東安縣境石期市入零陵縣境又東流至湘口合瀟水北流入祁陽縣境又東北入衡州府常寧縣西北界又東北入衡陽縣又東北入衡山縣東界又北入長沙府湘潭縣界桑欽水經湘水過重安縣東又東北過酃縣西承水今按承水即今烝水承烝字義音同從東南來注之注湘水又北歷印石又北逕衡山縣東又東北逕湘南縣東又歷湘西縣南元和志常寧縣湘水在縣北六十里衡陽縣湘水西南自永州祁陽縣界入衡山縣湘水在縣東衡陽縣志湘水自祁陽東經常寧縣界經衡山縣南八十里松柏鋪南又東北至江口入衡陽又北流歸水自東流注之又北經霞山東又北經花光山東又北經回雁

峯東。又北。經衡山府城東。又北。過石鼓山東。又漢書地理志。臨湘注。應劭曰。湘水出零山。水經注。湘水又東北。過陰山縣西。沅水從東南來注之。又北。過醴陵縣西。漣水從東注之。又北。經建寧縣故城下。又北。過臨湘縣西。縣南有潭山。湘水經其南。又北。經昭山西。又北。經南津城西。西對橘州。又北。左會瓦官水口。又經官船西。左經麓山東。又右經臨湘縣故城西。又右合麻溪水口。又經瀏口。戌西北。又北。瀉水從西南來注之。又北。左岸有高口水。又北。右會鼻洲。又北。經陵子口。又北。經銅官山。又北。經錫口。戌東。又北。枝津北出。謂之門水。經東北。合門水。又北。經黃陵亭西。右合黃陵水口。又北。經白沙。戌西。又北。會東町口。澗水。又北。汨水注之。輿圖。湘江自湘潭縣南石塘鋪入境。東流會淥口。卽漣水口也。又折而西北。有鼓灘洲。又北。左會易俗河。又北。經楊梅洲。又北。會湘鄉河。又北。經縣城南。繞流而東。經縣城東。又北。至縣北界。左會靳江河。入善化縣界。北流。經縣城西南。至府城西。水陸洲入。長沙縣境。至城西北。經三沙磯。又北。右受瀏渭水。又北。左會新康河口。右會澇塘河。又北。左會靖港。又北。右會樟樹港。左合喬口河。接湘陰縣界。湘陰縣志。湘江自上窰潭入境。江西爲喬口。稍北爲驛馬潭。又北。經文武二洲之間。爲鯿魚潭。分流爲文涇江。而西北流。其西岸名林子河。北流。經舊縣治西。爲小林子河。資水至此。入湘江。少北。左會壕河。又北。爲楊雀潭。又北。左會掃帚口。稍東北。匯爲蘆林潭。右會縣河。又北。左經橫岑口。會楊水寺潭。又北。匯爲南江潭。又北。經磊石山西。又北。通青草湖。而左會汨羅江也。大清一統志。

大江經臨湘縣西南。有白泥河水來會。皇朝通志。

大江既會洞庭水於巴陵東北之荆河口。經城陵司北。白螺司南。南岸有松陽湖。二支津來注之。又東北。經臨湘縣西南境。南岸有白泥湖水。自縣東南來。西北流注之。白泥湖在縣東南。卽黃介湖之委也。袤延七十餘里。西北流。經縣南境。又西入大江。又東北。過石磯。曰城陵磯。曰道人磯。經縣城西。北。又東北。經螺山南。又東北。至新隄鎮。南土磯頭北。南岸有黃介湖。西口。又東至茅埠村。東北。港塘。西東口。黃介湖源。南出大嶺口。水北流。經長安驛東。桃林鎮西。入湖。又東南。有龍角山水來會。湖袤延百餘里。西南流。爲白泥湖。西北入江。東北流。又爲長湖。其南有尖山鋪。港口驛諸山。三水會平水。港流入焉。湖東卽蒲圻西境也。北分二港。一西北入江。一北入江。水道提綱。

大江會洞庭諸水。東經臨湘縣。又華容縣。舊志。大江在巴陵縣北。從荊州府監利縣。流過城陵磯下。合洞庭諸水。入臨湘縣界。臨湘縣志。大江自城陵磯入縣界。經縣北二里。東至高家墩。入嘉魚縣界。

大清一統志。

續行水金鑑卷第一百四十九

江水原委四 湖北 漢水

又東北有陸溪水。自江西寧州西界。經通城崇陽。合諸水來會。皇朝通志。

又東北爲六溪口。卽古陸口。有陸水。東南自蒲圻。合通城崇陽諸水來注之。陸溪出江西寧州西界。大湖山。三原。東北流。折而西北流。經苦竹山西南樓嶺。東曰石鰲頭河。又東北至河市北。有河市港。水西南自黃龍山下將嶺。北流來會。又東北。經通城縣東境。有東港。太平港。及城南之朗河。皆自西南來會。又有龍窰山水。自西來。經城北來會。又北會西來之白港河水。折東北流。經新橋鋪。苔橋鎮。西北有毛公渡河。自南來注之。又北至石五鋪西。有大溪洞水。自東南來注之。又東北至崇陽縣西南。有吳城港水。南自雷公山來。會。又東經縣城南而東。有水自東南來注之。又北流。經城東而北。有白羊山水。合數小溪南流。折而西北來注之。又西北流。經崇洪鎮北。有小水自西南來注之。又北流。折而西。至蒲圻。東南有桃花嶺水。自西南來注之。又北。經縣城東北。又西北百餘里。至六溪口。西北入江。又東有石磯。磯南岸曰石磯頭塘。南岸有小湖口。卽嘉魚城西南湖也。赤壁在嘉魚縣西。與江夏縣界北岸。對烏林。水道提綱。

武昌府舊志。大江自臨湘縣清江口。入嘉魚縣境。經石頭口。陸溪口。嘉魚口。至嘉魚縣城。陸水一名雋水。源出通城縣上雋鄉。東北流。繞城西。經縣治北。合秀水。又東北。經柘橋。入崇陽縣界。名崇陽河。

至縣西南會桃溪。又繞城東。會大東港。經壺頭及崇陽。洪入蒲圻縣界。名蒲圻河。自縣東南洪下灘。西北流。至城東南。會荆溪。繞城東。通浮橋。又西北流。入嘉魚縣界。至縣西南七十里陸溪口。入江。又武昌府舊志。崇陽縣東有吳城港。白石港。縣西有白泉河。龍坊河。縣南有高視河。太原河。東北有龍頭河。西北有江巖河。俱會崇陽港。以入雋水。大清一統志。

經嘉魚縣北。沔陽州東南。又東北有沔陽東南諸水來會。皇朝通志。

東經嘉魚縣城北。北岸。卽沔陽縣東南境也。北岸自新隄鎮楊家灣東北至此。雖無入江之水。沔陽支津。北引漢水。爲川爲澤。縱橫五六百里間。又東折而東北。又西北。至新灘口。沔陽東南諸水合而來注之。水道提綱。

水經注。江水又東北。至江夏沙羨縣。今按沙羨縣。漢屬江夏郡。卽今武昌府江夏縣。西北沔水。從北來注之。又大江東入監利縣界。南岸與岳州府華容。巴陵。臨湘三縣分界。又東入漢陽府沔陽州界。荆州府舊志。大江至荆河口。會洞庭湖水。流至白螺磯。入漢陽府沔陽州界。大清一統志。

又東北有斧頭湖水。自嘉魚縣。合咸寧縣水來會。皇朝通志。

又西北折而東。經大軍山南麓。至金口鎮。西有斧頭湖。金水自南來注之。斧頭湖長百數十里。自嘉魚東南境。迤而東。有小水三。自南來匯。又迤而北。有咸寧縣咸河。自東南合六小水來北注之。又東北至賀勝橋。受東來一小水。又北百里。至金口鎮。巡司西北。入江。水道提綱。

大江東流。入嘉魚縣。與安陸府沔陽州分界。斧頭湖在江夏縣南一百二十里。會嘉魚。咸寧諸縣。

水至金口入江。又塗水源出咸寧縣界鐘臺山。曰咸河。又名西河。北流至縣南金燈山下。名塗川。又合官埠赤港二水。又西北入江夏縣界。匯爲斧頭湖。北流至金口入江。水經注塗水出江州武昌郡武昌縣東山。西北流經汝南僑郡故城南歷縣西。又西北流注於江。明統志一名金水。入江夏縣謂之塗口。亦名金口。咸寧縣志其源有二。一出浚水嶺西北流過洪崖山。名蘋花溪。一出鐘臺之桃花泉。北流與蘋花溪合。大清一統志。

又北有赤野湖。會沔陽太白十四湖諸水來會。皇朝通志。

又北流稍西。經小軍山東麓。又北有赤野湖。西會沔陽太白十四湖諸水來會。曰沌口。漢陽府之西南境也。荊州府治江陵縣城北有大暉港。自北而南。折而東。經城北。又東數十里。形如曲尺。北水無所入。其北有池水。當港曲平地。於龍背橋南。東流六十里。有小水自西北來會。匯爲太白湖。自西迤而東南。長九十里。至潛江縣西境。梅家觜西有三湖水。西南自江陵東南境來會。又東有漢水支津。東北自大澤口西南流來會。南流有紅馬湖水。南自江東岸之郝穴。東北流。又西合觀音寺東之水來會。卽古所謂夏水。首受江。後人曰長夏河者也。自此分二派。一東南流。至周家觜。又分爲二。北派東流至沔陽州南之謝雲口。又東數十里。至峰口復合。有小河西北自州北境來會。東至土坑口。又分爲三。其東流二渠。匯爲沙湖。其南流者爲白石湖。有上洪湖。官湖。下洪湖相連。自西來會。又南而周家觜。南流之水。與紅馬湖南流之水會。而東南者。西南受監利縣北岸之南江湖。蓮頭湖。大烏湖。蔣師湖。大城池五水。又東流百數十里。至新隄鎮楊家觜。又東北來會。過小港口。又東北與沙湖水

會而東。州東北水之支渠，亦東南注棍當湖，會於平坊。又東折而北，至州東南之新灘口。巡司之南，東入江。沔陽北派，自潛江縣北境，張集口南，引漢水支津，南流至排沙渡之西，折東南流，經縣城東北，又東南流，分爲二派。至謝汪劉三場，又分爲三。其東二派，南復合。至州西蕭家場，折而東北，匯爲西湖。經州西北及正北，曰邊邊湖。又東曰白泥湖，長百二十餘里，南北廣者八十里，狹者五六十里。其南一派，東南流百七十里，至州南境，與州城西水合。又東南至土坑口，會長夏湖者也。白泥湖，東南流於沙鎮司南，東北注赤野湖。赤野湖，兩受漢水。一西北於州東北之仙桃鎮南，南流與白泥湖北出之二渠合，而東經下楂埠南。又東注赤野湖。一東北於漢川縣東境蔡店巡司之北，引漢支津，西南流百餘里，注赤野湖。湖南北九十餘里，東西七八十里，於東流出，經小軍山之北，東北至沌口，入大江，卽沔水也。水道提綱。

漢陽府志：大江環抱郡城，去城僅數十丈，自荊州監利而下，會沌口，過城南，與漢合者，江之正流也。有自沔陽播爲陽明諸湖，匯於太白者，有自沌口出江者，有經沔爲黃蓬諸湖，經上平下平，放至新灘鎮出江者，有自孝感經漢陽之石潭河，入黃陂境，至沙口出江者。此在隣境旁出而入江者也。舊志：江水自江夏東臨入府境，歷新灘口，大江口，百人大小軍諸山，過沌口，至府城東，過大別山，合漢江，轉煙波灣，抵五通口，共一百九十里，入黃陂縣境，經縣東南三十里，流十五里，至沙口，入黃岡縣界。太白湖，在漢陽縣西南，接沔陽州東北界，水經注：沌水南通大白湖，輿地紀勝：在漢陽縣西南一百二十里。府志：太白湖一名九真湖，周二百餘里，潛水自西北來注之。西湖，李老沙湖，泗港諸水匯

焉。沱水自南來注之。直步陽明。黃蓬諸水匯焉。而東南匯於沱水出江。春夏水漲。與新灘馬影蒲潭等湖合。而爲一冬涸始分。舊志太白湖西南受陽明。西北受沙湖。北受索子港。南通新灘口。東通沱水。大清一統志。

經漢陽府城東南。武昌府城西。有東湖。湯孫湖。諸水來會。皇朝通志。

又東北七十里。經漢陽府城南。及東武昌府城西。有磯。有湖水。自東南來注之。磯在武昌府西南江中。當漢陽正南。卽鸚鵡洲也。武昌府治江夏縣。有黃鶴磯。縣南多水澤。曰東湖。曰湯孫湖。曰黃家湖。曰清寧湖。曰賽湖。至西山會流而北入江。水道提綱。

大江自沔陽州東北流。入漢陽縣界。與武昌府江夏縣分界。又大江自嘉魚縣東流。入江夏界東湖。在江夏縣東四里。輿地紀勝。上有東園。爲近城登覽之勝。清寧湖。在江夏縣西南十五里。東北通黃家湖。又東南通湯孫湖。又東通賽湖。賽湖匯諸湖之水。折而西北流。俗呼爲襄河。出鮎魚口入江。大清一統志。

又北漢水自西北來會。皇朝通志。

二府隔江。東西相望。稍北。漢水西北。合商維唐鄧以南諸巨川。自漢陽府城西北來會。曰漢口。水道提綱。

大江入江夏縣。會漢水。又大江與武昌府江夏縣分界。又東北會漢水。漢口在漢陽縣東。漢水入江之口也。亦曰夏口。沔口。魯口。蓋以夏水。沔水。魯山得名。實一處也。其地本在江北。自孫權置夏口。

督屯江南。於是相承以鄂州爲夏口。而江北之夏口晦矣。大清一統志。

漢水。卽漾水。源出寧羌州北之蟠冢山。卽禹貢導漾之蟠冢也。經沔縣西南。有沔水合澧水沮水來會。經褒城縣南。有黑龍江。自郿縣合斜谷水。褒城水來會。經漢中府治南。鄭縣西南。經固城縣南。有馬扈河。鐵臺河來會。經洋縣南。有潛水來會。有沙河。自西鄉縣來會。南流。有洋河。合木馬河來會。經石泉縣西南。又經紫陽縣西。有渚河。自四川太平縣來會。又東。有香河。自平利縣來會。經興安府西。有越河。自安康縣。黃洋河。自平利縣來會。經洵陽縣南。有洵河。自鄠縣。經長安縣。合鎮安縣水來會。東流。有吉水河。自湖北鄖西縣來會。經白河縣城北。又東。入湖北鄖陽府界。經鄖西縣南。有陡河。卽堵水。自竹溪竹山二縣。合諸水來會。經鄖陽西。至均州西北。有曾河來會。又東南。有丹河。自河南浙川縣。合陝西商州山陽商陽縣諸水來會。經光化縣西南。穀城縣東南。有南河。自房縣。合保康縣水來會。經襄陽府北。樊城縣南。有白河。卽濁水。唐河。卽清水。自河南新野。合南陽府諸縣水。鄧州諸水。又棗陽縣之滾河。來會。經宜城縣東。有蠻河。及鄖水。自南漳縣來會。經安陸府鍾祥縣北。經荊門州東南。又經京山縣西南。潛江縣北。有支津交匯。爲雲夢澤。見後。漢水正派。自大澤口東北流。又分支津。經潛江縣東北。匯爲沔陽北湖。其正派東南流。又分二派。北派經天門縣南。合松湖支津水。南派經沔陽州北。又分支津。爲白泥赤野諸湖。又東北流。與北派合。過漢川縣南。南有松湖支津水來會。又東。有澧水沮水。自隨州合德安府雲夢應城諸縣水來會。經漢陽府治西北。有赤野湖水來會。又東北。有三里河。自應山縣。經孝感縣來會。折東南。至大別山麓。入於大江。

漢水卽漾水。亦曰沔水。源出寧羌州北之嶓冢山。山在州北稍西九十里。卽禹貢導漾之嶓冢也。東南流數十里。折而北。數十里。至霓川鋪西。折東北流。經沔縣西南境。有大安水。自西北來會。在大安鎮東南。又東北。經青陽鋪南。又東北。有沔水會灑水沮水。自北來會。曰灑口。沔水上源有三。一曰灑水。出西北山。東南流經峽口北。又東南流。一曰沮水。出北山。南流經沮水鋪西南。一曰丙水。自東北山西南流。至鋪南。三水俱會。又東南。曲曲流八十餘里。入漢。又東。經縣城南。又東。經黃沙驛南。又東南。有水北自雲霧山來注之。又有白巖河。西自寧羌州城東北流。合平溪河來會。水勢始壯。白巖河出州西南。與四川界之七盤關北流。又東北。經州城西北。又東北。經鐵鎖關北。又東北。經蔡壩。有平溪河。自南山來會。曰壩河。又東北。入漢水。在天池山之北。又東南流。經褒城縣南境。稱爲沔水。有黑龍江。東北自太白山西南流。合斜谷東南諸水。自北來會。黑龍江源出郿縣南境。太白山之西南麓。兩源西南流而合。又南。合東來一水。西流。又合北來一水。又西。有紫金水。自北來會。又西。折西南流。至泰伯村西。受東來一水。西南至鎮江鋪西。又西南。有白馬及安河。西北自斜谷之東南山合而來會。曰黑龍江。又南流。折而西南。至武關驛東北。有野羊河。自西北來會。又南。有武林河。自西北來會。又南。有馬道河。沙河。俱自西北來注之。又南。稱褒城。水經褒城縣城東。折稍西南流。至龍江鋪。與漢水合。此水卽古褒水。自鳳縣大散水三岔驛以東。郿縣太白山以南。諸流悉會。行五百餘里。又東南流。至漢中府治。南鄭縣西南。有高臺鎮水。自西南來注之。東經府城南。又東。有老沔河。自南合。二水來注之。老沔河二源。一出建龍池。自南與川界之小壩北流。經巖壩口東。又東北。一曰青石。

水自東南與川界之籠蓋山北流。至青石關西合焉。又東北流數十里。入漢水。又東北流。經柳村堡南。又東。有一水自北來。一水自南來。並會。此水自北山南流。合西北一水。東南百餘里。入漢南水。曰南沙河。南自賈谷關北流。經七里壩東。又北。入漢水口。南北相對。其東南曰五郎口。又東。經城固縣城南。水中有洲。稍東。有小水自南來。注之。稍東北。有水自西北。東南流。經縣城東北來會。疑即古潯水。亦名智水。又東北。有馬扈河。自北來。注之。馬扈河。出城固縣北境山。東南流。有關王河。自東北來會。又南百數十里。折東南。至洋縣西南境。入漢。疑即古駱谷水。又東。有鐵臺河。亦曰溢水。自北來。注之。鐵臺河。出北境秦嶺之西南山。二源。西南流而合。折東南。曲曲流二百里。至洋縣城西南。入漢。又東。經洋縣城南。又東。稍北。八十里。有潛水。自北來。注之。潛水。出鐵臺河源之東南山。東南流百數十里。經槐樹關西。又南入漢。又東。經真武鎮北。有沙河。西南自西鄉縣北境來。注之。沙河。出西鄉縣西北之樓山。東北流。有祁了山水。自西來會。又東北。經真武鎮南。又東北入漢。又東。稍北。有金河。自北合二水來。注之。金河。出北山東南流。有玉門山水。自東北來會。又東南流。入漢。又東南流。至鐵石關南。有李家河。即饒風河。自東北合數水來。注之。李家河。出柏林壩北山。東南流。合西來一水。曰魚溪河。東南流八十里。有一水自北合。東北一水。南流來會。又東南至馬家溝東。折而西南流。南經金雞嶺。子午山東。又東南。有兩河。東北自雲霧山北。合而西流來會。折西南流。經饒風嶺北。又西南入漢。折西南。經西鄉縣東北境。渭門鎮東南。又南折。東南流。有洋河。即清涼川西南。自鹽場關北流。合木馬河。東北流。來會於茶溪鎮北。洋河。源出西鄉縣東南。與川界之驢場關北。山北流。經魚渡路。西。又

北有小巴山東水自西來會。又北有揚旗河自東來會。又北經碓臼壩西有七十二渡河。一自大巴山北麓。一自飛龍山合而東流來會。又北數十里至縣東境有木馬河自西南來會。木馬河源出縣西南與川界之米倉山東北流有大巴山西北麓水自南來會。又東北有賈峪關東水自西來會。東流經風口南。又東折東北流經空渠鋪北。又東經縣城南。又東與洋河會。二水既合。東北流經金牛山北。受西北來一水。又東數十里。有洋溪南自皂軍山北流經父子關。東北流來會。又北稍東至茶溪鎮西北入漢。又東至石泉縣西南有珍珠河北自雲霧山西南流合西北之香子河來注之。又東經縣城南。又東南流有池河。東自螞蝗山來注之。折南流受東來一水。又西南經漢陰縣西境南至馬家營西。漢陽坪東折東南流至紫陽縣西境有小松河自北來注之。又南有渚河西南自四川太平縣境北流經毛壩關合二水來會。渚河即任河。其上游曰北江出四川太平縣東境黃墩山北麓北流合東一水。西北流百里有一水自西南來會。又北流入陝西界經毛壩關東。又北有渚河自縣西南境東北流折而東南合西南一水來會。又北經馬家營東。又北折而東流數十里曰渚河。亦曰任河。至紫陽縣之西南東入漢。曰任河嘴。又東經城南。又東經西沙壩南。又東有汝河西南自雙河關來注之。又東有嵐河東南自花龍山來注之。嵐河出東南界花龍山西北流至水圍城北會西南來一水。又西北折而北流百餘里。又折東北經嵐河右營之東北入漢水口。正對漢北岸之流水鋪。又東有香河自南來注之。香河出平利縣西南境西北流經香河營東。又北九十里入漢。又東稍北至興安州西境有越河即古直水合恆河西北自漢陰縣來會。漢陰縣西北山有二水南流而合。

又會西來一水。東南流。經縣城西南。又東南五十里。有添水河。自東北山來會。卽古直水也。又東南經澗池鋪西。又東南五十里。經關堰南。有白音溝水。自北來注之。又東經恆口堡南。有恆河。自北來注之。又東南至長鎗鋪西南。有傅家河。自北來注之。又南入漢。又東稍北。經州城北。又東有黃羊河。南自平利縣來注之。黃羊河。出平利縣東南界。白土路營二水。南曰石牛河。北曰連先河。西流至營西而合。西流卽古灌溪水也。有獅子山水。自南來會。又西北流。經縣城西南。又北數十里。受東南來一水。又北流至州南之黃羊村東。又北。經州東而北。入漢。又東北經二郎鋪北。有一水合二溪。自北來注之。東經青山鋪南。又東北至洵陽縣西南。有閭河。自南來注之。閭河出縣南。與湖北界之七里關南山。北流。合西南來之炭河及神河三水。西北流。又折而北。而西。受西南來之孟家河。又北至閭河鋪西北。入漢。又東。過縣城南。有洵河。自北合鎮安縣諸水。東南流。經縣城東北。而南來會。洵河。源出鄠縣東南豹林谷之西南太乙山。西北徑鄠縣百五十里。東北徑長安縣二百餘里。太乙山西北麓。卽西黃谷嶺。爲瀆水之源。其西南麓。卽洵水源也。南流。合東來一水。又南八十里。合西北來一水。又南四十里。合西來一水。又東南經兩山間。三百餘里。至兩河關南。有鎮安縣水。自北來會。鎮安縣水。二源。西北源出天書山。東南流。北源二水。出舊縣關東南山。南流。至石甕子南會焉。南流。經徐家坪西。又南數十里。經縣城東。又南有一水。西北自紅山洞。東南流。合一溪。經縣城西南來會。又南。受東來一水。又東南。受西來一水。又東南。受東北來一水。又南。經青鎮關東。又南。折東南流六十里。有東岔河。自東北湖廣界來會。又南。至兩河關東南。洵河自西來會。洵河又東南。經趙家灣東。又東

南經洵陽東與湖廣界八十里折而南經縣城東北又東南入漢此水源流五百餘里在陝中入漢
巨川惟黑龍江及此水也又東稍南受北來構園水又東經大棕溪鋪南鋪北即湖北鄖西縣西南
界又東南有冷水河自西南來注之又東稍北經月兒鋪北稍東有吉水河北自鄖西縣西北境來
注之水口北岸即湖北界吉水河出鄖西縣西北境與陝西界之鐵錫嶺東南流經沙口鋪南又東
南九十里經上津堡西又南八十里受西北來一水又東南五十里受東北來一水南經夾關塘東
又南於白河縣北界入漢稍東南有白河即大白石水自西南來注之又東南經白河縣城北又東
有小白石水自西南來經城東而北注之又東入湖北鄖陽府界鄖西縣之西南境東流受東南來
一水漢水自源至鄖西界已一千三百餘里又東北百里至縣南境之黃連壩南有水北自縣城來
注之水有二源東源出水龍洞東北山西南流九十里經縣城東南西源出黃雲鋪西山東流合北
一水經土門鋪南折而東南經城西南至城南會焉又南流八十里於黃連壩東南入漢亦曰黃連
水又東北有曲遠河自北來注之曰曲河口曲遠河出滔河山之西南麓其東水即滔河也曲遠河
南流至青銅鋪折而西南流至曲河口南入漢又東流有陡河西南自竹溪竹山二縣合諸水北流
來會陡河即竹溪水有二源西北源曰竹溪河出竹溪縣西北與陝西白河縣界七里關西南之雞
籠山其北水即閭河炭河也竹溪南流數十里至中峯塘東南有白土關水西自界上西溝塘來會
其西水即平利縣東之石牛河也竹溪折而東流有一水自北來經城西來會竹溪又東經縣城南
有洛家河自北來注之又東稍北折東南流至水坪塘東南有縣河自北界山北流百餘里來會曰

西兩河口。又東南七十里。至東兩河口。西南源來會。西南源曰柿河。出西南與陝西界曾家村北山。其西水。卽嵐河也。柿河。東流百六十里。經渡船口塘北。又東四十里。有奏坪河。自西南來注之。折東北流百里。至東兩河口。與竹溪會。有羊腸河。自東南來合焉。又東北。經竹山縣西南境。至縣南。有樟落河。東南自陰條嶺西北流。合西南麥場塹北水。北經上龜塘。西曲曲西北流來會。又東。折而北。經竹山縣城東。又北。稍東二百三十里。至鄖陽府治鄖縣西南境之鮑家渡。東黃龍灘。西受西來一水。又北七十里。至陡河口。西北入漢。竹溪柿河源流。行六百餘里。竹山古上庸地。竹溪縣。又在其西。縣之北境及西南。卽陝西白河。洶陽與安州平利縣界。其南境及東南境。卽四川夔州府巫山縣界也。又東。經鄖縣西境。洪河館南。又東。折而南。經府城西南。受西南來一小水。又東。流受西南來之小嶺塘水。又東。至土地堰南。折南流。經龍門塘。西有一水。西南自十堰店東北流。經八畝地來注之。府東南境水也。又東。流有水自東北來注之。卽龍門塘東北一水。又東南流。至均州西北。有水西南自白浪塘南北。合二水。東北流來注之。又東。流經州城北。折東南流。至曾口。東有曾河。西南自兩河口。合太和馬嘶二山水。東北流來注之。太和山。在均州南百二十里。其南山北麓水。曰呂家口。西北流。至兩河口。塘有馬嘶山水。自西南來會。又東北。曲曲數十里。經武當山西麓。又北。至孫家灣北。又東北。經州南境。至曾口南。有草店水。南自太子坡北流。稍東來會。又東北。於曾口之東入漢。又東南數十里。至蕭江口。有丹河北。自河南浙川縣西。合陝西商州山陽商南諸水。南流來會。丹河。卽古丹水。源出陝西商州西北境之秦嶺東麓。其西北。卽藍田縣東界藍關。藍水源也。丹水東南流。至紅門

口南有一水自北來會。又南有一水自西來會。曰乳水河。又東南至州西南境。有荆水。自北山藥子嶺。合二水南流。至上板橋。又合西北一水。南來會。又有五峪河。自西南合南秦川。及赤水峪水。東北流來會。丹水又東。經州城南。又東曰丹江。折而南流。經巴樓鋪。白陽店西。又東南流。經商山北。經商維鎮南。又東南至龍駒寨南。受北來一水。又東南流。經商南縣西南境。有銀花水。西自中村。合二澗東流。經土門來注之。折而東流。有武關河。自北來注之。又東經縣南境。稍東。有清油河。北自城東來注之。又東南經打鼓洞。梳洗樓。凡百六十里。入湖北鄖縣東北界。數十里。又東。入河南浙川縣西北界。有淇河。自北來會。淇河出商南縣東北山。二源合東南流。入河南浙川縣西北界。又東南數十里。折而南。又東南流。入丹水。丹水又東南百里。經淅川縣城西南。有金牛河。合滔河西。自鎮安山陽來會。水勢始盛。曰丹江。金井河。出陝西鎮安縣東北孟家寨。南北二水。東流而合。又東合北來一水。東南流九十里。至扈家坪東南。有社川河。合三水自西南來會。又東南經山陽縣南境。有色河北。自縣北苦竹源南流。合東西四水來會。又東。經沙溝鋪南。又東。經商南縣南境。吐霧山南。又東南。至胡家店東南。有滔河。自西南來會。又東。入湖北鄖縣東北境。經梅嶺北。又東。至浙川縣西南境。東入丹水。俗稱滔河。源流行五百餘里。丹水又東南四十里。有老鸛河。北自杏花村南流。合熊耳山南之雙河。南經西峽集及宵山。凡三百里。至馬蹬店之西南來注之。丹水又南。稍折西南流。百三十里。於蕭江口東南入漢。此水源流。曲折行八百里。稍南。有青石鋪水。西南自太和山東北麓來注之。又東南流八十里。至光化縣西北。分爲二派。夾客洛河洲。至縣城西南之舊城西。復合。曰老河口。又南至

穀城縣東北有余家河自西來注之。又南經城東南之仙人渡。有南河。卽古沮水。西南自房縣東流。合保康縣水。東北流來注之。沮水源出房縣南境之景山。在縣南稍西。百三十里。其西爲陰條嶺。其東南爲五柯樹山。又東爲保康縣南境山。又東爲北風山。勸易巖。漳水源自景山。北流百數十里。至縣城西北。有包家河。北自東浪村西南流百餘里。來會於城北。折東南流。經宜陽灣北。又東。經驢蹄店南。又東。至保康縣西北之壘口。有白巖河。自西南來會。白巖河出景山之東南百里。五柯樹南山。東北流。曲曲至博磨坪南。又東北。折東南流。數十里。至王家灣北。折而北流。百餘里。至姬公會西。折東北流。百里。與沮水會。又東流。至保康東北之洞庭廟西。有板倉河。西南自縣城來會。板倉河出保康縣南境之馬湖埡。東北流。經羅圈巖西麓。其東水卽南漳縣西水也。板倉河又北。經黃保坪。東。折而西流。數十里。至保康城西南。又折而北。而東北。數十里。會沮水。沮水自洞庭廟西。折而北。又西北。復折而東北。經雞子口東。俗曰南河。又東北。經穀城縣城南。又東入漢。此水源流曲折。行五百里。又東南。至廟灘東。受東北來一水。又南至太平店南。折而東流。有水自東北來注之。水出北與河南鄧州界。東南流六十里。至黑龍集。西折而西南流。百五十里。至太平店之東南。入漢。又東南。至牛音塘南。稍東北流。經襄陽府城北。樊城南。稍東。有白河。唐河。東北自河南新野。合南陽府諸縣及鄧州水南流。又合西來之清河。東來棗陽之滾河來會。白河源出南召縣西北境之曹峯山。在老君山東南。二百餘里。其西北爲伏牛山。北卽汝水。其東北爲沒大嶺。卽沙河源也。白河南流。經演藝山麓。又南經縣西境。又東南流。至南陽縣北境。有雞子河。自東北山西南流。百數十里。合西北來之雅河。

來會。又西南出山，曰白河。西南曲曲百餘里，經府城東，而南，分爲二派。其東南流之支津，曰溧河。南經林水驛，至郭家灘，會唐河者也。正派於城東南，西南流百五十里，至新野縣北境，西流與湍河、潦河會。湍水出嵩縣老君山南麓，南流，合長城河，至內鄉，合螺螄河、黃水河、默河。又東南徑鄧州新野，合潦河，與白河會。白河既會湍河，南流經新野縣城西，又南數十里，有刁河。西北自內鄉西南山東南流，經孫家寨，又東南，經鄧州南境，又東南流，凡三百里來會。白河又南數十里，入湖北界，經襄陽東北境，西南流百餘里，唐河自東北來會。唐河三源，至唐縣皆會，故名唐河。其北源曰裕州西境之趙河，源出魯山縣南境大山，在雞子河源之東南，流百餘里出山，又南，折東南流，有三里河。北自趙河源之東北山，亦南流百數十里，與趙河會。此河南流處，有支津，東經葉縣南，舞陽北，東至鄆城，西入沙河之澧河也。三里河南流，與趙河但隔一山。趙河又東南，有裕州左右二水，俱出北山南夾州城，左曰潘河，至城南合而西南流，數十里來會。又西南百餘里，至南陽縣東南境，曰趙河，折而東南流，九十里，至唐縣西北，其東源，東自泌陽來會，東源曰泌河，又有兩源，南源出泌陽東，與確山縣西界之銅山，西流數十里，北源出縣東北之大胡山，西流，又西南合北來一水，數十里來會。西經泌陽縣城南，又西有灤水，北自申陽山西麓南流來注之。又西數十里，折西北流，經大河屯北，又西有昆河，東北自慈邱山西南流來注之。又西，至唐縣城東北，又西北，與趙河會。南流經縣城西而南，其東南源，東南自桐柏縣來會，東南源曰盧家河，二源，一出桐柏縣東北界之岡龍山西麓，其東水，即入淮之明港河也。西麓水，西南流八十里，一源北出泌陽南界山者，南流數十里來會。又西南七十

里。至桐柏縣北境。有一水。西南自淮源桐柏山北麓東北源來會。又西北九十里出山。曰盧家河。又西北百數十里。經唐縣南塘。至縣城西南。會趙河而南。以下總曰唐河。西南流百里。至郭家灘。東南有白河支津。曰溧河。北自府城來會。又西南八十里。入湖北界。經襄陽東北境。百數十里。白河自北來會。白河既會唐河。西南流三十里。有清河。西北自北界東南流百餘里來會。其東有滾河。自棗陽來會。滾河三源。東北源出棗陽縣東北境之洛湖店。南流。又西南數十里。折西流。經縣城南。有北源。自北來。經城西而南合焉。又西南流八十里。其南源自東南山。西北流百里來會。折西流。曰滾河。經秋樹井南。折西北流。經打火店北。又西北。與白河會。白河又西南流四十里。至樊城。東南入漢。白河源流。行七百里。西合湍水。東合唐河泌水。南陽全府州縣。羣流畢會。湍泌亦源流。行六百餘里。實入漢之巨川也。趙河。即古清水。漢水。又東至東津灣西。折向正南流。經東南境百里。有羅家河。自西來注之。又東南流數十里。經宜城縣東境。又東南百里。有蠻河。西北自南漳縣。合歇馬清涼二河。東南流來注之。南漳縣在襄陽府西南百二十里。宜城西北百四十里。其西與鄖陽府保康縣連界。其南境多大山。自竹山而東。南爲房山景山。爲五柯樹。爲龍潭山。高雞寨。東爲老龍山。北風山。至縣南。與遠安接界。綿亘不斷。而東南至荊門州之西北。凡數百里。禹貢荊州之荊山。在縣西北八十里。漳水所出。即今清涼河也。論源流。則歇馬河較長。歇馬河。源出縣西南。與保康縣南界龍潭山北麓。其南即興山。遠安北境羣山也。東北曲曲流。經老龍山西。折北流數十里。至長坪西南。有一水西南來。經羅圈巖東麓來會。折東北流。經長坪北。又東流。經杏橋坪北。又東南五十里。經南漳縣城南。又

東南經騎龍集南。又東南至武安鎮南清涼河。自西北來會。清涼河出南漳縣西北大山。卽穀城縣南界。保康縣東北界。襄陽縣西南界。諸山相連者也。東南流。循山南麓八十里。至縣北龍門集之北。又東南流百餘里。至武安鎮西南。會歇馬河東流。曰蠻河。又東稍北。經宜城縣西境。朱家嘴南稍東。折東南流八十里。至縣東南境之新店。又東南八十里入漢。源流行四百有餘里。又南經安陸府治。鍾祥縣北境之豐樂驛西。有豐樂河。自東北來注之。豐樂河西南流百三十里入漢。又南六十里有樂鄉河。自西北來注之。樂鄉河卽夾浴河。源出南漳縣西南界老龍山南麓。其西北卽歇馬河也。東南流二百餘里。合西來一水。經鍾祥北境。又百餘里有石橋河。西自山東流。經石橋驛南。又東合西南來之荆門山北水。東北流來會。又東入漢。麗陽石橋二驛。皆荆門山北境。源流三百里。此河源東南七十里。卽當陽漳河源。又東南經安陸府城西三尖山東麓。三尖山。西自荆門山東北。綿連數十里。至此山甚高大。其東南爲黃土坡山。東臨漢江。隔岸卽府城也。疑卽古內方。後人名爲章山。又東南至舊口西。有寨子河。自東北來注之。折西南流。經荆門州東南境。有水西北自州城合南北二水。東南流來注之。一水出州西南山。東北流經州城南。又東一水。西北自荆門山東南流。經城東北而南來會。又東南曲曲百餘里入漢。又正南經石碑鎮東。稍南折東南流。至沙洋鎮北。折南流。經京山縣西南境之多寶灣西。又東南流。至潛江縣北境之大澤口。西北有支津。西南流。西通荊州府南通監利。東南通沔陽州諸湖支港。縱橫交會。卽古之雲夢澤。見後。漢水正派自大澤口折而北流。數十里。又折東流。至張集港南。又分支津。南經潛江縣城之東北。又東南爲沔陽北湖。漢水正派。又東

南經黑流渡南竹根灘北。又東分爲南北二派。北派東北流。經天門縣南境。天門卽舊景陵縣。自截河場東。至乾正司南。又東數十里。有松湖支津。自東北合西北。京山應城諸水來會。又東過沈湖。至脈旺。與南派會。南派東流。經牛跡口南。又東南經慎口場北。彭河鎮南。東經沔陽州北境。曰拖鎗河。東南至仙桃鎮南。又分一支津。南爲白泥赤野諸湖。南派折向東北流。經沈湖東。沈湖長七十里。闊二十餘里。首東北。尾西南。在南北二派之中。隔一隄岸。其東村曰豆鷺。至脈旺。與北派合。分派東流二百餘里。南北相去五六十里。二派既合。東北流。過彭公湖南。彭公湖在漢川縣西南境。自東北而西南。長六十餘里。形如鯉魚。在松湖支津之南。漢水之北。至漢川縣西南。受西來之松湖支津水。折東南流數十里。復折北。稍西。至縣城東北。有松湖支津。自西北來會。又東至澗口塘北。有澆涓諸水。北自隨州南流。會德安府雲夢應城數縣水來注之。澆水。源出隨州西北界山。南流數十里。經唐縣鎮西。又南百里。至梅邱鎮東。有澗水。自西南山東北流。經鎮北而東來會。折東流。經安居店南。又東五十里。有均水。南自佛兒嶺北。流至茶庵西北注之。又東四十餘里。經州城南。有浮嬰河。北自太平嶺。南流至厲山店南。合西北來一水。東南經城西而南注之。又東流三十里。有漂水。自東北山西南流。經萬家店而南來注之。又東。經浙河店南。折東南流。至光化店東。有浪河。自西南來注之。又東南。至馬坪港南。折正南流百里。經平里市西。又東南流。經德安府治安樂縣西北境。有一水。東北自金家店。合二水西南流來注之。又東南至府城西北。有一水。東自城北來注之。又南。經城西。又南至兩河口南。有水東北來。經好石橋南。及雲夢縣西北之利塘鎮北。合雲夢城南之水。西北流來注。

之。又南有楊家河。西北自大猿山。合佛兒嶺南水。東南流來注之。又東南經胡金店。長江埠南。其東北雲夢境。其西應城境也。又東南百三十里。至漢川北境。劉家隔司之東。有孝感河支津。自東北來。合雲夢東水支津。南流來會。又南流。有應城南支津。自西北來會。又東南。至沮口塘南。入漢。此水源流。長五百餘里。又東南流。至漢陽府治西北境之蔡店司北。有赤野湖水。自南來會。赤野湖。爲漢南江北支渠總匯。分爲二流。一東流。至沌口。入江。其一東北流。至蔡店司。入漢。漢水。又東北流。曰拖路口。有三里河。北自應山東南流。合小河諸水。經孝感而東南來注之。三里河。源出應山縣北。與河南界平靖關之東南山。西南流。經麻穰市南。又西南。折而東南。經十里鋪東。又南。經縣城東。又南。曰三里河。又東南。有一水合二溪。自東來會。又東南。經太平鎮東。又東南。小河溪。自東北來會。小河溪。出河南界。九里關東之馬口嶺。二水合。西南曲曲流百五十里。有廣水店南溪。自西北來會。經小河司西。又西南。會三里河。又南百五十里。至孝感縣西。折東南流。經縣城西南。又東南流。有支津。西南與雲夢南境。八埠口支津。會三里河。又東南。有桑始湖。貓兒湖水。自西來會。又東南。至拖路口。入漢。此水源流。四百餘里。漢水。又折東南流。經漢陽府城北之大別山麓。東會南來之大江。當江口有巨洲。曰漢口。卽夏口。口南岸。卽武昌也。自鄖西界至此。又一千六百餘里。源流共三千里。合陝西漢中。與安。商州。河南。南陽。湖北。鄖陽。襄陽。安陸。德安。漢陽。七府二洲之水。古與大江並稱。朝宗不妄也。

水道提綱

漢水自沔陽州東流。入漢川縣界。又東流。入漢陽縣界。至縣北漢口。入江。一名沔水。一名沮水。禹貢

嶓冢導漾。東流爲漢。至於大別。南入於江。漢書地理志。沮水南至沙羨南。入江水。經注。沔水。東與力口合。又東南。沮水入焉。又東。經沌水口。又東。經沔陽縣北。又東。經林鄆故城北。又東。至江夏沙羨縣北。南入於江。元和志。漢陽縣。漢水自漢川縣流入。寰宇記。漢水在漢川縣東南四十五里。漢陽府志。漢水故道。在今漢口北十里許。從黃金口入排沙口。東北折。環抱牯牛洲。至鵝公口。又西南轉北。至郭師口對岸。曰襄河口。長四十里。然後下漢口。成化初。忽於排沙口下。郭師口上。直通一道。約長十里。漢水逕從此下。而故道遂淤。今魚利略存。不通舟楫。俗呼爲襄河。以上流自襄陽也。又水有自雲夢苛河出者。有自應城五龍河出者。有自竟陵阜角河出者。有經田二河沈下湖出者。又經回龍灣。及經南湖金剛腦出者。皆沮口以上小水入漢者。有自豬龍潭。經漢陽三汊會白水。又經東西二至山。過陳門湖下蔡店者。此漢之別流。分於沮口以上。合於沮口之下。而復於漢者也。舊志。漢水自沔陽州沈波亭入漢川縣境。會城隍港水。又東。分流爲麻布港。又東。右會卻月湖。左會西湖之水。折而北。右會白石段莊二湖之水。左會麻布港水。東北流。經縣城東而北。左經石岡口。稍東。右會許家湖。而東流。凡一百八十里。入漢陽縣界。至沮口會沮水。分流而入金牛港。又東。過蔡店臨嶂山。又東。過黃金口。南流至縣北郭師口。一支南流。經大別口。復至漢口。一支北出。亦至漢口。爲前襄河。凡一百三十里。入大江。大清一統志。

雲夢澤。跨江南北。蓋八九百里。自枝山而東。爲松滋。爲公安。爲石首。爲華容。濱江南岸。多藪澤。卽所謂江南之夢也。江北尤巨。自荊州府江陵以東。監利以北。沔陽州前後左右諸湖。皆受漢水支津。至嘉魚縣東。

北漢陽府西南境。分流以入於江漢。水之東北岸。自京山天門應城雲夢孝感。東南至黃州。羣水瀦匯。亦即古澤。皆入漢之水所瀦。而又分流以入於漢水。皇朝通志

雲夢跨江南北。蓋八九百里。今自枝江而東。爲松滋。東南爲公安。又東南爲石首。爲華容。濱江南岸。多藪澤。即古所謂江南之夢也。江南之夢。皆首受江水支津成渠。瀦爲澤。南入洞庭。北復入江。江北尤巨。自荊州府江陵以東。潛江以南。監利以北。沔陽州前後左右諸湖渠。皆首受漢水支津。於大澤口之西。在潛江縣西北西南流。張家港之南。在縣正北東南流。東南流。至嘉魚東北之新灘司。及漢陽西南境之沌口。分流入江者也。總曰沔水。在江陵東北者。曰太白湖。東南曰三湖。曰紅馬湖。在監利大江北岸。曰家淥湖。南江湖。蓮頭湖。大鳥湖。蔣師湖。大成池。在潛江東南。沔陽西北者。曰西湖。曰邊邊湖。曰白泥湖。在沔陽南及東南者。曰上洪湖。官湖。曰白石湖。沙湖。昆當湖。東北曰赤野湖。赤野湖。實爲沌口上流之總會也。又沔陽東北境仙桃鎮南。又受漢水支津南流。西南通白泥湖。東南通赤野湖。赤野湖有支津。北會漢水於漢川縣東南境之蔡店。東西地四百餘里。南北二百餘里。漢水東北岸。自京山天門應城雲夢孝感東南。至黃諸水所瀦。亦即古澤也。天門竟陵諸水。東北匯爲楊葉湖。京山水東南會焉。又東北爲三臺湖。應城水自北來會。又東南爲松湖。經漢川縣城東北。入漢水。雲夢東有湖。西南流。至縣東南。分爲二派。一西北。經城西而北。會沮水。一南流。會楊家河。俱東南至沮口。入漢。孝感水下合貓兒湖於拖路口。入漢。黃陂縣西南境。漢陽縣東北境。有牛湖。東通黃陂東南之五湖。南入江。以上諸湖。皆入漢之水所瀦。而又流入漢入江者也。水道提綱。

雲夢澤在監利縣南。漢書地理志：南郡華容雲夢澤。在南。水經注：監利縣土卑下澤多陂池。西南自州陵東界，經於雲杜沔陽，爲雲夢之藪。韋昭曰：雲夢在華容縣。按春秋魯昭公三年，鄭伯如楚，子產備田具以田江南之夢。郭景純言：華容縣東南巴邱湖是也。杜預云：枝江縣安陸縣有雲夢，蓋跨州互隰，兼包勢廣矣。大清一統志。

大江經江夏縣北，黃陂縣南，折東南流，有武湖水。自黃安縣來會。皇朝通志。

大江既會漢水，東北流，中有沙洲，又東北經武昌北境，南岸有南湖水口，一名五丈湖，在江夏縣東，北岸卽黃陂縣之牛湖水口也。牛湖在黃陂西南，袤邪八十餘里，廣五十里，東南流入江，卽古灑水。自漢陽來入，曰灑口，又東，大江始折東南流，自岳州巴陵東北流至此，徑五百數十里，北岸有武湖水，自黃陂來注之，曰武口，亦曰沙汊口。武湖水源出黃安縣西北境，與河南界之老山二水俱南流，經仙居亭山左右，約百餘里，會於河口之南，卽新集之西南也。又南八十里，經木蘭山西麓，又南百餘里，經黃陂縣城東，又南有什子湖水，西南來，鴨魚湖水，東南來，並會，又東南流有牛湖支津，自西南來會，豬爲湖，周五十里，又東南入江。水道提綱。

大江自嘉魚縣東流，入江夏縣，會漢水，與漢陽府漢陽黃陂二縣分界。又武昌府舊志：大江至嘉魚縣城九十里，過城，歷上下二簾洲，至上沙汊，入江夏縣界。又元和志：大江水在黃陂縣南一百一十九里，西南自江夏縣界流入。南湖在江夏縣南，輿地紀勝：在望山門外東南四里，舊名赤瀾湖，外與江通，長隄爲限，長街貫其中，四旁居民蟻附。牛湖在黃陂縣西南五十里，東通大江，其支流西

南入漢陽縣界。武湖在黃陂縣東南，卽武口水也。水經注：江之左有武口水，上通安陸之延頭，南至武城，入大江。元和志：武湖在黃陂縣南四十九里。黃祖閱武習戰之所。寰宇記：在縣南二十里。黃陂縣志：在縣東南二十五里，東至黃岡縣一百三十里，周回四十五里，東通大江，亦名黃漢湖。大清一統志。

經黃岡縣西北，有華家河，自黃安縣來會。白塔河，自麻城縣，經黃安縣來會。皇朝通志。

又東南至黃岡西北境，陽邏驛南，北岸有水，北自黃安縣，合二水來注之。華家河，出黃安縣北，與河南界之暮雲山，在周八家村之西，又西，卽仙居亭山也。南流九十里，折東南流，有郭家河，自東北來會。經縣城西，又南百餘里，經三姑井西，又曲曲東南流，折而西南，百數十里，至驛東南，入江。又東南，經汪家鋪南，白虎山北，北岸有湖水口，湖在陽邏驛水之東，團風鎮水之西，形三角，數十里，西南流入江。又東稍北，流至黃岡北之團風驛，西有水，自北合麻城諸水來注之。江口有洲，白塔河出麻城縣北界之黃土關大山，南流曲曲百餘里，至縣城東，有洪家河，東北自虎頭關東山，西南流來會。又西南流，有道觀河，南自馬鞍山西北流，折而東北，經沙河鎮東，合八疊山之水。又西北，經白果鎮來會。又西北流，有浮橋水，北自黃安，東北界之分水嶺南流，經黃安東境，麻城西境百數十里，至浮橋西中館驛東，又南來會。又西南，至宋埠鎮南岐亭東，折而東南，曲曲百六十餘里，至團風驛之西，入江。水道提綱。

大江自漢陽府黃陂縣，流入黃岡縣界，與武昌府武昌縣分界。又元和志：大江自江夏縣界流入，又

東入黃岡縣界。漢陽府舊志：大江入黃陂縣境，經縣東南三十里，流十五里，至沙口，入黃岡縣界。華家湖在大冶縣東北五十里，源出縣西北流水里，由黃石港入江。垂山水在麻城縣東，今名白塔河水，經注垂山水，出垂山之陽，與弋陽淦水同出一山水之東，有南口戍，又南經方山戍，西流注於舉水。麻城縣志：白塔河亦名界河，源出河南光山縣界，經黃土關外南流，又經麻城縣東北三十里，又南經縣東至縣南，合桃林河，為縣前河，又桃林河折而西，會白塔河，始名縣前河。西南流，經縣南十里，名高岸河，稍西匯麻溪白杲二河，又西南會浮橋河，又西南過宋埠，至岐亭鎮，合松溪河，名岐亭河，又西南經黃安縣境，南入黃岡縣界。黃岡縣志：長河自麻城縣流入，會道觀河、沙河諸水，由團風鎮入江。大清一統志。

南流。經黃州府西北，有白洋湖，自咸寧縣，經江夏武昌縣來會。皇朝通志。

江至水口，折正南流六十里，經黃州府城西北，有小水口，自府北境西南流入江，經城西，有磯，曰赤鼻磯，折而東流，南岸武昌縣境，有諸湖水，自西南來注之，曰樊口。南岸湖自江夏東境之白羊湖南，為山口鋪，東為白虎山，南湖水漸廣，其上源南出咸寧縣東北山，數源東北流，合而曲曲經山中，曰大港水，又北至金牛港，入湖，曰梁子湖。西北自長山鋪東南，至武昌縣西之樊山，長百三十里，廣八九十里，盡匯縣境，湖澤九十九，北注大江。水道提綱。

元和志：大江流入漢陽縣，去縣東二十步，東北流入黃州界，又大江流入漢陽縣界，與武昌府江夏縣分界，又東北會漢水，入黃陂縣，又東入黃州府黃岡縣界，又大江東南流入武昌縣，與黃州府黃

岡縣分界。白洋湖在江夏縣東北十五里。一名白楊湖。西北流。經青山磯入江。曰白楊浦。樊港在武昌縣西南。一名樊溪。一名袁溪。一名樊川。源出咸寧縣東四十里。東北流爲高家河。入武昌縣界。又北。經金牛鎮。爲金牛港。匯爲梁子湖。又北。爲蘆席口。又北。經樊港。經樊山下而北。入江。爲樊口。唐書地理志。武昌有樊川。明統志。在樊山西南。控縣南湖澤。凡九十有九。大清一統志。

經武昌縣北。又東有巴河。自羅田縣。經蘄水縣來會。皇朝通志。

又東。經武昌縣城北。南岸縣城。與西北岸府城。隔江相望。又東稍北。南岸有五丈湖口。即武昌東之南湖。俗曰洋瀾湖者也。又東稍南。北岸有小湖口。即黃岡東境湖。又東有巴河。東北自羅田縣西南流。至蘄水縣西境來注之。巴河源出羅田縣石門寨西。多雲司東南山。西流經天堂寨南。又西南流。有一水自北來會。又西南流。曰九子河。又南流。經平湖店西。又西南至縣西南境之油店。西有油河。東北自縣北淨瓶山水。合石柱山水南流。曰沙河。又西南曰油河。合東一小水。南經縣城東。又經其南。西流來會。自源至此。已二百八十里矣。又西南數十里。折南流。經蘄水縣北境之上巴河。又西南百餘里。經巴水驛西。又南。至下巴河之西南。入江。巴河口之西。即黃岡東湖口。其東。又有小湖口。自東來注之。水道提綱。

大江流入黃岡縣界。與武昌府武昌縣分界。黃岡縣志。大江自黃陂縣。經陽邏團風鎮。至赤壁磯。遶南岸東。過巴河。入蘄水縣界。又水經注。大江又東。經五磯北。左則巴水注之。五丈湖在武昌縣南半里。一名洋漫湖。一名洋瀾湖。連車湖。西控兩湖之水。出大江。寰宇記。五丈湖在武昌縣東。有長湖。

通江南。冬卽乾涸。陶侃作隄以遏水。於是不竭。永嘉初。隄頽破。太守褚雋之重修復。輿地紀勝。五丈湖。舊曰南湖。賊質逃入南湖。以荷自蔽。卽此。巴水源出羅田縣北。南流入蘄水縣界。又東南流入黃岡縣界。入江。今謂之巴河。其上流名平湖鄉河。一名九子河。水經注。巴水出雩婁縣下。靈山南。歷蠻中。吳時舊屯所在也。引巴水以溉野。又南經巴水戍。南流注於江。謂之巴口。輿地紀勝。巴水源出版石山。羅田縣志。平湖鄉河源。自鹽堆山西流。會瀧沱河下。與新昌河三里河合。出九河嘴。入蘄水縣界。經黃岡縣。至上巴河。入縣東北八十里。南流至縣東南四十里。下巴河。入江。東卽蘄水縣界。按水經注。雩婁縣之下靈山。在今壽州霍邱縣界。大清一統志。

折東南。經大冶縣東北。蘄水縣東南。有滄水。自江南之英山縣來會。皇朝通志。

大江又折東南流。南岸爲大冶縣東北境之黃石港口。華家湖。自五丈港塘之南。廣二十餘里。東南流。曰黃石港。又東。入江。正對滄水口。東北岸有滄水。自東北來。經蘄水縣城東南。而西南流。注之。滄水源出江南英山縣北界嶺。南流曰落里河。流百餘里。折東南流。有一水。自東界嶺西南流。經縣城東南而西來會。曰雞兒河。卽蘭水也。又南流。經縣城東。經土峯嶺。豹子山之北。折西流。百數十里。曰古河。有一水。自東北來注之。又西南流六十里。經蘄水縣城東南。又西南七十餘里。至蘭溪司。入江。又東南。經蘄州西北境之茅山司。西南岸有道士泖口。大冶縣東北。有張家湖。在黃石港之南。東流。曰道士泖。入江。正對茅山司。水道提綱。

大江與黃州府黃岡縣分界。又東南流。入大冶縣。又大江與武昌府武昌縣分界。東南流。入蘄水縣。

界與武昌府大冶縣分界。又水經注：大江又東經軼縣故城南東，會滹水口。又武昌府舊志：大江至武昌縣界，經蘆洲、磧磯至樊口，凡九十里，抵武昌縣城，過城，經五丈口、土腦嘴，又七十五里，至大冶縣界。大冶縣志：大江自武昌縣界五十里，至黃石港，經道士泖。希水，希一作滹，源出江南六安州英山縣，西南入羅田縣界，爲英山河。又西南爲落翎河，踰嶮石，爲石嶮河，一名古河，一名界河。又西南入蘄水縣，西南蘭溪鎮入江。水經注：希水出灄縣霍山，西南流，分爲二水，支津出焉。又南積而爲湖，謂之希湖，輿地紀勝：嶮石在蘄水縣東北，羅石三溪之水會焉，高數十丈，十里餘，橫截溪流，水注罇中，皆成巖竇，玲瓏相通，衝淙而下，湍迅異常，入蘄水縣界，爲希水。武昌府舊志：自石嶮分金山入蘄水縣東境，西南流，名蔡家河，會九江河，東分一支，名倒流河，又西南流，至縣南，名南門河，過南城，西流出蘭溪口，入大江。大清一統志。

經興國州東北，有漳源湖，自大冶縣來會。皇朝通志。

又東南經興國州東北境，有漳源湖，西自大冶來注之，曰漳源口。漳源出大冶縣西境，大港東山，三源合東南流，經縣城南，又東爲金湖，經小箕山北，爲漳源湖，廣數十里，又東爲小口，入江。水道提綱。

大江入大冶縣，與黃州府蘄水縣及蘄州分界。又東南流，入興國州。又大江東南流，入蘄水縣界，與武昌府大冶縣分界。武昌府與興國州分界，又大冶縣志：大江經道士泖，又七十五里，至漳源口，流入興國州。漳源湖在興國州北七十里，接大冶縣界，發源武昌縣陽橋諸山，合大冶縣諸水，經下

游湖出漳源口入江大清一統志

經蘄州北有蘄水來會皇朝通志

江中有洲其東北岸卽蘄州城北之蘄水口也。蘄水東北出大浮山數源。一源出龍坪山西麓西南流。至大同司北。又西南有南源。二水出茅坪山寶蓋山者。西流合而來會。又西流曰童子河。至高山鋪南而西。有北源。出豹子山者。亦西南流。曰開口河。經鋪西北而南來會。曰兩河口。又南經西河驛東。曹家鎮西。分爲二派。一東匯爲赤東湖。一西南流而合。又西南數十里。至州城之北。西入江。其口正對沙洲。水道提綱。

大江又東南流。入興國州。與蘄水分界。又黃州府舊志。大江自巴河經蘭溪口。至月石磯。抵蘄州城西。繞城東南流。經山港。挂口港。至龍眼磯。抵蘄州城西。繞城東南流。又水經注。江水又東經西陵縣故城南。又東過蘄春縣南。蘄水從東北注之。蘄水在蘄州東北。今名蘄河。亦名童子河。源出州東北大浮山。西南流。合三十六水。又西南流。合鉛錫水。入赤東湖。至州西挂口。入大江。水經注。蘄水出江夏蘄春縣北。山南。過其縣西。又南至蘄口南。入於江。大清一統志

又南有富水。自通山縣。經興國州來會。皇朝通志

又南。經州城西南。有數洲。又東南。南岸有富池口。富水西南。自通山縣東。經興國州。合諸水來注之。富水出通山縣西。太平鋪諸山。其西諸水。俱自崇陽西北。至蒲圻入江。卽陸水也。其山東數水。東流合而東。經寺下鋪。東南。又南。合一水。又東。經通山縣城南。又東北流。至花橋北。合二水。至板橋。又南。

合一水。又東。至陽辛市。有水自南來注之。又東北有水。南自江西武寧縣北境小洞山來會。又東南。經排市鎮北。又東北流。有高橋市。南北二水。合而東南流。州城西北湖。匯諸水。西爲冰湖。西流合而南來會。曰港口。又東數十里。經州城南。有一水自南來會。又東北流。有夾節湖。匯諸水自南來。經雞籠山來會。又東有網湖水。自西北來會。又東至富池鎮之南界首鋪之北。入江。水道提綱。

武昌府與國州志。大江經黃陂口。又東南。經富池口。武昌府志。大江又東。過下雒縣北。又東。富水注之。富水。源出通山縣。東流至興國州東富口入江。今名長河。水經注。富水出陽新縣之青盪山。西北流。經陽新縣。又西北。經下雒縣。水之左右。公私裂溉。咸爲沃壤。舊吳屯所在也。興國州舊志。長河有二源。俱出通山縣界。南源爲寶昌河源。出九宮山。流經州界首鋪。名慈口港。北源卽通羊港。由州西北一百三十里。雞口港入境。俱東流。至陽辛渡。合流。今名陽辛河。曲折東流。繞州城南。納境內諸湖水。凡二百二十五里。出富池口。入江州境。水最多。皆匯於此。大清一統志。

經廣濟縣西南。折東北流。南岸入江西界。皇朝通志。

又東南。經廣濟縣西南境之馬口鎮南。折東北流。南岸入江西界。水道提綱。

大江與武昌府興國州分界。又東南流。入廣濟縣界。又黃州府舊志。大江抵蘄州城西。繞城東南流。經新洲。宿鳩洲。出浮玉磯。至高林港。凡六十里。入廣濟縣界。又大江又東南流。入興國州。與蘄州分界。又東流。入江西。又興國州志。大江又東南。經富池口。東入江西。大清一統志。

經瑞昌縣西北。有楊林湖水。卽溢水來會。皇朝通志。

經瑞昌縣西北境。北岸有馬口湖水口。馬口湖水西北自蘄州城東南迤而東。會諸小水。及東南至廣濟西南。馬口鎮之東南。入江。又東北八十里。折而東南。南岸有瑞昌水口。卽古溢水也。今曰楊林湖水。西出縣西界之赤顏山。二源合東流。經羊腸山南。又東經縣城西南。有小水。北自城西來注之。稍東。經城南。有白石巖水。自西南來。有羅家湖水。自南來。會。又東北豬爲湖。周二十餘里。分爲二流。一西北流。有白沙渡水。自西來。會。卽馬頭鎮之南水也。又東北流。入江北岸。卽廣濟東。與黃梅接界之新開口司也。水道提綱。

大江又東南流。入廣濟縣界。與江西之九江府瑞昌縣分界。又大江與蘄州分界。又東流。入江西九江府瑞昌縣界。楊林湖在黃梅縣西南二十五里。西接太白湖。東由濯港。經白沙渡。入孔壠小江。至清江鎮入江。大清一統志。

經黃梅縣西南。有縣河。合廣濟縣水來會。皇朝通志。

又東南經黃梅縣西南境。有縣河。東北合諸水。經小池口來注之。水出黃梅縣西北龍坪山。兩源合。東南流。有孫家山水。自東北來。會。曰古角河。又南有老寺山水。自西北來。會。折東南流。經縣城東。又西南流。至黃連村。有廣濟縣水。自西來。會。又東南合一小水。又西南數十里。入江。廣濟縣河二水。一曰縣河。出縣北橫岡山西南流。經縣城東。而西南有層峯山水。自城西來。會。南流曰撻水河。折東南流。匯爲大澤。迤而東北。曰太白湖。又北受東衝山水。自東流出。經雙城驛前。又東至黃連村南。與黃梅縣河會。水道提綱。

大江與江西之九江府瑞昌縣分界。又東流，入黃梅縣。黃州府舊志：大江入廣濟縣界，自高林港過田家鎮一百二十里，遶長隄，經武穴鎮，至界牌石，入黃梅縣界。至套口八十里，過小池口。隆斗河在黃梅縣東，一名鼓角河，有二源，一出唐家山，南流經龍坪山麓，又經渡下橋，一出鼓角山，南流經亭前驛，至兩河口，合流，過柘林鋪，至鐵塘口，會小溪河，遶縣城南，名縣河，自縣西流，匯張家湖，會馬頭橋河，爲殷家河。又西南流，經黃連嘴，會廣濟，達水河，出西南，入大江。關山河在廣濟縣北二十里，一名撻水，河源出展旗山，南流十里，經松陽橋，名石塔河，又經縣西秀雲山東，爲關山河，又南流數里，爲團山河，而達於梅川。大清一統志。

又東南至九江府治，德化縣西北，亦名潯陽江。北岸爲黃梅縣，及江南之宿松縣界。皇朝通志。

又東南有數洲渚，至九江府治，德化縣西境之溢口。大江西北，自武昌府東北，青山鋪之北，東南流，至溢口，計六百餘里。大江自此，其勢遂向東北。溢口水，卽瑞昌縣東南楊林湖，東流，經錦繡谷，又東北流，至府城西境，有小水自東南來，會北入江，亦曰溢浦。北岸亦德化界，有柘港湖，江磯湖，諸小水。東經府城北，亦曰潯陽江。又東稍北，北岸爲黃梅，與江南宿松縣之界。西曰小池口，楊家穴，黃梅境。東曰段腰鎮，歸林司，宿松境。水道提綱。

大江又東流，入黃梅縣，與九江府德化縣分界。又東流，入安慶府宿松縣界。又黃州府舊志：大江入黃梅縣界，至套口八十里，過小池口，至清江鎮十里，屬江西德化縣。自清江鎮，鵝鷹嘴三十里，仍屬黃梅縣。潯陽江在府城北，亦名九江，卽大江也。自湖北與國州界，東流入境，經瑞昌縣北三十五

里北岸爲湖北廣濟縣界。又東經府治德化縣界。北岸爲湖北黃梅縣界。又東合彭蠡湖水。經湖口縣北二十里。又東北經彭澤縣西北二里。北岸爲安徽宿松縣界。又東北入安徽望江。東流二縣界。江廣二十里。西自瑞昌下巢湖。東至彭澤馬當山。共三百二十五里。漢書地理志。潯陽禹貢九江在南。皆東合爲大江。又九江郡注。應劭曰。江自廬江潯陽分爲九。郭璞江賦。流九派乎潯陽。按自漢至唐皆謂九江。在潯陽。至宋初。胡旦始以洞庭爲九江。而諸儒從之。舊說遂廢。大清一統志。

續行水金鑑卷第一百五十

江水原委五 江西

又東爲湖口縣西之湖口。鄱陽湖匯章貢諸水來會。皇朝通志。

又東爲湖口縣西之湖口。江中有大洲二。曰梅家洲。曰永和洲。彭蠡湖南匯章貢諸水。北流來會。又東經縣城北。又東北流。北岸有龍湖水。北自宿松縣來注之。水自縣北之二郎河南流。經城西而南。分爲二派。一南流。與西自黃梅來一水會。階爲龍湖。廣二十里。又東南流。入江。江口有二小洲相連。稍東有一水自南來注之。卽太平關水也。水道提綱。

大江經德化縣。又東合彭蠡湖水。經湖口縣。大清一統志。

鄱陽湖匯章貢諸水。互南昌、饒州、南康、九江四府。南昌、新建、建昌、德安、星子、德化、湖口、都昌、鄱陽、餘干十縣之境。東北至湖口縣境。入於大江。皇朝通志。

鄱陽湖匯章貢諸水爲巨浸。互南昌、東北、饒州、西、南康、東、九江、東南、四府、南昌、新建、東北、建昌、東、德安、東、星子、東南、德化、東南、湖口、西南、都昌、西、鄱陽、西、餘干、西北、十縣之境。東西廣四五十里。至百里。南北長三百里。形如葫蘆。中爲細腰。卽南康星子之東南、都昌之西北也。南曰宮亭湖。族亭湖。北曰落星湖。曰左蠡湖。實一水也。湖自三江口康山而東北。爲鄱陽兩口。又北而西。經都昌。東南境之黃金背。又西北。經縣南湖。中有礪山。當縣西南。稍西有黑山。東有甲山。東南有茗蕘山。自此而南湖心。

東西闊百餘里。其西南與南昌東北之焦尾相望。北經縣西。有水自東北來注之。卽都昌東北之石牛浦水。西流經縣北而西南入湖。又北稍西。有馬家灣水。自東北元辰山合數溪來注之。又北爲山麓石流背。又北爲左蠡司湖。至此甚狹。西望南康城。僅三十餘里。又折而東北。有馬幾山水。自東南來注之。又東至拌龍鋪北。有西洋橋水。合數溪自東來注之。又北爲屏風山。又北有沙洲。經劉家市西北。有白羊湖水口。又東北爲湖口縣東南之西倉湖。又西經縣南。稍西爲鞋山。鞋山在湖正北。西與大孤山隔水相望。又北爲湖口。自三江口而西北爲凡山。爲表安東北沙洲。又西北爲焦尾。又西北爲松門。又西爲吳城鎮。以上皆支渠入湖之口。又西北爲德安縣東南水口。博陽水合廬山水。自西北來注之。博陽水出縣西南樟樹坳東北。經城南。又東與東北來之廬山水及諸溪會。廬山水出縣東北之廬山。曰谷簾水。西南流。有五乳峯水。自東來會。又西南會數水。折東南流。會北來柵嶺使君山二水。又東南有紫竹林水。自西界東南流。合北來鳳凰山石鼓山諸水。又東南來會。又南有縣北水。自西來注之。又有清風嶺水。合龍山鋪水。自東北來會。又南經縣城東。又東南入湖。又東北爲渚溪。又北爲羊闌頭。又北爲南康西南之福星洲。南康北倚廬山。東南面彭蠡。又東北爲德星石。西北岸卽桃花鋪。又北經甘棠鋪東。自此而西卽白鹿洞凌雲峯。正當南康北境。又北而湖漸廣。東望屏風山五十餘里。東北望鞋山六十餘里。又北稍西。經吳帝鋪東。其西卽廬山之五老峯也。廬山爲南康北界。九江南界。又西北經九江府東南之大孤塘南。大孤山在北岸。又東北至鞋山西北。東爲一江。闊十餘里。東北經湖口縣城。西北會大江。章江自源至湖口縣西北入江。共行二千三百

里。水道提綱。

鄱陽湖。南昌府志。在新建縣東北。跨南昌、饒州、南康、九江四府之境。長三百里。濶四十里。卽古彭蠡也。一名宮亭湖。隋時以接鄱陽山。故又名鄱陽湖。寰宇記。宮亭湖在州北水路二百四十三里。圖經。鄱陽湖東至饒州府餘干縣。西至新建縣之荷陂里。南至進賢縣之北山。北至南康府都昌縣。其南入南昌界者。則爲宮亭湖。新建縣志。鄱陽湖在縣東北一百五十里。謂之東鄱湖。宮亭湖亦作邲亭湖。在縣北一百八十里。謂之西鄱湖。實一湖也。饒州府志。鄱陽湖在鄱陽縣西四十里。會鄱江繞衢徽之水。匯於大江。跨南昌、南康、饒州、九江四郡。周四百五十里。其東境屬饒州。有雁泊小湖。每春漲。則與鄱江連接。水縮則黃茅白葦。曠如平野。南康府志。彭蠡湖在星子縣東南。及都昌縣西一里。卽鄱陽湖。南接南昌府。抵饒州府界。由都昌縣之南西兩面。歷星子縣東。又西北入九江府湖口縣。注於大江。在星子縣南者。名落星湖。因落星石而名也。在縣東南。及南昌界者。名宮亭湖。在都昌縣西南者。名揚瀾湖。又北曰左蠡湖。水經注。廬山下有神廟。號曰宮亭廟。故彭湖亦有宮亭之稱焉。元和志。彭蠡湖在都昌縣西六十里。與潯陽縣分湖爲界。周必大廬山後錄。出石門。望宮亭湖。橫出揚瀾左蠡。左右相對。星子縣志。落星湖卽大湖之西出者也。今名德星湖。又左蠡湖在縣西左蠡山南。大清一統志。

章水。源出湖南郴州桂陽縣東。東流入江西南安府界。經崇義縣西北。又經上猶縣西南。又經南康縣北。至贛州府治贛縣西南。有池江。自南安府大庾縣。經南康。合諸水來會。至贛州府西北。貢水來會。皇朝通

自洞庭以東。庾嶺以北。藪澤大者曰彭蠡。爲江西全省十三府一州之總會。北入大江。其上源曰章貢二水。卽古豫章湖漢也。旣合後。總曰章江。章水源出湖南郴州桂陽縣東之孤山。三源合而東流。爲章水。桂陽縣南境山。爲大分水嶺。凡西北麓水。皆西北流。入湘江。其南水。皆入廣東南。至番禺入海者也。章水出縣東南山。東北流。經苗將司東北。其北源。西北自硤石界東南流來會。又東北流。其最北源。又自西北來會。經集龍邨南。又東入大庾界。東入江西南安府界。經珠子山北。又東北流七十里。有一水。自北山來會。又東五十里。有一水。自西南山來會。又東北六十餘里。至崇義縣西北。受西南來一小水。又東經縣城北。折東南流。受南一小水。又東北流五十里。有禮信水。自西北合琴江來會。禮信水。出文美營。與湖南界之大山。東南曲曲流百餘里。合西來一水。又南流八十里。有琴江。西自界上山。合二水。東流來會。又東南流。合縣北一水。又東南入章。又東北折而東南。經上猶縣西南境。有口溪坑。自西南來。卽水。合二溪。北自城西來。並會。又東經縣南。又東稍北。有九十九曲水。合四溪。自北來會。水出上猶東北山。南流。合東來三水。南流百里。入章。又東北經西雲山北麓。又東流。曰梅江。經南康縣北境。有小水。自南來注之。東南流。過玉潭山。至贛州府治贛縣西南境之潭口東。有池江。西南自南康。合南安府諸水。東北流來會。池江卽章水之南源也。出南安府治大庾縣西。與桂陽界珠子山之東南大山。在內良隘之東北。古源隘之東。東北流。亦曰章水。折東南流。八十里。經南安府城北。折而南。經城東北。又東南。有小溪。自西來會。小溪出大庾縣西南。與廣東界大

山東流經鬱林司北。又東經小梅嶺大梅嶺之北。過縣城之北。府城之南。兩城隔水相望。爲入粵孔道。又東與大溪會。而東流。又折東二十餘里。折西北流十餘里。折東流。經大里塘南。遂東北流。八十里。經鳳凰城南。池江鋪北。又東北。曲曲經鍋坑鋪南。又東北。受西南來一水。又東北。至南康縣西南境。有一水合二溪。西北自李姑堡來注之。卽上猶東南境。南康西北境二溪也。又東北。至縣城東南。受南來一小水。折北流。經城東。又北。受西北一小水。又東北流。八十里。至潭口。卽東北。受南來一水。又東北。會章江。章江既會池江。東南流二十里。折北流。經贛州府城之西。折東流。經城北。貢江南。自城東來會。計章水與池江。至此俱四百餘里。水道提綱。

章水。贛州府志。在贛縣西。一名西江。自南康縣界流入。至府城西。環城而北。合於貢水。南昌府志。在府城西。章江門外。濶十里。一名贛水。卽古湖漢水也。自臨江府清江縣。流入豐城縣界。經縣西。又北。經南昌縣界。又北。經新建縣界。又北。注鄱陽湖。入南康府星子縣界。水經注。贛水過新淦縣西。又北。過南昌縣西。盱水蜀水注之。又北。歷南塘。又經谷鹿洲。又北。經縣城西。又北。歷度支步。又經郡北。爲津步。又東北。經王步。又北。經南昌左尉廡西。又北。經龍沙西。又經椒邱城下。又歷釣圻。抵閣下。又北。經鄖陽縣。餘水注之。又與鄱水合。又有僚水入焉。省志。贛江自清江北流。經豐城西。爲劍江。繞而北。觸磯頭山。繞而東行。至縣東北數里。復折而北。名爲曲江。形如半月。中分三潭。亦名金花潭。又北。豐水注之。又北。受雩韶水。過龍霧洲。入南昌新建二縣界。杭溪水。合瑞州水。東流入之。瀦爲象牙潭。北流。經府城西。爲章江。又北。受修江諸水。匯於彭蠡。南安府志。章江在府城南門外。源出聶都山。東流。

過府東。又東。經南康縣南。折東北。入贛縣界。卽古贛水。亦卽豫章水。亦名南江。又名橫江浦。山海經。贛水出聶都山。東北流。注於江。漢書地理志。豫章水出贛縣西南。北入大江。水經注。贛水出豫章南野縣西北。過贛縣東。注庾仲初謂大庾嶠水。地理志曰。豫章水蓋控引衆流。總成一川。雖稱謂有殊。咸歸一水矣。其水導源東北流。經南野縣北。又經贛縣東。寰宇記。章水源出大庾縣界聶都山。從南康縣東北流。合西扶良熱等水。流三千里。入贛縣界。與貢水合。大庾縣志。章江源出聶都山之沙溪洞。如星宿海然。至府東六里。有過步灘。水勢湍急。巨石突起。舟行至此。極險。舟中人必登岸步過。故以名灘。明成化十五年。知府張弼鑿平峻阻。南康縣志。章江在縣南。一名芙蓉江。相傳唐時兩岸多植芙蓉。故名。有浮石在縣西三十里。高二十餘丈。當江流之衝。水環其外。宏治中里人吳登顯鑿石浚水。取道由石之南。行者便之。舊志宋蘇軾詩。浮石已乾霜後水。卽此。大清一統志。

貢水卽古湖漢水。源出福建汀州府長汀縣西北。西流入江西瑞金縣界。經會昌縣東北。有雁門水。自長寧縣來會。又西北。有梅邨江。自安遠縣來會。經雩都縣東南。有梅川水。自寧都州合石城雩都縣諸水來會。西流有澗河。合澗江水。自興國縣來會。又南有桃江。自信豐縣。合龍南縣定南廳諸水來會。經贛州府東北。與章江會。曰贛江。皇朝通志。

貢水卽古湖漢水。源出福建汀洲府治長汀縣西北山。有兩源。合而西流。其北源山之東北。卽汀州府西溪也。曰萬安溪。又西稍南。經古城司。又西受南來逆嶺之水。又西入江西瑞金縣東界山中。數十里至縣南。稍西有一水。東北自界上黃竹山。合數溪。西南流來注之。水勢始盛。曰貢江。黃竹山在

瑞金東北界。卽陳石山所出之綿江水也。三源合西南流。經壬田寨南。又南流。折西南。經縣城東。又折西流。至縣南。入貢江。西南流。有壩水。自北來注之。又南。有羅田水。自東來注之。又南。受西北來一水。又西南。有浮圖水。自東來注之。浮圖水二源。出瑞金南與福建界之黃安山。合而西流。曲曲數十里。入貢江。又西。經謝坊東。又西南。經會昌縣東北。有湘洪水。自東南來會。湘洪水。出會昌東境。與福建界山。西北流。至縣東。貢江自北來會。又西流。有雁門水。合朗溪沙河。南自長寧北境山北流來會。雁門水。源出長寧縣北境。盤古山北麓。東北流。合西來一水。又東北曲。東流。有朗溪。自東南來會。於羊角寨西北。折西北流。至軍門墟東。受東西來二溪水。又西北。折正北流。經羅田墟東。又北。有一水自西南合三溪。東北流來會。又北。有沙河。東自白雲山合一溪。西北流來會。又北。經會昌縣城東。又北。入貢江。又西。經縣城北。又西。折西北流。受西南來一水。又西北。有梅邨江。西南自安遠縣。合諸水東北流來會。梅邨江。卽安遠水。亦曰廉水。源出安遠縣東南山。西北流。經縣南及西境。有一溪。東自城北來會。又北。折而東。北流。有樂山衛孛山二溪。自西合而東來會。又東北。經羊山南。又東北。至莊埠墟南。又東北。至洛口墟之南。北入貢江。東受一小水。又北。曲曲八十里。受東南來二水。又西北。七十里。至雩都縣東南。有梅川水。合諸溪。東北自寧都縣西南流。合石城縣之鹿河。瑞林河。又西南。合雩水來會。水勢益盛。梅川。卽梅江。源出寧都縣北境梅嶺。東南流。有苦竹鋪。東南山。及大樹嶺二溪。西南流。合而來會。又西南流。有凌雲山水。自西北來。有一水。自東南來並會。又西南。至洛口邨西。北。有南曹山水。及錦山北水。合四溪。自西北來會。折正南流。有南雲鋪東水。及蜈蚣山北水。自西合。

而來會。又南折東南流。受東北來一水。又南受東來鼇溪水。又西南受西北來桃溪水。始曰梅江。自源至此。已二百數十里。又西南至縣東。有龍溪合二水。自西北來。有大溪。合二水。自東北來。並會。又南經縣城東南。又西南八十里。有瓚溪。西北自黃沙山。有白沙水。東北來並會。又西南流。瑞林河。合鹿河。自東來會。鹿河。出石城縣東北界山。兩源西南流而合。又西南有溫泉水。合二澗。西流來會。又西南經縣城西北。又西南折西流。有琴水。自東南來注之。曰琴水江。又西數十里。折西北流。有寨溪。合二水。北自陽坑。東南流來會。又西經固口墟南。西南流。有一水。合二溪。自北來會。又西南流。曰鹿江。瑞林河。出石城縣東南與福建界之黃竹山北麓。其南。即瑞金之綿江源也。水自北流。曰秋溪水。兩溪合。西北流。至秋口渡。北有瀟水。自東北來會。折西南流。有龍江。自東南來會。又西流。曲曲有大柏水。自南來會。折西北流。經瑞林司東。有智水。自東來注之。又西北流。數十里。曰瑞林河。又西與東北來之鹿河合。兩河源流。至此俱三百餘里。又西與梅江會。梅江。既會瑞林河。又西南數十里。有藥水。自東來注之。即長樂水也。又折西流。有曲陽河。自北來會。又西南流。八十里。受南來二水。又西稍北。有寒信峽水。自北來注之。又西南至零都縣東。有零水。北自零山西南流。經城東來注之。又南而貢江。自東南來會。此水亦曰寧都水。以梅川爲上源。與散水篋。曲陽黃沙。長樂瀟水。慶化諸水合。受納既多。源委行五百餘里。實湖漢水之別源也。經縣城南而西。有麻油水。自北來注之。又南數十里。有小溪。河合流。陂水及二溪。自南來注之。折西流。受北來二小水。過三門鋪南。又西有激河。合激水諸溪。北自興國縣來會。激河。出興國縣東北境。寧都西北境之蜈蚣山。西麓西南流。有

藥山西水。自東南來會。又西南流。有沙湫河。自東來會。又西南八十餘里。至興國縣東北。有濊江。自北來會。濊江出縣北境。山南流九十里。有甲溪。自西北來會。又南有寶石水。合一溪。自東北來會。卽城岡墟東水。有楊坊水。自東來合者也。又西南流。有文溪。西北自塘源嶺。東南流注之。又南曰濊江。至縣城東。與濊江會。又南至城東南。有程水。自東來合一谿來會。又西南有廖屋谿。西北自疊山東南流。合一谿來會於縣南境。又南有沈水。自東南來注之。又西南流。經石院鋪東。零山西。又南。曲曲西南流。一百數十里。入賁江。又南。有桃江。南自信豐縣。合龍南定南二縣諸水。北流來會。桃江卽信豐江。源出龍南縣西南。與廣東界之冬桃山東北流。有熱水湖水。自東來會。又東北數十里。有一谿。自東南來會。卽東南源也。又北數十里。折東北流。經松林巖西麓。有猿山水。西自界上東北流來會。曰桃水。又東北七十里。至縣城西北。有水尾山水。西北自界上南合葛谿。東南流。經祿馬上將軍山來會。東流。過城北。有渥水。自南濊水自東來會。渥水源出縣南界之南宮山兩澗。北流而合。又北。合西來之松林巖水。又北。至縣東南。有一水。東南自定南縣西界山來會。又北。經龍南縣城東。又北。與桃水會。稍東北。濊水自東南來會。又北。經金盆山東麓。又北。有水自西南來注之。又北。少東。至小江口西北。有水。東南自定南西北界山。合三谿來注之。卽九洲河也。又北。有一水。自東來注之。又北。有九渡水。自西南來注之。曰桃江。又東北。至信豐縣城東南。又北流。有大樂水。西南自龍潭石君山。合四谿東北流。經縣城西北。而東來會。又有一水。東南自安遠縣西境之九龍山黎山。西北流。合五谿。經小坑鋪南。又合南來之黃沙埕水。而西北來會。又有南水鋪前谿。自西來會。桃江水勢益盛。

東北流。有一水。西北自楊鋪東南流。合二谿來會。又東北。曲曲經贛縣東南境。陳四鋪西。又東北。受東南來一水。又東北。入貢江。此水源流行五百里。入貢江。巨川。梅江爲最大。桃江次之。貢江又西流。有一水。自東北注之。又西至崆峒山東麓。折北流。經府城東而北。與章江會。曰贛江。府城南有崆峒山。章水自西來。貢水自東來。夾山左右麓而北。經城東。章水自西折而東。經城之北。貢水自南來。會。俗稱章爲西江。貢爲東江也。貢水自源至此。行七百餘里。受數巨川。實較章水爲尤畫。水道

提綱。

貢水。在贛縣東。源出福建汀州界。西流。經瑞金、會昌、雩都三縣。又西。入贛縣界。與章水合。一名東江。又名會昌江。卽古湖漢水也。漢書地理志。雩都湖漢水。東至彭澤入江。行千九百八十里。水經注。湖漢水出雩都縣。導源西北流。經金雞石。又西北。經贛縣東。西入豫章水。寰宇記。貢水源出汀州新樂山。經雩都縣東南。四百七十一里。北流。至縣。入贛縣界。西北流八十里。至縣東北二十里。與章水合流。按貢水。出今汀州府西六十里。新路嶺。蓋卽新樂之訛。明統志。綿水一源。出汀州白頭嶺。卽指此也。西北流五十里。經瑞金縣南門。與綿水合。又西南。合灞羅諸水。至會昌縣東北。湘水自南來入之。亦名湘洪水。經縣北七里。又折西北流。合西南來之安遠江。入雩都縣界。又西北。至縣東南。寧都江。自寧都來入之。又西。合雩水。經縣南。合諸小水。又西南。激江水。自興國來入之。又西二十里。桃江水。自信豐來入之。又西。至府城東。環城而北。合於章江。其中灘石參差。舟行甚艱。漢時豫章之水。湖漢爲大。故地理志。此水下獨曰東北入江。其彭廬、肝、蜀諸水。皆云入湖。漢豫章水。雖亦云北入大江。

然不言諸水入此。不詳其里。疑當時尙未知二水之源異流同。姑並著之。而專以湖漢爲經流也。自水經注以豫章水爲正源。而湖漢之名遂隱。大清一統志

贛江自贛州府城東北。經萬安縣東南。有皂江。自贛縣來會。又西北。有遂江。自龍泉縣來會。經泰和縣西南。有牛吼江。自永寧縣來會。又東北。有雲亭江。自興國縣來會。至吉安府廬陵縣東南。有廬水。自安福縣合永寧永新諸水來會。經吉水縣西南。有恩江。自永豐縣來會。經峽江縣東南。新淦縣西南。有象江。泥江。自永豐縣來會。至臨江府清江縣東南。有秀江。即袁江。自新喻縣合萍鄉宜春分宜縣諸水來會。經豐城縣西。又北。分爲二支。一東北流。有盱江支津。自建昌撫州二府境來會。一西北流。會瑞州府之錦山水。至南昌府西南合流。又北。支渠無數。連絡交錯。入於鄱陽湖。皇朝通志

章貢合爲贛江。自府城東北。東北曲曲流。多險灘。古稱贛灘三百里。又北。折而西北。有水西南。自分水坳。合二溪。東北流來注之。又北。至萬安縣東南境之灘頭鎮。西有蓼水。自東南來注之。在萬安縣境。有十八灘。而惶恐灘最險。又西北至皂口。有皂江。自西南來注之。皂江。即皂溪。源出贛縣西北境。之金船山。東北流。合分水坳北二谿。又東北七十餘里。至皂口。入贛江。又北。有油田谿。自東來注之。又西北。至縣城南。有龍谿。自東來注之。經城西南。有遂江。西南自龍泉縣。合諸水來會。遂水。源出龍泉縣西。與湖南界之萬羊山。東南流九十里。有一水。自北來會。又東流。有一水。南自書山來會。東北流。曰左溪。有大汾水。西北自燕塘隘。東南流。合北來林陽谿。東南來會。又東。有新谿。自北合二水來會。又東。有右谿。自南合二水來會。又東。經縣南。交南來一水。又東。受南來湯村水。又東北流。有零

谿西北自拔鐵山合二水東南流又合敷谿來會又東北九十里至萬安縣西南入贛江此水源流行三百餘里又北經城西而北折東北流七十里有常谿自東南來浩谿自西來並會又北經觀莊西又東北至泰和縣西南有牛吼江自西南來合澄江來會牛吼江上源曰未谿二源出永寧縣東境拔鐵山北嶺東南流合又東南有蜀水自西南合二谿來會又東南有二谿自南合而來會又東有射川水自南來會又東北流至泰和縣西境曰牛吼江有澄江又名環川自西北來會東流入贛江曰牛吼石口又東北經縣城東南有雲亭江東南自興國縣境來注之曰珠林口雲亭江即繪水出興國縣北境山北流經雙鳳山東又西北至泰和東之珠林口入贛江又東北至水泡塘西有仙槎水合一谿自東南來注之一谿之源即甲谿源北山也又北至鐵橋塘東折西北流至吉安府治廬陵縣東南境神岡山下有盧水西北自安福縣東南流合西南永寧永安二縣諸水來會盧水即廬水爲豫章十川之一源出安福縣西二百八十里與湖南界之盧蕭山東流折而南數十里有一水自西界來會折東北流受西北來一水又東流數十里有赤谷水自北山來會有洋澤水自西南來會又東有寨木勘水南自羅塘司來注之又東北有岡山二水自西北合而來注之又東曰廬水河至安福縣城西北有郭水自北來注之又東經城北稍東有荷谿自北山合智谿南流來注之又東折而東南流有王江合毛亭水閩水自北來注之南流至絲毛鋪西有金田水西南自大橋東北流合縣南境冷水坑數谿來會曰洋口又西南流經荷山鋪西岡鋪南又東南經螺江鋪南即府城西南境也有禾水漿水合諸谿自西南來會漿水別源最遠曰永河出永寧縣東南柁湖山西

北流數十里。有二谿。一北自鷓嶺。一東自拔鐵山西麓。西流合而來會。又西數十里。經縣城南。又西有黃煙堡水。自南來會。又西北有漿水。自西南茶陵交界。楓谿巖之北。東北流七十餘里來會。以下總名漿水。又東北流八十餘里。至永新縣西南境。曰勝業水。與西北來之禾水會。禾水。源出永新縣西北境秋山。東南流。經栗邨司東。又東南流。有琴川水。西自湖廣界山。東流來會。又東流。會南來之永寧漿水。曰永新江。亦曰潞江。東至永新縣城西南。有二谿。自南來合而北注之。東過城南。折東北流。九十里。有一水。自西北來會。又東北折東南流。數十里。有天河。自西南來注之。折東北流。經敖城司北。又東北。曲曲百數十里。至廬陵西境螺江鋪南。與盧水會。盧水。既會永新江。東南流。有邕水。自西南合高湖山水。東北流來會。又東經府南。入贛江。卽神岡山下也。盧水及漿水。源流俱五百餘里。又北經府城東。又北稍東。有真君山水。自西來注之。經螺子山東麓。有橫江。合朗谿三水。自東南來注之。又東北至吉水縣城西南。有恩江。東北自永豐縣。合諸水來會。恩江。源出寧都東北界廣昌西北界樂安東南界。苦竹鋪梅嶺北之大龍山。兩源北流而合。曰遠谿水。百徐莊水。自東來會。北流數十里。有鹿角峯西水。自東來會。又北流。曰前團水。有湖平水。自西南來會。又西北流。至樂安縣西南境。有雞籠山水。東自縣城南。西流來會。折而西流。曲曲百六十里。至永豐縣東南。受東北來一水。又西。經縣城南。而西南流。有一水。北自城西來注之。又西南。有焦嶺北水。合南曹山塔嶺數溪。自東南來。西北流。經藤田鋪南。自西北注之。此水頗盛。又西南流。有皂水。自東南來注之。又西。受北來之吉陽水。及東南來之烏水。又西。經吉水縣城南。曰明德江。又西。入贛江。此水源流。行四百餘

里。又北經縣城西而北。經三曲灘。東北流。有南谿水。自西北來注之。又東北有楓子江。自西北合二谿。經富田墟來注之。又東北有黃金水。自西北黃皮邨。合二谿及洞水來注之。又東北經陽山西。又東北經峽江縣城東南。玉笈山西麓。又東北有烏河。自西合數小水來注之。烏河出峽江縣西北境。有牛頓虎嶺二水。合而東流。曰淩江。又東南有覺水。自南來會。灑水自北來會。又東有一谿。自北來會。又南入贛江。又東受北來沙谿水。過仁和鋪南。又東至新淦縣西南境。有象江。泥江。自東南合而來會。象江。即永豐縣北之郭山水也。二源合。北流。有樂門山水。自東南來會。又北流。數十里。與泥江會。泥江。出縣東境。極山關南麓。南流。曰泥水。西南流。七十里有大盆山水。及豐谿。自南合而來會。西北流。八十餘里。郭山水。自西南來會。北入贛江。又北有高嶺水。自東南瀦爲小湖來會。即新淦南水也。有一水。自西來注之。又北經縣城西北。折東北流。循山麓。凡百里。至臨江府治清江縣東南境。清江。即贛江也。亦曰章江。分爲二支。一支北流。折而西。二十餘里。又折而北。有秀江。西南自新淦縣會萍鄉。宜春。分宜諸水。東流來會。即袁江也。袁江。曰秀江。即古南水。爲豫章十川之一。源自萍鄉縣東南之羅霄山。羅霄水出焉。分流爲二派。其西北流者。合縣北之萍川水。西爲湘東江。入湖南醴縣界。入淥水。下流注洞庭湖。其北流者。即秀水也。兩源在羅霄山東北。與赤谷水。岡山水。隔一山。西北流。合而西北。有水。東自江西鋪來會。又北折東北流。經縣東境。又北至瀘谿鎮南。有水。西自萍川之東來會。相隔地僅數里。萍川西南流。經縣城爲湘東江。此水東南流入秀水。秀水自源至此。已一百五十里矣。又東北流。至宣風鎮北。有一谿。自南來會。又東北經七里鋪北。又東北有坑頭嶺谿。自西

北來合羅漢山水東南流來會又東至袁州府城西北有清瀝江自南來經城西而北注之東過城北有石屋山水自西北來注之折東南流有老山水合二溪自南來注之又東有白沙水自北來一水自南來並會又東稍南有洋江赤江俱自北來注之又東南經分宜縣城西南又東南受北來之鍾山水南來一溪又東流經鍾山峽至新喻縣界曰喻河東經縣城南稍東有睦官水自南來注之又東稍北受南一谿水又東受南來灼水又東有長宣江自西北合二谿來注之又東有瑪瑙山水合東北來之陰岡嶺水南流來會經維湖鋪南又東有沿河自南來注之折東北流至清江縣東南境有皂谿自西來會又東北入贛江此水源流行六百餘里既會袁江東北流經府城東又北折東流與支津合而北經樟樹鎮西江澚司東有蕭水自西來注之折東北流至豐城縣西南境又折北流經縣城西蓮花湖之東又北有豐水南自柘山關北流合東南數水來會豐水二源出柘山關北流而合又北數十里合西南來一水又東北經縣南境數十里有富水東南自羅山合二谿西北流來會又東北有棧水東南自萬家橋西流合南一水西北流經雷家鋪西來會又西北流至縣北入贛江又北歧爲二支一東北流受南來三小水次曰零韶水自鍾城山西北流注之又東北中有巨洲又東盱江之支津東南自建昌撫州二府來會西北流經南昌南境之猴邨東又北有巨洲又北至南昌府城之西南一西北流經新店西有杭水自西南合藥湖水東北流來會又北流百里有錦江卽古蜀水西自瑞州府來會東北流經留田鋪南河泊所北章江之正派也又東北至南昌府城西南與東支津復會江流甚盛北經城西其西卽南昌山銅嶺及西山也又北分爲二派又東北

支渠無數。連絡交錯。入鄱陽湖。支津東北出者。會南來盱江支水。及東南來廣信府上饒江水。於三
江口入湖。支津西北出者。會奉新安義之馮水。靖安之雙谿水。與寧州武寧之修水。並匯於建昌縣
南。而東入湖。章江自貢源至入湖。已一千九百里。水道提綱。

贛水。贛州府志。在贛縣北。章貢二水。於此合流。又北。入萬安縣界。漢書地理志。豫章水。出贛縣西南。
北入大江。水經注。贛水。地理志曰。豫章水。導源東北流。經南野縣北。贛川石岨水。急。舟行甚難。傾波
委注。六十餘里。經贛縣東。右會湖漢水。又劉澄之曰。贛縣東南有章水。西有貢水。縣治三水之間。二
水合爲贛。因以名縣。陳書高祖紀。南康贛縣。舊有二十四灘。灘多巨石。行旅者以爲難。元和志。貢水。
西南自南康縣來。章水。東南自雩都縣來。二水至州北。合而爲一。通謂之贛水。寰宇記。貢水西北流。
至贛縣東北。與章水合。章水從南康縣東北流。合西扶良熱等水。流三十里。入贛縣郭。與貢水合。爲
贛水。從縣北。一百九十二里。入吉安府泰和縣界。章貢圖經。東江發源新樂山。經雩都而會章水。西
江導源大庾縣之聶都山。與貢水會而爲贛。在州治後。北流至萬安縣。爲灘十有八。怪石突兀。廉厲
錯峙。舊志。贛水自府城北。北流三百里。歷十八灘。乃至萬安。在贛縣境者。一百八十里。有九灘。曰白
澗。天注。小湖。鼈灘。大湖。銅盆。落瀨。青洲。梁口。其九灘在萬安縣。案元和志。皆以自東來者爲章水。自
西來者爲貢水。寰宇記。始以東爲貢水。西爲章水。至今仍之。吉安府志。贛江在廬陵縣南。自贛州府
北流三百里。經萬安縣。西折東北流。六十里。經泰和縣東。又東北八十里。經廬陵縣界。遠城東。又北
四十五里。經吉水縣西。又東北入臨江府峽江縣界。桑欽水。經贛水東北。過贛縣東。又西北。過廬陵

縣西又東北過漢平縣南萬安縣志贛江自贛縣梁口灘北入縣界有灘凡九曰崑崙曉灘武朔昂邦小蓼大蓼錦灘漂神惶恐水性湍險惟惶恐灘尤甚本名黃公復訛爲惶恐也按陳書贛州有二十四灘今止有十八灘詳贛縣泰和縣志贛江自萬安縣東流入經南野縣東水流澄澈故又曰澄江廬陵縣志縣之東贛江自南下合廬水經郡城螺子山亦曰螺州又四十里經墨潭而下吉水吉水縣志贛江自府城東北注縣西南十五里之墨潭爲吉文水與永豐江合有清湖洲橫亘江中逶迤繞狀若吉字故名吉水又曰文江又東北入峽江縣界案吉文水卽贛水之異名臨江府志贛江在府城東自吉安府吉水縣流入峽江縣經城南又東北經新淦縣西又北流入清江縣界至縣北合袁水又北入南昌府豐城縣界漳江縣志贛江舊自縣南十里萬石洲南折而西與袁水會名爲清江遠城而北明成化末贛水衝蛇谿不復西折止有橫河一線與袁江相吐納直至城北二十里二水復合水勢益大有衝齧之患又十里經清江鎮入豐城縣界是爲劍江大清一統志

上饒江一名信河卽玉山水有二源一源出玉山東北曰上千谿西南流至廣信府上饒縣東南一源出廣豐縣東南當浙江福建之界有江山縣水浦城縣水來會曰永豐溪至廣信府南而合曰上饒江經鉛山縣北分二派納諸水而合經興安縣南弋陽縣東南又經貴谿縣西南有須谿來會經安仁縣東南有白塔河自瀘谿縣合光澤金谿安仁諸縣水經龍虎山來會經餘干縣東南合諸水折西北與盱江贛江支津匯入鄱陽湖皇朝通志

上饒江卽玉山水亦曰安仁港曰錦江有二源一爲玉溪出玉山縣東稍北之懷玉山與浙江常山

縣界。草平鋪之西。大橋鋪之西北。分二流。東流者爲信安港之上源。東入浙。其西流。卽玉谿也。亦曰上干谿。西南經縣城東南。西流。有古井潭水。自北經城西來會。又西南流。至崙溪鋪。西南。有冰玉水。東北自子午口南。合二谿。西南流來會。子午口。在縣東北白石街之西。水玉水西南流。有落馬潭水。自西北界來會。折南流。有汪邨潭水。自東北來會。又西南。至崙谿鋪。西南合焉。又西南。至廣信府治。上饒縣東北境。有儲谿。自西北來會。儲谿。卽靈水也。源出上饒西北之靈山。東南流數十里。有一谿。自北來會。南流。有玉瑯谿。自東北來會。又東南數十里。與玉山水合。又西南。經府東境。折西流。經府城南。稍西。有永豐谿。自東來會。一爲永豐谿。出廣豐縣東南。與福建浦城縣界之漁梁山北三源。當浙江福建之界。在浦城西北境。其東南水皆入建谿。其東北水皆北入於浙者也。永豐源。一自漁梁汎之北。西北流。折而東北。至小關驛北。會東來一水。又北。至楓嶺汎西。有一水。北自江山縣界。西南流來會。又西稍北流。過黃家橋南。又西。至二渡關木城關之南。入江西廣豐縣界。又西北流。經太平隘南。又西北。過封禁山隘。又西北。至府東南境。而永平諸水。自廣豐縣城。合諸谿來會。永平谿。出廣豐東南。與浙江界山。二渡關之東山西北流。至縣東南。有永豐谿。自東北來會。永豐谿。出縣東。與浙江界。界頭草坪關之南大山。西南流。合東來一水。又西南流。合永平谿。西北流。經縣城南。又西南。至洋口鎮北。受北來之扈水。又西南。會浦城水。總曰永豐谿。又西北。至府城西南。而玉山水自東來會。二源既合。西流。曰上饒江。有一水。自北合二谿。南經府西來會。又西南。至鉛山縣北境。分爲二派。一西南流。會東南來之岑陽關水。岑陽關水。出浦城縣西北漁梁山北麓。其東北水。卽永豐上

源也。此水西流數十里，經岑陽關北，入江西界，西北流，經封禁山之南，又西北，有七盧水，自東北來會。又西北，折西南流，有橫谿河，自焦嶺關西北流來會。又西北，會上饒江南支水。又西，會南來鉛山縣之東西谿，曰汭口。鉛山東水曰車盤水，源出縣南與崇安縣界之分水關嶺，其南水，即崇溪。東南入建溪者，此水東北流，合西南來一水，又東北流，有一谿，自東南界，合溫林關撩竹關二水，北流來會。又北，合東來一水，折西北流，合西來一水，即彭谿也。又西北，經鵝湖嶺南，又西北，經縣城東北，折而西，會西南東一水。鉛山西水曰桐木水，出縣西南，與崇安界之桐木關，其南水，即望谿。東會崇谿者，此水北流，有馬陵關北水，自西南來會。東北流，又合東南來一水，又東北百里，至縣西稍北，與車盤水合，曰汭谿。又北，流入上饒江，曰汭口。又西北，而一派西北折而西南，二十餘里，受北來二谿合焉。又西流，經興安縣南境，弋陽縣東南境，有大州谿。南合信義港翁源及雙港水，北流注之。信義港，出石佛司北。又西北，有潦源水，東北來注之。潦源，出興安北境山中。東南流，經縣城西北，又南，有水東來注之。又西南，入上饒江。又西北，曰葛谿，有弋陽谿，自東北來注之。又西，經弋陽縣城南，稍西，有水自北，合二谿。南經城西來會，折而南流，有軍陽水，自東南來注之。即薊谿也。亦曰貴谿。又西，受北來一水。又西南，經貴谿縣城南，而西，有須谿。南自雲際關西北流，合數水來會。雲際關南與福建光澤縣界水，自關北流，折而西北，數十里，有茶山東北水，自南來會。又西北，經火燒關東，又西北，折而北流，受東南一水。又北流，稍西，受西南一水。又西北，受南一水。又西北，至縣城西南，與上饒江會。又西北流，至縣西北，有山水自北，合數谿。西南流來注之。貴溪縣北境水也。山水自徐克揚東南流。

數十里有佛老嶺水。自東北來會。又南流。受西來一水。又南。有一水。自東北來會。折西南流。北受長溪水。東受縣北筓谿水。西入上饒江。又西北。折西南流。受南來馬安山西水。又西北流。八十里。至安仁縣東南境。有白塔河。南自瀘谿縣合杉港。茶山清田諸水。經龍虎山。而西北來會。白塔河二大源。一出瀘溪縣東。福建光澤縣西北境之大禾山。南沿傍邨北。西流。經鐵牛關南。入瀘溪界。經縣城北。大山南。折西北流。有縣西南二溪。北流合而來會。又北流。受西南一水。又東北流。受東南來一水。是曰杉港。又北。而茶山水。自東南來會。茶山水。出光澤縣北境大山中。西北流。數十里。經茶山隘。西入江西界。又西北。與杉港合。又東北流。至紫雲鋪西。折西北流。經金貴鋪北。又西北。曰上清水。以其北卽龍虎山也。又西北。有清田水。南自金谿縣東南山。東北流。合東南來一水。折西北流。受西南來一水。又北。折東北流。會上清水。北流。曲曲數十里。折而西流。曰白塔河。又西北流。經掃帚嶺。東至安仁縣東南。與上饒江會。此水源流。行四百里。有惠安谿。自東北來會。惠安谿。自白雞山西南流。合東來一水。曰惠安谿。又西南流。入上饒江。又西北。至城東南。曰安仁港。有金盤山水。自東北經城東來注之。又西。經城南而西。又西北。南受穆皇山西水。又西北。經黃田鋪南。又西北。經撥雲峯東麓。曰錦江。又北。至餘干縣東南境。折而西南。經縣南境。又西北流。有潤陂水。自南合陽林鋪水。北流來注之。又西北。受南來一小水。卽流落山東水也。自縣界至此。總曰龍窟河。又西北。至三江口。與盱江章江支津。北會入鄱陽湖。湖口有洲。其西北卽凡山大洲。其東北康山也。口在南昌東北。餘干西北。上饒江源流。行八百里。所會諸水亦多。水道提綱。

廣信府圖志。上饒江。在上饒縣城南。一名信河。源出懷玉山。西流。經縣南及鉛山、弋陽、貴谿四縣。入饒州府界。饒州府圖志。上饒江。在餘干縣東南。自廣信府貴谿縣流入。又西北流。與盱江、章江支津。北會入鄱陽湖。乾隆府廳州縣圖志。

盱江。卽古盱水。亦曰臨川江。源出廣昌縣。有三支合流。經縣南。又經南豐縣西南。北流。經建昌府南城縣東南。有新城縣之黎水來會。西流。有金谿縣水來會。又北。經撫州府城東。有臨水。自崇仁縣東北。合宜黃縣水來會。又西北分支。一西流。經豐城縣東。至南昌府城西南。一北流。經進賢縣西南。新建縣東北。又分二派。與西流一派。並入鄱陽湖。皇朝通志。

盱江。卽古盱水。亦曰臨川江。亦曰汝水。亦曰東江。源出廣昌縣。有三處。一曰小勳谿。出縣東南。與福建界山。卽白蓮池之東北山也。西流。曲曲百餘里。折西北。至縣西南境。一曰巴谿二澗。出縣南界。血木嶺。北流。合而北。數十里來會。又北。有雩河。自縣西南山來會。曰盱江。東北流。有一谿。自西北來會。東經縣城南。折東北流。受東南來一水。又東北。受西北來二水。一曰菰河。自西北大樹嶺東南流。又東北。受西北來一水。自南豐西南境筆架山東南流。又東北。至南豐縣西南。有軍港水。西自軍山來會。東流。有大南河。自東南與福建界山來會。東北。經縣城東南。又東北。受東南來一水。又東北。有石溝水。東南自蟠湖隘來會。又北。有兜港。自西來注之。又東北。有一水。自西南來會於水口。鋪東。又北。受東南來一水。水東有湯塘泉。又北。至建昌府治南城縣南。受西來一水。又北。經府城東。稍北。有新城縣水。自東南來會。新城縣水。卽黎水。飛猿水。及五福港也。有赤谿。出縣南。與福建界之黃土關北。

流折而西北。會東南來之游源水。又西北流。經縣城西。又西北。有桃谿。自南界得勝關之西山北流。合西南來之九曲水。東北流來會。又北稍西。至硝石鎮西。有資谿。源出東與福建界之杉關。卽五福港也。西南流。合東南來之洵谿。及黃土關熊村水。又西北流。經藍田鋪南。又西北。受東北來一水。又西北。至硝石鎮南。入盱江。自此而北。曰東江。折西北流。數十里。受西南來之岳口東水。又西至藤橋鋪北。有金谿縣水。自東北來注之。金谿二源。一出縣東北山。西流。經縣西北境而南。一出縣東南山。西北流。而合西南流。經苦竹鋪南。又西。有嵩谿市西二水。合西北流。經后車鋪西來會。又西南流。至藤橋鋪之北。入盱江。又西稍北。經白塔鋪東。又北曰汝水。至許灣鎮西。受東南來一水。又西北。受西南來一水。又北稍西。經撫州府城東。折而西北。有臨水。西南自崇仁縣東北流。合南來宜黃縣水。經府城西北來會。臨水。源出崇仁縣西南之巴山。卽臨川山也。北流。有樂安縣北境諸水。自西南合而來會。源較臨水爲甚遠。卽唐水也。唐水。出樂安西北境之大盆山。南流爲大谿。有寶谿。自西來會。東南流。受西南來一谿水。又東。經縣北。折東北流。有十洞水。自東南來會。又東北流。曰蛟河。有殷方水。西北自桃嶺來會。又東北。北受一小谿。南會臨水。自源至此二百里。實臨水上源也。臨水。又東北。至崇仁西南。有一水。西北自西羅山之南來注之。稍東。有西寧水。南自華蓋山來注之。又東北。經縣城東南。折經城東而北。又東北。有羅山水。自西北來注之。又東。有孤山水。自南合二谿來注之。又東北。百二十里。至府治臨川縣西境。有宜黃水。自南來會。宜黃水。出宜黃縣南。南豐縣西北境。軍峯山北之棟柱嶺。北流。合西南來一水。西北流。合西一水。又北。經老埠邨東北。有黃水。西南自鹿角

合二溪東北流。又合西一水。又東北。經老埠邨西北。合西一水來會。又東北。至縣東南。有宜水。南自麻坑村東北流。合東來漳水。西北流來會。又東北。經城東而北。有曹水。西自迎華山東流。經縣北而東來會。又東北流。至長山鋪東。折西北流。經臨川縣南境。至縣西。稍北。臨水自西南來會。東北流。經撫州府城西北。又東北。與盱江會。此水源流行四百里。又北稍西。有櫛山水。自西界橋南。合一谿。東流來注之。東受延橋北水。又西北。至桂家邨西北。歧爲二派。一派西流。折而西北。百五十里。於豐城縣東北境。與章江支津。及雩韶水通。又西北。經猴邨鋪東。又西北。至南昌府城西南。有巨洲。又北。與西南來之章江會。一派北流。折西北。經進賢縣西南境。又西北。至管頭鋪西北。有東鄉進賢水。自東南來會。水出東鄉縣東境山。一自東北來。一自東來。一自東南來。合而西流。經縣城北。又西。受北來南來二水。又西南數十里。受南一小水。折西北流。至進賢縣東南。受南一小水。又西北。經縣城。又西北。經潯江嶺下。分爲二派。南受小港水。又西。復合。又西。受南來之羅谿水。又西北。入盱江。又北。至謝埠東。折東北流。百餘里。有落港水。自東南來注之。港二源。出進賢縣東南之六山鋪。及徐橋鋪。合西北流。經縣東北之龍馬洲東。又西北。百數十里。經斂足嶺東北。又西北。入盱江。又北。歧爲二派。一北流。曰竹山谿。至新建縣東北境。趙家園之西。與章江東北支津。曰蟠谿北港者會。東北經三洞湖。至表安邨。東北入鄱陽湖。當口有大洲小洲各一。其西卽表安西北口也。一東北流。受東南來之古路水。又東北。至几山東南。西會趙家園南支津。東南會廣信府之上饒江水。北入鄱陽湖。曰三江口。指章江盱江。及上饒江也。源流千三百餘里。此口於湖爲正。南有小洲。水道提綱。

盱江在府城東。一名建昌江。源出廣昌縣南血木嶺。東北流。遶廣昌南豐二縣南。又東北。過南城縣東。轉西北。入撫州界。漢書地理志。南城縣。盱水西北。至南昌。入湖漢。寰宇記。盱水在南城縣東二百十步。源出南當山西北。沿流至臨川縣石門。改爲汝水。明統志。盱水。源出血木嶺。流二十里。爲巴谿。又十五里。爲小勳谿。又七十里。至廣昌縣界。又三十里。入南豐縣境。東北流。至府城東南。會新城縣飛猿水。又北流二百餘里。入撫州境。建昌府舊志。盱水自血木嶺北流。過崖山。又四十里。到白水鎮。又四十里。入廣昌縣。是爲平西大河。又百二十里。至南豐縣治前。又東北。入南城縣界。至東津龜峯渡。與黎川飛猿二水合。又東北流。至縣東北。折而西。入撫州界。大清一統志。

瑞州府錦江。卽蜀水。一名筠河。又名瑞河。源出萬載縣西北。東流。經上高縣西北。有藤江。自新昌縣合臨江諸水來會。經高安縣西。有鳳嶺水。龍口水來會。至南昌府新建縣西南。會贛江。入鄱陽湖。皇朝通志。

瑞州錦江。卽古蜀水。源出萬載縣西北。與湖南界之大圍山雲峯洞。東南流。數十里。有一水自西北來會。又東南。有劍池水。合二谿。自西界來會。西界有金鐘淵。及龍成巖之水。皆會入焉。又東流。曰龍江。經縣城北。又東。折東北流。經紫蓋山南。荔子嶺北。曰楊木江。受北來康樂水。又東。經上高縣西北境之淺江口。有藤江。西北自新昌縣。合臨江諸水。南流來會。藤江有二。一曰長藤江。出新昌西北黃岡洞之西北山。隔山北。卽寧州修水也。此水於山南。三源合。東南流。經黃岡鋪西。又南。數十里。折東南流。有一水。自西南黃土嶺。東北流。合血樹坳二谿。東流。經金谿山之北來會。曰長藤江。又東。受北來之藤江水。及鹽谿水。北藤江。出縣北大山。有鹽谿。自西北雙丫尖來會。南流。經黃茆嶺東。又南。

經縣西而南。會長藤江水。又東。經縣城南。又東南流。有臨江。自東北山。合二谿南流。經縣東南境來會。又東。合北來一谿水。又東。折西南流。至臨江口。與楊木江會。楊木江。東南流。合此水。勢始盛。實蜀江北源也。又東南流。有靈江。自北合數水來會。靈江。出上高北境之靈源山。及西洞山。二源南流。而合於太平鄉之東。清涼山之西。曰崇浦江。又南合西北太平鄉來二水。又南至縣北境。曰靈江。折西南流。經縣西南。入楊木江。又東南。經縣城西南。又東南折。東北流。有斜口水。南自蒙山。合一水來注之。斜口水。出縣南境蒙山。北流。折而東北。有寶珠嶺水。自東南來會。又北流。至斜口。入楊木江。亦曰界埠會水。又東北。曲曲經青山。受東來華陽水。又北。曰蜀江。折東流。至府治高安縣西境。有鳳嶺水。合二谿。自北來注之。此水東南流。經鳳嶺山。靈山。尉山之西麓。又東。有龍口水。自南合二谿來注之。龍口水。出縣西南境山東北流。有碧雲峯水。自南多寶嶺水。自東南合。而西北流。來會。又東北數十里。入蜀江。又東。至府西南。受西北來蓮花山水。瑞州府西水也。又東。經府西南。受南來鐘口水。又東。受北來城東水。曰錦江。又東。受南來之琴嶺水。又東。受北來一水。又東。稍北。有曲水。自南合二谿來注之。曲水。出雞籠山之北。北流。有羊山水。自西南來會。又東北流。有藥湖北地一水。自東南來會。又東北流。入蜀江。又東北。至烏溪浦西南。有逍遙山水。自北來注之。又東。至南昌府治。新建縣西南境。象牙潭。與南來豐城之章江會。而東北。經南昌府城西。又東北。入鄱陽湖。蜀水。卽筠水。爲豫章十川之一。源流行六百餘里。南昌之西山脈。自新昌上高高安北境之山。連接而東北。遂爲西山。其北水。皆入馮水。其南水。皆入蜀江。水道提綱。

蜀江。瑞州府治。在府治北。一名濁水。今日錦江。源出袁州府萬載縣界。東流至上高縣凌江口。合新昌鹽谿。又東經縣南。入高安縣界。歷郡城中而東出。又東至新建縣界。入章江。漢書地理志。建城縣。蜀水。東至南昌。入湖。漢水經注。濁水出康樂縣。又東經望蔡縣。又東經建城縣。又東至南昌縣。入贛水。寰宇記。蜀水在高安縣北三里。東流五百九十里。與章水合。耆老傳云。許遜爲蜀旌陽令。有奇術。晉末人皆疾癘。多往蜀詣遜請救。遜與器水投入上流。疾者飲之愈。敬其神異。故以蜀水爲名。府志。錦江自府西南折而東注。貫府南北城中。分一支入南城。爲市河。設三牐以爲防衛。饒州府志。錦江在安仁縣南。卽貴谿之信河下流也。自貴谿縣西北流入安仁縣界。至縣東南。會白塔河。西流。經縣南。又西北入餘干縣界。至縣西瑞洪。入鄱陽湖。在安仁者。名安仁港。在餘干者。又名龍窟河。寰宇記。興業水。一名安仁港。在餘干縣南一百二十里。發源自貴谿縣西漏石邨。經縣過餘干。合江水。明統志。江有雲錦石。故名。餘干縣志。龍窟水。在縣西南十五里。自安仁縣流入。又北至縣東南桐口灘。分流。其經流入縣。出南佈邨。又西北注瑞洪。入鄱陽湖。大抵縣境之水。代有變更。漢時西津塞。則龍窟爲大河。齊梁間。龍窟河塞。則馮田西津爲大河。隋開皇中。何杞塞西津。開龍窟。旣而龍窟復塞。馮田西津復爲大河。宋咸平間。陳襄塞西津。龍窟復爲大河。今大河直走龍窟。而馮田西津冬涸。如行陸路。吉安府志。蜀水在龍泉縣北一百二十里。亦名禾蜀水。有二源。俱在縣西北界。左源清港。右源稍渾。過金田。合爲一。至泰和縣界。合禾谿水。入贛江。袁州府志。錦江水在萬載縣北三十里。源出謝山。亦名謝江水。又名康樂水。東南流至縣東二十里邱江。會於龍江。寰宇記。康樂水在縣東北水口。去

縣三十五里。自謝山出南流。卽康樂候謝靈運嘗游之水。南昌府志。蜀水在新建縣西南。一名筠河。又名瑞河。又名錦江。自瑞州府高安縣流入。合於章江。漢書地理志。建城縣蜀水。東至南昌入湖。漢新建縣志。水在縣西六十里。至縣境象牙潭入章江。大清一統志。

修水。出寧州西南。與湖廣界之幕阜山。東北流。有南樓嶺水來會。又東北。有武寧縣水來會。經武寧縣東南。又經建昌縣東南。有靖安縣之長谿。奉新安義縣之馮水來會。分數派會贛江支渠。入鄱陽湖。皇朝通志。

修水亦曰修河。亦曰西河。源出寧州西南。與湖廣界之幕阜山。亦曰大阜山。北曰青龍山。兩源合而南流。會西來血木山黃蘗山二水。二山自大阜相連而南。又南爲仙羊寨山。俱西與湖廣界。又東南至銅鼓營東江頭邨。西有址河。自西南來會。卽修水西南源也。址河兩源出西南。與湖廣界大山合流而東。百數十里。經銅鼓營南。又北流。會修水東。經江頭村南。又東北流。數十里。折西北流。經葡萄嶺。又西北至山口邨。西卽青龍大阜之東麓支峯也。又東北。曲曲受西北來一水。又東北。至州西南。有南樓嶺水。西北自崇鄉東南流。經南屏山。合西南馬市一水來注之。水勢始大。亦修水北源也。崇鄉東西北三面。皆湖廣界。其山東南相連爲州北境諸山。又東北爲九宮山。赤岡山。武寧西北境。又東北。經州城東南。有額坳嶺水。自南合彌玉山清涼二山水。西北流注之。又東北。數十里。有鶴源水。北自九宮山南。合一谿來注之。九宮山甚深。又東北。曲曲受北來赤岡山水。南受陳坊山水。又東。受北來東延山水。及九宮東水。又東北。受北來一水。又東。有白石港。南自茅坪東南山。合二谿北流。

經柳山來注之。又東受北來一水。武寧縣西水也。又東經武寧縣城南。又東受北來城東之水。又東北受北來一水。又東受西南來一水。又東北有紫鹿嶺。白羊山水自西北來注之。折東南流。受西南來嚴陽山水。又東南經白崖山。有灘溪。西南自洪屏山東北流。經朱家山。猴子崖來注之。又東南經尖山。將軍山。南麓。又東南至建昌縣城南。有靖安縣長谿。及奉新安義之馮水。俱自南來會。長谿源出靖安縣西北。九仙鋪之西北山。其北水即茅坪谿。北流入修江者。此水東南流山中。曲曲百里。至縣西北。有雙谿水。西自寧州界毛竹山合兩水。東流來會。又南至縣西南。有石掌谿。西南自雙峯來注之。又東南經縣城南。折東北流。至東北境。有一水。北自牌樓山下。合東一谿。東南流注之。又東北流。經安義縣北境。又東北曰皓源水。又東北至建昌縣南境。而馮水自南來會。馮水出奉新縣西北。與寧州界之百丈山。即寧州東南境。東嶺之東北山也。東流經南坪橋南。鯉魚山北。東北曲流。折而東南。合西南來謝山之水。東北流。有洞山。及北嶺水。合自西北來會。東南流。受西來一水。又東南。經藥王山。西南麓。受諸谿澗。又東流。受南來李家山水。又東。受南來華林山水。又東。受白鶴山水。皆高安北境山水也。又東。受北來之龍谿水。又東。受奉新城西水。東經縣城南。稍東。有米嶺水。合高胡山水。自南來注之。又東北數十里。經安義縣南境。有白雲山水。自南來注之。白雲山東北。即南昌之西山。諸峯嶺也。修水。又東北。受西來縣城南二谿水。經安峯桃花嶺。翔鸞山之北。曰龍江。分爲二派。一北流。經牛頭山西麓。至建昌縣東南境。與西來靖安之長谿會。而北合與修河。一東北流。經牛頭山東南麓。東北至老鸛鶯北。於修河之支港會。又東北。至赤岸山北。又會支港。東北至松門之北。

吳城鎮之南入鄱陽湖。馮水源流五百餘里。修水於建昌縣城南分二派。中有巨洲。一南經州東南流。會長溪馮水。東北流。又分二派。曰慨江口。一東經丁家山南。會馮水支津。及章江支渠北流者。於赤岸山之北。又分二派。一東北於松門北。吳城鎮南。東入鄱陽湖。一於建昌城南。東北流。受支渠水。又東北。經丁家山北。東北於吳城鎮之西北。入湖。湖口西北。卽德安水口也。修河源流。行九百餘里。水道提綱。

修水。南昌府志。在武寧縣南一百步。源出寧州西。東北流。過州南。經縣界。又東。入建昌縣界。漢書地理志。艾縣。修水。東北至彭澤。入湖。漢行六百六十里。水經注。修水出艾縣東北。經豫章寧縣。又東北。逕永修縣。又東。注贛水。寧州志。修水源出龍飛山。東北流。合幕阜山水。又東。合東津水。又東。合百葛水。又東。合杭口水。又東。合高城津。又東南。合武寧鄉水。又東。經州南。至旌陽潭。合秀水。又合安坪水。又東。合吳坊水。又東。合梁谿水。曰梁口。又東。合鶴源水。東入武寧縣界。江西省志云。修水流經武寧縣南。合官塘源。港魯溪水。又南。受清江。長田楊浦石鑊鳳口。北受茶培。東北受陂田箬谿。東受蹟谿。諸港水。東北流。入於建昌。以其修遠。故曰修水。南康府志。修水在建昌縣南。源出南昌府寧州。自武寧縣流入縣西界。又東流百二十里。合上僚水。入章江。注於彭蠡。邑人呼爲西河。亦名修江。水經注。修水。經豫寧縣東北。經永修縣。又東北。注贛水。王存九域志。建昌縣有修水。建昌縣志。西河自武寧縣流。經縣西九十里。三猗灘。亂石縱橫。最爲險怪。東流合諸水。凡折行百十里。與南河合。又東出蘆潭。入新建縣界。與章江合。大清一統志。

鄱江卽古番水。源出安徽婺源縣北。西南流入江西界。經德興縣北。又經樂平縣東。有大溪。自婺源德興縣來會。至饒州府治。鄱陽縣東南有餘水。自萬年縣來會。又北有昌江。自祁門。黟縣。浮梁縣來會。又西南有西湖水來會。入鄱陽湖。皇朝通志。

鄱江卽古番水。有二源。一曰婺源河。出江南徽州府婺源縣北之大廣山。自塔坑鎮西南合二水。其北隔山。卽浙源東北至五城鎮。合黟南港河。西南流數十里。有龍尾山水。自西北來會。折東南流。會茗坦村水於汪口村東。茗坦村在塔坑西南。有水西南曲曲。經江灣村東。又南西至汪口村之北。西入婺。又東南。經古坑村東。折西南流。數十里。經縣城東南。曰婺源河。又西南百里。經太白司南。又數十里。至曹港口南。入江西界。經德興縣北界。西南流。經桐林鋪西北。有一水。北自鳳遊山西南流注之。又西南。經樂平縣東境。曰樂安江。有大溪。合諸水。東自德興縣來會。大溪。自婺源界山西南流。卽三清山水也。有靈山水。東南自北前村西山。西北流來會。西流有一水。自東北來會。始曰大溪。西南流。經德興縣城北。有林河。自東北山來會。西南流。有石人峯水。合二谿。自東南曲曲西北流。經縣城南而西來會。又有一水。南自毛嶺北山北。經界田鎮來會。又西南。有建節水。南自楊林鋪來會。又西流。有福泉山水。西北流。合一溪來會。折西北流。至樂平東南境。與東北來之婺源會。源流三百餘里。又西稍北。經樂平縣城南而西。有擎舟村水。自北來。經城西而南注之。樂平北水也。東北卽烏聊山。山之東南卽鳳游山水。水之西。有龍停湖。周十數里。又西二十里。卽此溪。又西稍南百里。經古城南。石頭街北。西北流。經高沙灣南。又西北。至饒州府治鄱陽縣東南境。有餘水。東南自萬年縣西流。合餘千

縣水北流來會。餘水出萬年縣東北仙鶴山西南流，經縣城東南，有竹屯河，自東南山西北流來會。又西北，經城西南，又西北，流六十餘里，至餘干縣城西北，有二溪合而南，經城之西，折而東，經其南，遂東北，七十里來會，卽餘水爲十川之一者也。又北流，受西南二小水，東南一小水，又北而娶河，自東來會。又北於府城之東南，會東北來自祁門浮梁之昌江，一曰大共水，卽祁門南河，源出祁門縣北境大共山，山中曲曲南流，曰柏溪，經縣東北之柏溪鎮東，又南西南流，有山溪河，東北自黟縣西武嶺西南流來會。又西，經縣城南，又西南，曰南河，有歷河，西北自櫟根嶺，合界河水，東南流百餘里來會。山溪河，東隔一山，卽黟縣城西之浙源也，界河西，卽江西界大山，又西南至倒湖村東，入江西界。經浮梁縣東北境，曲曲西南，經大寒嶺吳嶺之北，有小北港水，自西北來會。小北港水，出浮梁縣西北境高陂蒙嶺，及分水嶺，二溪合，東南流，至大惟鋪西南，有一溪，自北來會，又東南流，至山麓，折而南流，與南河會。又西南，經洞庭山北，又西南，至縣東，有渭水，東自吳嶺，合高嶺水來會。又西南，經城東南，又西南，至景德鎮北，受北來赤嶺水，及西北來南坑橋水，稍西，受東南來鳳游山北水，及柳家灣水，又西過界牌鋪南，曰昌江，又西南百里，至雲龍山南，折而南流，經府東北境，求仁湖，上東湖之東，白鹿山之西，折西南流，經下東湖南，又西，至府城東南，而娶河自東南來會。二河旣合，曰鄱江。西經府城南，又西南，有西湖水，自北來會。又西南，入鄱陽湖。湖口正西對康山，在餘干西北，康郎湖之北，南昌東北，三江口之東北也。此水源流七百里。西湖水南通鄱江，北爲上湖珠湖，又北爲烏玲湖，會鄱陽童子石門二港水，西入鄱陽湖。童子港，出鄱陽縣東北境，與江南界之浩山，南流有東北

蒙嶺及分水嶺水合而西南流來會又西南流有港口水一出北斗嶺西南流一出福峯西北流合而西經雙鐘山來會曰童子港又西南經鐵藍山西又南有上藍村南水自東北經塔水橋雲龍山北而西南來會又西南至府西北匯爲烏玲湖石門港出鄱陽北境石門司之西北山二源合東南流經司南曰石門港又東有一水自東北來會又南曲曲經烟衝山論石嶺東麓又西南至烏玲湖會童子港及珠湖水西入湖卽鄱陽北港口也童子港源流四百里石門港源流二百餘里水

道提綱

鄱江在鄱陽縣南一名長港樂安江自東南來昌江自東北來流至城東會爲一名鄱江環城南而西折北流又分二支名雙港分流入鄱陽湖漢書地理志鄱陽鄱水西入湖漢水水經注鄱水出鄱陽縣界東西經其縣南武陽鄉入西流注於贛寰宇記浮梁樂平餘干等三縣水合爲鄱江經郡城南又過都昌縣入彭蠡湖鄱陽縣志鄱江上流有二一自安徽婺源縣經德興樂平流入經縣東六十里曰大渡一自安徽祁門縣經浮梁流入經縣東北三十里曰小渡至縣東合流經城南又西而廣信西界諸水復自餘干來合焉折北十餘里又分二支一支自西而北又折西經崇陰鎮出饒河口入鄱陽湖一支自西而北復折西注於堯山港又二十里入老鸛港匯於烏玲湖由湖西南出經虬門入鄱陽湖又老鸛港一支轉北十餘里折東入車門港匯爲北珠湖其經流一名長港一名雙港宋時和州史定之植柳江濱亦名柳林港大清一統志

續行水金鑑卷第一百五十一

江水原委六 江南

大江經彭澤縣西北江中有小孤山有泊湖水自彭澤來會皇朝通志

又東經彭澤縣城西北有一水南自城西北注之江中有小孤山濱岸有磯山在城北江中江之北岸有小孤司又東有泊湖水自東南來注之大泊湖在彭澤縣東境表延曲折數十里西會一南來之水北入江又東北有大洲又東北南岸受小水二中有洲水道提綱

潯陽江在九江府城北亦名九江即大江也自湖北興國州界流入瑞昌縣北北岸爲湖北廣濟縣界又東經九江府治德化縣界北岸爲湖北黃梅縣界又東合彭蠡湖水經湖口縣又東北經彭澤縣寰宇記吳時來江防考江水經小孤山最爲險要小孤山之上二十里曰楊家洲下十里爲毛湖大清一統志

小孤山在宿松縣南百四十里初山在江北岸與岸南澎浪磯相對江流至此湍激如沸海潮不得上明成化間北岸衝決爲廣流遂獨峙江中勢分險殺而山愈峻拔江南通志今按神禹治水每舉名山大川以爲表識其淵渟有定者謂某水在某處其流衍所歷者謂某水經某處其同源異派者則又云某水至某處別稱爲某水故導山之文與導水並重今通志暨提綱舉小孤山以爲識亦此例也宜詳疏之後仿此

又北入江南境。皇朝通志。

又北入江南界。大江於江西經四縣境五百里。水道提綱。

大江又東北經彭澤縣西北二里。北岸爲安徽宿松縣界。大清一統志。

經東流縣西。又經望江縣東。有雷水來會。經縣東。有前長河。自潛山縣經英山縣。合宿松之南泊湖水來會。皇朝通志。

大江北經馬當山北。東流縣之西南境也。馬當山橫枕大江。爲彭澤東流分界。西岸卽望江縣東南之雷口。有水西北合太湖宿松二縣水。東流注之。前長河有三源。一出潛山縣西北境水吼巖之西山。其北水卽淖河。北流入淮者。南水。西南流。經重山間。曲曲百餘里。曰薛家河。有一水。自西北來會。又東南流。數十里。有青石河。西北自英山縣東境山。東南流。百餘里。來會。卽西源也。又東。至青石鎮南。有東源。曰羊角河。自潛山西北境山。西南流。百餘里。來會。又東南數十里。分爲二派。一東南流。經太湖縣城西南。一東流。經城北。折而南。經其東。又南。復合東南。七十里。爲泊湖。又東南流。爲前長河。六十里。至望江縣西南。有南泊湖水。自西來會。南泊湖水。西北出宿松縣西北界之二郎河。東南流八十里。經縣城西南。分二派。一南注龍湖入江。其一東流。經縣東南境。有預縣河。自北山。經縣東而南。來注之。又東南四十里。折而東。稍北。爲泊湖。又東八十餘里。會前長河。東流。經望江縣城南之青水鎮前。又東入江。卽古雷口也。水道提綱。

安慶府志。大江自湖廣黃梅縣東流。入宿松縣南。一百二十里。對岸爲江西湖口彭澤分界。又東北。

經望江縣南十五里。對岸爲池州府東流縣界。又九江府志。大江又東北。經彭澤縣西北。北岸爲安徽宿松縣界。又東北入安徽望江。東流二縣界。雷水亦曰雷池。亦曰大雷江。亦曰大雷口。今名楊溪河。源出湖廣蘄州黃梅縣界。派流至宿松縣西北四十里隘口。合流曰三溪河。至縣西北三十里曰二郎河。又曰清灣河。又至縣西一里曰縣西河。又南行五十餘里出龍湖。曰滂池河。又東過泊澇湖。經望江縣南五里。曰楊溪河。又東抵華陽鎮南入江。晉咸和二年。溫嶠欲率衆下衛建康。庾亮報嶠書曰。足下無過雷池一步。又義熙六年。劉裕討盧循軍於雷池。宋鮑照有登大雷岸與妹書。隋書地理志。宿松有雷水。寰宇記。望江縣大雷池水。西自宿松縣界流入。至縣東南積而爲池。謂之雷池。又東流至縣南。去縣百里。入於江。爲大雷口。相近有小雷口。明統志。雷池在望江縣東南。又十五里入江。名雷港。前長河。明統志。楊溪長河。在望江縣南五里。有二十六斷。南泊湖。望江縣志。宿松縣龍南諸湖之水。匯於泊湖。其水東流湖之口。又東達雷港。入江。明天啓山。雷港爲浮沙所塞。今自華陽鎮入江。大清一統志。

又東北有香口河。自建德縣經東流縣來會。經縣北有漳湖。合上流諸湖水來會。皇朝通志。

又北至望江東境。近西岸有洲。東岸依山麓。又東北爲香口河口。香口河兩源。一出建德縣南境石門嶺西北流。一出桃墅嶺。東北流。合而北流百里。曰前河。折而北流。經縣城西南。堯城鎮東。又北流折西北。至東流縣東南。東一水。南自山中來會。曰香口河。又西流。經縣城南。又西入江水口。西岸稍南。卽望江縣東北之華陽鎮。又北。經縣城西北。又北。西岸有漳湖溝口。湖在望江縣北境。周四十里。

東南流爲溝入江。水道提綱。

香口河在建德縣東南流六十里其源有二合流至香口入江。大清一統志。

漳湖在望江縣東北六十里受武昌青草白土諸湖之水北經埭溝河至山口入於江。江南通志。

又有皖水潛水自潛山縣經皖口來會。皇朝通志。

又北六十餘里折東北流經安慶府治懷寧縣西南境數十里至縣南有長河西合潛山諸水來注之。卽古皖水曰皖口。長河數源出潛山縣西北山東流經縣城北而東南者曰賓河。又北曰黃花河。

又北曰破越河皆西出山中東流經青口驛南折東南流有西源曰西河出西境山東流經縣城南而東與北三水會。又東稍南至石牌鎮有地靈河自西來會俗總名曰石牌河。又東有白沙河與晶

靈河西自小池驛合而東流來會。又東有靈里河及北關口河西南自太湖縣東北境合而東北流來會。又東南經府西境曰長河至府城西南東入江。水道提綱。

大江又東北經望江縣對岸爲池州府東流縣界。又東北經懷寧縣西繞城南而東。寰宇記大江水在懷寧縣西一百八十里與望江縣分界。至皖口南對江州東對石牌中流與彭澤縣分界。皖水今名長河源出潛山縣西北天堂山東南流經縣西北二十里又南至縣東二里會潛水。又南至石牌市與太湖縣東諸水會。又東南經懷寧縣西十五里又南入江。元和郡縣志自壽州霍山縣流入經縣北二里。又東南流二百四十里入大江謂之皖水。寰宇記在懷寧縣西北潛山縣志皖水亦名後河源出天堂山之龍潭東經烏石陂至縣東二十里陶阜分爲二支一由破越溪至府西石牌口。

入江。一經縣東二里。與潛水合。亦達於石牌。懷寧縣志。一名長河。北自潛山縣分。烏石吳塘二支。奔瀉二百餘里。會於康平山。又太湖縣水。亦奔瀉二百餘里。至此同會於石牌。屈曲七十五里。至皖口入江。潛水。今名前河。源出天堂山。相近之羅源山。曰羅源澗。東南流。經潛山縣城北。又東合皖水。宋史河渠志。元豐五年。淮南監司言。舒州近城有大澤。出潛山。注北門外。比者暴水。漂民居。知州楊希元。築捍水隄。千一百五十丈。置洩水斗門二。遂免淫潦。入城之患。潛山縣志。源出公蓋山。經水孔嶺。天柱西湖塘堰。至縣西北五里。白沙河。分爲二支。一繞縣北。東合皖水。一繞縣西而南。又分爲二支。一東南合黃泥港。至石牌。合皖水。一東經縣南。曰黑河。明萬曆三十一年。知縣于庭采濬之。乃與縣北之潛水合。案輿圖。潛山縣北有賓河。又北有黃花河。又北稍東。有破越河。以地勢推之。黃花河疑卽皖水。而賓河疑卽潛水。又案方輿紀要。但載皖水。在府西。源出潛山。合潛水。南至石牌市。東至皖口入江。流長三百四十里。卽引宋史河渠志爲證。蓋皖潛同流。亦通受其名也。大清一統志。

經安慶府東南。又經池州府貴池縣西北。有張溪。自建德縣來。會皇朝通志。

東經府城東南。又東北。南岸池州府治貴池縣西境。有張溪。自南來注之。張溪。卽李陽河。源出建德縣東境山。三水合而北流。折西北百餘里。至張溪鎮。東又八十餘里。至黃盪鎮。西又北入江。水道

提綱。

大江經東流縣西。與安慶府望江懷寧二縣接界。又東經貴池縣。東流縣志。自彭澤縣馬當山東北四十里。至香口。又三十五里。至縣西。又三十里。至吉陽。又東北。四十五里。至奔灣。雁汶。又四十里。至

黃溢河口接貴池縣界。張溪在貴池縣西六十里。源引大江。以江流之消長爲盈縮。本名李王河。以李王二姓居其地也。其西五里曰新河。自河口出江中。有石槎枒橫突。爲攔江羅漢二磯。奔流激盪。爲運道患。南唐發運司周湛役三十萬夫。作支流以避其險。自是往來無覆溺之患。大清一統志。

又東北有樅陽河。自桐城縣經懷寧縣。合諸水來會。皇朝通志。

又東北至樅陽鎮南。有樅陽水。西北自桐城縣。合諸水來注之。樅陽水數源。東北曰魯玉河。出桐城縣東北。北破關西北山。東南流。經呂亭驛東。又南至縣東南境。孔城鎮西南。有小水。自西北來會。又南流至懷寧縣界。練潭驛東。有二水。自西北來會。曰倒流河。曰掛車河。倒流河二源。一出桐城縣北馬頭山。東南流。經縣城東。又南。其西一水。出五嶺山。南流。經城西南。又合一小水。東南流來會。又東南流。與西來之掛車河。同入魯玉河。掛車河二源。一出縣西南山。東南流。一出陶衝驛西山。東流而合。又東南經練潭驛北。又東會倒流河。入魯玉河。又東南流有三安河。及沙河。自西合而東流來會。三安河。出桐城縣西南境。山東流。經陶衝驛南。又東南百餘里。至練潭驛南。又南有沙河。自西來會。沙河兩源。在三安河之南。東流合而東南。有小路口二水。西自潛山青口驛之北。合東流會沙河。又東。會三安河。又東南。會魯玉河。又東南。經桐城東南界樅陽鎮之西。入大江。水道提綱。

大江。又東北。經懷寧縣。繞城南而東。又東北。經桐城縣東南。漢書武帝紀。元封五年。冬。自尋陽浮江。親射蛟江中。獲之。薄樅陽而出。又郊祀志。上巡南郡。浮江。自尋陽出樅陽。過彭蠡。樅陽河。今日練潭河。在桐城縣東南一百二十里。源出潛山縣東北界之黃馬河。東流。經懷寧縣北九十里。又東

流經桐城縣西南七十里。練潭驛南。盡匯懷寧桐城二縣北境之水。又東南至縱陽鎮入江。寰宇記。縱陽湖在桐城縣東一百五十里。桐城縣志亦名縱陽湖。西引練潭。北通孔城。南達大江。安慶府舊志。練潭河西受懷寧縣北高河。黃馬河。諸水。北通白兔河。沙河。大清一統志。

又東北有池河。自祁門縣來會。皇朝通志。

又東北數十里。南岸有池河。自南來注之。卽貴池水也。池河俗曰雲溪河。源出祁門縣北界。大洪鎮西北諸山。兩水合北流。至七都村西。折西北流。二百里曰雲溪河。經唐村山南。有一水自南來會。又西北至府西南之殷家匯。東折北流。至池州府西五十里。北入大江。曰池口。水道提綱。

元和郡縣志。大江水在秋浦縣北七里。宋史河渠志。宣和六年。前太平判官盧宗厚言。池州大江。乃上流網運所經。其東岸皆暗石。多至二十餘處。西岸則沙洲。廣二百餘里。諺云。折船灣。言舟至此必毀折也。今東岸有車軸河口沙地。四百餘里。若開通入杜塢。使舟經平水。逕出池口。可避二百里風濤折船之險。請速開修。從之。貴池水在貴池縣西。一名池口河。亦名杜塢河。水經注。貴長池水出石城縣南郎山。北流爲貴長池。池水又北注於南江。元和郡縣志。貴池水在秋浦縣西七里。梁昭明太子以其水魚美。故封其水爲貴池。寰宇記。水在貴池縣北七里。源出秀山。池州府志。池口在縣西五里。其源有五。會於秋浦。瀦於玉鏡潭。沼於殷家匯。決爲灰埠港。注於杜塢。過鎮山入江。大清一統志。

經銅陵縣西南。有大通河。自青陽縣合數水來會。皇朝通志。

又東北至府城西北境。有通濟河。南自城東北來。西北流注之。卽池州城河也。源二。一出府南境。唐村山。東北流。一出東南。石羅山。西北流。合而北。而西北。經府城東。折西北流。入大江。又東北。北岸有羅昌河。自西北來注之。河出羅昌鎮北山。東南流。經湯家溝北。又東南入江。又東南岸有梅根港口。梅根港。在貴池縣東北境。水有二源。西南曰沙塘河。東南曰石米河。合而西北流。又有白沙河。自西來會。又北流。經梅根鎮西北。入江。又東北。經銅陵縣西南境。有大通河。南自青陽縣。合數水來注之。大通河。西源曰五溪河。出青陽縣南山。合五水北流。經兩山間。又北。經縣西南之九華山西麓。又北。至大通鎮之南。與東源會。北入江。東源三水。一曰分水嶺北水。西北流。經青陽縣城東而北。有博山河。東南自石埭縣北境。陵陽鎮西。北流來會。又北稍西。有喬麥灣河。自東南來會。又西北至大通鎮南。會西源入江。水道提綱。

大江。又東。經貴池縣北。又東。經銅陵縣西。梅根河。在貴池縣東四十五里。亦曰錢溪。劉宋泰始二年。沈攸之與袁顓相拒於濃河。其將張興世。逕趨錢溪。立營寨。顓遣將陳慶引舸攻之於梅根渚。是也。胡三省通鑑注。梅根港。有鑄錢監。故曰錢溪。貴池縣志。梅根河。源出太樸山。與青陽縣五溪河。合交於雙河。又北。達大江。大清一統志。

大通河。在府東北六十里。其源七。自青陽者四。自銅陵者三。俱會於車橋河。至大通鎮。入江。江南通志。

經無爲州南。有荻港水。自銅陵縣。合繁昌縣南水來會。皇朝通志。

又東北經南岸山麓。又東北經縣城西。有小水口。自城南西北流入江。中有洲。又東經城北。北岸有二小水口。無爲州南境也。曰灰河。鎮水口。正對南岸銅陵城。曰土橋。鎮水口。又在其東。又東北南岸有小水口。又東北岸有泥汊。鎮水口。巢湖支津。北自巢縣。南經無爲州東。而南入江之一派也。江心有洲。南岸有荻港口。荻港水。出銅陵縣東南山。東北流。至順安鎮。有二小水合。自東南來會。又東北流。曰新河。至黃澣鎮。又合繁昌縣南之水。龍山水。折而西北。經荻港鎮南。西北入江。水道提綱。大江。又東經銅陵縣西。與安慶府桐城縣。及廬州府無爲州分界。又東北經桐城縣界東南。一百二十里。對岸爲貴池。銅陵二縣接界。又東北流入無爲州界。歷府境四百二十里。荻港河。在銅陵縣東北五十里。其源有三。合流至北下社。入江。案劉宋泰始中。李安民擊赭圻湖。白荻浦。獺窟。皆捷。荻浦。卽荻港也。泥汊河。源出廬江縣黃陂湖。東流入無爲州界。至州東南五十里。入江。大清一統志。荻港河。在銅陵縣北八十里。源出朱村。會各鄉之水。至北下社。入江。江南通志。

經繁昌縣西北。蕪湖縣西南。有石碓河。自南陵縣來會。皇朝通志。

又東北經繁昌縣西北境。北岸有珊瑚港口。中有數洲。又東北經北岸。與龍鎮南。南岸三山鎮北。與龍鎮以西。俱無爲州境。三山鎮。係繁昌北境。有三山磯。濱江。又東北爲南岸。蕪湖縣西南境之石碓河口。石碓河。源出南陵縣西南山。東北流。經縣城東南。又東北。受西來二小水。卽西出小龍山馬耳山者。又北有一湖。自東合南來一水。并東南達清弋江支津。西流來會。於繁昌東境。又北至蕪湖縣南境。石碓鋪之西。折西北流。至魯港鎮西南。入江。其北岸稍東。卽和州南境之裕溪口也。北岸爲和

州南境之裕溪口。水道提綱。

太平府志。大江自池州府銅陵縣界東北流。經繁昌縣北五十里。與無爲州分界。又東北。經蕪湖縣。繁昌縣志。江面廣濶凡數十里。蕪湖縣志。自繁昌螃蟹磯。至縣界之魯港。十里。廬州府志。大江在無爲州東南。自安慶府桐城縣流入州界。爲石灰河口。又十九里。抵泥汊河。又三十里。抵柵港口。又六十里。抵梟磯。又三十里。抵裕溪口。入和州界。上下二百餘里。與池州府銅陵縣。太平府繁昌縣對境。無爲州志。凡境中之水。在州東者。柵港河。在州東南者。泥汊河。在州東北者。運河。裕溪河。濡須水。在巢縣南。一名柵口水。又名石梁河。源出巢湖。東南流。經無爲州東入江。三國魏志。武帝紀。建安十八年。進軍濡須口。水經注。柵口水。導源巢湖。東經烏江城。北又東。經南譙。繞郡城南。又東。經附農山。北。又東。左會清溪水。又東。左會白石山水。又東。經石塘。至東關南城。又東南。注於江。寰宇記。巢縣濡須水。源出縣西巢湖。亦謂之馬尾溝。東流經亞父山。又東南入江。與含山縣分中流爲界。宋史。劉錡傳。錡與金人。夾石梁河而軍。河通巢湖。廣二丈。錡命曳薪疊橋。須臾而成。通鑑。地理通釋。濡水。與和州含山縣分中流爲界。濡須山。在含山縣西南七十五里。與無爲軍七寶山對峙。中爲石梁。鑿石通水。山川險阻。舊志亦名天河。自巢湖入口。經流巢縣南。又東南。經七寶濡須兩山間。亦曰東關水。無爲州志。柵水出東關口。爲海子口河。又東南。經黃洛河。湛河。過新裕口。又東南。入江口。柵口。在州東五十里。東北去和州一百五十里。今坍入江。大清一統志。

裕溪河。在無爲州東北百二十里。又東北百里。有樸樹河。東北四十里。有運河。合於馬場河。俱入大

江南通志

又東北有魯明江。卽清弋江。匯旌德太平石埭涇縣諸水。經宣城縣。又經蕪湖城南來會。皇朝通志。

又東北爲蕪湖縣西北之魯港口魯明江。南匯旌德太平石埭涇縣諸水。東北流。經宣城西北境。曰清弋江。折西北流。經蕪湖城南。而西北注之。魯明江。卽清弋江。有三源。東南源曰梅溪河。出旌德縣南。與績溪縣界之鋪頭鎮南山。北流數十里。經縣城東。又北。折西北流。經三溪鎮南。又西北流。依山麓。折而東北。至涇縣南境。烏溪鎮之西。合南來三小水。又北。經縣城東。又北。西南二源水合。自西南來會。南源曰小溪河。出太平縣南。與歙縣界黃山北麓。北流八十餘里。經縣城東。又北。稍西。北。曲曲八十里。而石埭水自西南來會。西南源曰陽溪河。有三源。一出石埭縣西北分水嶺。其西北流。卽青陽縣水也。此溪東南流。至縣城西南。與西南源之出郭村山者。會而東。經城南。又東北流。與南源之一出焦村。一出崔村。合而北流者。合。又東北七十里。與小溪河會。陽溪河既會小溪河。又東北流百餘里。至涇縣北境。與東南來之梅溪河會。又東北九十里。分支津。北流入橫湖。注石碓河。北入江。正流東北流八十里。至宣城縣西北境之灣沚鎮。西北又分二派。一西北流。經方村鎮東。又西北流。一東北流。至黃池鎮南。有烏溪鎮水。東北自水陽河來會。又分支渠。北達水陽河。其一支西北流。與方村鎮一派合。曰縣河。西流。經蕪湖縣城南。折而西北流。經魯港鎮之東北入江。此水三源。皆在黃山之北。水道提綱。

清弋江。在蕪湖縣東南。卽清水也。一作應冷水。徐鍇說文繫傳。漢書。丹陽宛陵有清水。至蕪湖縣入

江應冷水出丹陽宛陵。然則清冷同也。蕪湖縣志清弋江自宣城縣北合黃池水。至縣東南界入於長河。又分爲黃池水。北行匯爲路西河。又北入當塗縣界。合姑溪入江。大清一統志。

魯港在蕪湖縣南十五里。源出宣城。西注大江。一名魯明江。舊志云昔有魯明仲者居此。江南通志。

經太平府治當塗縣西南。有姑孰溪。自寧國府經當塗縣合廣德州建平高淳諸水來會。皇朝通志。

又東北六十里。至太平府治當塗縣西南境之水陽江口。水陽江卽姑孰溪。南自寧國府北流至當塗會廣德建平高淳諸水。西北流注之。水陽江南出寧國縣。有二源。西南源出縣南。與績溪縣界之

叢山關西北。北流有四小水。東西來會。又北流經胡樂司西。又北流數十里。曰西河。折東流。至蟠龍

鋪之西北。有一溪。自南合東來。二水來會。又東北流六十里。經縣城西北。有東河自東南來會。東南

源卽東河。又有二源。一東南出。與浙江界山兩水。西北流合。經獅橋鎮南。又西北。至石口鎮南。折而

北流。有一水。自南合。二溪北流百餘里來會。又折東流。經梅花鎮北而東。又折北流。經河瀝溪鎮西。

又西北八十餘里。至縣城東北。又北。與西河會於可渡鎮之西。始曰大河。北流。又西北。經杜遷鎮黃

渡鎮西。受西南來之小水。二又北分爲二派。一北流。一西北流。數十里。至寧國府治宣城縣東南。又

分二支。一北經府城東北。卽折東北流。一北流。二十餘里。合於府北山東麓。稍東北。前北流一派。自

南來會。又東北。復分爲三派。一派東流。會裏南湖。一派東北流。會高淳縣東南之因城湖。一派北流

八十里。至水陽鎮西南。有支津。與東北流者通。又北流四十里。折西北流。至烏溪鎮東南。有支津。與

清弋江之經灣汊者會。又西北流。分爲二派。一西流。有黃池河。南自黃池鎮通清弋江來會。又西稍

北流。經太平府南境而西。至東梁山之南麓。其前分一派。西北流於府東南。又分爲二。一西流。一北流。會高淳縣塘溝河。西流。經府城南。折而西南流。會前西流之派。又西南於東梁山東南麓。復會。西入大江。水出廣德州者有二源。一曰東溪。亦有二源。一東南出。與浙江界山。西北流至廣德州城東北。一東北出。杭村鎮西南流。至州城東北。合而西北。有水西南自陽灘來會。又西北。曲曲流出。山折而西。至建平縣東南。有西溪自南來會。西溪出州南境陳陽司南山。北流數十里。經柏店東。折西北流。有水合二溪。自南來會。又北。百數十里。會東溪河。又西。有水西南自唐尼嶺。北流經十字鋪。又東北來會。又西北。經縣城西南。又西北。曰溪河。西入南礮湖南礮湖之南。曰裏南湖。北曰因城湖。實一澤。東西狹。南北長。南承洪村橋水。爲裏爲湖。有姑孰溪支津。西南自寧國府東北來會。迤而東北。受一東南來之水。又北。有溪河。東南自建平來注之。又東北。經定埠鎮西。又北。有胥河。東自溧陽來會。湖水自西北流。有姑孰溪支河。西南來會。又北而西。經高淳縣城南。又西北。經滄溪鎮東北。有石臼湖水。自北支津相會。又西北。曰塘溝河。經薛鎮南。又西北。至太平府東南。水陽河支津。自南來會。又西北。至城東南。分爲二派。一經城南而西南流。合水陽河於東梁山南麓。西入江。一經城東而北。石臼湖支水。自東來會於府城西北。入江。石臼湖。在高淳之北。溧水縣之西南。東西長八十里。西南支津。通高淳縣西之塘溝河。自湖北流出。一水經博望鎮東。又北。折而西流。經丹陽鎮南。又西。曰新河。經府城北而西。至采石鎮之南入江。水道提綱。

續文獻通考。大江在太平府城西北五里。太平府志。大江在府西。卽洋子江也。又東北。經蕪湖縣西。

五里。又東北經當塗縣。姑孰溪。在當塗縣南。卽姑孰水也。一名姑溪。一名姑浦。元和志。姑孰水。在縣南二里。姑孰城。因此名。寰宇記。姑浦水。南岸立津。以譏行旅。太平府志。丹陽湖北股。西行。經陳進。盱北。受橫望港水。又西過武山南。受武山港水。又西過青山北。又西過白紵凌家二山南。是爲姑溪。又經縣南。爲南州泮。受胭脂港水。又西北受襄城港水。爲三江口。又西北受淮渡港水。又西北過采石鎮。又北經新河。至寶積山入江。大清一統志。

至和州南。有巢湖水。自廬州府合肥縣。合合肥之肥水。舒城之界河。潛山之巴羊河。及巢縣無爲州諸水來會。皇朝通志。

南岸博望山。與北岸和州南之西梁山。隔江相對。亦曰天門山。博望山。今日東梁山。以與西岸梁山對也。又東北。北岸爲橫江口。牛屯河。西北自巢湖來注之。巢湖。在廬州府治。合肥縣南境。廬江縣北界。東西廣百餘里。南北八十餘里。形稍方。中有姥山。姑山。近西岸。爲江北巨澤。周四百里。自合肥南界諸水。皆匯注之。其上游。則肥水及舒城縣之巴羊河也。肥水。出合肥西之雞鳴山。亦曰金斗河。東南流。有一水。西自小蜀山來會。又東南。經府城北。又東。有店埠河。東北自圖墮來會。又南流。九十里。入湖。肥水之西南曰派河。出西南大尖山之東麓。東流。經派河驛南。又東流。稍南。入湖。派河之南。曰界河。卽桃溪也。源出舒城縣西北界山。東流。經桃城鎮南。又東北流。折而東南。入湖。與西南來之巴羊河合。巴羊河。源較諸水最遠。出潛山縣北界小路之北山。其山以東之水。皆東南會桐城之樅陽。其西水。卽此河也。東北流。經桐城西北之五嶺山。馬嶺山。西麓。曲曲已二百里。東北至龍河口。

有龍河北自舒城縣城西來注之。又東流數十里。經縣東南境。又東北八十里。會界河入湖。湖自肥水口東南。經忠廟鎮。桐陽鎮。南。又東南。有支渠。東流。有柘臯河。東北自浮槎山。又有下閣鎮河。自東合而南流來會。其南。又受一小水。東稍南流。經巢縣城南。又東南八十餘里。至黃落河鎮。之東北。分爲二派。其南流者。經漕運鎮西。又分二派。一於鎮南東合。其一南流。經無爲州東境。又南。分爲二派。一正南於泥汊鎮之西入江。正與東岸荻港相對。一東流。經柵港汛南。而東入江。卽古濡須口也。其東南流者。經漕運鎮北而南。又合西南支津。稍南。又分爲二派。一東南流。經雍家鎮之北。而東南入江。曰裕溪口。正與蕪湖魯港鎮相對。其東北流者。卽運河。亦曰牛屯河。又東北。經和州東南境之西。梁山北。又東北。入江。卽古橫江。正對東岸太平府西北之采石磯也。水道提綱。

太平府志。大江又東北。經當塗縣西。與和州分界。廬州府志。大江抵裕溪口。入和州界。和州志。大江在州東南。江防考。大江上接無爲州。下接應天府。凡一百一十里。與太平府中流分界。江流自西南繞而東北。故昔稱和州爲江西。巢湖在合肥縣東南六十里。廬江縣北七十里。舒城縣東北一百三十里。巢縣西十里。周回四百餘里。港汊大小三百六十。納諸水以注大江。爲淮南巨浸。一名灤湖。亦曰焦湖。後漢書明帝紀。永平十一年。灤湖出黃金。廬江太守以獻。注灤湖。湖名。在今廬州合肥縣東南。三國吳志孫亮傳。太傅恪率軍過灤湖。陳書宣帝紀。太建十一年中。領軍樊毅領水軍自東關入焦湖。王應麟通鑑地理通釋。巢湖本爲巢縣地。後陷爲湖。今與巢縣廬江縣分湖爲界。廬州府舊志。在巢縣西十里。有東口。在縣西南十里。其水由此入江。肥水源出合肥縣西南紫蓬山。北流二

十里分爲二。其一東流。經合肥縣。又東南入巢湖。其一西北流。二百里。至壽州。入淮。爾雅釋水。歸異出同。曰肥。三國魏志武帝紀。建安十四年。軍至譙。自渦入淮。出肥水。軍合肥。水經注。肥水出九江成德縣良余山。北流分爲二水。施水出焉。又北經荻城東。又北經荻邱東。右會施水。支津首受施水。於合肥縣城東西流。經成德縣。注於肥水。唐書地理志。淮南道。其大川肥。寰宇記。肥水出合肥縣西南八十里。藍家山。東南流入於巢湖。輿地紀勝。古巢湖水。北合於肥河。故魏窺江南。則循渦入淮。自淮入肥。由肥而趨巢湖。吳人撓魏。亦由此。司馬遷謂合肥壽春受南北潮。蓋此水耳。王圻續文獻通考。肥水在廬州府城南七十五里。水出雞鳴山。北流二十里。分爲二。其一東南流。入巢湖。其一西北流入淮水。南畿志。肥水北流。有洗馬灣。黃連門二河。合流而北。入壽州界。大清一統志。界河在舒城縣東北三十里。一名桃城水。源出六安淠河。入於巢湖。江南通志。

經太平府城北之采石磯。皇朝通志。

又東北經太平府城北之采石磯。卽古牛渚。水道提綱。

大江在府西。自銅陵縣界流入。歷繁昌。蕪湖。當塗三縣。東北流入江寧縣界。采石山在府西北二十五里。昔人采五色石於此。因名。一名翠螺山。丹陽疆域志云。西臨大江。爲吳楚險要。晉王渾駐師取吳。隋韓擒虎宵濟破陣。宋曹彬渡江取南唐。明常遇春先登獲捷。皆在此山。南有磯。峭拔險峻。亦曰牛渚。舊傳金牛出。故名。輿地志云。溫嶠平蘇峻亂。至牛渚磯。以下多怪物。然犀照之。奇形異狀畢見。南址有然犀亭。在其上。李白騎鯨亦在此。故謫仙樓。捉月亭皆在焉。江南通志。今按采石磯新

開河在太平府西北二十五里。牛渚磯東。宋慶歷中。以采石磯當江流之衝。水勢洶激。每妨舟楫。乃開新河於磯東。以達大江。上下風檣安穩而渡。

經江寧縣西南江浦縣東皇朝通志

又東北經江寧驛西。又北流經烏江鎮東。板橋鎮西。東岸有秦淮支津口。又北有支津口二。江寧縣西南境。其西岸卽江浦縣東境也。水道提綱。

太平府志。大江在府西。又西則曰西江。又名夾江。接銅陵縣界。下至和尚港。接江寧界。和州志。大江自無爲州流入江寧府江浦縣界。大清一統志

經江寧府城西北折東北流有秦淮水自句容縣合丹徒溧水縣水經上元縣東南至府城分二派先後來會皇朝通志

又北至江寧府城西北境。折東北流。經北岸浦口南。南岸有秦淮口。秦淮水源出句容縣北華山。東南流。折而南。八十里。經縣城東。而南。又西南五十里。有運河。東北自鎮江府丹徒縣南境。西南流來會。又西南六十里。至柘塘鎮西北。有水東南自溧水縣西北山來會。折西北流。至秣陵鎮東。有湯水。北自湯泉東南。曲曲流經句容西北境。折而西。經湖熟鎮北。又西南七十餘里來注之。又西北流。經上元縣東南境之方山西。又西北百里。至府城東南。分爲二派。一派西流。又分爲三。一南流。四十里。至板橋鎮之西北。入江。正對和州東北境之烏江鎮也。一正西流。入江。一西北流。入江。正當府城西。南。其西岸。隔江卽江浦縣城東境也。一派北流。入府南城。又西北流。出城西門。與支津自南來會。又

北經西城外。而過龍江關入江。隔江北岸稍西。卽江浦縣北境。渡江孔道之浦子口也。水道提綱。太平府志。大江又東北。經當塗縣西。與和州分界。又東北流。入江寧府江寧縣界。和州志。江水自和州城北下。經烏江縣東五里。與上元縣分中流爲界。江寧府志。大江自和州界東北流入。經江寧縣西四十里。北岸經江浦縣東南三里。又東北。經上元縣。秦淮源出溧水縣北。西北流。合諸水。經上元縣東南。入通濟水門。橫貫府城中。西出江寧縣三山水門。又西北。沿石頭城西。又西北。入大江。晉書。王導渡淮。使郭璞筮之。卦成。璞曰。吉。淮水竭。王氏滅。晉陽秋。秦時所鑿。故曰秦淮。南史。梁天監九年。新作緣淮塘。又陳禎明二年。淮渚暴溢。漂沒舟乘。元和志。淮水源出華山。在丹陽湖熟兩縣界。西北流。經秣陵。建康二縣之間。入江。寰宇記。淮水源從溧水縣西北流百五十里。縈紆京邑之內。至石頭入江。縣互三百里。宋史。乾道五年。守臣張孝祥言。秦淮水有三源。一自華山。由句容。一自廬山。由溧水。一自茅山。由赤山湖。至府城東南。合而爲一流。經上水閘。入府城。別爲兩派。正河自鎮淮新橋。直注大江。又府東門。有順聖河。分秦淮之水。自南門外直入於城。故秦淮無泛濫之患。今一半淤塞。爲田。請疏導之。建康志。本名龍藏浦。有二源。一自華山。經句容西南流。一自東廬山。經溧水西北流。入江寧界。至方山埭。合流注江。或曰。方山西瀆。直屬土山三十里。是秦所開。江寧府志。自吳至六朝。都城皆南去秦淮五里。史所稱柵塘是也。梁時作塘。又作兩重柵。自石頭至方山運瀆。總二十四渡。皆浮航往來。亦曰二十四航。楊吳時。改築金陵城。乃貫秦淮於城中。大清一統志。

經句容縣北。六合縣東南。有滁河。自含山縣經全椒。江浦六合來會。皇朝通志。

又東北經鍾山攝山北中有長洲。至南岸句容北境。龍潭驛北。北岸爲瓜步山。六合縣東南水口。有滁河西自含山全椒來。東南流注之。滁河出含山縣西北黃山。東南流。經縣北境。山中九十里。曰後河。折而東北。至全椒縣東南境。有一水。北自花山合三溪來會。又東北。經東葛驛南。江浦縣北境。又東北。至山麓。曰天河。又東北。至六合縣西南。有一水。自北來會。經縣城南而東。折東南流。至瓜步口入江。江有洲。水道提綱。

鍾山在江寧府東北十五里。朝陽門外。卽古金陵山也。山時有紫氣。故又名紫金山。漢秣陵尉蔣子文。吳爲立廟。此山因改爲蔣山。又曰聖遊山。又曰北山。山半有井。曰應潮。或云其水與江潮爲盈縮。朱子云。天下山皆發源於岷山。蔣山實其脈之盡者。攝山在江寧府東北四十五里。多藥草。可以攝生。因名。輿地志云。攝山形方。四面重嶺似繖。亦名繖山。西北有水。注江乘浦。入攝湖。卽秦始皇所從渡江者。江南通志。

東流經儀徵縣西南。運河分流。自江都來會。皇朝通志。

大江又東流。過南岸河口。鎮炭渚驛北。北岸有北新洲。卽儀徵縣城西南之汶河口。運河東北。自江都南境。分流來注之。水道提綱。

運河卽古邗溝水。舊曰官河。北自淮安府山陽縣界南流入。經寶應縣高郵州西。又南經揚州府城東。至揚子橋三汊口。分爲二支。一支西南流。經儀徵縣東。又分爲二。一南流。至舊江口入江。一西南流。至下江口入江。爲上江運糧入河之口。一支南流。卽伊婁河。至瓜洲鎮西南入江。爲江南運糧入

河之口。左傳哀公九年。吳城邗溝。通江淮。注。吳於邗江築城穿溝。東通射陽西北。至末口入淮。今廣陵邗江也。漢書地理志。江都有渠水。首受江北。至射陽入湖。水經有中瀆水。酈注。謂之韓江。亦曰邗溟溝。自江東北。通射陽。隋書。開皇七年。開山陽瀆。以通漕。通鑑。大業元年。開邗溝。自山陽至揚子入江。渠廣四十餘步。渠旁皆築御道。樹以柳。大清一統志。今按餘詳見運河。

經鎮江府丹徒縣西。爲京口。運河自此南達於杭。皇朝通志。

稍東有福德洲。又東過南岸高資鎮北。又東。經鎮江府治丹徒縣西境之北固山。銀山。東爲京口。運河自此南達於杭。水道提綱。

江寧府志。大江又東北。經上元縣北四十里。北岸經六合縣東南二十五里。又東。經句容縣北七十里。與揚州府儀徵縣分界。又東。入鎮江府丹徒縣界。亦曰揚子江。又稱宣化江。揚州府志。大江自江寧府東。六合縣東。流入儀徵縣南。其對岸爲句容縣。又東。經江都縣南四十里。瓜洲鎮渡口。對岸爲鎮江府丹徒縣。鎮江府志。大江自句容縣界東。流入經府城西北。與揚州府江都縣分界。大清一統志。

北固山。在鎮江府北。下臨長江。回嶺陡絕。其勢險固。故名。又名北顧山。因梁武帝改京口。城樓曰北顧樓。得稱。銀山。在鎮江府西江口。舊名土山。唐劉禹錫詩。土山京口峻。是也。元時以與金山對峙。易今名。今亦名雲臺山。山側爲鎮屏山。下有潮音洞。江南通志。

江中有金山。北岸經江都縣南。爲運河口。卽淮揚邗溝入江處。皇朝通志。今按運河邗溝。俱詳見上文。

江中有金山。在府城西北。銀山之北。北岸爲運河口。卽淮揚邳溝入江處。在江都縣南。水道提綱。今按運河邳溝。俱詳見上文。

金山在鎮江府西七里大江中。初名浮玉山。風濤環遶。勢若飛動。巖洞泉石。皆名勝也。九域志云。唐裴頭陀於此開山得金。因賜金名。然梁天監四年。僧祐高寶誌於金山修水陸會。則金山之名當在唐前。又名伏牛山。宋真宗夢遊其山。又改名龍遊山。復旋故名。有金鰲妙高等峯。浮圖冠上有泉名中冷。陸羽以爲天下第一山。東有日照巖。一曰朝陽洞。東麓有善才石。一曰鶴峯。西有石排山。隱出水面。若簾篔簹。江南通志。

又東有焦山。皇朝通志。

稍東卽瓜洲鎮港口南岸。自京口東。經府城北之蒜山。京峴。圖山。江中有焦山。水道提綱。

蒜山在府西五里。元和志云。臨江絕壁。山多澤蒜。因名。或曰算山。謂周瑜與諸葛亮議拒曹操之所。東晉孫恩浮海至丹徒。劉裕大破其衆於此。山本寬廣。宋元間淪入於江。今西津渡口水中孤峯獨峙者也。京峴山在府東五里。京口京鎮皆因名。一名丹徒峴。或稱荊峴。圖山在府東北六十里。濱大江。江流自東而西。而北轉屈之間。層峯峭壁。俯瞰湍波。京口之咽喉也。山有上下二箭洞。下有東霞寺。焦山在府東北九里大江中。舊傳以東漢焦光隱此得名。寰宇記。通典亦謂之譙山。亦曰浮玉山。與金山對峙。相去十五里。上有焦山嶺。三詔洞。以焦光三詔不起也。江南通志。今按大江經焦山南而東。十餘里有丹徒港。卽通志所稱丹徒港。在鎮江府東南十五里。南抵漕河。有壩。北入。

於江者。今建閘設官。以司啓閉。

又東。經泰州南丹陽縣北。有九曲河口。皇朝通志。

又東。爲府東水口。江中洲嶼稍多。自此又折東北流。北岸有芒稻河口。秦塘港口。南岸爲大港鎮東之安港鎮口。計自江西湖口東北流。至此而極。徑一千二百餘里。北岸自江都東南至泰州界也。江始折東南流。北岸有白塔河口。又東南。爲泰州西南之河口。又南爲州南境口岸。司南。司在江之東岸。其西岸。卽安港鎮水之復入江口也。又東南。經西南岸丹陽縣東北之包涇鎮。有九曲河口。江心有二洲。自此江濶四十餘里矣。水道提綱。今按芒稻河。秦塘河。白塔河。九曲河。俱詳見運河。

揚州府志。大江又東。經江都縣南。瓜洲鎮渡口。對岸爲鎮江府丹徒縣。又東。入通州泰興縣界。鎮江府志。大江東流。入經府城西北。與揚州府江都縣分界。又東。經丹陽縣。元和郡縣志。晉祖逖擊楫自誓之所。舊閘四十五里。大清一統志。

經常州府武進縣北。有連江橋河。新園河口。北岸爲泰興縣南。皇朝通志。

稍東。爲孟河口。又東。爲常州府治武進縣北境之連江橋河。及新園河口。北岸。卽泰興縣城南河口也。河口南岸。卽新園河東之圩塘鎮。水道提綱。今按孟河口。連江橋河。新園河口。城南河口。俱

詳見運河。

大江又東。經丹陽縣東北六十里。又東。入常州府武進縣界。卽揚子江也。大清一統志。
又東北。經靖江縣南。江陰縣北。有黃田港口。皇朝通志。

又東稍北流。復折東南。經靖江縣城南。南岸卽江陰縣城西北之君山。靖江縣西南濱江。江中有二大沙洲。卽馬馱沙。有黃田港口。在君山西。水道提綱。今按黃田港。詳見運河。

大江自鎮江府丹陽縣流入。經武進縣北。又東至江陰縣北。又東入蘇州府常熟縣界。禹貢。漾水東爲北江。入海。漢書地理志。毘陵縣江。在東北入海。寰宇記。江陰縣北至江二里。至江心。泰州海陵縣界四十里。通志。大江在府北五十里。江陰縣北一里。而靖江之東南也。西自丹陽入界。經府治北。東抵江陰東北。與通州泰州相對。行郡境一百八十餘里。靖江縣志。大江舊自郡北迤東。至今縣西。分爲二派。繞縣南北。以入海。縣居江海之交。中流屹立。明天啓以來。潮沙壅積。北大江竟爲平陸。大清一統志。

君山。在江陰縣北二里。君謂春申也。亦名瞰江山。突起平野。橫枕江流。四望無際。延攬可爲雄勝。有浮遠堂。取東坡江遠欲浮天之句以名。江南通志。

又東北。經如臯縣南。通州西。又東北。經常熟縣西。皇朝通志。

又東稍北。過山麓。北岸爲如臯縣南境。河口。又東北。至通州西境之廟港。江流極闊。東西相望。六十里。稍折而南。經州西南馬鞍山。黃泥山西麓。山南岸爲江陰。東境橫河口。又東南。爲楊舍鎮南之谷瀆港口。又東。爲常熟縣西北境之奚浦港口。水道提綱。今案南境河口。廟港。橫河口。谷瀆港。奚浦港。俱詳見運河。

常州府志。大江又東。至江陰縣北。又東。入蘇州府常熟縣界。蘇州府志。琴川至揚子大江。在縣東。迤

而北與通州對岸。九域志。常熟縣有大江。亦名揚子江。大清一統志。

大江在通州南二十里。西自江都入泰興縣界。過如臯北。於州治東。至料角嘴入海。南與太倉州海口相望。馬鞍山在通州塔山西。一統志。謂以形似名。舊志云。隋煬帝征高麗。牧馬於此。塔山。俗名黃泥山。在狼山西。舊傳有女子得道於此。下有仙女洞。其西下有石刻通濟閘三字。蓋元時海運故道也。江南通志。

又東爲福山港。皇朝通志。

又東爲福山港口。福山城。山在口西北。臨大江。與北岸通州南境鹽河口之狼山遙對。爲大江門戶。狼山之東有龜山。在水口。與南岸劍山相望。又東江流益濶。經永安鎮南。南岸爲土堡河口。又東南爲徐六涇口。南北濶八十里。福山港在常熟縣北四十里。自城北水門流三十里。經斜橋。又二十里。經福山下。入於江。水道提綱。

福山港在常熟縣北。宋郊竄曰。常熟有福山東橫塘。福山西橫塘。古人東取海潮。北取揚子江水灌田。姑蘇志。福山塘自縣城北行四十里。入揚子江。大清一統志。

福山在常熟縣西北四十里。俯臨大江。與通州之狼山相望。境特雄。本名覆釜。唐改爲金鳳。五代吳越改今名。狼山在通州南。圖經云。與劍軍等五山相屬。又名狼五山。相傳有白狼居此。或云山形似狼也。形勝甲淮南。蓋一方之鎮也。又有神人鞭石處。世傳秦皇時事也。劍迹山在狼山東。一名刀及山。世謂秦始皇淬劍於此。有磨劍石。今墜於江。江南通志。今按如臯縣東一百三十里。有獺

港西通運鹽河東抵海其地爲廣陵東南門戶掘港通運鹽河運鹽河又通運河以受納江水

又南經昭文縣東北有白茅浦口皇朝通志

又南爲昭文縣東北境之白茅浦自浦而南爲太倉州北之七鴉浦東踰海港卽崇明縣懸居海中

爲大江口南之護沙自白塔口東南至蓼角嘴白茅鎮七百里水道提綱

白茅港在常熟縣東七十里本丹陽練湖常郡瀉湖諸水爲震澤不能容者溢而東南從無錫蠡蠓諸湖入常熟之華蕩繞縣城南而東北流至鮎魚口又東二十五里經支塘市又東稍北二十六里達白茅口入於江水道提綱

大江自常州府江陰縣流入昭文縣界東則白茅浦白茅浦在昭文縣東宋大理丞周環議以太湖東北由諸浦入江其沿江洩水惟白茅浦最大元明時屢經濬治常熟縣志康熙二十年巡撫慕天顏濬白茅浦自支塘迤東以至海口淤道四十三里大清一統志

北岸經餘西餘東呂四諸場之南又北至蓼角嘴與海中之崇明縣相對入於海皇朝通志

北岸自永安鎮東北經餘西餘東呂四諸場之南又北至蓼角嘴與西南昭文白茅浦相望正南與崇明縣西北平安鎮舊城相望是爲大江入海之口蓼角嘴之東爲大海洋西南徑白茅浦百四十里正南徑崇明舊縣百二十里水道提綱今按餘西餘東呂四諸場南接江東濱海

固爲淮南魚鹽之藪而其境據江國之末流控海天上澳一洲踞踞亦江海關鍵處也

大江在太倉州境東北入海崇明縣懸居海中北接通州界大清一統志

大江在昭文縣北。西接江陰之涸瀆浦。東至太倉界之撐脚浦。福山縣居其中。北對通州狼山。最爲險要。江南通志。

大江自常州府江陰縣。流入昭文縣境。又東流入海。崇明縣唐爲海中沙洲。五代時楊吳爲崇明鎮。屬通州海門縣。宋嘉定十五年。置大賜鹽場。元至元十四年。置爲太倉州。以縣屬焉。州境皆東濱海。去州城東北七十五里。崇明懸居海中。乾隆府廳州縣圖志。

續行水金鑑卷第一百五十二

江水章廣一

聖祖仁皇帝康熙五十五年奉旨趙世顯奏稱花園港地方及息浪庵前石工馬頭俱被江水衝坍屯艘之處窄狹風浪可虞題請挑挖月河等因乃伊慮及河工之意朕以普天之下生民爲念無處不豫爲籌畫儻江水日漸北流衝刷不已則瓜洲城垣必致危險其荊州杭城等處俱有護城隄岸瓜洲地方修建護城隄工作何保護不致危險庶瓜洲一帶地方始得完固又奉旨據趙世顯奏稱江溜北徙花園港地方被衝坍塌一百二丈瓜洲息浪庵前石馬頭亦被汕刷坍塌等語儻江流日漸北徙衝刷瓜洲城垣必致危險事關民生若不豫爲籌畫修隄保護斷乎不可著江南督撫總河總漕速行親往詳加察勘作何修隄保護城垣勿致危險之處作速詳議一面動帑一面奏聞江南通志

雍正四年七月奉上諭湖廣總督李成龍湖北巡撫鄭任鑰荊州長江兩岸隄防關係民生最爲緊要蓋因川湘二江之水匯歸於江易於泛濫聞今年雨水連綿水勢甚猛陸地成渠爲江水所拒不能減退以致低窪之地禾苗淹沒又聞往年黃灘等處隄岸兩次衝決江陵潛江等州縣田苗被淹甚爲民害長江兩岸州縣雖每年各自興修然地方遼遠少有疎忽則民生重受其累爾等可公同商酌委員踏勘應否作何修築防護之處悉心妥議具奏憲皇帝聖訓

雍正五年二月署湖廣總督福敏奏請動用耗羨銀兩修築荊州府江陵監利松滋等縣沿江隄岸奉上

諭耗羨銀兩亦係小民脂膏。凡地方應修工程。於民生實有裨益者。卽當動用帑金辦理。不必取給於耗羨。但此處既係民隄。若修理之後。卽算欽工。則凡遇隨時補葺之處。小民不敢干涉。轉致疎忽。且恐頑劣之民。恃有朝廷歲修之例。不肯用心防護。以致潰決。害及田廬。而民受其累。此等處皆當豫爲籌及。荊州沿江隄岸。著動用帑金。遴委賢員。監督修理。修成之後。仍算民隄。令百姓加意防護。隨時補葺。俾得永受其益。河渠志稿。

七月十三日。湖南巡撫王國棟奏。奉上諭。興修隄岸一事。臣謹案湖南長沙、岳州、常德三郡。逼近洞庭湖邊。計有隄之處。如湘陰、巴陵、華容、安鄉、澧州、武陵、龍陽、沅江、益陽、九州縣。環遶大湖。隄塍甚多。緣洞庭一湖。春夏水發。則洪波無際。秋冬水涸。則萬頃平原。濱湖居民。遂築隄堵水而耕之。但地勢卑下。水患時有。惟恃隄塍以爲固。蓋同一隄塍。而形勢與湖北迥異者。湖北之隄。禦江救田。湖南之隄。阻水爲田。湖北之隄。或東西長數百里。南北長數百里。湖南之隄。大者周圍百餘里。小者二三里。方圓不一。星羅棋布。名雖爲隄。其實皆垸。而洞庭一湖。三面受水。凡沅湘滇黔川粵之水。千條萬派。皆匯其間。而所賴以洩瀉者。惟江。偶值水大之年。諸水併歸。江水又漲。不惟不洩。反灌入湖。隄塍不能堅固。致衝決漫溢。田禾淹沒。民難安堵。向係民間歲修。工費或多。官修助之。查康熙五十七年。官修隄費。湖北四萬有奇。湖南二萬五千有奇。此則三郡隄塍之大略也。我皇上念切民生。知濱湖之處。地勢低窪。隄防不固。設法興修。務圖一勞永逸。爲小民謀其萬全。浩蕩皇恩。實亙古以來所未有也。上年冬。檄司轉飭長岳常三府。將所屬州縣隄塍。親查確估。議詳。并委岳常道督同確勘。今據司道府詳。各州縣回稱。去年稍被水災。蒙皇恩動帑賑卹。又

免地丁錢糧。各隄居民感戴皇仁。一切隄腴俱各踴躍爭先。願自出力。加高培厚等語。詳覆。但查各屬估勘册內。現有潰口四百三十餘處。估計工銀七千四百九十餘兩。工程緊要。費用頗多。若不急爲籌算。深恐民力不齊。春水一發。致有貽誤。已飭令水利各官搶修潰口。剋限趕築。此外險工次第興修。更嚴禁包折等弊。實夫實工。務期增加高厚。工程堅固。以副皇上視民如傷。已饑已溺之至意。所動工費銀兩。現在會同督臣邁柱具題。臣謹繪湖南長岳常三府屬隄腴圖。並撮其大意。爲隄腴圖說。恭呈御覽。硃批。上諭。今按大江東南流。至湖南岳州府。與洞庭湖會。湖亦江流所潴納。其濱湖各郡邑。隄垸之功。雖與楚北之專於捍江者異。而江挾湖流。湖乘江勢。其浸淫一也。故錄之。

是年奉。上諭。荆江沿州隄岸。著動用帑金。遴委賢員。監督修理。修成後。仍爲民隄。令百姓加意防護。隨時補葺。俾得永受其益。大清會典。

是年。四川撫題修都江堰。酌派夫價事宜。按是時議興水利。蜀中水利之大。無如都江堰。眉州之蟆頤。彭山之通濟。及嘉定夾江之楠木龍興等堰。利賴皆不及都江之廣。堰鑿於秦時。導江支流。分引郫灌。溫江及崇寧新繁新都金堂成都華陽等縣。灌漑民田。後漸堙廢。民人止就隅曲之水。分潤濟涸。至是議修。疏稱。蜀省水利。川東南南川北。皆崇山峻嶺。並無應修應築之塘堰。惟成都地當平川。舊有都江大堰。灌十餘縣之田。李冰鑿離堆。導江流。書深淘灘。低作堰。六字於石壁。爲千古治堰要訣。後人因之。創爲竹籠作隄之法。編竹籠納石於內。築人字堰。以資捍禦。歲事洶築。人字隄堰下。又有太平堰。三泊洞。柏橋堰。上下漏確堰。羊子堰。徐堰河。導江堰。牛子堰等處。分流而郫灌。溫江及崇寧新繁新都金堂成都華陽等縣。

俱引水灌田。由來久矣。其歲修之費。先照用水之戶。按田派夫。灌溫等出夫折價無定則。歲以爲常。糜費不支。本年人字隄衝決壅塞。費用更廣。今擬計畝均攤。如灌郫崇三邑。得水最近。獲利最溥。溫江新繁新都金堂成都華陽去都江大堰百有餘里。用水之處。不能無多寡遲速之殊。出費應量爲區別。以出費每自二釐至一釐五毫一釐爲差等。令各縣按數徵收。徑解水利同知。收用報銷。並備漲水衝塌之費。仍將派費刊榜曉示。責令該同知深淘堅築。使渠水足資灌溉。於國計民生大有裨益。部覆如議。勻輸齊力。工易舉矣。堰志云。禹導江正源。至石組。出汝川而南。其北無水。秦李冰鑿離堆。引江水循灌城折而北。於是始以東流正流爲南江。經離堆北注者爲北江。北江又分爲內外江。並南江爲三外江。北經崇彭新漢會縣。雒諸水出金堂峽內江。經郫崇過府城北趨彭山。南江經崇新東流至彭。與府江合。三江各分水口。以此貫注。視水則爲準。旱潦有備。故記曰。水旱從人。不知饑饉。沃野千里。世號陸海。謂之天府。以時修治。又立法以均其役。則事不擾而利普。久安常治之道也。河渠紀聞。今按岷江出松潘。南流經茂州。合黑水河。至成都府。屬爲數道。分流郫灌等邑。總名曰都江。實岷江上源之支流也。功度之事。所當附載。惟考大清會典事例云。雍正九年。修築四川灌縣都江。而河渠紀聞編入雍正五年。當是五年題修。九年工部始覆准耳。

雍正六年上諭。據湖廣總督邁柱奏稱湖廣各屬隄腴。歷係業戶按糧派出夫土。逐年歲修。今各業戶感戴皇恩。軫念民生。至計莫不踴躍歡呼。自出夫土。照上年水痕加高修築。其支河淤淺之處。業戶亦照歲修之例。自行挑濬。朕念修築江隄。疏濬河道。該地方既有歲修之定例。今百姓踴躍從事。加高修濬。甚屬

可嘉。用沛特恩，助其力作。查康熙五十五年，湖北、湖南地方，興修隄垸河道工程，蒙聖祖仁皇帝特沛賞助米糧人工之費，共計銀六萬兩。今朕遵照此例，將帑銀賞賜六萬兩，令邁柱於湖北、湖南二省酌量工程多寡，分散派給，並飭地方有司實心料理，使小民均沾實惠，工程永遠堅固，以副朕愛養楚民之至意。謹按三江考，楚江連接八省，秦關、巴蜀、中原、貴竹、嶺右諸水俱注之，導爲三江。瀦爲七澤，卽禹貢江、漢、九江。沱潛雲夢之故區也。江發岷山，抵巴東，入荆襄，流至岳陽，與洞庭水合，受害惟荊州一郡爲甚。漢發蟠冢，抵上京，入鄖地，流至漢陽，與大江水合，受決惟鄖陽、襄陽、安陸、漢陽四郡，而襄陽、安陸爲尤甚。九江是沅、漸、无、辰、敘、西、澧、資、湘諸水合流，入洞庭湖，沿匯八百里，經岳陽樓西南，出於湖口，與江流合，其受決害者常武、岳陽二郡也。三江總匯於武昌，江身至此始闊，直注而東，故武昌斬黃之境無大害。隄防多在襄陽、常武、荆岳間，蓋古七澤正其地也。漢唐以來，代苦水患，至宋爲荆南留屯之計，多將湖渚開墾田畝，復沿江築隄以禦水，故七澤受水之地漸湮。三江流水之道，淺狹而溢，其所築之隄防亦漸潰塌，故有以開穴口爲上策者。然穴口所以分大江之流，必下流有所注之壑，中流有所經之道，然後上流可以分江瀾而殺其勢。楚有三大江，惟川江獨據中流，故穴口在南者以澧江爲所經道，以洞庭爲所注壑；在北者以潛沔爲所經道，以漢口爲所瀉地，故川江獨有穴口。然古有九穴十三口，江水分流於穴口，穴口注流於湖渚，湖渚洩流於枝河，枝河瀉入於江海。此古穴所以並開者，勢也。今耕牧漸繁，湖渚漸平，枝河漸湮，穴口故道皆爲塵舍畎畝，他如章卜等穴故道無復舊蹟矣。此今穴所以多塞者，亦勢也。虎渡、郝穴二穴獨存者，衆水會合，則流行不絕，注瀉有壑，則水道不壅，若穴口之枝流多湮，則江水之正流易泛，其何能免。

於浸決之患。又以襄陽安陸之防水。惟修築隄防爲上策。而勢有遷徙。非人力所能爲。若竹筒一河。上接漢水下通漢口。如咽喉不可塞。治楚南水患。必以濬此河爲先。竹筒水道。惟中淤十五里。其淤平絕流者。祇七里許。今已開濬通流。然遇漲則沙迴淤停。隨淤隨浚。始無大梗。此楚江之大勢。顧亭林之論曰。余蒿目楚疆。爲之諮詢。迺知時異事異。其迹不能盡沿。要在觀變度宜。善體其法用之。堯時中國之水皆陸浮。禹治而納之地中。其法有五。堅則鑿之。盛則灑之。淺則淪之。大則決之。急則排之。而其要則有二。曰經曰緯。夫漢之南入江之北。匯皆禹貢所列。爲楚大經者。然漢則東爲滄浪。過三澨。乃至大別。江則東別爲沱。至於澧。過九江。至東陵。乃迤北而匯焉。隨地注瀉。使游波寬緩。不相激薄。何其緯之有緒也。經緯旣備。水爲安流。故總謂之導。言順其道行之爾。平成旣久。民多濱水而居。或填築而業之。故潛沔之間。所進滄浪。句雍諸澨。皆不容刀。甚或至不可辨。而澧水與江相去凡百餘里。禹時之九江。猶受岷江之輸。今九江自相經緯。瀦爲洞庭。且與江漢敵大矣。故禹所患者。經不足以持緯。其治法後緯而先經。今所患者。緯不足以受經。其治法後經而先緯。周禮。稻人職。掌稼。下地以瀦蓄水。以防止水。以溝蕩水。以遂均水。以列舍水。以滄瀉水。雖主治澤田。而最得治水緯法。阡陌旣變。故道湮沒。智巧之士。始隄而障之。夫障雖起於後世。然周之防。禹之排。實肇端焉。顧專事隄岸。以捍衝流。則必有利而不利。惟審視度宜。堅爲之隄。以禦水之經者。而又分注湖槽。使有所游蕩。股引取之。則經緯得理。水不爲害。賈讓以繕隄爲下策。非通論矣。至徙民當水衝者。歲取治河費。以業徙民。今議者猶引爲上策。楚民多澤居。稅賦半出其中。國家經費有常。豈能捐費徙民。民徙而水不止。棄之安窮。闡於用矣。若取就河隄。多穿漕渠。張水門。殺水怒之策。江漢舊時。

穴口數十道。民環居隄上。水有洩。歲不爲患。頃以豪右規利。漸塞諸穴口。故水患游至。惟沿漢江相其故道。擇其急要者。爲開濬小河。陳洪謝家泗港諸河。以洩漢流。開濬虎渡郝穴來穴新衝諸口。以散江漲。使民得隄爲衝。不患昏墊矣。此通論楚南之大勢。而以賈讓中策。疎其去路爲急務。溯源探本之論也。然功大不易舉。民力不能自治。在上之人。有以整率而鼓舞之。聖明在上。洞燭民艱。列聖相承。不惜左藏。巨萬多金。流布田間。大吏仰承德意。實力宣導。分別官垵民垵。已築者依限歲修。專官督理堅築。若濱湖已無餘地。處水將壅而爲患。則疏渠導引。以殺其勢。要使功歸實用。帑不虛糜。雖有異漲暴流。不爲民患矣。河渠紀聞。

是年議准荆江兩岸黃灘等六處險工。每隄百丈。設圩長一名。圩甲二名。圩役五名。督率附近居民看守。遇有蟻穴獾洞。卽爲填補。再於江工險要之處。一例籤釘椿木。編槿條竹笆。以垂永久。又題准楚省江隄。有勒索業戶。包攬夫土者。照河工包折開夫溜夫之例。分別治罪。又議准楚省官民。有於隄外捐栽柳護者。照河工之例。分別議敘。今按官民捐栽官柳。於乾隆年。經兩江督臣尹繼善。南河河臣富勒赫奏請停止。詳見河水章曠。又復准江西九江府同知。給江防銜。並令管理津渡事務。又議准四川成都府同知。分駐灌縣。專司都江堰工。大清會典。

是年發帑修築荊州府大江禦水隄。隄在公安縣東上接江陵。下抵石首。長一百里。縣治平曠。宋端平三年。孟珙築隄以禦水。元大德七年。竹林港隄大潰。自是不時決溢。迨明初。修築沿江一帶隄。西北接江陵。上灌洋。東南接石首。新開隄長一萬二千五百餘丈。其間雷勝文灣。窰頭鋪。艾家堰。竹林寺。二聖寺。江

池湖、狹隄、淵、沙隄、鋪、新淵、隄、郭家淵、施家淵、諸隄。凡十一處。尤爲要害。又築荊州府臨江大隄。隄在石首縣北。一名新開隄。自縣西北公安縣界。至縣東列貨山。共長九千三百丈。大清一統志。

雍正七年。濬臨桂縣陡河。增建石陡二十。以利農商。按是時。大興西南水利。發帑興修陡河。與興安靈渠工役並舉。粵西志。陡河自臨桂辦塘山。流出獅巖。東流至太平陡。經蔣家壩。至相思江口。入灘江。西流至鯁魚陡。達蘇橋。合永福江。至柳州。舊時止建鯁魚一陡。奔流激湍。壘石多圯。仰惟宸衷軫念。西南發帑興修。建閘水之陡二十。鑿去礙船之石。三百八十餘處。開濬河流。如石槽形。水得容蓄。長流不竭。又泝流而上。經懷遠。達古州。爲黔粵通津。農田商楫。均資利益。西江三水。灘居其一。陡河水入灘江。灘水下流通於左右二江。曰三江。粵西水利。惟引用三江之水。灘水自海陽山至漢潭。派分西北。北曰湘西。西曰灘。合大融江。至桂林。合相思江。東匯於平樂。經三郡。行九百八十里。至梧州府。與左右江合。溯流至潯州。而江分城東爲左江。城西爲右江。左江出安南十萬山。經太平府。至合江鎮。與牂牁江合者。交趾江也。出雲南入田州境。下奉議。合南流江。至合江鎮。與交趾江合者。牂牁江也。右江出清水江。經貴州黎平府。合古州江。下懷水。經慶遠。至柳城。合融江者。龍江也。桂林西北諸水。泗慶西南諸水。皆匯於潯州。合流至梧州縣灘江。會出肇慶端峽。合須江。至廣州入海。顧亭林謂粵西山多膚立少草木。食土之毛者。什不得一。三江諸水。勢若建瓴。奔流東傾。故其民類不能收倍稱之息。而少蓋藏。山澗多用石陡蓄水。田高水不能上。築堰架車。屛注。其法量岸高下爲輪。輪中輻出。枸處繫一竹筒。使兩頭活動。可俯仰。置軸半岸。貫輪其上。岸上近輪處。置木槽取水。溪水散緩。則以石約歸輪下。使急水急。則輪轉如飛。每筒得水。則底重口仰。及輪轉。

至上則筒口向下。水瀉木槽。分流田中。不勞自利。桔槔處處有之。或運以手。或運以足。或運以牛。皆引江水以爲利。率建陡設堰。水以漸至。周禮遂人之職。溝洫畛域。獨爲加詳。所重固有在矣。山民運木出山。多層層築堰。乘漲浮江而下。亦職方氏藪澤原隰之利也。河渠紀聞。

是年議准武昌、荊州、襄陽三道。各加兼理水利銜。統轄武昌等府同知、州同、縣丞、主簿等官。如有防護不力。修工怠玩者。該道揭參。該道徇隱不揭。該督撫一併題參。又議准荊門州沙洋大隄。逼臨襄江。歲徵湖糧三千石。湖糧每石輸銀一錢。計銀三百兩。以資江工歲修之用。大清會典事例。

雍正八年十二月二十六日。湖廣總督邁柱。湖南巡撫趙宏恩奏。洞庭縣互八百餘里。自岳州出湖。以君山爲標準。一望杳渺。橫無際涯。而舵桿洲居西湖之中。去湖之四岸。或百餘里。或二百餘里。行舟至此。儻遇風濤。陡作無地停泊。亦無拯救。聽其傾覆。昔人曾經創議。欲於此建築石臺。使商旅船隻。遇風遇夜。可以灣泊。奈此洲有名無體。須從水內立基。工大費鉅。事不果行。今臣因往長沙。自岳渡湖。悉其情形。復又探訪輿論。或謂此工得成。則一歲之中。全活生命。不可數計。垂諸久遠。利濟無窮。臣隨與趙宏恩面爲酌議。舵桿洲石臺工程。實於民生有益。知之既確。敢不上聞。業經委令衡永郴道許登瀛勘估。須磊石爲隄。南北兩面。形同偃月。長九十六丈。寬三十丈。高六丈。仿照江南木櫃之法。下用長二丈之松椿密排。需櫃三十層。外用石條。靠櫃砌護。五層每層高一丈二尺。用米汁油灰合縫。其接縫處。用鐵錠接連成片。以期永久。約計估銀二十萬兩。可以竣事。所需銀兩。或照營田之例。開捐應用。或將鹽商每年報捐銀內動支。俟工竣日。核實請銷。奉上諭。築臺之議。例旨遵行。硃批。上諭。

是年興修安靈渠。疏淤截流。以利農田。通行舟。按渠水發興安縣南九十里之海陽山。湘灘二水皆出於此山下。泉不盈尺。深叵測。秦史祿始築石爲隄。以堵禦湍流。鑿山通水。一注於北。曰湘江。一注於南。曰灘江。有七十二灣。三十六陡。因名曰陡河。溉田萬餘頃。漢馬伏波復葺之。至唐李渤加修。後皆循其故迹。洪武初。遣官修葺。爲陡渠者三十六。至其末年。復圯。命嚴正直燒鑿陡澗之石。以通餉道。旋即崩壞。成化間。增修。更置水函十。以洩潦。靈渠水不復嚙隄。本朝康熙二十二三四年間。巡撫陳元龍先後改葺。經十有餘年。陡座石埂傾圯。將半。加以水勢衝決。不由故道。致舊河淤塞。水無涓滴。數千百畝糧田。時虞枯槁。至是督臣鄂爾泰。撫臣金鉉。奉命履地相度。酌籌興修事宜。鳩工庀材。堵截新河之流。疏濬舊河之淤。堰壩悉皆修固。蓄瀉水源。商農兩益。宋李師中重修靈渠記云。廣西湖南一嶺中。截舊時咸阻於嶺。弗相聯接。至秦史祿導海陽山水。逆爲石磯。以激水分嶺而下。會湘桂二水。合爲一石。互數十里不絕。迄今千有餘年。假民力爲隄。爲陡門。以役水於石者。屢易其制矣。後寢堙廢。集夫興作。燎石以攻。旣導旣闢。以通南北之流。繼前事也。方輿紀要云。水經注。湘水自零陵西南。謂之靈渠是也。唐時安南爲南詔所陷。嶺南用兵。諸餽運皆泝湘江入靈渠。范成大云。秦始戍嶺時。鑿此以通運。水發源陽山。在此下融江。融江爲牂牁江下流。水南下。興安地勢最高。二水遠不相謀。祿始作渠。派湘之流而注之融。使北水南合。南舟逾嶺。其作渠注於湘流砂碛中。壘石爲鑷嘴。銳其前。逆分湘流。而激之達渠中。以入融江。與俱南。渠繞興安界。深不數咫。廣丈餘。六十里間。置斗門三十六。土人但謂之斗。舟入一斗。則閉一斗。俟水積漸進。故能循崖而上。建瓴而下。千斛之舟。亦可往來。治水巧妙。無如靈渠者。河渠紀聞。

是年開挑瓜洲正人洲引河。建築夾江大壩。按江工與黃河工程不同。黃河頂衝掃灣淘刷。壩根深不過三四丈。用寬長大壩。重土追壓。至蟄入爛泥。卽止不動。江水清深力大。沙岸高闊。壩不易到底。清水汕刷更猛於濁流。不能以長樁大壩。敵千尋之巨浪。瓜洲大江。正人洲回溜沙淤。尾定業等洲。挑激大溜。直射瓜洲花園港一帶。壩工隨下。隨蟄。江岸日漸坍塌。逼近城垣。議於正人洲下截頂衝迎溜。舊有河形處。挑挖引河。引水南行。河尾接開生河。使上源之水匯流。直注夾江。減其北趨之勢。又於夾江尾閘。搶築土壩百餘丈。兩面下壩。簽釘大壩於夾壩中間。填土以遏其衝。壩上壓土。兩頭接築土壩。以防漫灘之水。又於定業洲迤下。挑濬支河。俾引河大溜順從支河宣洩。直抵南岸。仍於上游對岸。高資港河頭。江心套港口。長出礮嘴挑溜之處。督率河兵。開夫。駕犁船。用鐵篋子。混江龍等具。犁爬深通。保護瓜城。是蓋用以水治水之法。築壩束水。攻沙開河。引溜不得。用犁船鐵篋。以梳爬之。人力所能至。不過如是。惟恐長水平漫。中流難以立壩。開渠引水。稀淤流沙。旋浚旋長。卽用鐵篋爬梳迴溜壅沙。卒不能見功。古人有用碎石之法。就崖拋護。以壩護崖。未做壩工以前。先用碎石填平其底。既做壩工以後。復下碎石。護其根基。碎石不與水爭。隨泥墮入。久而自定。爲以柔制剛之法。然必持之以久。爲之以漸。積日累功。水石沙泥合而爲一。則水不能衝溜。自開行。若疎於修防。舊工不守。待其刷進而後急治。工程浩大。人力難施。亦猶河工之守壩不力。壩去灣生。溜大壅進。變成入袖之勢。而推之不去也。河渠紀聞。

是年議修成都大江大堰。均攤修費。分別輸納事宜。按都江大堰。灌成都九屬田地。各屬用水。多寡不一。輸費亦應有差等。非定明章程。不能行之久遠。至是。川撫奏稱。規條數目。以爲定則。疏稱。都江大堰。自

秦時蜀守李冰鑿離堆以導江之支流。築人字隄以資捍禦。每歲淘築。遂爲成例。人字隄之下。又有太平堰、三泊洞、柏橋堰。上下漏灌。羊子堰、徐堰河、導江堰、牛子堰等處分流。而郫、灌、溫江及崇寧、新繁、新都、金堂、成都、華陽等九縣俱引水灌田。由來久矣。其歲修之費。向按用水之戶。照田派夫。灌溫等縣。出夫多寡不一。通出夫八百八十三名。每夫一名。折銀一兩。照夫計算。雍正元年以來。每年修費。或五六百兩。或七八百兩不等。五年。因人字隄衝決壅塞。五六兩年。用至一千二百餘兩。計每年須派銀一千二百兩。方可有備無患。但從前照田派夫。因川省地田。不論畝數。計塊派夫。不知大小懸殊之別。今丈量已竣。畝數可稽。應請計畝均攤。以免畸重畸輕。查九邑田畝。惟灌郫崇三處。得水較近。獲利最溥。其溫江、新繁、新都、金堂、成都、華陽、離都江大堰。有百餘里者。其用水之處。不無遲早多寡之殊。出費亦宜略爲區別。如郫灌崇三處。每畝派銀二釐。溫江、新繁、新都、金堂、成都、華陽。每畝派銀一釐五毫。又華陽縣內。有用水略少之田。每畝派銀一釐。庶得均平。今按九邑丈量清冊。實在水田畝。照派定釐數。分別輸納。九縣共田七十六萬五千三百餘畝。通派銀一千二百八十有零。每年令各縣按數徵收。徑解水利同知。每歲估報數目。工完造冊報銷。餘剩銀兩。存貯以備夏秋水發衝塌之費。務令深淘堅築。使各處田畝。俱資灌漑。各縣鄉村。用水田畝。派銀數目。刊刷木榜。通行曉諭。照依江南河工歲夫折銀之例。官徵官解。不經甲里之手。以杜支少派多之弊。如是則力均而事舉矣。河渠紀聞。

是年發帑修湘陰縣隄境。按隄防考。湘陰居洞庭之濱。地勢最卑。東北一帶。水爲巨浸。縣治之西曰淮。西水勢更大。其地生齒日繁。土田日廣。防遏不可不豫。縣南至西十七隄圍。日久殘缺。民力不能任。發帑

修築統計大圍十有六。受西南迤北之水衝蕩。歲不能免。湘水蒸水。匯流自西入長沙。繞東而下。至湘陰。是南水也。南水自外泛入沙田。一圍之東。實當首險。從此擁入楊柳軍民等隄之近東南者。三面被激。資水沅水。出與湘水合。達於洞庭。是西水也。西水自內出。兼西南夾湧。洪波紆回。灌激沙田。一圍之西。出水當衝。次及楊柳軍民荆塘各圍之近西北者。古塘塞梓。並受沅水之衝。至北。則余垵莊圍黃公魯家買馬葡萄等垵。濱湖地益曠。土益鬆。水自西內出。自南外入者。悉於是匯。遇漲所在。瀾漫衝潰隄。各垵出水積水之區。有港有塘。有閘。港則設之。涵中塘則立有引溝。閘則時啓閉而蓄洩之。兼資灌溉。修復舊制。農田得施生之益矣。河渠紀聞。今按湘陰濱洞庭。洞庭納江水。其受湖患一受江患也。

雍正九年三月二十一日。湖廣總督邁柱奏。竊惟洞庭爲城內第一大湖。風浪叵測。出其途者。咸有戒心。今蒙皇上特發帑金二十萬兩。於湖中舵桿洲建立石臺。俾往來舟楫。得有避風灣泊之所。保全生命。此乃不朽之功。皆我皇上成之。臣仰承德意。親往相度。又行據委理工程道員許登瀛。逐一估計。現在造冊覆核具題。至石臺之上。臣又添估於東西兩面。各建廟宇一所。召僧住持。又蓋營房二所。撥兵居住守護。并立高竿二枝。日則張旗。夜則懸燈。使行舟遠望。得有指歸。又於南北兩面。擬造店房數十間。使貿易者居之。出賣米薪。以資過往商民食物。合計所費二十一萬餘兩。臣飭管工官督率稽查。尙可節省。以皇上恩發銀二十萬兩。似已敷足。一面分委官員採買木石灰鐵等項。俟秋間水落。擇日興工。并繪建築石臺圖式。恭呈御覽。奉上諭覽奏。并圖已悉。萬壽宮無庸建造。止立一碑亭可也。餘照議行。硃批上諭。今按舵桿洲石臺落成。督臣邁柱等恭錄上諭。並撰文記摹勒上石。建暨御碑亭於石臺上。洋洋聖澤。湖水同

流具載湖廣通志。

雍正九年。上以楚省洞庭湖。縣互八百餘里。橫無涯際。舟行遇風。無地停泊。舵桿洲居湖之中。建築石臺。於商船實有裨益。特命將營田水利捐納項內。平餘銀二十萬兩。解送楚省。交該督撫經理。建石臺於湖內之舵桿洲。東西長九十六丈。闊三十丈。南北各灣進。如偃月形。以便泊舟。自是商船無風濤患。皇朝通志。

五月二十二日。江南河道總督稽曾筠奏。大江北岸。瓜洲花園港一帶。江溜北趨。城垣運道。坍塌卸堪虞。經臣奏請開挑。正人洲引河。分溜南行。以保北岸。仰荷俞旨。臣祇遵辦理。其挑挖引河。創建夾江壩工。疏築情形。俱經節次奏明。今各工俱已完竣。長江水勢。正當盛漲。臣飭委淮揚道。率同承挑各員。乘勢開放。茲據報於五月十八日。開放見水。若排山大溜。直趨引河。奔騰之勢。直達河尾。及開攔潮尾壩。雖外面水高數尺。而上源來水湍急。抵禦出江。衝刷更爲有力。兩岸民人聚觀。洲上民船商舫。順流揚帆。俱由新關引河南下。一時衆口歡呼。咸各頂戴皇仁。又據廳營汛弁。稟報僉同。臣隨檄道廳江工。引河初放。嚴飭防範。善後。其夾江貼心大壩。并兩頭接築土堰。專爲攔遏引河漫灘。并潮汐湧掣。不使斜注東北。亟令僱築加高。鑲做防風。以資捍禦。收束。其五公灘支河。爲引河下尾。匯流之處。再令熟諳弁兵。多用鐵篋子。混江龍器具。乘船往復爬浚。自此日引日深。現今江勢。南趨溜緩。北注瓜洲花園港工程。化險爲平。惟有相機防護。加謹修守。仰副我皇上精誠協應。奠定濱江之至意。奉上諭。引河開放情形。欣悅覽焉。善後事宜。更當詳籌熟計。以收久安長治之效。毋稍疎忽。南河成案。

十二月十九日。吏部尙書總督江南河道嵇曾筠奏。江南瓜州濱江要工。經臣奏明。於對江挑挖引河。攔築夾壩。分溜南注。而北岸花園港等處。酌用椿埽。相機建築挑水壩。以禦外溜。但城垣之下。地脈虛鬆。必得填實基址。以爲內固。因倣照前人保守江海塘岸之法。用高大木櫃。裝載石塊。深埋地底。俾江溜不致搜刷。以護崖岸。其所需工料。於來年歲搶錢糧內。通融計處。硃批。上諭。

是年復准四川灌縣都江爲岷山分流。經成都華陽新津溫江崇慶彭崇寧新都金堂等縣。及簡州直入資陽內江富順瀘州歸入川江。各縣田畝。藉以灌溉。水道隄堰。關繫緊要。每秋末水涸時。該管官逐一勘估。冬月募夫修築。春月報竣。又覆准都江堰工。按照田畝均攤夫價。解交水利同知承修。再修築堰工。用竹編長籠。自一二丈至三四丈不等。中將碎石填實。壘築成隄。面蓋押二笆。每塊長二丈。闊一丈五尺。用白夾竹百梗。每梗銀一釐六毫。編工銀一錢二分。竹籠折長三丈。徑一尺八寸。用白夾竹四十梗。編工銀一錢二分。又奏准武昌乃楚江之省會。沿江隄岸。應行修築。計正岸一千三百十九丈五尺。護岸六百八十八丈。限三年次第修理。又奏准修築江工。每沙石長三尺。厚一尺。價銀八分六釐。每松椿長七尺。圍圓一尺五六寸不等。銀四分五釐。汁米一石。銀一兩二錢。柴每觔銀一釐。化灰槽銀八錢。汁桶銀四錢。水桶銀五分。小灰桶銀二分。土箕銀八釐。帚銀三釐。竹槓銀一分五釐。木槓撬棍銀三分。灰籬銀五分。灰篩銀四分。木掀銀三分。唇斗銀二分。桶竹每捆銀五分。青竹篾每把銀二分。揪棍銀一釐。蘆席銀一分。每擔灰百觔。漢陽腳價銀四分五釐。武昌五分。荊門州八分。每匠一名。工銀五分。每夫一名。工銀三分五釐。又覆准川省都江隄堰。嗣後伏汛。遇有搶修工程。該督先將應修緣由報部。所需工料銀。入歲修案。

內造册題銷。如有侵蝕捏報者。該督卽行指參。大清會典事例。

雍正十年。開濬成都金水河。以利民用。按志稱。成都環錦江。爲池江之支緯。城中曰金水。開自宋白敏中。至明嘉靖中。金水止留一綫。蓋水宗於江。逕隍以入河。其後久堙。而江沮。止托源於隍。壅淤日增。居人利其岸。以自拓。河深廣纔咫尺。雨潦無所歸。然隍俯金水。江俯隍。有建瓴之勢。隍去江不數武。而近分江。以益隍。於事易便。於是釺流溯源。穿江作渠。濬金水之堙。斷龍泉之石。固水門以節江之入。溝堰津梁。隨宜施設。刊汝山之木。下沃野之竹。以爲江障。渠成而江入隍。汰河之壅。廣三丈有奇。深三之一。又爲石堰一。開一橋。一金水之漪。洋然流貫。閘閘迨後。修治不時。漸至淤塞。至是更議修舉。成都守項誠申稱。成都金水河一道。開自宋時。相沿已久。近年失於疏濬。以致不通舟楫。民苦沮洳。立政水利爲先。省會爲郡縣之首。金水河。民命地脈攸關。未可任其久廢。查金水上流。原通灌水。從郫縣兩河口引入磨底河。逕達成都。西水洞入城。由三橋玉河沿一帶。出華陽城東水關。直達府前河。自磨底河至府河。俱應開濬。西門水洞。密布鐵窗。止令通水。不得通船。其划小船由東門進者。俱抵滿城東水關爲止。如此。則沿河一帶。俱爲商賈閘閘輻輳之所。民間米蔬柴炭。及客貨至者。皆用小船撥運入城。三橋爲省會適中之地。往來宜便。此河一開。兼可備防祝融爲患。城中地泉鹹苦。食飲不便。昔杭州近海。民飲井水多病。唐刺史李泌。始引西湖水入城。作六井。至今賴之。開河舒地氣。水脈流貫。利民生。日用。查雍正元年。議准條奏。內開。令各省確查大小河道。如有淤塞者。卽行設法疏濬。應詳請興工。開濬深通。用垂久遠。奉准施行。分段挑濬。自西門外磨底河起。由西門滿城一帶。三橋青石玉河沿。至府河。濬深千有五百二十餘丈。工竣。詳陳善後事。

宜俾有職司分理之人專其責成。條議井井。要諸永久。昔李冰以導江著烈。廉范以貯水興謠。皆蜀先猷。是舉似導江而愈於貯水。實惠及民也。君子之澤易涸。地道之變靡恆。又賴繼事以永其庥矣。河渠紀聞。
今按金水河自成都府治城西流入城內。由城東出。吳師孟導水記云。自高駢築羅城堰及藥棗。分江水爲二道。環城而東。後惟餘一派。自城西北隅鐵窗潛流入城。歲久亦絕。天禧中。王觀知成都。訪得鐵窗石渠故基。循渠而上。十里許。至曹波堰。接上流。漑餘之棄水。於是導之自西門而南。至南鐵窗入城。引而東流。折而西。又東匯於東門而入江。久之復塞。大觀初。席旦復疏導之。宣和末。旦之子益以舊渠堰廢。復修築城西外堤。引江水入城如故。并作斗門節之。本名禁河。明初建蜀府於河陽。故名金水。今重加疏濬。又於三橋西北開新河。環蜀王城外。以通舟楫。蓋金水河爲江流之支津。故歷代治之耳。又按此紀。稱雍正十年。大清一統志謂係九年。或一統志據奏請之年書之耶。

是年。江西修豐城土隄。湖南修益陽沅江之東西堰。皇朝通志。

雍正十二年九月十五日。湖廣總督邁柱奏。本年五月十一日。准原任湖北撫臣德齡鈔錄摺奏。稱武昌省城漢陽門一帶。江岸日就傾圮。請將本省收捐監穀事例。改收折色三十萬石。修築江岸。查湖北省城漢陽門沿江用石壘砌。原有正護二岸。今正岸鞏固。惟臨江護岸。向有埝埝之處。然所埝石條。緊護正岸。臣在楚數載。每見伏秋水發於江岸。無復加損。及水落石現。形蹟依然如舊。非必不可緩之事。若行估修。必先採備石條。而現在建築舵桿洲石臺。工程浩大。需石甚多。北南兩湖。屢募石匠開採。每年採取之石。僅數舵桿洲之用。此時亦無石料匠作。何以分修江岸。漢陽門江岸情形。卽越十年之後。量加補砌。猶未

爲晚奉。上諭不急之務。自應從緩。所奏是。硃批上諭。

是年川撫鄂昌奏請修復眉州蟆頤堰。以灌民田。按眉州蟆頤堰。農民衣食之源也。利多而澤溥。沾溉已久。年久堰圯。渠塞利源減息。至是議開疏稱眉州地方。向有蟆頤一堰。障流四十餘里。灌田二萬餘畝。爲利甚溥。邇年堰隄圯壞。沙水橫流。溝渠墊如平陸。民力築濬維艱。常以旱涸爲患。地方士民呈請動支公項修理。委員查勘。據稱蟆頤一堰。若得修築。不特可以灌漑水田二萬餘畝。卽將來凡堰渠之旱地。皆可改爲水田。甚有裨益。請於各官養廉截曠銀內。動支六百兩。委官督修。此後每歲修濬。責令需水人民。按地方遠近。計田畝多寡。公估公捐。交眉州州判經營辦理。工竣據實造報。奉硃批。興修水利。原係善舉。欽此。遵辦蟆頤堰。障蜀江水。溉眉山青神田畝。魏了翁取武陽石壘隄。其利尤溥。引灌雖不如都江堰之大。而資用甚便。修還舊制。眉州士民永沾利濟之益矣。河渠紀聞。今按岷江自成都府南。流入眉州界。經彭山縣。及州治東。又經青神縣東而南。其支流爲蜀江。故紀開稱蟆頤堰。障蜀江。溉眉山青神田。也。是年江溜南趨。刷去京口迤北之談家洲。直逼京口。拋填碎石。下埽固護。按京口東西諸山環繞。岡連高阜。惟臨江一面。地勢平衍。民居稠密。倚談家洲爲外護。江溜刷去洲地。直逼京口。坍塌崖岸。損傷街道。民居議用碎石保護江工。經河督趙世顯題定。於息浪庵前築護城隄埽。又於花園港等處。修建埽壩。歷年歲搶修防。無拋碎石之例。江上用碎石。自嵇文敏始。初因雍正六七年後。江溜北趨瓜洲。江岸塌卸。逼近城垣。水面空闊。江潮洶湧。大風鼓浪。衝刷最深。崖岸一經坍塌。椿埽難以施工。沿江拋填碎石。增修埽工。三百餘丈。始得穩實。至是京口亦援爲例。拋石下埽。保護平穩。歷年增修埽工。至千有餘丈。江水清深。

先用碎石拋擲填平其底。然後下掃鑲護。復以碎石護其根基。雖遇風潮。不致輕易掣動。保固崖岸。以衛城垣。江防之要略也。河渠紀聞。

是年江督高斌議濬江浦縣朱家山河道。并建束水二閘。按朱家山河在浦子口。舊名黑水河。卽沙河。迤東南下浦口入江之水溝也。前明嘉靖中。王來於近浦官塘。試開四井。各深四丈餘。下皆黑水。無石骨。故有是名。沙河之源由含山。全椒。和州而下。謂之椒河。由滁州來安而下。謂之滁河。至江浦合流爲沙河。又名天河。東過六合二百餘里。達於瓜埠灣。環曲折入江。上游來水猛迅。下源去路紆回。常憂水泛。上江之滁和椒來含山下江之江浦六合七州縣窪地築圩禦水成田。毘連七十有二圩。軍民衣食。惟取辦於力田。田所倚在圩。水漲不洩。破圩疾苦萬狀。前明屢議開鑿。未得通流。至是議浚疏三沙河入江之水溝。溝在兩山之間。開鑿成渠。寬不逾三丈。首尾建閘二。今浦口迤北之馬家橋。陳家莊。北上之陳板橋。石塊猶存。卽其遺蹟也。濬後復雨。霪水衝山土。卸入溝內。不數年卽塞。至乾隆十九年。江督鄂容安奏准開鑿。疏稱滁州有天河。宜洩滁來上游之水。由六合出江。繞過二百餘里。水大時宣洩不及。衝漫圩田。竟爲巨浸。天河迤南有山河一道。由張家堡二十里。至浦口入江。是年曾開挑。中有朱家山嶺。脊橫梗。浮論謂脊下有石。遂止。委員創視。徹底純土。無石。請動匣費。及時辦理。始定議開挑。資以宣洩。歷時既久。流沙溼遏。水道仍前阻塞。嘉慶八年。士民籲請修復。而前時浮論復起。仍謂山石難鑿。且懼江水倒灌。又有謂洩六合之水。衝浦口居民廬市者。紛紜煽惑。工久不舉。制軍會稽陳公力排衆議。獨斷舉行。江寧藩司駐工督辦。先鑿朱家山。深徹到底。創至二丈以下。純土無石。舊河青沙之底呈露。人言始息。於是畢力於工。剋期

舉事。募者踴躍趨公。互相呼助。露宿野處。不畏其艱。婦子往來饋食。欣欣有喜色。人衆而工倍焉。三閱月。河成。河長四千七百餘丈。深廣如其地之宜。經始於癸亥十二月。逾年三月畢工。事詳陳中翰朱家山農田水利河道記。是河始浚於高文成。繼事於鄂制軍。中阻於浮議。其謂水洩無餘。江水倒灌。礙於浦口居民之市廛也。殊不思天河之水分流。由張堡煨灌橋入。本有限制。非及丈不能出槽。水至槽而後洩。洩六合有餘之水。非洩六合有用之水。舊河出浦口市廛之東。無礙民居。展關寬深。加築土石隄岸。備防倍周。山形自高而下。江水焉能倒灌。皆不足信者。而耳食者從而和之。遂使萬頃膏腴之產。衝突漫溢於數十年中。遇漲卽連爲巨浸。圩不能障。而漂廬舍。溺丁淹禾。望拯於官。如望歲矣。非大力者振起之。未能速成也。惟朱家山兩崖壁立。河出其中。遇霖輒崩入河內。歲不可弛工。僉議善後。七州縣牧令共襄厥事。歲常修治。庶可以傳久遠而爲永利也。河渠紀聞。

雍正十三年四月十五日。江南總督嵇曾筠奏。初五日夜。江間風浪大作。所有北岸瓜洲江工。數年以來。仰蒙皇上聖明。指示堵築夾壩。開挖引河。以埽護崖。以石護埽。足資捍禦。值此江潮湧激。埽壩高堅。屹如磐石。城池田舍。保護安寧。惟南岸鎮江京口迤下新河口。臨江崖岸。有坍塌之處。臣等聞信。卽差員馳往查勘。茲據委員並江防同知等稟稱。新河口江崖坍塌去橫長一里有餘。進深八九十丈不等。沿江民房。塌卸三百餘間。臣查所坍塌之崖。距鎮江府城尙遠。無關運河要道。惟河口內向建新閘一座。蓄洩水勢。以便民船。今臣親往勘明後。移咨督撫。臣轉飭地方印汛官。相機料理。並確查塌房民居。分別撫卹。硃批上諭是年湖南巡撫王國棟奏。湖南長沙。岳州。常德三府屬。有隄之湘陰。益陽。巴陵。華容。澧州。安鄉。武陵。龍陽。

沅江九州縣。上年八月十日。欽奉上諭。湖北湖南近江濱湖之地。居民常被水患。朕心深爲憫惻。或有隄岸未修。或有疏濬不力。務須設法經理。以安民居。邁柱到任後。會同湖北湖南巡撫。悉心商酌。將如何興修防護。詳悉速議具奏。欽此。臣遵照委員逐隄查勘估計。於十二月督臣邁柱到任後。即移咨商妥。於今年興工。派員監督。臣等各捐穀石。幫給百姓。已皆踴躍赴工。願自出力。加高培厚。復於雍正六年四月九日。接准督臣邁柱移咨。三月三日。欽奉上諭。已恭載雍正六年。欽此。臣隨出示諭知隄工百姓感戴皇恩。喜出望外。益加奮力堅築。歡呼萬歲。今據九州縣陸續詳報。潰口俱已告竣。其首次險工。有告竣者。有報八九分與六七分者。其平易工程。有告竣者。有報現在興修者。現值農忙。田功尤爲緊要。俟栽插事畢。便可齊力搶築竣工。硃批。上諭。

是年湖南巡撫王國棟奏。臣上年奉命自浙赴湖南任。道經長沙所屬之湘潭縣。見千艘雲集。商賈輻輳。數里市鎮堆積貨物。懋遷有無。居民櫛比。而長沙係省會之區。府城又逼臨湘江。乃環顧江干。無船停泊者。蓋因湘潭江形稍曲。北風勢緩。而長沙江面既寬。北風勢緊。又無小港可以灣入。猝然風起。濤湧一時。難禦。沈溺漂沒者。往往而有。此官民船隻不能停泊。而商船亦多往湘潭。以舍湘潭無可棲泊也。卽如江西之湖口關。先設湖口縣。江水浩瀚。商人上稅停舟。常遭風濤之險。荷蒙皇恩。移駐九江。則人稱便焉。聞長沙北門外。原有舊河一道。計長三百餘丈。淤塞已久。若照舊開挖深闊。可以多泊船隻。誠爲大便利於民之事。不但往來官民船可以避險。其駕小舟以謀生者。可以安宿湖港。不致飄泊風波。且商船四集。則生計日饒。卽肩挑食力之民。有商貨往來。上下可以擔負纍纍。亦貧民衣食之藪也。臣目擊地方情形。而興

工費財無項可抵。今據驛鹽糧儲道楊秘詳稱。荷蒙皇上不次擢用。由麗江府知府簡調湖南糧道。聖恩優渥。惟有冰兢自勵。勤慎急公。以圖仰報萬一。茲長岳常三府屬隄工。欽奉諭旨。行令修築。查本道衙門向有每年鹽規銀八千兩。願以雍正五年現存銀八千兩。並六年所餘銀八千兩。歲底彙齊。共一萬六千兩。作為修築隄工之用。再長沙為省會之地。長江浩瀚。竟無灣泊舟楫之所。北門外有舊河一道。俟七年分所餘八千兩解到日。可以開濬此河。停泊船隻。庶於地方民生。不無小補。嗣後每年所餘八千兩。俱存貯道庫。以充公用。詳請核奏。臣見楊秘情詞懇摯。以雍正五年分鹽規銀為修隄之用。而以七年分鹽規銀開濬河道。與臣見適合。亦估計工銀約費一萬四千有奇。但事關為民興利。似不可緩。據臣愚見。或於秋冬興工。應否先於司庫正項內動支開濬。俟雍正七年該道歸公銀抵補。殊批上諭。

續行水金鑑卷第一百五十三

江水章牘二

高宗純皇帝乾隆元年五月三十日。部議江南河道總督高斌奏稱。江南河工。每年歲修搶修。共銷帑銀三十餘萬兩。至四十萬兩不等。臣蒙皇上天恩。畀以河防重任。自應遵守大學士嵇曾筠已驗之章程辦理。但現在辦理之處。既與報銷互異。不敢不據實奏明。懇請聖恩。勅部議定成規。載入江南漕規之內。俾於本年霜降後題估本內。即可據實聲明。永定章程。所有事宜三條。謹備細據實陳奏。今按一核定各廳夫土銀兩。給發報銷。一核實領運葦營蕩柴水脚。分款請銷。此二條不載。一奏稱江工需用石料。應照京口之例。畫一報銷也。查江防廳屬瓜洲花園港。胡家門首內。查子港等工。逼近城垣。實屬最險。經大學士嵇曾筠相度機宜。下石填墊根基。保護崖岸。所用石塊。每擔需銀一分二釐。每年約需銀一萬數千或二萬數千餘兩。因報銷冊內。未有辦石一款。是以每歲統作椿埽報銷。查鎮江京口埭崖江工。亦係下石保護。業經題估在案。今瓜洲查子港等工。需下石塊。事同一例。請嗣後統於霜降後。將一等內所用辦石銀兩。核實在報銷冊內。據實造報等語。查鎮江京口埭崖江工。經江南總督趙宏恩題請。多填碎石。固護根基。其瓜洲查子港等工。應需石塊。尚未入冊報銷。但一切修築工程。自應據實辦理。應如所奏。嗣後歲修前項江工。責令經管廳員。採辦石料。填墊堅實。務使根基穩固。以資捍禦。其所用銀兩。據實確核估計。照例造冊具題。如有藉稱水深工險。浮冒錢糧等弊。該督卽行查參。六月五日題。六日奉旨。依議。速行。南河

成案。

乾隆二年。覆准歲修都堰。自人字隄起。至省城西門外金沙新堰。溫江縣鎮安堰。新繁。彭二縣通濟堰。疏濬城二江支河。自乾隆二年爲始。於該省鹽茶項內動支修築。又議准湖北沔陽一州。南北兩江大隄。計三萬一千九百三十餘丈。東西南三方隄工。歸水利州同管理。北方一帶隄。令州判分駐仙桃鎮。就近管理。凡有應修工程。按期督修。大清會典事例。

乾隆三年。署理湖廣總督兼理湖北巡撫史貽直奏。武昌爲楚江省會。岷江之水。湍激東奔。沔漢之川。沸騰西匯。大別山聳峙其北。高羅峯屏列於南。沿城西南一帶。適當二水之衝。兩山之夾。每遇暴漲。勢若建瓴。駭浪洪濤。吞囓城堞。粵稽古蹟。唐宋旣築長隄。元明每加修治。壘以巨石。保以松椿。錮以鐵液。鎮以鑄犀。當年鹽艘。俱泊武昌城南鮎魚口。例係淮南按船帶石。以資修補。迨後鹽船移泊漢口。遂弛輸石帶修之事。年久傾圮。小民無知。每將坍塌土石。乘間挖取。日侵月削。習爲故常。今沙土淤鬆。狂瀾衝激。每當西風狂撼。江漲連天。水勢直刷城根。時遇漫溢。臣檢查舊案。從前督撫諸臣。屢經商謀修築。祇以工程浩大。費用不貲。旋估旋輟。臣抵任。目擊沿江隄岸。頽塌難堪。若不及今修築。將來傾卸愈多。所費尤鉅。坐見塵舍垣墉。高下剝損。凡係保障城池之所。實爲生靈民命之攸關。我皇上誠求保赤。凡利益民生之事。每不惜帑金。多方軫卹。仁恩普被。率土均沾。况武昌爲九省通衢。萬民托命。身任風疆。敢不仰體宸衷。經營措置。隨檄行藩司。遴委道府大員。逐加確勘。自望山門外王惠橋。至武勝門外土城磯止。正岸縣互一千三百一十九丈五尺。護岸一百八十八丈。通計正護兩岸二千餘丈。確估工料。需銀十一萬一千九百三

十七兩九錢。核無浮冒。查湖北藩庫現存商捐提估銀五萬九百五十餘兩。又有徵存二公分項內動支銀二萬兩。合計七萬九百餘兩。請將緊要工程。先於今冬水涸時。亟爲修築。此外不敷之數。再於來年動支公項銀一萬兩。此後口岸徵收之銀。除臣衙門一切公費外。如有存剩。亦可按年動支。又臣標滿兵八十名。向有南北兩省。每年幫貼養贍三千八百四十兩。今滿兵已經撤回荊州。此項銀兩。無須支給。均可按年湊用。足敷經費。毋庸議動正項。至興修之期。請限以三年。分段次第修理。其承修督修之各官。務擇實心任事諳練工程之員。分別委用。皇清奏議。今按是年。奏准修築於武昌江塘護岸一帶。加高二層。是年。奏准武昌一帶江塘護岸。加高二層。又議准漢陽府江岸石隄。波浪衝激。自西關小馬頭。至東關上馬頭。建築正岸二百六十七丈。護岸亦如之。城南張王磯。加築二層護岸三十丈。以爲保障。大清會典事例。

乾隆四年。覆准武昌江岸。蕎麥灣地方。別築月隄二百九十五丈。大清會典事例。

是年。修築湖北漢陽黃陂縣之溪岸河堰。皇朝通志。

乾隆五年。奏准上江地方。和州大洋河。姥下河。牛屯河。含山縣銅城。牯河。來安縣龍尾壩。河。均令開堰疏濬。安徽通志。

乾隆六年。江西巡撫陳宏謀奏。竊惟耕鑿乃食之源。而水利實農田要務。江西一省。所屬郡縣。非濱江帶湖。卽環山逼嶺。近湖之地。勢與水平。民間築有圩隄。開壩。以資捍衛。地以內之民田。廬舍。煙火。萬家。每遇水發。全仗圩隄。開壩。周圍堅固。始保無虞。一有衝漫。均遭淹害。此以圩隄。開壩。防水之害者也。近山之地。

高下畸零。開墾田地。既防衝決之爲患。又苦灌溉之無資。惟有修砌陂塘堰圩。水至可資防禦。水少可資灌溉。此又以陂塘堰圩防水之害。而卽資水之利者也。江西水利。不外此二者。而年歲之豐歉。亦卽關係於此二者矣。向例農隙時。撫臣行令各地方官。將舊築圩隄。派夫修葺。年底將完固緣由。造冊報部存案。止就南昌、瑞州、臨江、饒州、南康、九江、贛州等府所屬之十有餘縣。年年報部有案者。彙冊開報。而近山逼嶺地方。一切陂塘堰圩。均不在開報勘修之例。卽此數府中。除所報圩隄外。亦尙有續修未修之圩隄。開墾總因地方官向無承修保固之責。視爲泛常。並不親勘督修。其間民力之勤惰。出夫之多寡。圩隄之堅否。既無有司親臨查勘。無人督率。奸頑田戶。每推諉不前。不但應修而未修者。延挨觀望。卽已經派修者。亦不過虛隄浮土。掩飾一時。隨修隨傾。難資捍禦。以致驟遭大水。尺土不保。全圩受淹。一處衝決。闔境罹害。現據士民以民間情願修圩築壩。請官督修主持。以免阻撓。紛紛具呈。則江西省之圩隄堰壩。夫力出於民。督率不可無官也明矣。查地方縣令。身膺民社。水利農田。本其專責。但每年農工畢後。正值徵漕開訟之際。勢難親往各鄉勘修。而各處應修之處。無官督率。未免心力不齊。強弱不一。動多阻撓。爭勢控告不休。臣查各縣均有縣丞一官。未屬閒曹。并無專管職掌。原應佐理縣務。此等隄開圩堰。乃民生要務。正宜專委辦理。臣蒞藩司任時。正屆農隙之時。曾經詳明通飭各屬。令縣丞各員。分頭勘修。但係一時詳行之事。若不定以責成。永遠遵守。仍致始勤終怠。難收實效。請將江西一省縣丞。均加水利銜。凡有修築圩隄。開墾陂塘堰壩等項工程。俱專責各該縣縣丞。查勘督修。間有并無縣丞之屬。卽委典史巡檢。各按本管地段查勘督修。每年九月後農隙之時。各該縣丞等官。輕騎減從。親詣各鄉確勘。將應修隄圩等項。查照

向例督率圩長民夫合力修築。薄者培之。卑者增之。圩長徇私怠玩。田戶持強抗違者。該委員卽就近分別懲治。統限歲底修竣。造冊移縣。知縣察實。加具印結。轉申彙冊報部查核。其有向無圩隄等項。查勘情形。或應築隄建閘。或應修砌塘塌等類。及向曾築有工程。年久坍塌過甚者。亦卽督令民夫合力修築。如工程浩大。關係永遠水利。而民力不支。難以派修者。請循照從前奏明事例。動支鹽規充公銀兩。給發興修工竣造冊報部核銷。各該員三年內。果皆實力督修。并無衝決被水等事。遇有保舉陞用。將承辦水利如何列入事實獎薦。以示鼓勵。儻有扶同捏飾。及借端需索擾累鄉民等弊。分別參究。自此之後。除猝遇異常大水。非人力能施者。毋庸議。如止尋常雨水。而有圩有壩。田地工程。修築不堅。致有衝漫受淹者。將各該委員及知縣一併題參。分別議處。如此則責成既專。修築以時。各官咸知境內有不容玩視之水利。小民亦知境內有不容推諉之工程。上下官民。交相勸勉。水利興而農田得收實效矣。皇清奏議。

是年覆准川省石牛黑石二堰。歸入都江歲修案內。一併動項修理。大清會典事例。
乾隆七年。水決華容縣蔡田安津諸垸。巡撫許容築復。按隄防考。華容縣北臨川江。南接洞庭。中有斗子褚塘蘇池等十有三。湖南北水漲。殆無遺土。環土爲垸。凡四十有八。明時江湖水溢。諸垸隄盡潰。勢難並築。垸大而要害者。惟官垸。濤湖。安津。蔡田四垸。各周回四十餘里。縣賦半出其中。嗣修蔡田。安津二垸。復合二垸爲一。康熙雍正年間。俱發帑修築。乾隆五年。水漲潰伍家垸。至是復決蔡安二垸。委員修復。陳士元議云。楚東諸郡。水弗可隄。利在疏導。西諸郡隄斯利焉。漢水之泥。濁似江河。非疏滌之。則散漫矣。東諸郡固漢濱也。水由澧會赤沙湖。沉出邑南華容。當大江九江之衝。江水較漢稍清。不異於澧。自杜豫開

漕以瀉江勢。而東邑之湍悍稍紓。邑西之流澌浸巨。故江水橫截華容。注之洞庭。范晦叔岳陽風土記。謂華民多舟居。常產卽湖地。建寧南隄決。卽被水患。建寧今石首南隄。卽今調絃。夏秋必決。必溢。二邑江患相表裏。境最巨者安津。蔡田官境。一遇漲潦。隄卽衝決。冬月水退。有司發粟集民修之。而於隄之堅脆弗問也。宋熙寧初。遣使察農田水利。蘇軾上疏。以遣使察農。必大煩擾。吏卒所過。雞犬一空。修境弊同於昔。邇來建寧諸隄悉潰。江水散流潛沔。枝江隄決。水奔黃山鹿河。漫流邑之西鄙。故邑河勢殺。不然。幾以城爲市也。宋史。閩越皆有陂湖。湖高於田。田又高於江海。旱則放湖水溉田。澇則決田水入海。故不爲災。然此可行於浙西耳。境民心殊力惰。少旱則決隄引水。坎穴叢楚。甚者以施筴蒙害。今不計。莫若督令民於境中鑿陂。嚴禁防。謹蓄洩。乃安津。蔡田諸湖弛稅。令民溉田。而縣令取水面錢至盈百。訖無成功。境民又於境外水濱墾田植稻。謂之湖田。湖無稅額。三歲一熟。熟則倍獲厚利。此所謂涸梁山泊。可得良田萬頃。而王安石懼無貯水之地者也。圩田湖田。起於宋政和以來。使遇賈讓杜豫諸境。尙在興廢之間。况境外乎。然有洞庭爲之瀦。亦不致大害。修內圩。明賞罰。爲今日要務。至調絃開塞之議。雖無成說。以勢觀之。塞固漲而西。開亦漫而東。今開者幾百載。卽款塞之莫能也。善爲水者。因時補苴。無一勞永逸之道也。河渠紀聞。

乾隆八年。白鍾山奏。查瓜洲京口兩岸江工。外臨大江。內係運河。居民稠密。舟楫通行。所關綦重。向於沿江迎溜頂衝緊要處。所建築埽壩。以爲保障。又於埽根外。多投石塊。層層堆積。以資擁護。其法甚善。惟江性溜走。水下淘刷根底。兼之潮汐往來。風浪衝擊。每每坍卸。必須不時下石外護。庶免脚根空虛坍塌之

患。臣蒞任後。經飭行道廳。如法修守。今臣由淮揚一帶下游運河查勘湖河各工。直抵瓜洲渡。以至京口。往來詳勘。南北兩岸江工。俱各遵照修保護平穩。一律鞏固。但查江中投石。既無丈尺之可量。又無多寡之可計。設遇不肖屬員。虛冒侵蝕。用少報多。憑何稽查。不特糜費錢糧。亦於工程無益。且採辦石塊。俱由各山頭雇船運至工所。向例即就船上循岸投擲。以免上岸搬運之費。今若逐一盤驗。勢必運至岸上。未免多費工價。亦爲未便。臣酌將運石船隻。擇其大小各一隻。先量其長短高寬若干。裝載石塊後。入水深淺尺寸若干。然後將石塊運至岸上。覈明觔重數目。每船約載若干。以此爲準。嗣後總以船隻之大小。入水之尺寸。丈量明白。毋庸逐船盤驗。即可覈算石塊之多寡。如用料之確數。庶以杜不肖廳員。用少捏多之弊。該處係常鎮道所管地方。相近咫尺。俟運石到工。即令報明該道。就近逐船丈量。覈實方詳動用。如此立法稽查。庶石料均歸實用。於工程錢糧。大有裨益。南河成案。

是年議立稽查江工投石之法。按江水清深有力。淘刷近岸。必下埽護崖。水深埽難屹立。向有用竹簍裝石。入水攬護。并用賈魯沈船法。以大舟載石鑿漏。沈入水底。亦有在對岸開挖引河。築壩挑溜。然用竹簍沈船。工費更大。而易有架隔。不能隨流填墊。開引河築壩。則數丈之溝。不能引無崖之水。柴土之壩。不能抵浩瀚之流。惟有靠岸拋填碎石。以實其底。爲濟變之法。而不可無法以稽其數。河督白鍾山言。向來採辦石塊。船運至工。即就船循岸投擲。以免上岸搬運。而無丈尺可以數計。終非核實之道。應將石運至岸上。量明載石之船長短高寬。入水深淺。即可計其輕重。核定數目。以爲準則。此計數之常法。尤在先事豫防。如法修守。下石以固其根脚。外加防風。以護其灘岸。使不至衝刷進內。若疎於防護。引溜坍崖。以數

十丈寬之急溜深坑。即使多運石塊，齊力拋填，而石隨浪淌，前石尙未拋足，後段又復坍塌矣。河渠紀聞。是年重修儀徵江口通濟羅泗等閘，以利運行。按揚州之儀徵運口，江廣漕船出入經此，兩淮鹽艘亦由是道。地居衝要，漕河之水由此入江，高卑勢殊，易洩易涸，立閘以束水勢。古與今同，閘始建於宋嘉定間。至明洪武，卽其地築而壩之，舟上下必車壩，成化宏治以來，歷設響水、通濟、羅泗、攔潮四閘，逐遞灌注，節節收束，以備相機蓄洩。雍正十二年，修補響水攔潮二閘，其接連之通濟羅泗，自康熙五十五年修補後，已屆三十年，大江潮汐往來，衝刷日久，多有塌卸折裂，閘底石塊衝跌坑塘，難以下板啓閉。至是重加修整，疊石如壩，松椿櫛比，琢整砥平，復還舊制。江口無閘，漲潮上閘啓注，不可遏，建瓴之水直瀉無餘，難以濟運。二閘樞紐鹽漕，而常議建之始，咸謂江濱多浮沙，椿虛難立閘。至濬見黃壤而論息，前人於此與舉不易，遵守成法，以時修治，自得其用也。河渠紀聞。

是年奏准武昌沿江一帶石岸，動支江工節省銀五千兩，交江夏漢陽二縣商民營運生息。按季交總理江工之驛鹽道庫收貯，每年水涸時，著地方官履勘，乘時修葺。又奏准荊門州沙洋大隄，發銀萬兩分給荊門州遠安縣，交商營運取息。按季呈繳安陸府庫，每屆歲修，勘明動用，如有餘剩，遞年存貯備用。大清會典事例。

乾隆九年，湖廣總督鄂彌達奏，臣惟全楚吐納衆流，而楚北爲尤甚。現於議覆臺臣張漢請疏水道摺內，將江漢情形備呈聖鑒，竊以爲疏洩之法，勢固難行，而修築之功，實不可緩。武漢各屬城郭都會，逼臨水次，環水而居者，半以水邊地畝爲生涯，全賴隄隄以資保護。其險要之處，有亟宜增築防衛者，謹分晰言

之。武昌郭外江面約寬七八里。受荆江、湘江之洪流。自洞庭大湖直瀉而下。勢如建瓴。繞城之西北。而東注城西之望山門。城西北之草埠門。業蒙聖恩。砌建石隄。聯屬鞏固。惟城西南之保安門外。有金沙洲。洲中腴壤滿目。煙戶萬計。洲之左偏。爲蕎麥灣。緊臨大江。向有老隄一道。長二十五里。外防江漲。內衛民田。實金沙之隄防。卽武昌之保障也。自江流衝激。日漸崩坍。乾隆二三年間。卸去隄身六十八丈。刷進隄脚二百餘丈。嗣復於老隄內築月隄一道。然工程單薄。江勢洶湧。久經衝決。至今尙未修築。昨臣親往蕎麥灣踏勘江岸情形。月隄欹側。隄之不絕者如綫。詢知金沙一洲。歷來有街八道。今已潰其四。若不及今堵衛。不獨洲內民廬地畝將淪胥於水。而江水直灌城根。卽現在沿江石隄。恐亦難免衝刷之患。臣相其地勢。須再退內灣裏築大隄一道。先於根底密釘排椿填築。以固其址。然後增高培厚。庶永爲不拔之基。此武昌隄工之最要者也。又漢江險工。莫如安陸府屬之沙洋。而沙洋之險。又在水府廟鄭家潭等處。現今動帑修築沙洋大隄二十里。足資捍護。特是漢水日就南滾。每遇伏秋汛水。隄脚難支。昔人遇險處。每築一隄。必退築月隄一道。或兩道。重層障禦。所謂一包三險也。今沙洋之隄。如鄭家潭、水府廟諸處。並無月隄。今隄身瀕近河干。不過數弓。設遇暴漲。人力難支。亟宜添築月隄。此安陸隄之最要者也。蕎麥灣隄計估約需銀一二萬兩。沙洋月隄計長二千餘丈。需費約計三四萬兩。前督臣阿爾塞已題借帑銀一萬兩營運。以資歲修。臣請再借帑銀四萬兩。合之前次成本。共五萬兩。分交武漢行銷。按月生息。每年可得息銀九千兩。不過三五年間。兩處大工。次第克舉。陸續歸還成本。臨期酌量留存。爲逐年歲修之資。其於國帑既無虧損。而楚省人民之仰戴聖恩。實無涯矣。又潛江天門二邑縣治地勢低窪。一遇大漲。浸城過半。

現檄飭修護城根。第潛沔諸州縣中均係按畝派夫。其在豐稔無事之年。尚可奮勉趨事。設或隄岸潰決。又值年穀不登。伊等謀生不暇。礙難計畝科工。往往公則官墊。私則民貸。否則束手無策。請於現在捐監穀石。撥十萬石。分貯沿江各州縣常平倉內。名曰江防倉穀。或遇隄決歉收之年。按隄計畝。酌借無力窮民。俾得踴躍赴工。俟工畢後。按年徵完。於倉貯無虧。於民生有益。此亦沿江州縣之要務也。又襄陽府之老龍石隄。計長十里。古有子隄重重。逼近府城。現今子隄已多坍塌。每年著落地方官粘補。僅歲修銀三百餘兩。實不敷用。查襄陽府庫內有軍窩銀二萬兩。積年收貯。請撥五千兩。交襄陽府當鋪生息。每歲可獲息銀九百兩。歲修銀共可千餘金。以爲頻年修築之用。官不費而民無累。亦地方之利賴無窮者也。皇清

奏議。

是年題准漢陽江岸。動支江工節省銀三千兩。交江夏漢陽二縣商民。各半營運取息。遇有坍塌。卽飭估修。今按是時。以臺臣張漢請疏各直省水道。湖廣督臣鄂彌達。因奏請修築。又議准漢陽險工。水府廟。鄭家潭等處。增築月隄。又議准武漢兩處大工。動撥銀四萬兩。交商營運取息。以備次第興舉。又議准襄陽府枕江老龍石隄。每年隨賦額徵歲修銀三百兩。有奇。尙不敷用。動撥府庫軍需積貯銀五千兩。交襄陽商民生息。以備修築。大清會典事例。

乾隆十年十二月。工部議准兩江總督尹繼善疏稱。無爲州濱臨大江。舊有大壩一道。抵禦潮汐。緣江中續生三洲。洲頭支水。逼衝壩根。大壩屢經衝坍。請於鱗魚口。鮑家橋二處。加築一壩。但逼近大河。無地可築。應先另開河道。讓出餘地。請將王家渡一帶河道堵塞。另開新河一道。并挑挖白米塍河。於秋冬水落

後興工河渠志稿。

是月工部又議准甘肅巡撫黃廷桂奏稱。寧夏四堆子一帶。埂外閑田。曾招民墾種。查四堆地方。雖有月隄三道。距黃河大溜甚近。恐水大泛溢。衝刷傷田。請於月隄後。自馮家廟至五堆子。再築遙隄一道。並將六堆子以下殘缺舊隄。加培高厚。至昌潤以西。惠農尾稍。出水小渠。淤墊淺窄。夏秋宣洩不及。恐致黃水倒漾。請一體展挖寬深。河渠志稿。

是年議准安陸府黃蓬山同知。改駐荊門州沙洋地方。麗陽司巡檢。改駐潛江縣。與主簿分地管理。天門縣縣丞。改駐兵家口。鍾祥縣縣丞。改駐石牌沔陽州。東西南三方大隄州。東令沙鎮巡檢。州南令鍋鎮巡檢。州西令州同分管。天門縣之牛蹄河。令乾鎮巡檢專管。以重責成。大清會典事例。

乾隆十一年七月初九日。工部議覆湖廣總督鄂彌達奏稱。湖北濱江水勢衝激。今金沙洲已建石岸。菽麥灣又築月隄。可以互資捍禦。惟武昌望山門外王惠橋。爲金沙洲江口入水之區。請添建石閘一座。依時啓閉。外防江漲。以免衝淹。內蓄湖水。以備旱潦。應如所請。從之。河渠志稿。

十月十五日。江西巡撫塞楞額奏。查江西南昌府屬之豐城一邑。濱臨大江。當吉南贛袁臨諸水下游。勢如建瓴。賴有東西兩岸土石各隄。以禦水患。而近城一帶石隄。計五里許。共長八百一十餘丈。尤爲急溜頂衝。城池倉庫。居民田廬。全仗石隄爲之保障。臣上年請將石隄歸官承辦。並將坍塌隙裂尤甚。計共一百三十餘丈之石隄。請於鹽規項下歲修銀內。通融辦理興修。工完報銷在案。而未修之馬家園。普明堂等八處。舊老石隄。本年四月二十七八九等日。大雨連縣。先後坐陷。隙裂坍塌倒壞八段。計共九十六丈。

五尺實屬險要工程。亟宜修砌。以資捍禦。逐一勘估。共需工料銀六千八百九十五兩零。查該縣隄工。將定歲修銀一千四百兩。每年與驛鹽道庫鹽規項下動用。今被水衝之舊老石隄。應請仍於鹽規項下預借歲修銀六千八百九十五兩八錢零。購料興修。工竣之後。飭令承修官照例保固。以重責成。河渠志稿。

乾隆十二年。議准湖北各隄隄長。嚴飭印河各官。加意稽察。隄長止令傳喚雇工。毋許濫行苛派。如有曠誤營私。勒索滋擾情弊。嚴加治罪。別行公舉籤充。如印河各官漫無覺察。經道府揭參。照隄岸潰決疎防例處分。大清會典事例。

是年修江西九江府石礮。吉水縣被衝隄岸。又以楚南洞庭。爲川黔粵楚諸水匯宿之區。必使湖面廣濶。方足容納。禁瀕湖荒地。毋許築隄開種。皇朝通志。

乾隆十三年。奉上諭。內閣金沙江。亙古未經濬導。今平險爲夷。通流直達。不獨銅運攸資。兼且緩急有備。於邊地民生。深有利益。工鉅役重。成千古之大功。不可不爲文紀事。垂之久遠。其發源何地。經流所歷。郡邑幾何。起訖計若干里。險峻者幾處。經始以迄竣工。爲時幾何。創議始於何人。前後經理督率之大吏。幾人在工。効力人員。幾何。統用夫役若干人。費帑若干兩。著總督張允隨。一一明晰開具清單。以備採擇。載入碑記中。純皇帝聖訓。今按金沙江。卽古麗水。以產金。故名金沙。一名繩水。一名犂牛河。一名馬湖江。

皇朝通志云。源出西藏犂牛山。行二千六百餘里。入雲南麗江府西北邊界。始名金沙江。經雲貴邊境各郡邑。至四川敘州府城。東會岷江。大清會典云。金沙江出寧遠府。東北流。入敘州府界。經屏山縣南。又東

北。經敘州東南。稍北。與岷江會。大清一統志云。自雲南昭通府流入。東北。經蠻夷平夷。二土司南。東北。經屏山縣南。又東北。經敘州府城南。與大江會。蓋金沙江。固大江之西南源也。

是年。湖北巡撫彭樹葵奏。臣於二月抵任。接讀諭旨。將湖河灘地。禁止侵佔一案。作何辦理之處。查明具奏。隨經檢查舊案。以楚省積水之區。俱係納有糧課。並非官湖。可容侵佔。至湖邊江岸隙地。私築小垸。歷係嚴行禁止。聲明覆奏。半載以來。臣時時體察。兼採輿論。知仍有尙須籌畫者。蓋少一阻水之處。卽多一容水之區。則私垸之禁。尤不可不既乎其實也。查荆襄一帶。江湖袤延。千有餘里。一遇異漲。必藉餘地以資容納。考之宋孟洪知江陵時。曾修三海八櫃。以設險而瀦水。後豪右據以爲田。汪葉力復之。又荊州舊有九穴十三口。以疏江流。會漢水。是昔之策水利者。大都不越以地予水之說也。自滄桑變易。故跡久湮。現在大江南岸。止有虎渡調絃黃金等口。分疏江水。南入洞庭。當汛漲時。稍殺其勢。至漢水由大澤口分派入荆。夏秋汛漲。又上承荆門當陽諸山之水。匯入長湖。下達潛監。瀾漫無際。所恃以爲蓄洩者。譬諸一人之身。江邑之長湖。桑湖。紅馬。白鷺等湖。胸膈也。潛監沔陽諸湖。下達沌口。尾閘也。其間滌洄盤折之支河。港汊。則四肢血脈也。胸膈欲其寬。尾閘欲其通。四肢欲其周流無滯。無如三襄之水。性濁多沙。最易淤積。有力者因之趨利如鶩。始則於岸脚湖心。多方截流。以成淤。繼則借水糧魚課。四圍築隄。以成垸。在小民計圖謀生。惟恐不廣。而不知人與水爭地爲利。水必與人爭地爲殃。川壅而潰。蓋有由矣。臣查舊案。節據荆宜施道諸嘉正。安襄鄖道王槩。議將未有之垸。永禁私築。已潰之垸。不許修復。詳請飭遵。補偏救敝。誠爲允當。惟是利之所在。民間每不憚百計。以求勝。而地方有司。未能規及遠大。少不留意。則私築之弊。

仍有不能免者。縱令道府親查。而會否加添。究屬無憑。再四熟籌。竊以爲積習既成。挽回非易。亦欲復三海八櫃之舊。勢誠不能。亦祇杜其將來。而不使境之增多。則當先查其現有。而確知境之定數。現在惟有檄飭各州縣。於冬春之際。親行履勘。將闔邑所有現境若干。各依土名。查清造冊。由府核定。費送各衙門存案。嗣後卽以此次所查。著爲定數。聽其安業。此外永不許私增。卽一境之內。亦不得再爲擴充。仍令該管道員。本年出巡之便。逐細詳查。則有無增添。按冊可稽。而各州縣之實心奉行與否。亦可藉以查核。勸懲。至此後遇有淤灘。原係民間納糧之地。或種麥豆。或取柴草。均聽自便。但不得另築境圈。以妨水路。如此則愚民不致因小失大。地方有司。益不敢姑息怠玩。自貽參處。而與水爭地之錮習。或可少息矣。皇清奏議。

是年議准川省歲修都江等堰。每年動支鹽茶耗羨銀二千五百十二兩有奇。又議准民間隄堰。原無給價助修之例。祇以年歲偶歉。估發半價。官爲助修。至於被災深重。而所議之工。又係有關蓄洩機宜。急應修理之工。給發半價。恐尙不敷。該督撫將實在情形。並作何籌畫酌辦之處。於疏內分晰聲敘。請旨遵行。儻偶遇偏災。其所做工程。又非迫不及待之工。不得概行聲敘。陳請。大清會典事例。

乾隆十六年。江南總督尹繼善。請於王家渡一帶。另開新河一道。起劉家渡。止張家灣。袤四千一百九十四丈。寬三十丈。深一丈四尺三寸。上游襄安迤西之水。匯馬家渡入此河。至姚家溝分二派。一出泥汊。一出飛雁投湖。北繞州城。出裕溪。廬州府志。

乾隆二十年。湖撫陳宏謀。飭行築隄利弊。以重河防。按濱江臨湖之地。水道難疏。易淤。承平日久。深山

窮谷石陵沙阜莫不芟闢耕耨地脈既疏沙石易崩每雨則山谷泥沙盡入江流江身淺塞諸湖湮平惟有修築隄垵爲捍患之大防陳文恭飭行築隄利弊重修守也作隄之法首在審勢水勢直衝而來退爲曲防愈退愈決如築虎渡口之隄至直逼江口遏水衝而後定其次則察土宜也堅杵築也挽月隄也塞穴隙也捲土埽以塞決也用石甃以當衝也立排椿以禦風浪也以及植楊柳培草鱗力杜其偷減草率之弊而利可興而爲水鄉計必留處水之地審去水之路如澧州諸谿峒山水驟長虎渡江流奔入五大河宣洩不及官民隄垵加高障水不得下而爲患又當禁其占壅水道也又如益陽上承資沅之水下連洞庭左抵長沙大江漲時南水瀾漫上之來者滯而不去下之積者壅而上行亟應通其去路智者不與水爭地長岳常澧之修防禦而兼疏矣河渠紀聞

乾隆二十二年開常熟昭文二縣之白茆河徐六涇海口及塘外淤河以消積水皇朝通志

乾隆二十三年奏准湖北江夏縣蕎麥灣第五段石岸改築土工大清會典事例

乾隆二十五年改常熟昭文二縣海口石閘爲滾壩皇朝通志

乾隆二十六年浚常熟之福山塘河皇朝通志

乾隆二十七年奏准湖北江夏縣蕎麥灣第五段江工做照修築第一段坦水之例用土填築深釘排椿每層加用蘆埽攔護嗣後各段隄工照此妥辦大清會典事例

乾隆二十八年奏准湖北襄陽府老龍石隄歲修銀兩著該督撫委驗取結奏明又奏准湖南洞庭湖荒地永禁私築隄圍年終取具該州縣及專司水利官並無增築私圍結狀備案大清會典事例

乾隆二十九年七月十三日。高晉奏。查本年江水長至一丈五尺八寸。爲數年來未有之大水。經臣兩次親往查勘。並將籌辦迴瀾壩護崖埽工緣由具奏。茲又據江防營稟報。七月六日。風潮迴瀾壩江灘。忽然兩頭並後身裂縫。登時坍陷入江。長九十餘丈。測量水深四五丈至六七丈不等。與護城河相連。距瓜洲城十一二丈及三四丈不等。現將崖岸設法搶護等情。臣卽率同淮揚道吳嗣爵。參將徐建功。馳赴查勘所坍之處。自六日塌卸後。連日並未續坍。溜勢已漸開行。向來江坍一晝夜必定。就目下情形而論。尙與城垣無礙。復登城細勘沿江城內西南隅。並無居民。皆係曠地。查大江兩岸地勢本高。水由地中向無隄岸。其江灘坍漲靡常。潮汐隨時長落。原無衝漫民田之患。從前灘勢寬闊。離城數百丈。以至一二千丈不等。迨後漸次坍塌逼近。臣歷查從前辦過江工成案。並廣詢從前辦過成法。緣江水近海。潮汐往來。是以修防搶護。與黃運湖河情形不同。簽椿下埽。水深莫測。旣不可行。曩有用木櫃盛石沈入水中者。又用竹簣沈石者。並有以大舟載石鑿漏沈水者。更有在對岸開挖引河。及築壩挑溜者。倍費工力。均無成效。惟有緊靠灘邊。拋填碎石。以實其底。修做防風。以護其灘。雖不能保其永遠不坍。然歷年照此辦理。尙屬有益。但正當坍江之時。以數十丈寬之急溜深坑。卽使多覓船隻。多運石塊。齊力拋填。而石隨浪淌。江水甚深。灘坡甚遠。前石尙未拋足。後段又復坍塌。虛應故事。動則需銀數萬兩。徒啓工員冒銷之端。再四斟酌。必須於江勢坍定。相機施工。則料有稽核。工歸實在。帑不虛糜。方爲妥協。臣與道參府廳。並在工年久之員弁。詳加講求。該處江灘。目下雖未續塌。而本月十七八九等日。爲秋汛大潮。過此始能勢定。臣隨一面督率道參廳營。將現在兩頭未塌之灘。用埽樓護。以禦風浪汕刷。護城河亦卽築壩堵截。以防其通流掣

溜並於沿灘接做草壩。以通絳路。一面酌撥銀兩。採辦石塊料土。堆貯無礙近地。以備臨時應用。一俟本月十七、八、九等日。大汛過後。再看形勢。有無續場。即可酌定。擬即先拋石塊。得底之後。再鑲防風。如法妥辦。庶灘底穩固。城垣可保無虞。臣現住工所。督率料理。不致貽誤。奉硃批。祇可如此。與河爭地已難。況與江乎。南河成奏。按江防與河防異。江流清深。揚子以北。水勢多趨北岸。賊波凌濤之激蕩。往往剝蝕。傾圮。明時疏江中沙洲。以殺其勢。而橫決時聞。本朝設江防廳。駐工修守。建迴瀾壩。護崖埽工。至是伏汛長水丈有六尺。又兼風湧。迴瀾壩後身裂縫。坍陷入江。九十餘丈。水深四五丈至六七丈不等。與護城河相連。逼近瓜洲城河。河督高晉查勘。議俟江勢坍定。始可相機施工。將兩頭未塌之灘。用埽摟護。以禦風浪。汕刷護城河。亦煞壩堵截。以防其通流掣溜。並於沿灘接做草壩。以通絳道。一面採辦石料。俟過秋汛大潮。先拋石塊。得底後。再鑲防風。以爲保護城垣之道。此隨時補救。而不能與水爭也。然防之以豫。爲之有漸。積累日久。有基可恃。而奏功不難矣。河渠紀聞。

是年修築無爲州圩田隄壩。安徽巡撫托庸言。安省沿江各屬圩田。全賴隄壩捍衛。本年夏間。江潮盛漲。漫缺甚多。小民俱各自行修築。惟無爲一州。地處極低。被水獨重。臣委員分勘。大小缺口二十餘處。州境內外。隄壩二百餘里。經江潮汕刷。處處卑薄。應及時修築完整。以資捍禦。從之。皇朝文獻通考。

十月二十二日。奉上諭。據常鈞奏。監利縣孫家月隄工程。例應民修。今因該處濱江被水。民力未免拮据。籲請自修三分。暫行借帑七分。按三年帶徵還項等語。此等隄工。雖向係民修之項。但今年江潮驟漲。該處現在尙加賑卹。閭閻物力維艱。深爲軫念。所有現請借銀一萬二千兩。加恩免其帶徵歸款。著在罰修

隄費等項內動支。儻罰項不敷。卽動撥正項亦可。河渠紀聞。

是年。奏准江西豐城縣土隄。次第改做石工。又定湖北金沙洲隄工。發商生息銀三萬兩。以一分五釐生息。爲歲修之資。每年造具四柱清冊。報部查覈。又諭監利縣孫家月隄工程。雖向係民修之項。但今年江湖驟漲。該處現在尙加賑卹。閭閻物力維艱。深爲軫念。所有現請借銀一萬二千兩。加恩免其帶徵歸款。著在罰修隄費等項內動支。儻罰項不敷。卽動撥正項亦可。大清會典事例。

乾隆三十年。開挑武進丹陽二縣之孟瀆等河。尹繼善言。常州府屬之孟瀆德勝兩河。南通運道。北達大江。關係數邑水利。民田萬頃。咸資灌溉。緣積年吐納。江潮流沙停積。河身淤墊。孟瀆河計長一萬五百餘丈。德勝河六千六百餘丈。亟須築壩。大加挑濬。鎮江府丹陽縣之九曲河。亦係通漕濟運。灌溉田畝。年久淤塞。計長九千五百餘丈。亦應挑濬。從之。皇朝文獻通考。

是年。湖廣總督定長。湖北巡撫鄂寧奏。湖北素稱水鄉。除鄖陽宜昌施南三府外。其餘七府屬。外臨江河。內濱湖港者。所在皆是。雨水稍多。卽漫淹田地。歲以爲常。土人亦視爲固然。此等水易漫淹之區。大率以水鄉魚糧等則例起科。上中下三則。賦甚輕減。且每年水漫挂淤。土性加肥。來年春收必倍。况水退涸出後。原可相其節氣。以次補種中禾晚禾。卽遲至白露節內涸出。亦可補種蕎麥離糧等物。此濱臨江湖州縣之大概形勢也。再水易漫淹之區。固因地勢。亦有小民貪利與水爭地。致頻年泛溢者。臣等見該守令等。細加諮詢。以籌調劑之方。據漢陽府守令面稟。漢川縣沔漢境一區。每有水患。賑借甚煩。先據境民具呈。曾有廢隄改糧之議。未經舉行。隨檢案卷。上年前撫臣李因培。曾飭司道會同查議。嗣因調任。未及籌

辦。臣等飭司道詳悉籌議。今據布政司三寶糧儲道李成業、武漢黃德道盧謙據該府縣議詳前來。臣等查漢川縣沔沔垸在縣境西北。垸內有沔沔大湖。又聯絡倒灣等十三小湖。陸地湖地環錯其間。南接彭公、蓼湖、香花三垸。東西北三面圍築長隄七千五百餘丈。例係官督民修。隄外東爲松湖北爲慈湖。西爲竹筒支河。東北爲德安府河。入松湖之頂衝。西南爲漢河。由竹筒支河入慈湖之頂衝。西北爲天門縣三臺湖。入慈湖之頂衝。先年隄外皆植蘆葦。藉以散緩水勢。迨後生齒日繁。小民趨利。逐漸芟除蘆葦。墾爲麥地。一經汛漲。水逼隄根。兼之垸內南首之彭公等三垸地居高阜。積水俱匯入沔沔湖。惟隄西北隅建有石口。以資宣洩。而隄之正北一面內湖水又直抵隄根。內外衝刷。最爲受險。以致潰漫頻仍。在垸內地畝原因勢居窪下。科則甚輕。農民惟以春收二麥。秋種雜糧爲務。每年春麥大概有收。迨夏汛漲發潰口時。農民多借捕魚以爲生計。本無所害。然垸內尙有紅糧三則田地。非盡屬水鄉漁糧。是以潰決之年。照例報災賑卹。並借帑修隄。卽乾隆二十六年、二十九年、三十年三次。被水蠲免賑借等項。已計費萬有餘金。而潰口趁時補築。自應照官督民修之例。第每年竭力修工業民洵屬甚苦。是潰口之後。搶築大費周章。卽無水之年。歲修亦復不易。蓋緣收麥捕魚。既有自然可得之利。擇地而處。又無飄廬蕩舍之虞。迨責以畚插泥土之役。自覺格外苛求。是以有情願廢隄不築之請。查該隄長計七千五百餘丈。高僅三四五六尺。寬僅二三四五尺。隄雖縣長而卑薄殊甚。向係垸民分上下八總。各按地畝出夫分修。今欲足資捍衛。必須加高培厚。但所費甚鉅。民修力有不能。借帑難以徵補。况總計垸內每歲共徵各則銀不及一千三百兩。米僅八十餘石。通計節年賑貸浩繁。反倍多於額徵之數。實屬虛糜。且在民生既相習水鄉。在

國計又歲入無幾。不如改糧廢隄。以便民生而順水性。查境內上八總民田。以紅糧上中下三則起科者。歲徵銀六百十六兩零。南米八十一石零。又湖地以漁糧上則起科者。歲徵銀二百三十七兩零。又軍田歲徵銀一百六兩零。屯幫銀六十六兩零。軍幫銀四十九兩零。下八總民地。以紅糧水塘荒地草墻等則例起科者。歲徵銀四十三兩零。南米五石零。又民地以漁糧中則例起科者。歲徵銀八十四兩零。以漁糧下則例起科者。歲徵銀六十七兩零。今將上八總民田紅糧三則。改漁糧上則。計減免地丁銀九十九兩零。減免南米八十一石零。其軍科則例。輕漁糧上則從輕。俱有隨徵幫費銀兩。亦將該軍田改爲漁糧。下則計減免銀六十兩零。所有原徵幫費共銀一百一十五兩零。係辦漕必需。應照舊徵收。下八總民地內。雖亦有紅糧。但係水塘等則例。較漁糧從輕。及原係漁糧者。悉仍其舊。毋庸議改。惟內有應徵南米五石零。今既改爲漁糧。應同上八總南米八十一石。一并減免。以符漁糧則例。似此改則起徵。該境內盡屬漁糧。科則田地。無水之年。以地爲利。有水之年。卽以水爲利。任水之自然。不與之爭地。俾免告災請賑之繁。其原有隄陸。聽其自便。亦省修築傳呼之擾。雖現請減免銀米。共計二百數十兩。較之頻年蠲賑。所省實多。於國計民生。兩有裨益。如蒙天恩。允臣等另飭造減免細冊。照例具題。由部臣覆核。載入全書。永遠遵守。謹繪圖貼說。恭呈御覽。至此外沿江臨河有隄垵之州縣。亦須調劑者。容悉心諮詢。因地制宜。從容籌議。皇清奏議。今按廢隄改糧之請。下卹民生。上紓國計。誠善舉也。東南水鄉。其有形勢相埒者。仿而行之。澤孔長矣。

乾隆三十一年六月二十四日。高晉奏。常州府武進縣孟瀆德勝兩河。鎮江府丹陽縣九曲河。於通漕濟

運水利農田均相利賴。緣江潮往來。流沙停積。致河身年久淤塞。亟應挑浚深通。三河共估工料銀七萬餘兩。需費浩繁。民力難以措辦。經陞任督臣尹繼善會奏。請於司庫存公銀內借給備辦。分年徵還。荷蒙聖恩允准。臣抵任後。遴委河工幹員。覆勘核實確估。一面交地方官選擇誠實士民。分派段落。於春融農隙時。集夫儻辦。仍委諳練河員。分段督催。責成道府隨時查察。嗣據稟報於本年二月十七日。及二十一等日。先後完工。由該道府查驗如式。開壩通流。茲臣親往各該工。逐段量驗。寬深丈尺。悉與原估相符。修建閘座。亦以次告竣。且四五月間。各處雨水過多。幸賴河道深通。宣洩甚爲迅速。於田疇水利。大有裨益。該處紳衿士庶人等。無不歡欣鼓舞。感頌聖仁。惟是三處河道。通達大江。爲潮汐往來之所。若不量加歲修。恐沙泥壅積。難以經久。現在酌籌善後事宜。責令兩岸得沾水利士民人等。分年挑浚。並將閘座依限啓閉。交地方官督率經理。以期永收水利之益。其所借司庫存公銀兩。現亦按年徵還。至山陽縣借帑挑濬之澗河。高郵州借帑挑濬之運鹽。澄子二河。據報於本年三月二十三日。及四月三日等日。先後完工。并據該管道府查驗如式。臣現赴河工防汛。卽順道親往驗收。另行奏聞。南河成案。

是年奉上諭。常德府城濱臨湖地。應修隄垸一事。雖係官隄。少而民垸多。但此次山水驟發。漫溢江湖。民間猝被異漲。非尋常被水者可比。災民口食維艱。現在加恩賑卹。期無失所。豈能復有餘力。營修隄垸。從前二十九年。湖北監利縣江水漲溢。衝損孫家月隄。經該撫請借帑興修。會降旨官爲修築。免其徵還。此次所有應修民垸。並著一體官爲修建。以卹民力。且災後興舉隄工。無食貧民。兼資以工代賑之益。著該撫將積水處所。上緊設法堵禦疏消。卽速勘明。應修各隄垸殘缺丈尺。剋日興工。俾災黎均沾實惠。該部

卽遵諭行。大清會典事例。

乾隆三十二年四月十三日。高晉奏。上月二十七日。奉上諭。乾隆二十七年七月內。據高晉奏。江防廳。迴瀾壩。江灘塌陷。距瓜洲城十一二丈。及三四丈不等。原有之歸崖埽。旣經塌卸。已成坑塘。難以施工。填補。議將新修埽工。簽椿壓實。並築子堰爲靠。及於埽外。拋填碎石。以資鞏固。旋據奏報工竣。三十年春。朕南巡。親臨相度。埽工俱已修固。江流頗覺安瀾。惟與瓜洲城逼近處。所恐岸或續坍。卽不得不籌及避讓。溜勢收築城垣。爲一勞永逸計。迄今又閱數年。夏秋潮汛。若何。埽岸有無。汕刷。沿江一帶。曾否長有沙灘。足資保護。未據奏聞。著傳諭高晉。將邇年潮汛隄工。及現在護沙長落情形。確切查明。據實覆奏。以慰廑念。欽此。仰見我皇上。廑念江防。疇諮保護。無時無處。不在聖明遠照之中。查迴瀾壩工。自乾隆二十九年秋。汛江灘塌卸。搶護平穩後。三十年春。恭逢鑾輅臨幸。荷蒙皇上。周覽形勢。指授機宜。臣欽承聖訓。敬謹遵守。每年霜降後。卽會同河臣。督令道參廳營。將舊埽卑矮殘缺處。所逐一勘估。次年桃汛前。將應修之工。用柴加鑲。厚壓重土。以禦風浪。埽外所下碎石。歷經大汛。潮汐往來。風浪汕刷。不無掣卸空虛之處。復多加填碎石。以固根基。兩年來。仰賴聖主洪福。夏秋潮汛。均慶安瀾。該處埽石工程。平穩形勢。如舊。臣去夏。赴工防汛。曾親歷相度。江灘溜勢。雖已開行。但碎石外。舊有坑塘。仍未淤平。是以尙未長有沙灘。原擬本年。再加查勘。多加碎石。俾坑塘逐漸填平。方可望其長灘。如查長有沙灘。堪資外護。卽可毋庸收小城垣。讓地與水矣。容臣防汛到工。將該工形勢。隨時查勘。與河臣李宏。並諳練工員。悉心講求。辦理妥法。再行請旨遵行。南河成案。

五月二十六日高晉李宏奏江防廳屬瓜洲城外迴瀾壩坍卸處所仰蒙皇上廬念諭旨垂詢經臣高晉將該處並未長有沙灘亦未續有坍卸情形覆奏臣李宏赴揚河揚糧江防等廳查工亦至該處會同查看逐段查丈上段四十五丈離城寬二三十丈埽外九丈以內水深四五尺中段二十丈離城四五丈埽外五丈以內水深一丈餘尺至二三丈不等下段長五十五丈離城二三十丈至八九十丈埽外五丈以內水深一二三丈不等臣等上下履勘細加籌畫三段共長一百餘丈近年所拋碎石俱護埽根埽外雖未長有淤灘而各段並未續有坍卸形勢如舊此時若再加碎石擁護更資穩固目下經臨大汛上段四十五丈離城較遠而水勢亦淺應將中段離城最近處長二十丈並下段水深處長五十五丈再酌添碎石俾資抵禦嗣後每年仍隨時察勘情形逐漸拋填日久坑塘平滿溜勢漸遠可期淤灘外護核計現拋碎石需銀二千五百餘兩卽於該廳本年庫貯內通融辦理毋庸另動錢糧已遴委幹員會同該管廳營購辦石塊如法拋填南河成案

八月上諭軍機大臣等據定長奏湖北黃梅縣董家口以下卽係江南地方舊有隄陸一道自順治年間修後並未重修若能修復舊隄一百里不特黃梅廣濟可資捍禦卽江西德化江南宿松等縣胥受其益等語黃梅等縣居全楚下游內湖外江易致淹浸據圖內所繪情形如涼亭商家各口未嘗非節年修築之隄工一經江湖異漲卽不免衝潰今欲於董家口以東復築隄百里則是加之堵束與江爭地當水發時上流不更激而漲溢乎且此隄自順治年間旋建旋廢久未修葺可見江水勢大原非一綫隄所能抵禦此時卽勘估修復亦未必能一勞永逸則又不如順其自然之爲得也定長於江防諸務未經諳習

茲但據道員盧謙所稟欲議興修恐於江湖形勢未必實有神益此地與江西安徽毗連定長原有與三省會辦之語高晉總理河務有年籌辦水利素爲熟悉著交與高晉前往相度情形會同定長熟商妥議具奏純皇帝聖訓今按是歲董家口工程估需修築銀一萬七千數百餘兩該督等奏請借帑扣還奉諭加恩動用公項免其扣還不獨以防止水可復田廬抑且以工代賑足資安集矣

是年奉上諭湖北黃梅等縣董家口以上界連江西德化境內一帶江隄潰決之處應行修築估需銀一萬七千九百餘兩著加恩即動用公項交地方官實力妥辦毋庸借帑扣還俾貧民得以赴工餬口是於捍衛田廬之中推廣以工代賑之法實屬一舉兩得該部即遵諭行又復准湖北省城保安門外蕎麥灣江岸隄工舊隄外灘坍塌數百丈全賴月隄防護現今西岸江灘漸長江水逼近東岸離隄僅二丈餘至五六丈不等於時和歲稔四字號舊隄內再挽築月隄一道并於頂衝處所添修排椿接崖內添裏戩其內外殘缺坍塌低薄之處加幫寬厚今按乾隆四年書築蕎麥二十四年書改築蕎麥是年復書加築蕎麥即九年湖廣督臣鄂彌達請修武昌隄工疏中議於蕎麥灣築大隄一道誠以武昌郡治橫枕江流洪波激蕩如撼岳陽而蕎麥灣緊臨大江形勢兜曲適當回溜之衝治之匪易故屢見施工也 大清會典事例

乾隆三十四年三月十九日李宏奏臣於三月初二日前往揚河揚糧江防等廳勘核工程料物查高郵寶應一帶內運外湖兩岸各工本年應修春工去冬先已勘估核定正月以來各廳次第修做今逐工履勘均照估辦理堅實如式兩岸臨湖石工凡歷年久遠稍有脫落殘缺之處俱令隨時修補完整免致日

久塌卸多費錢糧。其江防廳迴瀾壩。節年拋填碎石。抵禦江潮。現在石塊擁護埽根。一律穩固。已收實效。此時無須多爲添辦。惟迴瀾壩中段十丈。碎石尙覺單薄。應酌量加添。逐細勘估。需銀四百餘兩。隨札商督臣高晉。歸該廳庫貯辦理。定限大汛前拋填完竣。至揚糧廳金灣、東灣、西灣、鳳凰橋、壁虎橋等處。歸江各引河。現俱通暢。高郵、邵伯諸湖。所存底水。較上年此時計小二三寸。揚州鈔關上下。今春撈淺處。水勢一律深通。重運漕船。過行無滯。南河成案。

乾隆三十五年閏五月上諭。軍機大臣等。今日召見推陞溫州府知府福隆阿。因其久任江防。同知詢及瓜洲城外江工。據稱每年由龍潭將碎石運往填入近岸江中。以禦急溜。歲需二三千金不等。其石塊有無衝失。無由深考等語。瓜洲城近瀕大江。乾隆二十九年。江漲衝刷。漸及城根。沙岸多有損翳。曾經高晉等以碎石填禦。潮水不致內侵。近年俱經奏稱。江汛恬瀾。洲城安鞏。並未聞歲煩工作。今福隆阿之言。則江岸填石。竟成年例。如果思保衛城垣。自當籌一勞永逸之計。若徒事補苴下策。歲復一歲。長此焉窮。且碎小之石。抵禦洪流。豈能保無隨波漂盪。石投水底。又無形跡可稽。其是否如法施工。憑何考覈。每年雖僅二三千金之費。而積十年以計。已數萬金。似此虛糜。又有何益。况高晉、李宏伏、秋防汛。亦祇經意於湖河緊要工程。此等江防事宜。斷未必留心查驗。不過委之該同知。而河廳人員賢否不齊。其果能覈實濟工者。十不得一。其闕茸無能。受人愚蔽。及藉口開銷。從中染指之弊。皆所不免。並不止於有名無實。因思江岸如必須用石填護。亦非犖確細塊所能勝。或改用大石墜積。庶脚根堅牢。足資永久。而大學士尹繼善。則云法起於嵇曾筠。爲總河時。相沿至今。原屬補偏救弊之策。究無實濟。至江水東坍西漲。其勢靡常。

非人力所能強禦。設或侵至城根。不若將南面城牆。少收向內。較之水底。無可考校之工。似爲省力。以朕論之。積十年之虛費。以移城南角。亦不過二三萬兩。此司河者所當計及。著傳諭高晉、李宏。遇便前往會同查勘。作何籌辦。可以經久無弊。據實悉心妥議具奏。純皇帝聖訓。

六月十八日。李宏奏。上月二十一日。奉上諭。已恭載。上月。欽此。臣等跪讀聖訓。實切欽凜。復查迴瀾壩於乾隆二十九年六七月間。因江水盛漲。坍陷入江。經臣高晉歷查。從前辦過江工成案。並廣詢辦理成法。在靠崖拋填碎石。得底後鑲做防風工。竣後。誠恐江灘坍漲靡常。請俟將來再看情形。如江勢已定。並不續坍。或又漲出新灘。自應仍循其舊。儻溜勢仍復北徙。衝塌崖岸。止應將城牆改進。庶費省不致生工。三十年。恭逢聖駕南巡。備陳原委。繪圖貼說。恭呈御覽。蒙皇上渡江時。就近閱視。指授機宜。臣等歷今遵循辦理。迴瀾壩溜勢。自三十一年。卽已開行。江岸得以塘護如常。三十二年。復蒙皇上廬念降旨垂詢。瓜洲城逼近處所。恐岸或續塌。卽不得不籌及避讓溜勢。收築城垣。復經臣等會同勘明。自拋填碎石後。雖未長淤灘。亦無續坍。似有成效。復經奏准在中下二段。離城最近。並水深處。加填碎石。以期坑塘漸次填平。長有沙灘外護。卽毋庸收小城垣。工竣核實用銀二千五百兩。有零。迨三十三年二月內。汛水未長以前。臣等親往江工。逐段查驗。碎石俱高出水面。擁護埽根未動。細勘形勢。上段殷家莊挑溜得力。及中段水深處所。尚應酌加石塊。臣等又會奏辦理。工竣核實用銀一千二百兩。零。上年三月。臣李宏赴工查勘。石塊均屬穩實。無須多爲添辦。惟中段略覺單薄。估需銀四百餘兩。亦經奏蒙聖鑒。去年冬底。今歲夏初。臣等先後至工查驗。碎石並無坍卸。形勢穩固。毋庸再添碎石。遂未估辦。此節年辦理之實在情形也。祇緣

碎石工程。以船裝石。拋填於江。從前朦混欺隱之弊。不一而足。臣等深鑒於此。是以歷年所辦碎石工程。俱係親看形勢。確切估計。分委同知。知縣等員。採辦購運。另派幹練河工人員監收。每到一船。量明石塊。丈尺。如法拋填。工竣。仍委淮揚道查驗收工。不使短少弊混。如遇風浪汕刷。石塊不過外遊。仍在塘內。尙無衝失。第江岸工程。誠如聖諭。須用大石墜積。更資永久。近年購到之石。實已較大於前。經臣等遵旨親到瓜洲。會同履勘。細加籌酌。查該處江勢如舊。查探水勢。上段四十五丈。離城寬二十三丈。埽外一丈。碎石上水深三四五尺。中段二十丈。離城四五十丈。埽外二丈。碎石上水深六七尺。下段五十五丈。離城二十丈。至八九十丈。埽外二丈。碎石上水深七八九尺。近年所填碎石。一律穩固。堅整。就今情形而論。江岸既屬平穩。碎石之工。年省一年。今歲已經停辦。後此可以無庸歲歲加拋碎石。應請止將護崖防風照舊修整。以資防護。將來設遇江水盛大。溜往北趨。衝擊崖岸。侵至城根。碎石不足抵禦。多費錢糧。臣等卽將瓜洲南城角。量爲收進。讓地於江。以爲經久之計。臨時再爲請旨辦理。南河成案。

八月二十一日。李宏奏。八月初十日。後。連值西南風暴甚大。迴瀾壩般家莊等工。拋填碎石。樓護之處。仰賴皇上福庇。一律穩固。瓜洲迤西大莊一帶。無工。舊子堰接連查子港埽工。風浪衝擊。於十二三等日。場去長八十餘丈。崖外水流六七八丈。查該處離瓜洲城尙遠。計五十餘丈。並無妨礙。現已塌定。臣隨督飭該管道廳營弁。將沿江子堰。照舊補築。以利往來。繕道。謹繪圖貼說。恭呈御覽。南河成案。

是年。議准江西豐城縣角公嘴地方。第四段土隄。改建石隄二十二丈。大清會典事例。

乾隆三十七年。議准江西豐城縣豐字第三十七號。鄒家腦土隄二十四丈。第四十七號。左家渡土隄十

三丈一律改建石隄。大清會典事例。

乾隆四十年七月十三日。南河督臣高晉奏。六月二十九日。奉上諭。據吳嗣爵奏稱。瓜洲城外迴瀾壩及大莊等處。從前拋填碎石。抵禦江潮。現在石塊擁護壩根。甚爲穩固。毋庸再爲添辦等語。此項碎石工程。前經諭詢高晉。查其是否有益。據實覆奏。每歲拋填碎石。藉以擁護壩根。相沿已久。是以仍聽其照舊辦理。今據吳嗣爵以壩根穩固。已有成效。奏請嗣後無庸添辦。不知何所見而云然。或係未悉從前立法之由。遂欲省工惜費。輕議更張。萬一停止之後。江潮復有衝嚙。漸致侵及壩根。又不免將來另辦。是每年所省者少。而日後所費者大。殊爲非計。著傳諭高晉。將此項拋填碎石工程。詳加察核。每歲有無開銷。於瓜洲城岸有無裨益。及是否可停。並應照舊例辦理之處。逐一查明。據實覆奏。并諭令吳嗣爵知之。欽此。查迴瀾壩自乾隆三十二年三月。及三十五年閏五月。節經臣查明。每歲拋填碎石。並未續坍。工程穩固。著有成效。此後應酌看情形辦理。無庸每歲添拋。並將歷年開銷銀數。奏蒙聖鑒。近年有稍爲添補者。有並未加培者。其拋填碎石工段。亦不止迴瀾壩一處。如附近之江安壩。查子港。大莊。蓋壩。并水利廳屬之查家壩頭等處。均有碎石工程。三十六年。係另案請銷。三十七八兩年。係彙入庫貯辦理。並不另請錢糧。此歷年辦理之情形也。上年及本年。因江水安瀾。各工所拋碎石。甚爲穩固。是以未曾添辦。原非永行停止。經河臣吳嗣爵將驗過江工具奏。止言壩根穩固。無庸再爲添辦。未將嗣後隨時相機保護。分晰聲明。致上廬宸衷。茲臣親赴江岸。迴瀾壩及大莊等處。詳加查勘。節年拋填碎石。俱一律穩固。第江岸坍漲靡常。工多逼近。城垣居民。設有坍塌。自應隨時保護。而下壩多致糜費。且不能穩固。惟拋填碎石。歷經有效。今

若不再添辦。萬一江潮復有衝囓。漸致侵及城根民舍。誠不免將來另辦。所費更大。是江工拋填碎石。原係補偏救弊之良法。自不便輕議停止。嗣後臣等惟有隨時察勘。如果形勢照舊。現有碎石各工。穩固無虞。自無庸歲歲添辦。或輒工日久外遊。或另有新生工段。則仍當勘估辦理。務期省所當省。費所當費。俾江工永資保護。以仰副我皇上殷殷訓誨之盛心。南河成案。

此
页
空
白

續行水金鑑卷第一百五十四

江水章 三

乾隆四十一年六月二十五日高晉薩載奏臣等接據江防廳營稟報瓜洲城外查子港工迤下殷家莊接連迴瀾壩江岸於六月初十日卯刻兩頭並後身忽然裂縫登時坍陷入江約長一百餘丈寬四十餘丈西南城牆塌去四十餘丈勢甚洶湧爲時甚暫人力難施幸城隅向無居民並無損傷人口內地高水面五六尺臣等聞信卽先後馳赴履勘測量塌倒地方靠崖水深七八尺及一丈不等其二三十丈外水深十三四丈初十日後形勢已定並未續坍查瓜洲城外江灘從前原屬寬闊離城甚遠嗣因江流北徙衝刷灘崖於康熙五十五年建築護城埽壩每歲修防雍正五六年後江流直趨瓜洲江灘漸次塌進迨乾隆二十九年六七月間迴瀾壩塌陷入江長九十餘丈逼近城垣甚爲險要當於江勢塌定後靠崖拋填碎石修做防風以資搪護奏奉俞旨恪遵辦理一面細審江灘坍漲靡常儻溜勢北徙衝塌崖岸城南居民稀少與其費帑保城而江灘終不足恃不如將城收小讓地與江則費省而不致生工三十年恭逢聖駕南巡親臨閱視臣高晉曾繪具圖說敬陳原委三十五年仰蒙皇上垂注江工以江永東坍西漲非人力所能強禦設或侵至城根不若將南面城牆稍收向內較之水底施無可考校之工自爲省力特降諭旨命臣高晉勘籌彼時溜已開行江岸平穩是以奏請照舊守護俟塌至城根卽將南城角收進臨時請旨辦理奏蒙俞允今殷家莊接連迴瀾壩又復坍陷並坍及城垣臣等會商現當江水甚大必須將查

子港迴瀾壩埧卸工頭。先用料裹護。以防江浪汕掣。隨督令價裹完竣。現在水勢平定。壩工穩固。至防守保護之計。應遵三十五年聖訓。將城量爲收進。讓地與江。遂又將瓜洲城垣內外。周遭相度。圍環計長一千五百四十三丈九尺。城之東北隅。及西門東門。俱有街市。民居稠密。惟城之西南隅。地勢高窪不平。目下壩卸處所。城內尙有隙地。自西城根斜至南城根止。長一百一十餘丈。自外至內。寬五六十丈。可以讓出。靠後卽有民人居住。不能多讓。應卽在此處補還城垣。但江灘漲埧莫定。終難保其不再埧進。再四思維。卽就埧缺之城。擬做土城一道。礮築堅實。上面仍加砌女牆雉堞。與原城一律相平。則需費無多。卽可分別內外。亦足以資攔禦。城內居民。更可有恃無恐。至埧去之殷家莊。上下壩工。原係江浙重運糧艘。渡江進口。繚路。今壩工埧卸。兩頭城牆陡立。無路可通。應將所埧城牆。兩頭各拆去數丈。以順其勢。將隍土攤平。因沿江靠崖一帶。築成土壩。仍用碎石鋪底。以資穩固。以通繚路。又可爲土城之外護。亦甚有益。其拆下所埧城磚。卽爲土城加砌女牆之用。所需補城修壩銀兩。統於庫貯內核實通融辦理。毋須另請錢糧。如此籌辦。雖未能一勞永逸。而補偏救弊。所費無多。旣可不與江爭。亦可隨時保護。謹繪圖貼說。恭呈御覽。南河成案。

是年上諭。軍機大臣等。高晉等奏稱瓜洲外查子港工。迤下殷家莊。接連迴瀾壩江岸。於六月初十日。裂縫埧場入江。約長一百餘丈。西南城牆。塌去四十餘丈。現在水勢已平。兩頭壩工。業經裹護穩固。請將瓜洲城量爲收進。讓地與江。並於沿江靠岸一帶。築成土壩。以通繚路等語。止可如此辦理。從來水行無事。難與爭地。河流尙且不可。况江勢浩瀚。豈人力所能抵禦。朕從前巡幸江南。親閱瓜洲一帶江工。恐江溜

奔注。侵至城根。欲將城牆稍收。以讓水勢。嗣復諭令高晉勘閱籌辦。高晉以溜已開行。江岸平穩。遂未辦。及惟照舊拋填碎石。爲補苴無益之計。今果如朕所料。使早將城垣收進。何至猝爲江溜所衝。頽則數年。來拋石之費。不歸於虛擲乎。著傳諭高晉。當以前事爲鑒。妥善經理。以資鞏固。並諭薩載知之。純皇帝聖訓

乾隆四十五年。湖北巡撫鄭大進奏。鍾祥潛江各隄潰口。攸關億萬田廬。亟宜興築。以資保衛。鍾祥縣自永興觀至保隄觀。挽築月隄九百九十七丈。又殷家灣潰口。淤沙盈積。難於沙面築隄。應挽築月隄二百五十三丈。潛江縣之長一垵。地勢窪下。應自地勢較高之董家冶。至鎮龍山。挽築月隄一千八十六丈四尺。則襄水不致衝突矣。從之。皇朝文獻通考

是年。奏准湖北潛江縣護城隄工。向係按田徵費修理。嗣後停止徵收。所需銀兩。在荊門州沙洋隄工籌備銀內酌撥銀七百五十兩。存安陸府庫。以爲歲修護城隄工之用。該縣鋪兵五十九名。每名額夫工食銀二兩零。不敷口食。從前在派徵費內支給錢五十三千有奇。今在酌撥息銀內動支。又奏准湖北省城漢陽門外。添建護城石岸一道。長一百三十五丈。高五尺。又奏准湖南芷江縣。添建礮岸七十七丈。桃源縣。添建礮岸四十八丈八尺。又奉上諭。工程動項興修。自有勘估原冊。及工竣報銷。部中覈減。亦必有一定章程。今湖北省借項興修隄工。動用銀七萬八千五百餘兩。此必因當仍徵於民之項。地方官任意浮冒多估。爲營私之地也。設如部中覈減。不過數千兩。尙在情理之內。乃竟駁減至一萬九千六百餘兩之多。則是七分之二矣。設遇數十萬兩之工程。竟將覈減至十餘萬兩。有是理乎。向來工部。遇有此

等浮冒。如海塘及韓莊歲修閘壩等工，皆係專摺奏明查辦。此案以七萬餘兩工程，竟至駁減七分之二。何不奏聞請旨飭查，僅照例題本完結。此事著秉公查詢，據實具奏。該督撫亦著明白回奏。其覈減銀一萬九千餘兩，追完時發商營運，以備再有工程動支。又奏准湖北漢陽江工險要，於荊門州沙洋隄工籌備銀內，動支銀五千兩，發交漢陽典商承領，以一分五釐生息，作為籌備江工之用。大清會典事例。

乾隆四十九年，江西巡撫伊星阿奏，南昌、新建、鄱陽、餘干、建昌等六縣下游地接鄱湖，又當章貢諸水之衝，圩隄衝塌，田禾被淹，請借項修築。下部議行。皇朝文獻通考。

乾隆五十二年，巡撫書麟因無為新河逼近大江，築壩無地，奏請開濬沈家塘至方家橋月河，袤五百九十四丈，底寬十五丈，面寬三十丈，中深一丈五尺，導黃白二湖之水，使荻港圩涸出餘地，為立壩之基。廬州府志。

乾隆五十三年六月，荊州大水，衝決郡城護城隄，沿江隄漫缺二十餘口，特發帑項修辦，以次報竣。按是時，荆南江水泛漲，隄塍潰決，灌入城內，郡城及滿城均被淹浸。先於四十四、六兩年，兩次被衝淹及城市，城垣亦不堅固，漲水一至，立見潰決。衝開西北兩門，直入城內，水深丈餘。較四十四、六等年被淹更重。志稱江水發岷山，抵巴東入荆襄，至岳陽與洞庭水合，其中受決害者，惟荊州一郡為甚。自明正德、嘉靖萬歷，荆江告警無虛日。康熙癸巳，決於萬城，澆澆巨浸。癸卯決於周尹店，丙辰潰郝隄。辛酉、壬戌，黃灘壘決，展轉數年。乾隆己亥、辛丑，均經被水，請項重修。至是，護城隄決，淹浸城民廬市。先經圖桑阿奏報情形，並稱城垣基址鬆動閃矧，須另修建。特派大學士阿桂並德成前往勘辦，奉上諭，據舒常奏馳抵荊州查

明被水情形。並繪圖呈覽。詳閱圖內。沿江隄工。漫溢至二十餘處。各寬十餘丈。至數十丈不等。此次荊州被淹較重。皆由隄塍不固所致。該處隄工。於四十四四十六兩年。被水後。俱曾借項興修。如果工程堅固。何至屢被潰決。著阿桂會同舒常等。查明嚴參。嗣後並著定限保固十年。此次應修各工。竟著動項興修。官爲辦理。該處城垣。自以不移爲是。至城廂內外。淹斃大小男婦一千二百餘名。皆當賑卹。其餘各災戶。現在城上搭棚居住者。尙有一萬餘人。著舒常先行查明。加意撫卹。似此重災。祇當期於無遺。不必復言無濫。荊州現有修建隄塍城壩各工。及撫卹兵民之用。再發戶部銀二百萬兩。派員迅速解往。並著阿桂通盤酌算。如尙不敷用。卽據實奏聞。以便再行撥解。欽此。仰見我皇上軫念災黎之至意。查川江當江陵、公安、石首、監利、華容間。自西轉北。向東回南。勢多迂曲。至岳陽自西南復轉東北。逆流而下。故決害多在荊州。夾江南北州縣。沿岸爲隄。咫尺不堅。千里爲壑。決口至二十餘處。下流州縣。自不能免於淹浸。至決口四通湖泊。賊匪竄伏。江陵之龍灣市。監利之分監所。公安、石首、澧州、安鄉四至水口。俱爲賊藪。隄防不修。則津渡散漫。賊盜分道四出。特遣重臣前往督辦。發內帑二百萬兩。官爲承修。更不絲毫派及閭閻。集夫興事。剋日功成。所以爲瀕江災民計者。無微不至矣。明時公安竹林港。石首陳公瓦。遞決。集夫修築。終無成績。但爲開穴口之計。通志江陵舊有九穴十三口。可開者赤剝、郝穴、楊林。然至今日。生齒日盛。耕牧殷繁。湖渚漸平。枝河漸湮。穴口故道。皆廢舍畎畝。卽章卜等穴故道。無復舊跡。此開穴口之所以不可行於今日也。惟有隨時堅築。補偏救弊。爲保衛民生至計。天語煌煌。恪謹遵守。民生永賴。至荆南以開古穴爲得策。亦自有故。虎渡流注澧江。入洞庭。江南之溪水俱注之。郝穴流出漢口。與大江復合。江北之溪水

俱注之。衆水會合。則流行不絕。注瀉有河。則水道不壅。二穴所以至今獨存。荆南人猶幸有虎渡郝穴。可分大江南北之勢。必將二穴枝河淤塞。開通使不至湮如舊穴。枝隄修築就緒。然後開水門以受江流。分洩水勢。所在通流。無東西泛濫之患。然不可專恃開穴。疎其修守。終以慎重隄防爲第一義也。河渠紀聞。七月十二日。湖廣總督舒常奉上諭。昨因圖桑阿奏。荆州城垣四十四六兩年。曾兩次被淹。城垣本不堅固。此次被淹尤重等語。恐該處城垣屢經淹浸。基址鬆動閃爍。另須建築。已派阿桂前往會同舒常履勘。是否可以酌量移建。並詳細諭知矣。但荆州爲古來重鎮。城猶是城。江猶是江。何以從古俱未聞有被淹之事。而本朝百餘年來。亦未聞此事。乃十年之間。三次淹浸。而此江水竟至衝入城內。情形尤重。且閱輿圖志內。荆州繪在江北。若果在江之北。則水勢應由西南兩門而入。何以此次又繞至北門。殊不可解。是否因近年江流。又有遷移。密邇城垣。以致頂衝受惠。是以昨思及該處城垣。既需另建。若仍舊基址。與水爭地。將來或仍有潰決不成事體。因令阿桂前往確勘再定。但城垣既移。則衙署倉廩監獄等項。概須搬移。所費又恐不貲。况該處素稱富庶。民人起居其處。亦不免安土重遷。雖百姓願移與否。尚可聽其自便。而衙署等項。亦可量爲收小。然恐需項浩繁。朕意此次水勢。雖衝入城。旋即消退。若文武各衙署。並倉監等項。不過稍爲浸濕。或有房間尙好者。或有基址未動者。尙易收拾。而商賈民居。不致蕩析。又不如不移之省便。第昨據圖桑阿奏。滿城基址較高。尙被淹浸。則水勢雖由西北兩門而入。其東南各門。恐亦一律淹浸。或文武各衙署。並倉監等項基址。全行泡壞。與其於鬆浮之地。重行建蓋。仍不堅固。又不如擇一高阜處。所收小移建之爲愈。德成於工程。尙爲熟諳。著令其逐加詳勘。並將該處城垣等工。移與不移。通盤

估計孰爲減省。據實具奏。此事朕在數千里之外。無由懸揣。因反復思維。究不能知移與不移。使官民兩便。朕實無成見。阿桂歷經委任。必能善體朕意。惟在阿桂等到彼。詳細察勘。虛心採訪。妥商具奏。以期一勞永逸。其荊州自本朝定鼎後。曾否被水。除交軍機大臣詳晰查奏外。並著阿桂等到彼後。一並查明具奏。至隄原爲禦水而設。若果隄工鞏固。不致潰決。原不能遽至城垣。與其搬移城垣。而隄工不固。或又衝決被淹。豈不徒滋勞費。若城可不移。莫若將所省移城之費。於修隄時量爲估計。加高培厚。認真修築。俾崇墉屹立。亦足永資保障。但該處隄塍。興修未久。何以卽被水衝。自因承辦各員。見該工例係民修。從中偷減草率。情弊顯然。著阿桂德成務遵昨降諭旨。到彼後親勘基址。分別嚴參治罪著賠。至該處城垣。無論移與不移。但經此屢淹之後。基址必不能鞏固。若僅間段黏修。不久又虞損裂。殊非長久之計。總當重行建蓋。著交德成詳細察勘。或將低窪之處讓出。或另加高培厚。堅固建造。以垂久遠。同日又奉上諭。昨因圖桑阿奏荊州城垣四十四六年兩被水淹。本不堅固。此次被淹尤重等語。因思該處城垣屢經淹浸。或因江水遷移。密邇頂衝之故。且屢淹之後。基址鬆浮。自須另建。何不選擇離江較遠高阜處所。移建。以期一勞永逸。阿桂歷經委任。於大局形勢。較爲諳悉。是以派令前往。會同該督履勘。定議具奏。但阿桂到彼尙需時日。舒常於二十六日。自省起程。計此時早抵荊州。著將昨日及本日所降諭旨。先行寄與舒常閱看。令其先將該處城垣究竟應移與否之處。詳悉籌勘。不必等阿桂到彼。卽就所見。據實迅速覆奏。舒常覆奏。奉上諭。飭查荊州附近。有無高阜之區。城垣應否移建。令臣於阿桂德成未到時。先行查明覆奏。欽此。寄信到臣。遵查郡治地當孔道。四面平原。川江西來。由城南而東。入岳州。匯洞庭之水。下達武

昌又有內河之水。由城東北流百餘里。卽合漢水而入江。扼滇黔巴蜀之咽喉。當常澧襄樊之衝要。是以古稱重鎮。郡之附近。並無高阜之地。惟荆門州地勢較高。然距郡百八十里。相離窈遠。不足以控制江湖。此外更無可以移建郡城之地。至城南岸隄。本不甚低。從前屢次隄潰。水漫亦止。泛入內河而洩。城內從未似此被淹。實緣今夏雨澤過多。江漢洞庭並漲。又聞江西水發於湖口縣。衝入江流。致楚省疏消不及。隄塍潰缺。詢之年老滿官。及本地耆民。僉稱今歲江水高漫過境。實爲從來未有之事。臣體察輿情。咸以廬墓田園。由來已久。遽議遷移。似非所願。誠如聖諭。不若以移建城垣之資。爲增築隄塍之用。加高培厚。再將郡城全行修補。似可能保鞏固也。荆州府江隄舊案。

是月十四日。舒常奏。奉上諭。據阿桂奏稱。訪聞熟悉荆州情形之人。據云。府治內有八處洩水。近惟虎渡一口可洩。餘皆湮廢。又沙市對岸地名窖經灘。沙勢日加寬闊。江流受逼北趨。衝淹府城。或由於此。著傳諭舒常。先將荆州對岸一帶。親加履勘。是否實係洩水之路。漸就淤塞。窖經灘沙勢增長。逼近北趨。卽行查明。據實具圖。貼說覆奏。阿桂到彼察看情形。若城垣不可不移建。卽於灑江處所。酌建石壩。逼溜南趨。再將從前洩水故道。擇其疏消得力。易於修復者。卽爲挑復。並將窖經灘上。挑挖引河。俾府城不受頂衝。自可長期鞏固。欽此。遵查荆州城垣。似可毋庸移建緣由。臣已於月之十八日。恭摺奏明。茲臣欽遵諭旨。隨率同藩司陳淮。署荆州府楊恪。曾徧歷府城上下兩岸。勘查並未見有從前洩水故道。惟有虎渡口一處。在府城西南二十里之南岸。川江西來。至此分流。入虎渡口。由公安縣境內小河。南達洞庭。餘俱沿江。經石首監利等縣。至岳州府城北一百八十里。仍匯洞庭之水而下。武昌臣謹按荆州府志。江防內載舊有

沿江入穴。元時查開而得郝穴、赤剝、宋穴、楊林、調絃、小岳等六處。明時再開。則止得郝穴、調絃二處。亦久經淤塞。其廢自何年。及各在離府幾里與何方。志書既無指實。詢之年老滿漢兵民。亦皆茫然。實難稽考。又查窖經灘。卽窖金洲。距城十里。在郡治下游沙市南岸。距大江之中約長八里。寬二里餘。洲西二里許。復淤起一小洲。約長二里。寬一里餘。江水至新淤小洲。分流過窖金洲。合流而去。乾隆四十四、六兩年。沙市之觀音寺、太山廟、隄潰。江水灌入內河。回溜倒漾。淹及城根。而水勢紆緩。故得堵護無虞。然自兩次借項修築後。今年如此盛漲。觀音寺、太山廟兩隄。俱照常堅固。是此次郡城被水。與窖金洲無涉也。至虎渡口對面北岸。卽萬城隄。在郡城西南上游。爲全郡之保障。其近南門者爲玉路口。卽萬城之隄尾。萬城隄外。亦有近隄沙渚。名爲龍洲。約長二里。寬一里餘。亦可藉爲護隄之用。今夏川江異漲。虎渡口亦爲洞庭水發。宣洩不及。萬城隄外。江水陡高二丈有餘。漫過隄面。致衝潰隄身。建領而下。人力難施。全城淹浸。是此次被水。實係萬城隄潰口之所致也。臣悉心相度。察看情形。惟有凜遵聖訓。將萬城隄通行加高培厚。再於龍洲尾、玉路口二處。加築挑水磯頭。逼溜往南。似可無虞水患矣。同日。又奉上諭。據阿桂奏。前往荊州查勘。應否改建城垣摺內。稱向熟悉該處情形之人。留心訪問。聞得荊州府治對岸一帶。向有洩水之路八處。近惟虎渡一處。現在尙可洩水。其餘七處。俱久在湮廢。江水分洩之路既少。又沙市對岸。有地名窖經灘。向來祇係南岸小灘。近來沙勢增長。日加寬闊。江流爲其所逼。漸次北趨。所謂南漲北坍。以致府城瀕江隄岸。多被衝塌。屢次淹浸。其故或由於此等語。已於摺內批示。今據阿桂查詢荊州對岸洩水之路。竟有七處湮塞。而窖經灘小灘。近復沙勢增長。寬闊致江流漸次北趨。府城瀕江隄岸。多被衝塌。漫

浸現在被水情形。卽阿桂所言。竟是該處受病有由。已非一朝一夕之故。而地方官之漫不經心。已可概見。現在阿桂到彼。尙需時日。著傳諭舒常到彼。先將荊州對岸一帶。親加履勘。是否實係該處洩水之路。漸就淤塞。窄經灘沙勢增長。逼江北趨。卽行查明。據實具圖貼說覆奏。不得因失查於前。又復回護於後。阿桂到日。亦卽行詳悉查明覆奏。又據阿桂奏荊州城垣一切布置規模。由來已久。不便輕易更張。卽常察看地勢。或於府城瀕江處所。築建雞嘴石壩之類。逼溜南趨。將窄經灘沙。漸次衝刷等語。所見甚是。荊州城垣。若須移建。則衙署倉廩監獄等項。概須搬移。所費不貲。况該處素稱富庶。民人世居其地。亦不免安土重遷。朕意若府城可以無需移建。自以不移爲是。昨已降旨傳諭阿桂到後。務宜與舒常察看情形。悉心籌酌。若該處文武衙署。並倉廩等項。不過稍爲浸濕。房間基址未動。尙易收拾。而商賈居民。不致蕩析。自可毋庸將城垣移建。卽當於瀕江處所。酌建石壩。逼溜南趨。再將從前洩水故道。擇其疏消得力。易於修復者。卽爲挑復。並將窄經灘上。挑挖引河。俾府城不受水頂衝。自可長期鞏固。阿桂歷經委任。諳悉形勢。務與舒常酌籌盡善。因利乘便。妥爲辦理。總期一勞永逸。方爲全善。荊州府江隄舊案。

是月十八日。奉上諭。據舒常奏荊州沿江隄工漫潰。共二十餘處。各寬十餘丈。至數十丈不等。並繪圖呈覽。是此次被淹較重。竟由隄塍不固所致。已降旨交阿桂等查明所決之處。如係十年以內。卽將承修之員。並各上司。分別嚴參治罪。著賠矣。至該處隄塍。爲全郡保障。所關甚鉅。且民人等經此重災。亦不忍令其自行修理。是以特將此次應修各隄工。令動項興修。似將來再照例辦理。沿江隄塍。爲百姓保護田廬。而設。固應動用民力。但該處民人甚衆。若不官爲經理。誰肯首先出貲。踴躍從事。若派之於民。僅官爲經

理並不報部查核。則不肖官吏。遇有應修時。或於需費之外。竟從中加倍洒派。入其囊橐。又從何稽察。况外省習氣不堪。官工尙思肥己。此項工程。卽例係民修。如不定以保固年限。將承辦之員。必仍草率偷減。浸漁入己。殊非慎重隄防之道。現令軍機大臣。將民修各工。是否報部之處。詳晰查明具奏。並著傳諭阿桂舒常。除此次應修隄工。官爲辦理。其將來民修各隄。應如何勘估報銷。及定立保固年限之處。卽會同悉心妥議具奏。荊州府江隄舊案。

是月二十五日。舒常奏。奉上諭。內舒常所進之圖。未甚明晰。閱之不能了然。著將此次隄。先由何處衝決。江水又因何繞至北門。被淹各處。係何地方。另行展寬圖幅。詳細繪畫。貼說呈覽。欽此。臣遵查此次隄。衝決係由城西北四十里。萬城隄之工。萬城首先潰塌。其迤下之上下漁埠。及玉路口等處。亦陸續酥。水勢愈湧。以致西門衝潰入城。其大北門距西門止二里餘。地較窪下。城之北面。原有土岡一帶。地勢較高。水流至北。回溜湍急。遂將北門一並掃塌。致小北門東門。相繼衝塌。水始傾瀉東流。泛入草市內河。此當日隄潰。江水由西繞北之情形也。至於被淹之處。除沙隄地勢獨高。得免淹浸外。餘盡被淹。幸得晴霽多日。現已涸出過半矣。謹遵旨詳細繪圖貼說。恭呈御覽。同日又奉上諭。荊州沿江隄工。據圖桑阿陳淮奏。潰決後。江水衝開西北二門而入。朕意該處西北二門被衝。大江自應在府城之北。及查閱輿圖。及一統志圖。大江則皆繪在府城之南。昨據舒常所進之圖。又與輿圖所繪南北方向相同。江既在南。則城內被淹時。水勢自應由南門而入。何以此次又繞至北門。殊不可解。此必從前承修隄。各員見該工例。應民修。任意草率偷減。侵肥入己。該管上司。復不以事爲事。致工程不固。一經江水漲發。在在潰決。江

水建瓴而下。將並非頂衝處所。亦被衝淹。况閩圖內。隄工潰決。共二十餘處。自係迤西之隄。先行潰決。是以水勢由西南繞至西北。遂至衝開北門入城。致成大災無疑。昨福建臺灣文武員弁。因循玩愒。肆意貪婪。竟至釀成逆案。不得不徹底究辦。河北吏治。亦屬廢弛已極。活埋冒賑之案。相繼敗露。其辦理鹽務。輒可私立匣費名目。大小官員。染指肥橐。累商滯課。今於承修隄工。又復一任劣員。肥己誤工。屢被衝潰。而此次江水。竟至淹入城內。被災甚重。前據圖桑阿查奏。滿城淹斃者。共四百餘名。昨又據舒常查奏。府城大小男婦。淹斃者。一千三百餘名。外省官員。於災傷向有諱飾。茲報出者。已有一千三百餘名之多。則其諱匿不報者。必尙不止此數。想來不下萬餘。此等災戶。流離顛沛。傷斃多口。可憫可憐。皆由隄工不固。以致罹此重災。若不將承辦及該管之員。從重治罪。何以示懲儆而慰輿情。除交軍機大臣。將十年以內歷任湖北督撫藩司。及荊州道府。詳細查明具奏外。並著阿桂到彼後。即將十年以內之承修隄工官員。暨該管各上司。一體詳查嚴參。分別從重治罪。仍著賠補。用昭懲勸。至沿江隄。爲百姓保護田廬而設。固應動用民力。此次因被淹較重。朕不忍仍令被災之民。按例修理。業降旨動用帑項。官爲堅實修築。永資保障。俟將來每歲修理。需費無多。再照例辦理。但該處民人甚衆。若竟歸民修。不復官爲經理。則百姓誰肯首先出貲。踴躍從事。卽如井田之制。宜古者未必宜。今若此時而沿襲井田。卽雨我公田。遂及我私之句。亦徒成虛語。是將來修理隄。各費派之於民。而仍當官爲經理。第不肖官吏。於官工尙思侵剋。肥己矧此項工程。例歸民修。並無保固。官員等不特於需費之外。可以藉端加倍洒派。入其囊橐。而且草率從事。偷減侵漁。事所必有。其該管上司。又因係民修之工。遂爾漫無查察。殊非慎重隄防。保護民命之道。自

應定立章程。於應修時派委大員。確加勘估。借項興修。俟該部核准後。再按畝攤徵歸款。並定以保固年限。如在限內有潰決之事。卽嚴參治罪。著賠庶工程可期永固。而官員亦不敢有侵蝕情事。方爲妥善。除此次應修之隄。交阿桂德成妥爲估計。動項官辦外。其將來民修隄工作。何稽察保固之處。著阿桂到彼後。卽會同舒常。悉心妥議。具奏。荆州府江隄舊案。

是月奉上諭。內閣據舒常奏。馳抵荆州。查明被水情形一摺。並據繪圖呈覽。詳閱圖內。沿江隄工。潰漫至二十餘處。各寬十餘丈。至數十丈不等。是此次荆州被淹較重。竟由隄塍不固所致。該處隄工。於四十四十六兩年被水之後。均曾借項興修。如果工程鞏固。何至屢被潰決。外省習氣不堪。官工尙且思肥己。况此項工程。例係民修。向無保固。承辦之員。並不認真妥辦。草率從事。甚或侵漁入己。均屬事所必有。屢經降旨交阿桂等。查明嚴參。著阿桂到彼後。卽會同舒常等。詳細查明。以十年爲限。所有現決之隄工。如在十年以內興修者。承修之員。俱當從重治罪。仍著落賠補。其監修之該管道府。及藩司督撫等。亦著一並查參。分別議罪。著賠嗣後。並著定保固十年。如在限內衝潰者。卽照此嚴行參處。以示懲儆。此次荆州被淹。旣因隄工不固之故。則該處城垣。自以不移爲是。著德成到彼後。詳細察勘。堅實重修。以垂久遠。純

皇帝聖訓

八月初六日。奉上諭。現在荆州被水甚重。皆由隄工不固所致。因該處隄工。向係民修。並不報部核銷。是以一面諭令阿桂等。查明辦理。一面命軍機大臣。查各省凡係民修各工。向俱是否報部。茲據查奏。各省濬修隄河等工。有借項里民自行經理。並不造冊送部者。有借項官爲經理。工竣造冊送部備案者。亦有

借項造冊具題核銷者。是各省民修之工。並非全行報部核銷。章程本不畫一。立法未爲妥善。修濬隄河等工。原爲保護田廬。疏消積水起見。向係民間修理者。原不便遽動官項。且各處隄工甚多。豈能一一官爲修辦。但因係民修之工。竟不立定章程。報部核估。僅令官爲經理。則外省官員。於官工尙思侵剋肥己。矧工程例歸民修者。並無保固查銷。不肖官吏等。不特於需費之外。可以藉端加倍洒派。入其囊橐。而且草率從事。偷減侵漁。均屬事所必有。該管上司。又因向例民修。遂爾漫無覺察。工程豈能永資鞏固。幸而各處隄工。尙安穩無事。是以從未覺察。現在荊州護城隄。潰決至二十餘處之多。卽其明證。豈可不嚴定章程。令其一體報銷保固。嗣後民修各工。除些小之工。無關緊要者。仍任民間自行辦理外。如係緊要處所。工程在五百兩以上者。俱著一體報部查核。予以保固限期。興修後。再行酌令百姓出費歸款。各工既有查核。承修各員。自必有所顧忌。不敢任意從中侵剋。且有保固限期。亦自不敢草率辦理。庶工程可期久固。而閭閻不致有被淹受害情事。此正係朕爲保護民生。節省民費起見。各督撫務宜仰體朕意。遇有民修之工。妥爲辦理。嚴加查核報部。如有仍前任令屬員。從下剋扣草率從事之處。經朕訪聞。或經科道參奏。百姓告發。不特將承辦各員從嚴辦理。必將該督撫一並從重治罪。著爲令。荊州府江隄舊案。是月奉上諭。據舒常奏。漢陽武昌兩城。俱因江水過高。城中積水。無從流瀉。低窪之處。間段淹溢。省城貢院。尤爲低下。湖水歸入號舍等語。現屆賓興大典。所有淹浸號舍。該撫卽行上緊設法疏消。其被淹各處。雖輕重不等。但係災民。皆當一體撫卹。不可以荊州府城被災較重。而於被水之別州縣。心存歧視。至有失所向隅之處。欽此。伏查郡乘。江漢九江三水。總會於武昌。出峽之水。奔流至此。江身始闊。直注而東。故

武昌蘄黃之境。無大水害。然必繞會城金沙洲。已徙水泛江岸。城內明月湖水甚漲。長隄、郭公、萬金三隄。衛之不致橫潰。漢陽郡城與武昌對峙。大江環抱東南。漢江合灑水、沔水、純水。與大江會於郡北。漲則瀾漫於諸湖。漢川縣當漢江下流。舊有長湖、橫湖、觀湖、龍車、小松等湖。蓄水。又有城北南湖、魚湖、蓼湖。湖西岡水、洪等垸禦水。漢江亦至此分流。水勢漸平。漢口爲漢水瀉流之地。江水洶湧。橫截其口。流不能洩。復逆折而上。漫入大白新灘等湖。而外有大別一山障禦。故歷來未設防。武昌城內之明月湖。漢陽之太白諸湖。祇爲江水過高。截流內水。不能外出。而瀾漫。非別有衝潰也。聖主愛養黎元。於被水稍輕之州縣。一視同仁。恩施益隆矣。河渠紀聞。

乾隆五十三年九月初一日。湖廣總督畢沅。奉上諭。據阿桂等奏。荊州東北一帶江面。較上下游本爲窄狹。江中淤沙一處。由來已久。土名窖金洲。其始祇係活沙。隨流遷徙。靡定。嗣後漸長。漸大。叢生葦荻。遂爲江中巨洲。江流至此。順洲南北分流。至洲尾始合爲一。二十餘年來。漲沙日益寬闊。侵佔江面。且洲上所長蘆葦枝幹堅實。密翳攢排。不特洲沙攔梗。激怒水勢。逼溜北趨。而深蘆密葦。亦足障遏奔流。助逼溜勢。致荊州隄工屢次潰決。而本年被淹較重。固屬異常盛漲。亦由窖金洲爲害等語。並據繪圖呈覽。前因舒常所進圖內。郡城江面迤西。有沙洲一道。距現決隄工不遠。恐江水爲所壅遏。是以諭令阿桂詳細履勘。酌量辦理。今閱阿桂等所奏。並所進之圖。窖金洲適處荊州郡治下游江心。且洲之迤南。江面不及二里。迤北江面最窄處。並不及一里。而該洲所佔江面。轉居十分之六七。洲首又突出江之北面。江水至此。爲洲所逼。無怪溜勢日益北趨。下壅則上決。此實受病之源。而龍尾洲在荊州上游。看此情形。又與該洲無

涉。惟當注力於窖金洲。以去其病源。據阿桂奏。此時卽於洲上挑挖引河。不得迎溜河頭。恐江水平漫入河。仍慮淤閉。必須建築石壩。挑溜向南。激注沙洲。方可相機辦理等語。建壩挑溜。所想甚是。自應卽速妥辦。但朕意何不於洲之上首西北處。所先挑成河口。使其迎受江水。因勢利導。將來石壩築成。挑溜南趨。江水必更直注洲頭。或可冀衝刷成河。豈不省便。已於圖內用硃筆標誌。發去著阿桂等。卽確勘妥商。是否。可以如此辦理。據實具奏。又據奏。現決各隄。補完決口後。再按被淹痕跡。最高處所。加高培厚。堅實礮築。足資保障。似毋庸改建石工等語。前因郡城迤西隄工頂衝。著重迤南。遮護府城一帶。亦關緊要。恐土性鬆浮。不能堅實。因諭令阿桂酌量情形。用石修築。今既據阿桂奏。江水深至數丈。難以措手。且土隄加高培厚。足資保障。則亦毋庸改建石工。但阿桂等現因擬添石壩。築成尙需時日。而玉路口迤東。正對窖金洲。掃成大灣。隄根搜刷傾缺。現今阿桂派員於該處載石沈船。護住掃灣。此亦不得已之一法。將來應否將該處隄工。及附近挑水壩隄工。酌量用石改建。並著阿桂覆加察勘。悉心籌酌。總期於隄工有益。不在惜費。永杜後患。或石或土。亦不必泥於遵旨也。至窖金洲。侵佔江面。漲沙逼溜。該處官員兵民人等。言者衆口一詞。且言之不自今日始。而該處蕭姓民人。又復契買洲地。種植蘆葦。貪得利息。逐漸培植。致蘆葦環洲而生。江水不能刷動。督撫等所司何事。置若罔聞。致釀成大災。淹斃多命。此而不嚴行辦理。何以示懲儆。而慰輿情。雖據阿桂等查明。此項洲地。蕭姓係雍正年間契買。由來已久。今僅將近年督撫等從重辦理。豈不似於偏枯。但該省督撫等。屢經更易。不特雍正年間。在彼服官者。無從查考。卽乾隆四十年前之督撫等。亦多物故。不能逐一跟查。自當以近年爲斷。且楚省吏治。近更廢弛已極。大小官員。婪索

商人匪費。本年舒常前赴行在。據奏實有其事。舒常素來小心拘謹。是以朕經面詢。不敢欺飾。但伊尙不免從中染指。則其他不問可知。卽將伊等嚴處著賠。毫無委屈。現已明降諭旨。將舒常李封姜晟一並革去頂戴。而舒常在彼年久。且稱此次隄工衝潰。與窖金洲無涉。其罪更復何辭。舒常才具本屬中平。朕念其係舒赫德之子。是以加恩用爲督撫。乃不知感激。因循玩誤。至於此極。本應將舒常查產深治其罪。究念舒赫德宣力年久。不忍將其子從重治罪。亦不籍其家產。但舒常似此負恩溺職。若尙令其坐擁豐臚。又復何以示儆。著傳諭阿桂卽將此旨向舒常面行傳知。令其酌留養贍家口外。餘悉據實繳出。以抵工餉之用。並著其有何辭登答。一並具奏。此係朕格外矜全。若舒常尙不激發天良。意圖隱匿。一經發覺。舒常自思。當得何罪。除姜晟就近傳諭。令其自行議罰外。李封本係棄瑕錄用之人。乃亦隨同玩視要工。沾潤匪費。伊前此所請罰銀二萬兩。尙不足蔽辜。除已令長齡傳伊原籍家屬。令其再行認罰外。並著阿桂面行傳知李封。令其捫心自問。如何切實議罪之處。登答具奏。其餘承修隄工。及該管各上司。自應遵照前旨。分別嚴參治罪。並著落賠補用昭懲創。至蕭姓民人墾種洲地。雖係雍正年間契買之業。但江中淤沙。是誰之祖業。此必納賄地方官所佔。其相沿種植。貪得利息。多植蘆葦。以致沙洲日漲。逼溜北趨。衝缺隄工。貽害生靈數萬。情節可惡。若僅將洲地入官。豁免蘆課。則伊墾種洲地已數十餘年。所得利息不少。豈不更資其生。竟當治罪。查產入官。著傳諭阿桂等。卽派員將蕭姓承產之人查抄。以抵工作之用。仍解交刑部。按律治以應得之罪。爲小民貪利貽害者戒。至此項洲地。本漲沙所積。自係官地。非若田地房產。係相傳祖業。復經業主輾轉售賣私產可比。從前該地方官任聽奸民開墾。妄報陸科。大率有力之家。貪

圖重利。賄賂地方官吏。任意侵佔。其所報陞科納稅。不過十分之一。而地方官飽其慾壑。又十之二三。其餘盡爲奸民等壟斷牟利。遂至漲沙蘆葦。愈積愈多。江水至此壅遏。浸爲地方之害。所有蕭姓民人侵佔洲地。著交阿桂等查明。起自雍正何年。彼時縣府道司。及該督撫係屬何人。並乾隆二十七年。該地方官及該督撫。又係何人。是否從他處轉售。一並詳悉查明。據實具奏。並著傳知該處附近居民。以蕭姓貪圖洲地利息。廣植蘆葦。壅遏江流。致郡城被淹。該處百姓。咸受其害。是以將蕭姓查產入官。照例治罪。並無私毫委屈。此卽爲富不仁之炯戒。嗣後小民等。毋得效尤爭利。復蹈罪愆。庶民人知所懲儆。是月初十日。畢沅奏。竊臣等前奏。查勘窖金洲漲沙逼溜。請於楊林洲築建雞嘴石壩。挑溜護隄。各情形。欽奉上諭。前已恭載。欽此。並將硃筆標誌原圖。一並發寄前來。臣等查窖金洲漲沙日闊。侵佔江面。致逼溜北趨。原應在洲上開挖引河爲正辦。無如江水順洲分流。沿近洲壩一帶。俱係平水。並無向洲溜勢。若卽挑挖。不得迎溜河頭。沙水蕩漾。仍致淤閉。徒費無益。是以請於對岸楊林洲。緊靠隄根。先築土壩。直至近江灘面。卽靠土壩。接築雞嘴石壩。由淺水做至深水。逐步前進。逼溜激注。洲壩約計做成一百四十餘丈。已至江水深處。難以施工。勢不能向前再行接做。而壩工旣建。溜日南趨。洲壩經水盪擊。自當漸次剝蝕。刷成兜灣。彼時乘勢酌挑引河。引溜注水。衝刷沙洲。較爲得力。實緣江水浩渺。又非河流可比。黃河大溜。止有一股引河。得溜卽全溜。皆注。可以藉水刷沙。江水溜勢平鋪。浩瀚莫測。若卽開挖引河。至深不過二丈。江溜仍走深處。引河不過略分溜勢。難望刷沙。若將突出洲壩。先行切去。現在洲邊俱係平水。切去沙土。不能隨流衝溜。仍慮淤墊。於事亦屬無益。再四籌酌。必先築壩。挑逼溜勢。俾有所專注。再行迎溜挑挖。引河方

可迎受江水衝刷洲沙。今將洲上蘆葦全行剷伐。已除去丈餘攏水之物。水長時洲壩不過平出水面數尺。並示諭遠近居民。令將蘆根刨去。即行給予。作爲燒柴之用。聞風爭赴。蘆根可以挖除盡淨。再每年春。令將洲面翻犁一次。沙土鬆浮。隨溜衝刷。自當日就坡坦。即遇盛漲。江水可以平漫。遇洲頂阻之害大減。其開挖引河。應俟石壩築成。江流直注洲壩。再行酌辦。此時似毋庸先開河口。至玉路口。迤東掃灣處。所恐交冬後水小走灣。回湍激盪。愈向厓底搜刷。隄面懸空。或致段段塌下。飭令地方官。遇隄工險急時。即用大船載石沉下。於厓邊拋填亂石。以護隄根。誠屬不得已之辦法。但查窰金洲西首新淤之洲。詢據土人稱。十數年前。有銅船沈沒該處。因而泥沙逐漸停積。淤成新洲。則於掃灣處所載石沈船。自可漸次挂淤。隄根足資保護。若改建石工。非不較土工更爲堅固。惟是荊州臨江隄。自得勝臺至塘樓橫隄止。綿亘七八十里。在在險要。儻一處稍有疎虞。即全城皆被淹浸。亦不獨玉路口。迤下爲然。若一律改建石工。爲費旣屬不貲。若間段興修。於通隄又屬無益。且該處江面旣窄。江水更深。亦無從措手。必須如海塘往裏退步。開槽釘椿。而隄內即係沙市通衢。居民稠密。又未便概令拆展。種種礙難辦理。是以前次摺內。業將毋庸改建之處。據實陳奏。今楊林洲旣議添建石壩。黑窰廠復用碎石裏頭。溜勢日漸挑逼。向南洲沙不至向北增漲。此一帶自必溜緩。沙淤不再搜刷。又將舊有越隄兩頭接做。一律培補高寬。與大隄相平。現在掃灣處。所自可保固無虞。再圖內現擬用石裏頭處。所奉硃筆標出。此處亦應築雞嘴壩。查該處臣等初意。原擬添建石壩。亦因江水甚深。不能施工。是以酌於現可施工暗灘淺水處。所用碎石砌做裏頭。今蒙聖明指示。應先將隄根裏住。冬深江水大落。察看形勢。如有可著手時。再將裏頭往前展做。挑溜護

灣更爲有益。以上各工。臣阿桂、臣畢沅俱已再四熟籌。往來察勘。以現在情形而論。祇可如此辦理。將來培隄築壩。臣畢沅當不時赴工查閱。如水勢消落。或淤出沙灘。後其險要之處。另有可辦。自當隨時奏請訓示。以期永資鞏固。荆州府江隄舊案。

是年酌定荆州臨江隄。歲修條款。一切善後章程事。奏稱臣等查荆郡濱臨大江。地處低窪。護城隄。保衛民舍田廬。關係綦重。所有沿江萬城大隄。綿亘二百餘里。而自沙隄塘樓橫隄以上。正當川江下游。尤爲險要。向因業民自修。未經立定保固年限。僅委知縣縣丞查驗督修。並不專派大員。確實勘估。又不報部核銷。致草率從事。有名無實。工程不固。屢經潰決。此次被淹尤重。仰蒙皇上軫念災黎。不忍用民力修理。特發帑金。令臣等會同確勘。動項興修。今將漫決缺口。分別估土補還。並添建土石壩工。挑溜護隄。又自萬城隄之得勝臺至塘樓橫隄止。培補寬厚。加築土堰。以資鞏固。節經臣等查明。並將歷任貽誤大小官員。據實參奏。分別革職治罪著賠。從此崇墉屹立。得以保護無虞。凡小民樂利之休。皆出自聖主生成之德。其將來民修隄工。必須官爲經理。若不明定章程。嚴立條款。恐仍不免草率偷減。剋扣侵漁等弊。謹會同籌酌。悉心定議。將一切稽察保固及善後事宜。按款開列。恭呈御覽。一歲修萬城隄工。宜責成大員經理也。該隄有關全郡保障。向因民修。僅歸知縣縣丞督辦。實非慎重要工之道。查荆宜施道。本係兼管水利。荆州府切近該工。呼應較靈。嗣後應卽責成該道府。專管督辦。每年秋汛後。荆州水利同知會同江陵縣。將隄身矮薄殘缺。並水溝浪窩。逐一勘明估計。應需夫工修費若干。由同知造冊移送荆州府覆勘。核實申賚。荆宜施道。復加核勘。移咨藩司。如工程在五百兩以上者。俱報部查核。仍先行借項興修。

俟工竣由府取結加結報明荆宜施道。逐段查驗收工。出具督辦穩固印結。移司報部核銷。藩司於每年奏銷後。親往查驗一次。督撫於每年春汛前。分年輪往查驗一次。如有偷減浮鬆情弊。即將承修督辦。並扶同之府縣各官。一並揭參賠修。此外南北兩岸。民修各隄。其緊要處所。每年俱令道府於汛前查閱一次。遇有單薄殘缺之處。一體修築堅固。一歲修隄。應定保固限期也。湖北官辦隄。向來保固土工一年。石工三年。今萬城大隄。欽奉諭旨。定限保固十年。如在限內衝潰者。即照例嚴行參處。嗣後官辦歲修。應令認真修築堅實。一律保固十年。如於限內坍塌潰漫。即將承修督修之員參處。並照估追賠。以示懲儆。一隄面隄身。應照限定加高培厚丈尺。按年賠補也。現在萬城隄工。自得勝臺至沙市西街頭止。已照此次被淹隄旁樹屋痕跡。普律加高。並較水痕再高二尺。復按其地勢。分別幫寬。又自西街頭至塘樓橫隄。一律加築土堰。將來雨水衝淋。行人踐踏。難免日漸塌窄。以後按年歲修。總以此次原定之高厚丈尺爲准。幫補足數。不得稍有單狹。致工程不能鞏固。一修築隄。宜嚴定章程也。向來隄歸民修。並無大員查驗。致草率偷減。有名無實。今既改爲官辦。務須雇募健壯人夫。登計名姓。令如法修築。逐層夯礮。照例九月興工。次年二月完竣。該同知常駐隄所督辦。如有草率。即將該夫從重責逐。另從召募。並不許假手家丁書役。致滋弊端。該管道府隨時輪流密往查察。如有包修偷減扣剋價值情弊。即將該同知知縣等揭參究辦。一借修銀兩。應豫爲籌備也。萬城大隄。向無籌備銀兩。嗣後每年估定修費後。由該管道府層層核實移司。一面飭令該同知。備具印領。赴省請領。即如司庫支動給發趕辦。俟下年令江陵縣按畝派算。核定每畝應徵銀若干。造具細冊。通詳隨同大糧。於業戶名下。攤徵歸款。一夫土工費。

應令公舉紳耆專司銀錢出入也。此項隄工原係民修。因欲杜其包修草率之弊。是以官爲代辦。所有一應銀錢冊檔。應令公舉誠實諳練爲衆所推服之紳耆三四人專管其事。責令收放登記。毋許衙役書辦干預擾越。致滋扣剋侵漁等弊。一新築石磯。應隨時修補也。新築石磯常年受水衝擊。恐易殘損。歲修時責成該管道府同知。按年查看。如有損壞蟄蝕。卽詳報勘驗。確估修整堅固。統歸歲修隄工項下攤徵歸款。其窖金洲蘆根。遇有萌長。隨時督夫剷創淨盡。並每年翻犁一次。無許一人居住洲上。其新淤洲亦照此辦理。一設立卡房以專防守也。萬城大隄向來以五百丈爲一工。每工設立隄長圩甲各三四名不等。遞年更換。嗣後隄圩應歸同知經管。照依舊例。按年輪流檢點。每工總須隄長四名。圩甲四名。令在隄上設立卡房。輪流住宿。如有穽洞蟻穴。卽報明隨時補修。如遇汛漲。隄圩人等多備守水器具。協同業民晝夜防守。該道府同知與地方水利各官往來梭巡。一有危險。卽督率人夫搶修子堦。水利各官防護不力。該管道府查明糾參。一隄上民房應令拆毀也。萬城隄上現多民人居住。致將隄面殘踏。低矮殘缺。一遇盛漲不能抵禦。且此後歲修隄墜俱應一律加高。若蓋有房屋。礙難辦理。所有萬城隄上現有房屋。應令該府縣出示曉諭。概行拆去。遷移他處。以便加高培厚。嗣後不許一人搭屋住隄。又沙市西街頭至東街尾止。現因市廛稠密。鋪面民房如遇傾倒。應需重建時。俱著報明地方官察看。無礙隄面處所。令其蓋造。其陸續讓出地面。逐漸培補高寬。長隄復舊。若隄外龍尾等洲。民人私築隄堰。有礙漲水。流行之道。亦概令毀去。違者究處。一隄工應分員看管也。萬城大隄共長二百餘里。同知一人不能照料周密。自萬城隄之逍遙湖至玉路口止。長六十餘里。迎溜頂衝最爲險要。請卽責成本縣縣丞看管。自玉路口

至黃家場止。長七十餘里。係在沙市巡檢汛內。卽責成該巡檢看管。以上所添縣丞。止令看管防汛。督夫照料。其歲修估計工程。並給發夫工價值等項。仍由同知督令董事經手。不許佐雜官妄行干預。一同知衙門。宜移建隄所也。荊州府同知衙門。向在城內。現已被水衝塌。必須另建。今該同知既令專管隄務。自應駐劄隄所。始於修築巡防。聲息相通。請於中方城李家埠等處。擇地修建衙署。卽令該同知駐劄彼處。專心照料。並於汛漲時。就近查看水勢。隨時稟報籌辦。再該同知員缺。本係部選。今萬城大隄。責成專管。必須熟習水利工程之員。方與隄務有益。恐部選人員。不諳水利。不足以資經理。請將是缺改爲調缺。由外揀員陞調。更於隄工有裨。一府城各門。應行堆土。以防水患也。乾隆四十四年。荆郡被水漫過護城隄。直至城根。隨用土囊將城門堵禦。水未進城。此次江水漲發。決隄入城。臣等詳加查訪。雖地方文武官員。曾將城門下閘關閉。募夫創土。並用舊絮圍塞。實因水勢洶湧。將西北兩門衝開。湧灌入城。但與其猝辦於臨時。孰若豫籌於先事。嗣後荊州府城。俱應於各城門附近處所。堆土豫備。以爲防患未然之計。地方官仍於大汛前查看。如有雨淋缺少。卽飭堆補足用。以上各條。臣等會同酌商。悉心籌議。謹奏。荊州府江隄舊案。

是年覆准湖北荆門州李公月隄等處。工程單薄低矮。迎水頂衝。分別加修高厚。以資保障。又遵旨議定荊州歲修隄工。嗣後責成荆宜施道。荊州府專管督辦。每年秋汛後。荊州水利同知會同江陵縣。將應修處所。逐一勘明。估計造冊。送府覈實。詳道覆勘。移咨藩司。借頂興修。取具道府切實印給。報部覈銷。仍令藩司於奏銷後。親往查勘一次。督撫於每年春汛前。輪往查驗一次。如有偷減情弊。卽行查參著賠。此

外南北兩岸。民修各隄。緊要處所。亦令道府於每年秋汛前。通行查閱一次。遇有單薄殘缺者。照此一律辦理。隄面隄身。按年歲修。照依乾隆五十三年加高培厚丈尺。分別估辦。幫補足數。以期經久。修築隄工。務須募夫。逐層逐段。夯礮堅實。令該同知親身督辦。該管道府隨時輪流密往查察。如有草率偷減。假手家丁書役。包修剋扣者。即將該同知知縣。揭參究辦。歲修銀兩。先於司庫借給。俟次年於業戶名下。按畝攤徵歸款。其動用何項。應令該督豫籌報部。仍將攤徵細數。送部查覈。銀錢冊檔。公舉誠實諳練紳耆。三四人。專司其事。如有書役攙越侵漁者。許紳耆等據實具稟。嚴行究辦。新築石磯。突出江心。挑溜保隄。最關緊要。責成該管道府同知。按年查勘。如有損壞坍塌者。即勘報估修。歸於歲修案內彙辦。並將窖金洲。萌長蘆根。隨時剷除。每年翻犁一次。不許民人居住。如有新漲淤洲。照此辦理。至大隄每五百丈。應設隄長圩甲各四名。於隄上設卡房。常川住宿。如有穉洞蟻穴。隨時報明修補。汛漲時多備守水器具。同業民晝夜防守。該道府同知往來巡查。一有危險。即行督率搶護。如水利各官防護不力者。該管道府查明糾參。隄上民房。自沙市西街至東街市廛稠密處所。俟傾倒時。報明地方官查勘。無礙隄面處所。另行蓋造。其餘占礙房屋。概行拆去。以期讓出隄面。逐漸加高培厚。隄工自逍遙湖至玉路口。令江陵縣丞看管。玉路口至黃家場。令沙市巡檢看管。黃家場至拖茅埠。令郝穴巡檢看管。遇防汛等事。隨時就近督夫。照料辦理。至歲修估計工程。給發夫工價值等項。仍由該同知經手。不得以佐雜微員妄行干預。並令同知移居大隄之上。以資防守。其經理隄工各款。仍令督撫等輪往查驗。詳加體訪。如有不遵章程辦理者。即將該管道府同知知縣等官分別參奏。以昭慎重。又奉上諭。嗣後凡瀕臨江海湖河處所。沙漲地畝。除實

在無關利病者。無庸查辦外。如有似窖金洲之阻遏水道。致有隄工地方之害者。斷不准其任意開墾。妄報陞科。如該處民人冒請認種。以致釀成水患者。卽照例嚴治其罪。並將代爲詳題之地方官等。一並治罪。決不姑貸。又奉上諭。本年監利縣地方。因江湖漲漫。將東鄉之孫張王公月隄二處。普漫該縣隄工。本係民辦。但今年被災較重。甫遭淹浸。雖已優加撫卹。民力究不免拮据。所有該縣孫張王公月隄需用土方。據該督估計銀三萬兩以上。此次著加恩照荊州隄工一體動用官項。以示朕軫念災區。格外體卹至意。又奏准荊州萬城隄等處。遇有歲修及增添工程。所需銀兩。於司庫存貯抄產變價發商生息。及田地租籽銀兩內動用。由道府勘估赴司支領。按年報部覈銷。又奉上諭。江陵縣南岸及公安縣各漫口隄。向係民修。但本年被災較重。所有該二縣此次應修各隄銀一萬九千二百餘兩。並著加恩一體動用官項。此後再照例辦理。以示朕軫念災區。有加無已至意。又奉上諭。本年荊州被水。廣濟黃梅二縣隄工均著加恩動用官項修築。將來再行照舊辦理。大清會典事例。

乾隆五十四年二月初一日。上諭內閣。畢沅奏。楊林洲雞嘴壩。原估十五丈。已如數挑砌。窖金洲嫩沙。刷去三百四十餘丈。黑窰廠裏頭。原估長五丈。今已做出七丈。對面沙灘。亦經刷去一百二十餘丈。溜勢愈覺南趨。仍日見潰塌。畢沅現親赴該處。相度形勢。苟可向前進占。總當極力做出。俾溜勢日挑日遠。以冀浮沙盡去。刷動窖金洲老土壩等語。並據繪圖呈覽。所辦是。但閱圖內。所繪黑窰廠裏頭。取勢太直。若復往南進做。不特恐致著重。且江水至此。已成入袖。兼慮激回波衝北隄。不能復回南挑。朕意應順向東南。不妨略長。以次進做。因勢利導。溜勢自全往南開。則窖金洲土壩。可期逐漸刷盡。已於圖內用硃筆標誌。

著發交畢。沅卽覆加履勘。酌量妥辦。並將應否如此辦理之處。據實覆奏。至楊林洲磯嘴壩。現做出十五丈。黑窰廠裏頭。現做出七丈。窖金洲淤沙。已刷去數百丈不等。可見荊州隄工。屢次潰決。而上年被淹尤重。總由窖金洲之上。種植蘆葦。致淤沙日漲。日寬。逼溜北趨。隄膝因而衝決。舒常平日在彼。旣不能預行查察。迨降旨詢問。尙稱此次荊州被淹。與窖金洲無涉。實難辭咎。而蕭姓民人。惟圖肥己。不顧占礙地方。水利釀成大災。淹斃多命。將伊治罪。尤屬情真罪當。毫無屈抑也。純皇帝聖訓。

四月初十日上諭。軍機大臣等。浦霖奏查勘各屬隄垸情形。內稱常德府城。近年每遇朗江水漲。南城以外。居民多被水淹。其對岸之玉皇閣。青草嘴兩處。又因歷年淤積成洲。逼溜射城根。沙洲已成高阜。占塞水道。查該府舊有石櫃四座。逼溜南趨。原爲保衛城隄而設。今年久大半虧損。請於水退時。照舊修復等語。各省隄垸。必須預爲修築。遇江水盛漲。下流無壅遏之患。始於隄根無礙。今常德府對岸玉皇閣。青草嘴兩處。淤積成洲。此卽與荊州之窖金洲無異。自宜亟去爲要。該處舊有石櫃。旣經坍塌。卽應酌添新料。照舊修復。但此時江水漲發。難以勘估施工。畢沅係兩省總督。著於深秋水退時。親赴該處。會同浦霖據實查明。勘估興工。並繪圖具奏。俾江流暢達。不致再有壅礙。純皇帝聖訓。

五月十五日上諭。軍機大臣等。畢沅奏襄陽城迤上老龍隄之臥鐵牛對面。周家嘴。係襄江坐灣。新長沙灘一處。將大溜逼向南趨。洲沙多係石子砂礫。未能挑挖。近年河勢兜曲。溜勢較急。若不早爲抵禦。恐將來對岸新灘日長。漢水益逼而南。必至搜刷隄根。擬於普渡庵至黑龍廟等處。做照荊州沙市石磯做法。各接做挑溜碎石壩十丈。及十餘丈不等。俾節節挑溜。以護石岸根基等語。窖金洲在荊州府城之南。洲

沙漲闊。逼溜北趨。致萬城等隄。頂衝受惠。今周家嘴在襄陽府城之北。若新灘日長。漢水益逼而南。則該處老龍隄工。適處頂衝。亦難免搜刷爲患。其情形與窖金洲相仿。漢水流爲荊江。亦不可不預爲籌辦。况現據畢沅奏估。做石壩共需用碎石八九千方。工程亦屬有限。易於建築。阿桂現在荊州查辦事件。回程必經由襄陽。著傳諭阿桂。於回京經過之便。卽會同畢沅。到彼詳悉履勘。如周家嘴洲沙。可以設法去淨。甚妙。若一時未能挑挖。則酌量於迎溜處所。建做石壩。務期挑溜往北。直走江心。俾沙灘不致再長。而老龍隄石岸。亦可永保無虞。純皇帝聖訓。

九月二十八日上諭。軍機大臣等。畢沅奏。查勘荊州萬城隄壩各工。並窖金洲刷塌情形。覽奏欣慰。窖金洲老壩。漸次刷動。又有楊林洲石磯。挑溜得力。北岸隄塍。自足資鞏固。將來江流能走中泓。順軌東趨。固屬甚善。但閱圖內窖金洲之西南。有大溜一股。分向南行。恐日久大溜全向南趨。南岸隄工。又致著重。該處隄境之內。必有民田廬舍。所關並重。不可不預爲留意。著傳諭畢沅。務宜隨時留心察看。如大溜有直趨南岸之勢。卽宜設法妥辦。不可專注意於北。致南岸稍有頂衝受險也。純皇帝聖訓。

十月初八日上諭。軍機大臣等。畢沅奏。勘估郝穴鎮磯嘴壩裏頭石方銀數。分別辦理一摺。批閱後。又觀所進之圖。該督因許仙觀對岸。新長淤洲。恐其日向北長。擬於許仙觀隄外。建築磯嘴壩一座。挑溜南趨。江流浩瀚。豈一石壩。遂能挑動大溜。况沿江一帶隄塍。從前亦並未育工。卽云此項工作。係用民力。但將來仍須按糧攤派。小民生計有常。詎能於額徵之外。復事增加。此次該督奏請於許仙觀建築石壩。係爲保護郝穴鎮市起見。姑准照所請辦理。惟閱所繪石磯圖樣。形勢太直。恐致著重。應斜向東南。順溜進

做方爲穩安得力。已於圖中硃筆標出。再石磯距白沙潭家兩洲江面尙遠。溜勢一時亦恐未能挑至對岸。或做照辦理窖金洲之法。將該處新淤量爲挑切。自更易於衝刷。著傳諭畢沅。將能否如此籌辦之處。詳勘熟商。據實覆奏。不必泥於遵旨。其沿江隄隄。嗣後不得濫添工作。爲屬員多起開銷之漸。純皇帝聖訓。

是年遵旨覆勘。將荊州黑窰廠碎石裏頭。改爲磯嘴壩。砌出江面。順向東南按做。共長十八丈。楊林洲磯嘴壩。砌出江面二十一丈。又奏准修築萬城隄工。原定土方例價不敷。礮工應酌給礮價。募夫夯築。以資鞏固。又奏准黑窰廠對岸及觀音寺對岸。挑築引渠一道。以分水勢。又奏准沙市等九處。各製鐵牛一具。並築砌石基安設。大清會典事例。

乾隆五十五年。議准荊州隄工。向係民修。今因被淹。蒙恩動項。官爲督辦。嗣後如有些小工程。聽民間自行修理。其增添礮價。不得援以爲例。大清會典事例。

乾隆五十六年。奏准荊州萬城隄中方城上漁埠李家埠中獨楊玉路口楊林洲黑窰廠觀音寺九處。頂衝坐灣溜勢內逼。每處安設鐵牛一具。大清會典事例。

乾隆五十七年五月二十七日。書麟蘭第錫奏。臣等接據江防廳營稟報。瓜洲迴瀾壩迤下江岸。於月之十八日。忽然裂縫。接續坍塌。約長一百餘丈。浸至城根。將四十一年收進之土城。塌卸十四丈。溜勢洶湧。人力難施。幸城隅向無民居。並無損傷人口。臣等聞信。先後馳赴履勘。測量坍塌地方。靠崖水深七八尺。離崖一二丈外。水深二三丈。其二三十丈外。水深十四五丈。十九日後。形勢已定。並未續坍。查瓜洲城外。

江岸於乾隆四十一年。殷家莊地方。又復塌卸。並坍及城牆。經督臣高晉。河臣薩載。勘明奏請。將城量爲收進五六十丈。補還城垣。因坍漲莫定。難保不再塌進。築做土城一百一十餘丈。以資攔禦。今迴瀾壩迤下。又復坍陷。並坍及土城。與舊城接連處所。臣等與道將等。逐細商酌。現當江水盛大。卽將迴瀾壩坍卸工尾。暨小南門外灘嘴處。所用料裹護。以免風浪汕刷。其城內西南隅。地勢高窪不平。並無街市民居。目下坍塌之處。後身尙有隙地。可以讓進五六十丈。照舊補還土城。長七十丈。上砌女牆雉堞。以復舊觀。其城外江岸。原係江浙重運糧船渡江進口。繚路。今坍卸處所。緊靠江崖。無路可通。應將坍卸城牆兩頭。各拆去數丈。將隍土攤平。並於沿江一帶。修做繚路。以濟糧運。拆下所坍城甃。卽爲土城加砌女牆之用。所需補修夫工銀兩。爲數無多。臣等督率道廳。認真辦理。毋須另請錢糧。謹合詞具奏。並繪圖貼說。謹呈御覽。南河成案續編。

六月十二日。奉上諭。書麟等奏稱。瓜洲城外。迴瀾壩迤下。江岸裂縫。坍塌浸至城根。將四十一年收進之土城。塌卸十四丈。現將迴瀾壩塌卸工尾。暨南門外灘嘴處。所用料裹護。並將土城讓進五六十丈。補還城垣。以復舊觀等語。瓜洲城外江灘。因江流北徙。衝刷灘崖。坍及土城。該督等以城內西南隅。並無居民。現在坍塌之處。後身尙有隙地。擬讓進五六十丈。照舊補還土城。亦只可如此辦理。但該處城垣於四十年業經收進五六十丈。此後又復讓進。若不另籌挑護之法。則江流衝刷靡常。難保不再行塌進。豈有屢將城垣。向內收進之理。因閱圖內。現做裹頭處所。自屬頂衝。何不於該處接靠壩根。建築石磯。挑溜向東南下趨。俾瓜洲城外灘岸。不致衝刷塌卸。城垣可資保護。已於圖內用硃筆圈誌。但此一帶係柴壩江。

流甚深溜勢湍急。若於壩根接做石磯。是否能生根鞏固。以資挑護。著該督等詳細校勘。是否可行。悉心籌酌。據實具奏。南河成案續編。

七月初三日。書麟、蘭第錫奏。臣等奉上諭前已恭載。欽此。遵卽先後帶同淮揚道谷廷珍。並曾在湖廣荊州江工估辦石磯嘴之葦蕩營。參將田宏謨。馳抵瓜洲。詳細履勘。欽遵硃批。圈誌裏頭處所。按度形勢。悉心講求。查瓜洲一帶江流近海。潮汐往來。水勢洶湧。與上游江面情形不同。測量江岸。坍卸處所。靠崖水深二丈。離崖三四丈外。水深三四丈至八九丈不等。西首新做裏頭。本係迴瀾舊壩。如能接靠壩根。建築石磯。挑溜下趨。洶可保護灘岸。爲一勞永逸之舉。惟該處係柴壩。江流甚深。溜勢湍急。若做石磯。根底必致外游。不能存立。是江勢浩瀚。難以生根。已邀聖明洞察。且漕船經由要道。若磯嘴挺出。水激浪湧。汭流挽曳。亦多未便。臣等再四籌酌。查江岸工程。原有下填碎石。上加護埽之法。現在迴瀾壩外。試探尙有碎石擁護壩根。似屬有益。今按現在形勢。擬於裏頭外。硃筆指示之處。拋填碎石。護住埽根。可以藉資挑護。自裏頭至坍卸舊城處所。共長七十三丈。靠崖緯道之外。一律拋填碎石。再於上面鑲做護埽。以禦風浪。嗣後每年察看情形。逐漸拋填。可期溜勢漸遠。城垣得以保護。核計拋填碎石。需費無多。同應鑲護埽。均入該廳本年庫貯核實辦理。毋容另動錢糧。如蒙俞允。容卽遴派幹員。上緊購辦石塊。運貯工所。俟臣等驗明後。監同如式拋填。不使稍有偷減。以仰副聖主慎重江防。保衛民生至意。二十八日奉硃批。如議行。南河成案續編。

是年奏准江西豐城縣東岸甘家湖土隄。應改建石隄。長五十丈。大清會典事例。

乾隆五十八年三月上諭軍機大臣等書麟奏查勘無爲州江壩情形酌籌辦理並繪圖樣呈覽詳閱圖內永成圩壩外卽係大河據書麟奏稱該壩兜灣處所尙露壩基應行幫築寬厚等語該處河形旣屬兜灣永成圩壩工卽使加築寬厚亦屬頂衝著重易致塌卸何不將河形開挖取直俾溜勢離壩稍遠不致逼近壩根用資保護已於圖內用硃筆畫誌著書麟等察看情形酌量辦理又馬頭埂地方現據書麟擬於該處開挖河口寬三十丈深一丈五尺曾家壩至東圩開所有舊河止寬六七丈及十三四丈不等今擬一律挑寬三十丈較舊展至一倍河流更爲暢順自應如此辦理至此項挑工係該州紳士爲保護田廬自應出資捐辦但向來地方官遇有挑河築壩工程動用官項者尙未免任意浮冒從中侵蝕今此項工程係紳士捐辦不肖官吏更難保無藉端侵肥勒索等事若因有地方公事而官吏等轉得藉以飽其私橐是非以便民適以病民現雖據書麟奏稱俟工竣時親往查驗不知隄工河工一經放水卽難勘實惟應放水之前據實查勘尺寸不致作弊並飭該府州於興工時來往稽察但該督駐劄江寧旣不能常往查勘而僅委之府州等稽察亦未必能認真辦理此事著交朱珪就近隨時親赴工所督率稽查毋任地方官吏胥役等藉端滋擾書麟仍於工竣時親往查驗以期一律穩固儻稽查不力官吏等稍有侵肥擾累等事一經查出惟朱珪是問必將該官吏等及該撫一並從重治罪純皇帝聖訓

乾隆五十八年奏准湖北襄陽府老龍石隄袤長十里保障全城頂衝險要處所之普陀庵頭工嘴二工嘴黑龍廟添做碎石礮四座每年葺治需用銀兩於蕎麥灣隄工籌備銀內撥銀五千兩交商承領營運以一分五釐生息爲籌備之用每年按季解收年終造冊送部查覈大清會典事例

乾隆五十九年。總督書麟奏請。無爲州民力民辦。開濬上河。起二沈家牐。至東圩牐。袤十六里六分。面寬三十丈。底寬十五丈。中深一丈四尺。洩黃白二湖。及州西南諸山水。由飛雁投湖南出泥汊北。東出裕溪。分達於江。廬州府志。

仁宗睿皇帝。嘉慶元年八月二十五日。奉上諭。本年湖北各屬。因漢江漲發。水淹荆門。該處隄工。原係百姓自衛田廬。例應官督民修。第念楚省教匪滋事之處。旣被擾累。其未經被賊地方。又復猝遇水災。殊爲可憫。加恩將此次隄工。官爲修理。以工代賑。作正開銷。河渠志稿。

嘉慶二年。奉上諭。豐城縣濠河。護城隄工。爲城垣保障。農田水利攸關。因上年長水漫入隄岸。被衝濠河。亦多淤墊。自應分別挑築。該縣本係積歉之區。且屢經被水。若仍用民力挑築。不無拮据。所有估需挑濠挑隄建橋銀一萬九千六百九十兩。著加恩准其動項修辦。俾濱河百姓。共資保護。該督等務須督飭承辦之員。實力經理。毋任稍有偷減浮冒。以副朕軫念歉區。奠安黎庶至意。大清會典事例。

嘉慶四年四月朔。康基田徵瑞奏。揚州府儀徵縣境內。臨江運口。上承淮水。下接江潮。爲淮南鹽運。及安徽江廣漕船。經由要道。向設通濟。羅泗。攔潮。響水。四閘。啓閉節宣。甚關緊要。今查響水攔潮兩閘。均尙完整。惟通濟。羅泗二閘。自乾隆三十一年拆修後。歷年旣久。又兼來源激湍。潮汐衝擊。所有兩閘金門。及雁翅燕尾。上下裏頭等處。均屬塌卸。閘底關石等椿。亦已朽爛。萬年枋。並皆碎損。實屬難資啓閉。急應照舊估修。以濟鹽漕運行。茲據兩淮運司會燠。淮揚道和騰額。會同勘明。核實估計。連上下築壩。共需工料銀八千三百九十餘兩。詳請專委江防同知承辦。照例在運庫項下動支修理。臣等復核無異。現批運司先

發八分銀數令購備石塊樁木等料貯工。委員驗明與修。勒限完竣報驗。照例取具保固。務期工歸核實。不任稍有偷減草率情弊。至煞壩興修時。鹽漕船隻暫令由瓜洲行走。不致阻礙停滯。合並陳明。南河成案續編。

六月十九日奉上諭。祖之望奏。漢水上游陡漲。荆門潛江等處民隄。間有被淹等語。楚省邪氛甫斂。民困稍蘇。今又因漢江上游水勢漲發。荆門潛江等處。間被衝淹。深爲可憫。著該撫等督飭所屬。速行查明被淹戶口。實力撫卹。並將各隄缺口。上緊搶築。積水設法疏通。俾得補種。以期有秋。勿使一夫失所。河渠志稿。

嘉慶七年。奏准湖北荊州南門外玉路口。江神廟前邊。砌築石裏頭。長五丈五尺。又奏淮江西豐城縣。蘇家廠土隄二十五丈。改建石隄。大清會典事例。

嘉慶十年閏六月。奉上諭。前據瑚圖禮奏。轉據布政使台斐音稟請。鍾祥潛江二縣。民修隄垸。無庸保固年限。並稱乾隆年間。荊州萬城隄衝決案內。欽奉諭旨。荊州隄工。著保固十年。係專指荊州萬城隄而言。餘似不在保固之列。請嗣後除官修之隄。仍遵例保固十年外。其餘借項民修之隄。毋庸定以保固年限。遇有潰決。仍令民自修補等語。朕以所奏自係實情。當經降旨。照所請行。茲據工部查明乾隆五十三年。節次所奉諭旨。並彼時大學士九卿原議。與瑚圖禮原奏不符。據實參奏。所奏甚是。詳閱工部摺稱。乾隆五十三年。荊州隄工潰決時。欽奉諭旨。以民修工程。向無保固。是以承辦官員。侵漁草率。諸多不免。嗣後著定限保固十年。並令各省河隄等工。凡係緊要處所工程。在五百兩以上者。均一體報部。予以保固限

期復令將荆郡隄工。嗣後作何稽察保固之處。交大學士九卿等妥議。當經稽璜等奏定。一律保固十年。如限內衝潰。卽將承修之員參處著賠。通行在案。是從前欽奉諭旨。及議定章程。極爲明晰。自當永遠遵行。今瑚圖禮摺內。輒將從前所定民隄例限。作爲專指官隄。又將隄工通例。作爲專指萬城隄一處。竟係有意朦混。且鍾祥潛江二處工程。俱係嘉慶七年所辦。彼時亦曾聲明保固十年。瑚圖禮前奏。不但請免著追。並欲此後永免保固。則承辦之員。尙復何所儆戒。勢必人人效尤。偷減工料。草率從事。明係爲屬員辦工取巧地步。大屬非是。瑚圖禮、台斐音均著傳旨嚴行申飭。此事瑚圖禮係轉據布政使台斐音稟請具奏。台斐音著交部嚴加議處。瑚圖禮著交部議處。嗣後官督民修之隄工。保固十年。仍照舊例行。其鍾祥潛江二縣潰決隄工。旣在保固限內。仍著追賠歸款。至工部於此事能詳細查出。據實參奏。尙屬留心。該堂司官究係何人。首先看出查辦。卽著據實奏聞。候朕酌量加恩。以示鼓勵。欽此。

嘉慶十一年三月十六日。鐵保徐端額勒布奏。查乾隆元年奉諭。儀徵縣河道爲通江達淮要津。向例大挑撈淺。商三民七分派捐輸。有名無實。無益於工程。有累於百姓。嗣後著將商民派捐之項。永行停止。如遇應濬之年。委員確估。實力挑濬。所需工費。卽於運庫一半充公。項下動支。毋得虛冒草率。欽此。茲據江防同知詳稱。儀徵縣有五里閘河一道。上承淮水。下達大江。爲鹽漕舟楫之要津。宣洩異漲之分路。中設響水。通濟羅泗。攔潮四閘。外禦江潮。內洩淮水。亦關扼要。該河自乾隆三十一年興挑以來。閱今三十餘載。日漸淤墊。水不暢行。漕艘及鹽銅船隻。俱改由瓜洲口出入。冒險繞江。諸多未便。且於淮水盛漲時。少此一處分洩去路。上游不免停遏。其響水閘亦係四十三年修理後。日久損壞。於潮汐往來。不能隨時。

啓閉於鹽漕河防。實有關礙。臣等當飭江寧布政使康基田、運使曾燠、勘估應需河工土方銀一萬九百六十四兩零。開工銀三千五百三十二兩六錢零。臣等查係必不可緩之工。飭司循例在運庫減半餘平項下先支八分數銀。給發該同知具領興工。並飭江寧藩司康基田、會同兩淮鹽運使曾燠、就近督率核實辦理。儻有草率浮冒。詳請嚴參著賠。俟工完驗收。造冊送部請銷。南河成案續編。

嘉慶十二年三月奉諭。軍機大臣等據汪志伊奏查勘隄工。目覩各州縣境內積年被水田畝未涸。請將湖北岸商匣費銀兩作爲防堵疏消之用。一摺。隄垸保衛田廬關係緊要。今汪志伊目睹漢陽等州縣均有未涸田畝。未築隄埝。並接據呈報江陵縣一百餘垸。因萬城隄潰口田畝盡沈水底。監利縣一百餘垸情形相同。天門縣七十二垸全數被淹。此外漢陽潛江荊門公安應城等州縣民間連名具呈。或請堵塞開疏。或請減則豁糧。不下數十起。自應亟籌勘辦。以興水利而衛民田。其所請岸商匣費一項。作爲修理之用。自係以公濟公。事屬可行。惟據稱該省岸商向有督撫衙門匣費。每年銀十萬兩。因節奉諭旨查禁後。歷任督撫俱未敢收受等語。此項匣費銀兩現存何處。覈計共有若干。現在修垸之費實需若干。著汪志伊咨會額勒布查覈明確。會同妥議具奏。睿皇帝聖訓。

嘉慶十六年議准江西豐城縣東岸湖土隄原長八十三丈。因江中新長沙洲。水勢湍急。逼射隄身。情形危險。改建石工七十二丈。又楊家湖土隄原長三十三丈。亦因江心新長沙洲。水勢湍急。同屬危險。亦全改建石工三十三丈。以資捍衛。大清會典事例。

正月十五日奉諭。據朱理奏靖江縣江岸近年被汛潮侵削。逐漸坍卸。現在南門外自江邊至城根地

基僅存四十三丈。形勢緊迫。懇請估拋碎石。照依高寬出水做法。以禦潮汛。計估需工料銀十三萬六千餘兩等語。此時帑項未充。一切工作俱經停止。百齡等當所深悉。吳璉現在江南查工。著卽會同百齡朱理。將靖江縣江岸坍卸處所。詳細履勘。公同商酌。果係目前不可刻緩之工。再行奏聞籌款修辦。如尙可緩。卽奏明停止。國家經費。實不能再瞻及不急之務也。河渠志稿。

嘉慶二十三年七月。奉上諭。慶保奏。沔陽州垵田積水。請借項修建閘座一摺。湖北沔陽州。低窪田畝。全賴隄垵保護。每遇伏秋盛漲。江水浸灌垵內。無路疏消。茲據勘明。該州龍王廟地方。添建閘座引渠。可資宣洩。於農田大有裨益。著照所請。准其於該處建立石閘。挑挖引渠。以時啓閉。所有估需銀二萬八千九百九十一兩零。加恩先於司庫商捐隄河沙洋籌辦善後工程款內。借支給領。勒限完工。照例保固十年。所借銀兩。於工竣後分作五年。在於受益各垵業戶名下。按數攤徵歸款。睿皇帝聖訓。

續行水金鑑卷第一百五十五

江水工程一

四川成都府同知雍正六年議准分駐灌縣專司都江堰工大清會典

乾隆六年覆准石牛黑石二堰歸入都江堰修案內一併動項修理大清會典

湖廣武昌府江岸自嘉魚至會城下合漢流水漲則逼繞城址舊恃金沙洲障之後洲徙水泛橫流直衝江岸因甃以石長十餘里後圯明郡守張以謙修之自王會橋至閱兵樓長一千一百三十五丈高廣各四丈有奇凡用石十萬松椿一萬二千松片二千一百俱以鐵錮之鑄鐵犀四以鎮焉

花隄在江夏縣平湖門內政和間江溢壞城知府陳邦光築以障水

萬金隄在江夏縣西南長隄之外紹興間役大軍築之建壓江亭

路隄在江夏縣南金沙洲至龍牀磯止雍正五年水決六年發帑修築

部隄卽金口長隄在江夏縣自赤磯山至嘉魚縣下田寺止雍正五年水決六年發帑修築

江夏縣隄防考略金口之有長隄自赤磯山至陶家馬頭凡四十里其間自鯉魚漣以西爲馬船港烏洲湖李老湖白楊港滾打洲名雖有五相距止三里土性直下盡屬淤泥隨築隨塌故議改築舊由赤磯山而南至雨灌山有橫隄今自雨灌山迤邐而西歷南廟山范家港至龍家溝過大青口之鎮江洋斜抵西北直接陶家馬頭中間橫距舊隄十五里長六十里因勢較舊隄稍曲故贏二千里夫舊隄本以防江水

但江自嘉魚下田寺二十里。過陶家馬頭。至赤城磯。四十里。水爲隄限。不得溢而南。由赤磯十里。至金口。則內有長港。溯流凡九十里。而法泗洲以上。則有斧頭、黃塘、西渠等湖。及嘉蒲、咸三縣諸湖。並山澗。悉由長港入江。江水泛漲。從此逆上。隄之內外。盡爲汪洋。今經改築。江水在舊隄北。港水在新隄南。不獨周遭四十里。不受水患。而隄亦得保固。可省民力。江邑舊有隄工二十二里。每歲隄長四十人。用夫二萬。每夫七工。統計夫工十四萬。興工日攜糧露處。辛苦可憫。所費又至不貲。今新隄旣成。地勢高阜。土性堅固。每歲增修。用夫不過十之一二。

通江隄。在嘉魚縣東北。自龍潭山至惠山驛。高丈許。廣三之。翼以柳。

新隄。在嘉魚縣北。地勢卑下。承上流。若建瓴。不數年。溢爲瀦澤。春水泛漲。與蒲圻、咸寧、江夏三邑。均受其患。政和間。知縣唐均。集四邑之民。築之。乾道初。知縣陳景。去舊隄三百步。因兩山距楊家潭上。橫亘爲隄。是名新隄。

成公隄。在嘉魚縣。皇慶元年。知縣成宣。築上自馬鞍。下至三角鋪。捍護四邑。明初。水決。屢築屢圯。雍正五年。水決。與江夏、咸寧、蒲圻三縣。分領帑銀修築。

漢陽府後湖隄。在漢口鎮。鎮爲水陸要衝。火烟數十萬家。前江後湖。漢水遠西北。每夏秋水漲。四面皆巨浸。僅此一綫隄。爲保障。居人歲加修築。終未完固。水勢稍大。輒虞泛溢。

張大渡隄。在漢陽縣蔡鎮。康熙五十五年。請帑建築。中立石閘。以時蓄洩。雍正五年。水泛決十餘丈。復發帑修築。

漢陽縣水利考略。郡城與武昌對峙。大江環抱東南。漢水合灑水、沔水、沌水，與大江會於郡北。漲則瀾漫爲害。縣舊有襄陽口，在漢口北岸十里許。卽古漢水從黃金口入排沙口東北，轉折環抱牯牛洲，至鵝公口，又西南轉北，至郭師口新岸，曰襄陽口，約長四十里。然後下漢口。成化初，於排沙口下郭師口上，直通一道，約長十里。漢水徑從此下，而古道遂淤。且漢口吳公隄在漢川縣，舊名和公隄。成化庚寅，御史吳琛築一自縣東至甌山，長十五里。一自縣北和公城至劉家隔，長十五里。

漢川縣隄防考略。縣東至漢陽，南至沔陽，西至天門，北至雲夢。正當漢江下流，故有長湖、橫觀湖、龍車、小松等湖以蓄水。又有城北南湖、魚湖、蓼湖、西江，水洪等垸以禦水。且漢江至此分流，一由張池口經縣治，一由竹筒河出劉家隔，二水復合流出漢口，故無大水患。嘉靖三十九年，漢水大溢，各垸隄俱潰，而竹筒河中塞五十里許。其張池口江身又復淺狹，以故水多壅滯於鍾祥天門間。而劉家隔之估船不得通於漢川，民亦病之。頻年查勘，上自河口，中經排子口，至東湖流水口，淤塞一千三百一十二丈。舊河口地勢稍低，不便受水，改從沙臺寺前去舊口約數十丈。中排子口至東湖流水口，舊河身甚曲，新改直勢，以順水性，約直長二百丈。下口叫子臺出風門，又半淤，計二百丈餘。巡撫劉懋奏請贖鏹一萬餘兩，募夫開濬。親臨閱工，乘流上下，河勢大通。二月興工，三月告成。雍正五年，麻城等十二垸潰決，共九千六百丈，有奇。奉旨發帑修築。

黃州府王公隄，在蘄水縣巴河鎮。正德中，知縣王伯築，自江沙抵鎮，長三十丈，廣四丈，高二丈，鑿石植以柳。

萬公隄。在蘄水縣西南回風磯上。

武家穴隄。在廣濟縣東九十里臨江。上自盤塘。下抵黃梅楊家穴。長一百九十里。歲時修築。以防江溢。雍正五年奉旨發帑修築。

安陸府隄防考略。江故道逼近郡治石城而下。嘉靖初年。徙新洪。遶浚山灣東。去城彌遠。水患日深。其故在豐樂。則舊有九龍灘。龍穴港。桐木嶺。金花。熨斗等湖。分洩至石城。則舊有城北湖池河。殷家等湖。注蓄後皆淤平。軍民官莊爭墾爲業。而下流竹筒河。復淤下滯。上圯。固一郡水患之原也。屬邑大半濱江。而受害甚者。北岸則鍾祥。京山。天門之紅廟。南岸則荊門。潛江。沔陽之沙陽也。

漢江隄。在鍾祥縣報恩寺南。長三十里。

鍾祥縣隄防考略。縣自石城而上。至豐樂驛。凡二百二十餘里。舊無隄。每水泛漲。西岸則漫至浚山岡。東岸則漫過池河等湖。薄長江而止。蓋以湖爲壑。以岡爲隄也。自石城而下。由蔡家橋灣。上下流漣。馬公湖。小河口。以達於南河。紆回三百餘里。土人總名之曰紅廟隄。最爲要害。然嘗考之。蔡家橋舊有口。通二聖道。入湖洩漢勢。又有流漣。金臺。二口。支河達赤馬野豬等湖。由青樹灣入金臺港。大分漢流。以故隄得無虞。後半堙塞。不可復疏。嘉靖二十八年以來。諸隄盡決。有司屢議不決。蓋由荊州右衛。與天門。京山三縣。軍民雜處其間。互相推諉。而格議撓法者多耳。

漢江隄。在京山縣南百餘里。

京山縣隄防考略。縣治依山爲城。其境土半係高阜。自古無水患。但下里有一面。逼近漢江北岸。上則接

連鍾祥及荊州右衛諸隄。下則有小河、南河、紫金潭、拖船埠頭等處。直抵天門界。地勢下濕。自嘉靖三十年來。鍾祥荊州右衛之隄一決。遂衝入京山。抵船埠等六十餘處。連歲屢築屢決。迄無成功。蓋京山隄防與鍾祥天門荊州右衛諸隄相爲唇齒。一處不堅。勢難獨保也。今按京山縣王家營隄。京山鍾祥天門漢川四屬。宣防所關。道光二年以後。屢有潰決。八年正月發帑官修工竣。

高氏隄。在潛江縣西北五里。相傳五代時高季興築。自荊州綠麻山。至縣南沱埠淵止。延亘一百三十里。以障襄漢二水。

白濮垸。在潛江縣邊。臨漢江。成化六年。水決二十餘丈。八年。知縣江志修。

江汭垸。在潛江縣。長六百餘丈。身甚厚廣。

車老垸。在潛江縣南。臨漢江。

長官隄。在沔陽州。荆南監利。至漢陽。長一百餘里。江隄在沔陽州。自龍淵、花墳、牛埠、竹林。西流平放。水洪。茅埠、玉沙凡九區。長萬丈餘。

漢隄。在沔陽州。自大小朱家岡、滄浪、南池。凡五區。長萬丈。

班隄。在荊州西北四十里白湖村。雍正五年。潰決。南江大隄一十九口。共一千七百一十二丈五尺。總督傅敏捐米三千七百三十餘石。幫修。六年。奉旨發帑修築。

沔陽州隄防考略。舊州以富饒稱。蓋以地當江漢之間。最多湖渠。民便魚鮮之利。又因湖渚。環隄爲垸。而業耕其間。誠樂土也。自五代時高季興節度荆南。築隄以障漢水。自荊門綠麻山至潛江。延亘一百三十

里。因名高氏隄。而江隄亦自監利東接漢陽。長百數十里。名長官隄。沔民賴焉。迨明。隄防漸潰。至成化甲午。宏治庚申。水大漲。正德丙子。復漲。丁丑如之。皆乘舟入城市。後都御史秦金布政使周季鳳。以江水長決。監利之車木隄。漢水長決。潛江之班家隄。俱修之。其丈以千百計。然未能高堅。水至即圯。嘉靖甲申。知州儲洵。疏陳隄防利害於朝。事下。巡撫舉行。按察副使劉士元。復建議龍淵而下。分爲九區。於是龍淵。花墳。牛埠。竹林。西流。平放。水洪。茅埠。玉沙。瀕江者爲隄。總萬餘丈。大小朱家岡。滄浪。南池。瀕漢者爲隄。總幾萬丈。丙戌夏。漢水連溢。而沔賴以完。至庚寅。漢水決拖船埠。西湖水溢。沔之西北。遂爲巨浸。頃江隄自西流。窩直抄至沙隄。凡二萬六千二百餘丈。其決口數百處。故州民歲苦水患。

荊州府隄防考略。江水之患。全在荊州一郡。夾岸南北。凡六縣。北岸則江陵。監利。隄四萬九千餘丈。南岸則枝江。松滋。公安。石首。隄凡五萬四千餘丈。嘉靖庚申。洪水決隄。無慮數十處。而最爲要害者。枝江之百里洲。松滋之朝英口。江陵之虎渡。黃潭鎮。公安之瑤頭鋪。艾家堰。石首之藕池。諸隄衝塌深廣。最難爲力。每歲有司隨築隨決。迄無成功。至四十五年十月。知府趙賢佑。議請修築。務期堅厚。自丙寅歷戊辰。凡三冬。六縣隄稍就緒。始立隄甲法。每千丈。隄老一人。五百丈。隄長一人。百丈。隄甲一人。夫十人。江陵北岸。共隄長六十六人。松滋。公安。石首。南岸。共隄長七十七人。監利東西岸。共隄長八十丈。夏秋守禦。冬春修補。歲以爲常。然荊州郡治濱江。郡西上六十里。有萬城隄。在當陽江陵之間。嘉靖十一年一決。直衝郡西城。不浸者三版。十二年。有司挽築李家埠。重隄護之。二十九年。又決。此隄乃郡治之大要害也。後江陵縣專爲修築。始得無虞。

新開隄。在江陵縣東一百二十里。成化間修。後圯。正德間布政使周季鳳築。長四百五十丈。黃潭隄。在江陵縣東南二十里。上當江流二百餘里之衝。一決則江陵、潛江、監利、民爲魚鼈。誠要害也。李家埠隄。在江陵縣西三十里。自萬城隄至鎮流砥六十里。當水勢之衝。宏治十三年隄決。淹溺甚衆。知府吳彥華修築堅厚。至今賴焉。諺云。水來打破李家隄。荊州便是養魚池。關係至重。鎮流砥。在江陵縣東十五里。突出大江數十丈。捍激江水。聲如迅雷。蓋江勢東下。鎮砥於此。則水勢延緩。如黃潭之衝。少殺沙市之地可保。

江陵縣隄防考略。縣沙市正古江陵地。陵阜自荆門西北來。二百里臨江。正扼水衝。南有虎渡穴口。分流洞庭。北有章北、郝穴二口。殺流出漢口。而潭子湖、洪水淵、三湖等處。俱爲湖瀦蓄水地。故漢宋以前無大水患。迨元以來。沙市高陵半圯入江。章穴口復湮。嘉靖十一年。決萬城隄。水遠城西。決沙市之下隄。而南二十一年後。又以浮議築塞郝穴口。諸湖瀦又多淺淤。三十九年。一連巨浸。各隄防蕩洗殆盡。四十五年。後有司稍稍修復。然不如古隄之堅矣。

大江隄。在公安縣東北。上接江陵。下抵石首。長一百里。雍正六年。奉旨發帑修築鄧家灣、陳家灣、東龍橋三隄。

公安縣隄防考略。縣東西廣一百三十里。南北袤一百一十里。地皆平曠。縣治舊在紫林衝。因避三穴橋水患。移至江臯。勢若原隴。宋端平三年。築隄防以禦水。有趙公隄。在縣東。斗湖隄。在縣南。油湖隄。在縣西北。倉隄。在縣東北。橫隄。在布政分司後。世傳爲五隄云。至元大德七年。竹林港隄大潰。自是隄不時決。迨

明修築沿江一帶隄。陸西北接江陵。上灌洋。東南接石首。新開隄。隄凡萬有二千五百餘丈。其間雷勝文灣、窰頭鋪、艾家堰、竹林寺、二聖寺、江池湖、狹隄淵、沙隄鋪、新淵隄、郭家淵、施家淵諸隄。更爲要害。成化五十九年。決沙隄鋪。四十年。決淵深隄。四十四年。決大湖淵。及雷勝文灣。四十五年。傾洗竹林寺。隆慶元年。傾洗二聖寺。二年。決艾家堰。水患殆無虛歲。縣境內有軍湖、貴湖、紀湖、重湖、大金、洋溪諸湖。惟大金一湖。通虎渡支河。河漲湖溢。毛穗諸里軍民嘗苦之。黃金隄。在石首縣東五里。

楊林隄。在石首縣楊林口。長百丈。有奇。

百家隄。在石首縣北四十里。其地爲水所圯。百家合築此隄。雍正六年。奉旨發帑修築。浪砍石碑二處。又濬黃金橋。剷口。

鄭家垸。在石首縣南三十里。元里民鄭淵率衆築此。以防洞庭水患。

石首縣隄防考略。縣東西廣三百八十里。南北袤一百里。俱夾江南北。而縣治一面濱江。勢復下濕。自元大德七年。決陳翁港隄。薩德彌實挽築。再黃金、白楊二隄。護之。不一歲。翁再決。趙通議開楊林、宋穴、調弦、小岳、四穴水勢。以殺之。迨明初。故道俱湮。隄防漸頽。嘉靖元年。決雙剷垸。三十四年。衝洗戴家垸。三十五年。決車公廳。四十五年。決藕池。頻年始修南岸。自公安沙隄。至調弦口。凡四千一百餘丈。北岸自江陵洪。水淵。至監利金果隄。凡十有餘丈。其間楊林、瓦子灣、藕池、袁家長剷。尤爲要害。

黃師隄。在監利縣西四十里。濱大江。歲久湮頽。明正德十一年。修築。

新衝隄。在監利縣南五十里。濱大江。極爲險要。

把火隄。在監利縣北五里。雍正五年。奉旨發帑修築。楊馬頭隄等處。六年。復發銀修築。楊林垸。永樂庵。大山坡下。張家等處。隄工。加修拖茅埠。低塌等隄。四處。

監利縣隄防考略。縣東至沔陽。西至江陵。南至華容。北至潛江。周四百五十里。正江湖匯注之地。勢甚汗下。鄉民皆各自築垸以居。而縣治臨江。有一枝河流貫城中。歲苦水患。元大德間。趙通議開赤剝穴。江流以殺之。迨明初。此穴已湮。乃築大興。赤射。新興等二十餘垸。成化間。又修築黃師廟。龍潭。蠶淵等一帶諸隄。嘉靖十八年。築塞十八灣。河又塞。祝家壩。其壩隨決。四十四年。水決黃師廟。李家埠。何家壩。文家垸。金家湖諸隄。而大興垸亦大潰。嘗一修築。自龍窩嶺至白螺磯。凡二百餘里。近年江勢南嚙。水患漸消。大隄。在松滋縣。自隄尾橋直抵虎渡。袤延八十餘里。雍正六年。奉旨發帑疏濬。太平。泰來兩垸。剝口。新築孟堰垸。月隄。

松滋縣隄防考略。縣地勢平衍。三峽之水。迸流至此。始得展蕩。勢若櫪馬。脫韁。隨性奔逸。最難防禦。而本縣又當公安石首諸縣之下流。江隄一決。正衝諸縣胸腹而下。其形勢尤爲要害。縣東五里。有古隄。自隄首橋。抵江陵之古牆鋪。長亘八十餘里。且舊有采穴一口。可洩水勢。宋元時。故道湮塞。迨洪武二十八年。決後。時或間決。自嘉靖三十九年後。決無虛歲。下流諸縣。甚苦之。較隄要害。惟余家潭之七里廟。河家洲。朝英口。古牆之曹珊口爲大。其餘五通廟。胡思堰。清水垸。馬黃岡等隄。凡十有九處。中多穰窩蟻穴。水易浸隄。

枝江縣隄防考略。江流至此地分派。如木之有枝。故以名縣。縣東至江陵。南至松滋。西北至宜都。周圍廣三百八里。縣治依高阜。向無隄防。惟縣東南有百里洲。袤延百里。南有蘆洲。澌洲。漢洲。萍洲。皆夾生大江之內者。自百里洲。楊林洲。賽磚灘。蔣斗灣。窰子口。至流店驛。復轉北。自董灘口。土臺。古城腦而下。至礮嘴灘。流店湖。又自礮嘴灘而南。轉至漸洋洲。觀音寺。直抵松滋米家埠。對岸皆有隄。其最要害者。莫過於石城腦。蔣斗灣二處。係通洲上流。一決則勢若建瓴。莫能捍禦。又洲內軍民雜處。互相規避。故隄工視他縣尤難。

二公隄。在夷陵洲東門外三里。當荆襄巴蜀之衝。旁有民田。成化二十二年。知州周肅築。行旅便之。襄陽府隄防考略。襄陽古有大隄。曲是隄。防之設。自商周已然。漢壽亭侯決水灌樊城。是漢水爲襄樊患。最切要害。明初。水流故道。不復爲災。故大隄漸塌。民多侵爲己業。而有司並無築隄慮。嘉靖四十五年。洪水四溢。郡治及各州縣城俱潰。民漂流以數萬計。郡西老龍隄一決。直衝城南而東。故郡治之患爲尤甚。副使金世龍。秦淦。徐學謨。先後條議。估修踰二年。工成。

老龍隄。在襄陽縣西三里。卽大隄也。

大隄。在襄陽縣。漢江出大安軍山下。入漢江。水漲不免嚙城。舊有大隄。東臨漢江。西抵萬山。袤十餘里。防護之。今逐年加修。恃以無恐。

襄陽縣隄防考略。縣隄防今在襄樊二城間。蓋二城並峙。漢水中流。如峽口。且唐。白河。從北來。橫截漢流。以故波濤激射。城隄爲患。按古大隄。西自萬川。經檀溪。土門。白龍池。東津渡。遶城北。老龍隄。復至萬山之

麓。周四十餘里。年久隄潰。而龍池東津一帶。又多浮沙。明初。修截隄一道。自長門至土門。大半頽塌。嘉靖四十五年。老龍隄一決。餘皆洗盡。頻年並力修築。北自老龍隄至長門。皆沿城甃石。高三丈許。南自萬山麓至土門。則仍古大隄。東南自土門至長門。則仍舊截隄。高二丈許。厚五丈許。樊城北舊有土隄。皆決。面江一帶。磚城盡潰。然樊城潰。則襄城無恙。其利害之輕重。又不可不審也。

宜城縣隄防考略。縣東至棗陽。南至安陸。西至南漳。北至襄陽。祇一面距山。三面臨江。江之故道。遶龍鳳山而下。去城二十里。舊有使鳳龍潭二港。大江流灌入城濠。然未聞爲城患也。迨明嘉靖四十五年。江溢。直衝迎水洲而下。改徙鴛鴦河。新洪通城五里許。又由使鳳龍潭二港。衝洗南北城樓。自此水漲。逕撼城隄。殆無虛歲。後議築使鳳龍潭二港。父老皆謂港口不塞。城隄終難保障也。

石隄。在光化縣。漢水東。宋李仲芳築。

鄖陽府隄防考略。鄖陽郡西北控扼秦豫。東南接連荆襄。四面皆疊山峻嶺。屬邑皆依山爲城。獨郡治孤立於川原之間。正當水衝。故上津竹山諸縣。雖臨漢濱。不必隄防。其水患祇在郡治。而禦水又以城爲隄。自古無大決害。至嘉靖四十五年九月九日。決東南門外土隄。城半傾塌。

吳公隄。在鄖縣東南。舊名捍江隄。明成化間。江漲隄圯。御史吳道光增修。高八尺。闊倍之。長三百餘丈。軍民永被其德。

長沙府陸公隄。在善化縣南十里。湘水東。明知縣陸南陽築。沙田隄。在湘陰縣南。長三千九百七十一丈。楊柳圍隄。在湘陰縣南。長一千三百五十丈。軍民圍隄。在湘陰縣西南。長一千七百四十丈。荆

塘圍隄在湘陰縣西南長五千三百四十四丈。東莊圍隄在湘陰縣計二十二里。右塘圍隄長三千七百三十七丈。塞梓圍隄長四千二百五十丈。金盤圍隄長三千三百四十五丈。彎斗圍隄長一千三百九十丈。韓灣圍隄長五千八百四丈。自古塘圍以下俱在湘陰縣西。金家圍隄在湘陰縣北長二千三百九十六丈。莊家圍隄長一千一百四十丈。黃公坵隄長一千二十丈。魯家坵隄長一千五百丈。買馬坵隄長一千二百二丈五尺。葡萄坵隄長一千五百四十九丈。自莊家圍以下俱在縣西北。以上湘陰縣境內圍坵諸隄雍正六年奉旨發帑修築。

湘陰縣隄防考略。湘邑居洞庭之濱地勢最卑其東北一帶近水悉巨浸也。而縣治之西曰淮西其水勢更甚今其地生聚日繁土田日廣防遏不可不豫而圍因以設焉分觀其勢各有隄統統計其數則十有六。南則沙田圍逼近江與楊柳相間中隔樟湖嶺埠由是而軍民荆塘金盤灣斗韓灣等圍垸隄雖間設各有腴限而東莊一圍則居軍民之東古塘塞梓二圍又居韓灣灣斗等圍之西北湘水沘水匯流自西入長沙遶東而下至湘陰是南水也。南水泛水自外入沙田一圍之東實當首險從此水由支港擁入楊柳軍民等隄之近東南者皆受頂衝而東莊向南稍平餘實三面被激焉。資水沘水出而與湘水合達於洞庭是西水也。西水泛水自內出兼之西南夾湧洪波濁浪紆回灌激在沙田一圍之內首爲出水之頂衝次及於楊柳圍更次及於軍民荆塘各圍之近西北等隄而古塘塞梓二圍界連沘邑爲垸水之頂衝焉。北則有金家垸西北又有莊家圍暨黃公魯家買馬葡萄等坵濱臨大湖地益曠而土益鬆其水自西而內出自南而外入者悉於是乎會歸而湖浪遂於是迎衝一經水漲其勢瀾漫隄腴衝潰頃刻灌滿蓋

統計各圍之險處。共有一萬九千四百九十八丈。至各圍垸內出水積水之區。或則有港。或則有塘。或則請建有閘。或則疏通有溝。向係民力歲修。港則設之混口。塘則立有剝溝。閘則因時啓閉。以資蓄洩。以資灌溉。似可無煩疏濬者也。大垸隄。小垸隄。在益陽縣千家洲。長湖垸隄。長二千四百八十九丈。沿河垸隄。長二千一百三十二丈。兩隄俱在益陽縣東。合興垸隄。長四千五百二丈五尺。中洲垸隄。長九百一丈。兩隄俱在益陽縣東北。長灘垸隄。長一千一百丈。河皮垸隄。長二千四百七十六丈。曹埠垸隄。長五千五十二丈。宋家垸隄。長九百丈。上火田垸隄。長二千八百九十丈。中火田垸隄。長一千八百四十一丈。下火田垸隄。長二千二十八丈。自長灘以下。俱在益陽縣東。以上益陽境內各垸隄。雍正六年奉旨發帑修築。

益陽縣隄防考略。縣在府治西北二百里。西界安化。南寧鄉。西龍陽。東北沅江。東南連湘陰水田。濱江。自寶慶發源桃花江。合流湍行。直下數百餘里。至縣前龜臺山而分派。大垸濱江。一爲千家洲大垸。一爲長洲小垸。又北。小河分汜。經石梁橋。沿河垸二處。會入大河。石梁橋地稍高。自趙家圍至尹家山止。爲沿河垸。皆明萬歷時舊址。又北自甘溪河分汜。入沅江。自泥湖入大河。直下。經沙頭塘之西北。爲合興垸。中洲垸。又東南。抵沅沙毛角塘分汜。入麻子河。沅江界。一由沅江瓦石磯塘。出大麻子河。湘陰界。一入小河。益陽塘。此益陽東北之水也。自龜臺山而東。爲支河。經長灘垸。至河皮垸。繞千家洲西南。復會沙頭塘而歸大河。一楓林河分汜。經瀾溪寺。直行抵添新橋河。支流旋轉鳳凰湖。回繞火田三垸旁。及宋家垸。曹埠垸。入盧家江。匯於瀾泥湖分汜。上入溪口。下經龍打窖塘。而歸於湘陰。蓋益陽分上中下三鄉。自縣北而東。

爲六鄉。上承澧沉之水。下連洞庭西汜。左抵長沙大江。一當湖水泛漲。加以南水之瀾漫。上之來者。滯而少去。下之積者。壅而上行。近江濱湖之地。常不免於淹浸。有備無患。唯在督理業戶。使之依時培修隄垸而已。

岳州府隄防考略。郡志。城西岳陽樓一帶。正臨洞庭湖。春夏水漲。波濤撼城。勢甚可慮。宋郡守滕宗諒。築偃虹隄障之。屬邑惟平江居萬山中。水患尙少。臨湘半倚山城。雖可捍禦。然西北俱濱江。水口又多。勢難築隄。巴陵隄防。祇在江北諸里。惟華容四十八垸之隄。最爲要害。

舵桿洲石臺。在洞庭湖中。雍正九年。世宗憲皇帝軫念四方行旅。及楚省居民。經九江五瀦之險者。東湖尙有洲岸可泊。西則渺漫無際。風鼓浪作。每至不測。特旨頒發帑金二十萬金。建造石臺。袤延九十六丈。高六丈。地廣三十丈。頂二十丈。狀如弓背。或浪至易分。南爲偃月隄。灣深可泊。凡往來舟楫。遇水漲風驟。栖宿臺南。從此有衽席之安。無漂淪之患。今按洞庭湖分東西兩湖。舵桿州居西湖湖心。有洲之名。而無沙渚。距湖岸四至。輒一二十里。或昏夜。或暴風。一望汪洋。無可栖泊。估客舟人。至此膽裂。先是雍正八年。湖廣督臣邁柱。湖南撫臣趙宏恩。議從水底施工。建築臺座。以便行舟。計需二十萬金。請撥每年商捐銀兩。或仿營田之例。開捐應用。乃特頒恩諭。發帑鳩工。法天之仁。平地之憾。萬古尤賴矣。

偃虹隄。在巴陵縣西。宋滕宗諒築。

永濟隄。在岳州府城北十五里。成化十九年。知府李鏡築。號李公隄。長四千丈。廣二丈。緣地勢爲平。高者七八尺。隄成名曰永濟。旁植柳二萬。以固積壤。又鑿巨石於華容之層山。爲橋二。可容舟。復倣規連河。瓮

石爲闌。於二橋之北。廣五尺。高丈有二尺。長加高之三尺。架木梁以通車馬。大學士李東陽爲記。國朝順治六年。知縣王篤慶捐修。康熙十年。知縣李煊五十二年。知縣王國英重修。

南津隄。在巴陵縣南十五里。洞庭之側。宏治間。知府張金築。

白荆隄。在巴陵縣東十五里。一名柴荆。築於宋。明成化四年。知府吳節增之。嘉靖十年。知府蕭勉重修。四十一年。邑人方純增築。

陽江村隄。在巴陵縣與監利縣接壤。前明額隄。止二百五十丈。國朝順治十二年。加修七百六十丈零。竹莊。何家壩。瓦子灣。魯家埠。四處。共一千一十二丈六尺。康熙五十五年。奉旨發帑銀二千六百兩。知縣王國英督工。五閱月始成。竹莊隄。長二百三十丈。何家壩隄。長三百丈。瓦子灣隄。長九十八丈。魯家埠隄。長三百八十四丈六尺。以上巴陵縣境內諸隄。雍正六年。奉旨發帑修築。高厚倍前。

巴陵縣隄防考略。巴陵縣正當洞庭湖沿匯之地。有白石等湖。又有南洋乾沙等港。湘水一泛。半沒田廬。然東南諸里。尙倚山阜。其最要者。江南則有永濟隄。江北則有江村隄。

趙公隄。在臨湘縣東南五里。西北倚山。東南臨湖。高下不平。難以瀦水。自南而東。皆窪澤。元泰定間。知縣趙憲築隄以防水。至今賴之。黃封隄。在華容縣河之濱。宋知縣黃照築。楊柳隄。在放生池側。官垸隄。在城西。長六千一百八十弓。蔡家垸隄。在城西四里。長三千三百二十三弓。黃蓬蔣垸隄。在城南三里。長五千三百七十三弓。張家垸隄。在城南三里。長一千四十三弓。朱家垸隄。在城東三里。長一千二百三十八弓。兔湖垸隄。在城東十五里。長一千九百二十五弓。蔡田南北垸隄。北離城東五里。

南十五里。長三千四百六十一弓。濤湖堽隄。在城東北一十五里。長一千六百九十二弓。凌溪堽隄。在城東北一十七里。長六百三十四弓。張家堽隄。在城東北一十九里。長一千三百五十弓。伍家堽隄。在城東北二十五里。長四百二十六弓。安息堽隄。在城北二十五里。長三千九弓。東坡堽隄。在城東北三十五里。長二千九百一十二弓。黃家堽隄。在城東北三十三里。長一千八百六十一弓。江黃堽隄。在城東北三十三里。長七千七百三十二弓。馬家堽隄。在城東北三十四里。長一千七百九十五弓。錢家堽隄。在城東北三十五里。長一千二百七十六弓。劉城堽隄。在城東北三十五里。長五千六百四十三弓。吳小堽隄。在城北三十七里。長一千四百三十弓。胡家小路堽隄。在城北三十七里。長二千一百三十三弓。楊李堽隄。在城西北四十里。長三千一百九十七弓。南北堽隄。在城西北四十五里。長一千四百三十弓。桃樹堽隄。在城東北三十五里。長二千七十弓。黃湖堽隄。在城東北四十五里。長一千八百七十二弓。永固堽隄。在城東北三十八里。長一萬二千九百九十七弓。嚴肖堽隄。在城東北三十八里。長一千八百八十四弓。林家堽隄。在城北三十七里。長三千三百一十五弓。乙酉堽隄。在城北六十五里。長七百三十四弓。蔡劉堽隄。在城北六十五里。長一千一百四十弓。合工堽隄。在城北六十里。長六千六百八弓。周小堽隄。在城北六十里。長九百八十二弓。以上華容境內各堽隄。雍正六年。奉旨發帑修築。高厚倍前。

華容縣隄防考略。縣城北臨川江。南連洞庭。中有斗子澌瀦等湖。南北水漲。殆無遺工。非累土爲堽。則民不能以旦夕安也。明正統間。知縣楊鏗請於朝。遣工部員外郎王士華。湖廣布政使蹇賢相。便宜築隄四

十有八。其最要害者。惟官垵、濤湖、安津、蔡田、四垵。周四十餘里。本縣錢糧。半出其內。一罅之漏。千家坐斃。隄防之功。不可緩也。以上湖廣通志。

此
页
空
白

續行水金鑑卷第一百五十六

江水工程二

湖廣常德府隄防考略。郡治與龍陽沅江二縣。地皆濱江。歷來歲遭水害。南齊永明十六年。沅江諸水暴至。常德沒城五尺。宋淳熙十六年。沒城一丈五尺。漂民廬舍。後唐沈如常。砌二石櫃。以殺水勢。得保城垣。元延祐六年。郡哈冊。哈冊。卽哈赤。元人言官也。於府學前。又砌石櫃一座。高二丈餘。益加保固。明嘉靖元年。大水決隄。十二年。江漲。幾欲衝城。隆慶五年。萬歷三十六年。屢遭淹沒。頻年修築。民始安居。長江隄。在武陵縣東二十里。小汛洲隄。在龍陽縣西二十五里。內有塘潛二座。大汛洲隄。在龍陽縣西四十里。周圍一千八百六十餘丈。內有潛四座。大圍隄。在龍陽縣北。周三萬五千八百餘丈。計一百二十里。上接沅。辰諸溪洞水。下濱洞庭大湖。舊有水潛七座。以洩積聚之流。康熙四十八年。令地方官專管。雍正六年。奉旨發帑修築。

九江隄防考略。禹貢。九江孔殷。謂沅漸无辰。敍西澧資湘九水會合。匯爲洞庭一湖是也。今以郡縣志攷之。辰常衡永支河。會流於洞庭者。無慮數十水。而其會衆流而注之湖。則有三焉。曰沅湘澧而已。沅發自群舸。經辰溪合麻陽諸溪洞水。過常武。出湖之北。湘發廣西興安海陽山。至分水嶺。分爲二派。一爲灘水。一爲湘水。至永洲瀟水會焉。至衡州。烝水會焉。過長沙府之南。澧發自武陵古充縣。東流過武水口。合焦溪。如溪諸水。經慈利石門。至澧州。出湖之西。而漸无辰。敍西資。共合流而匯爲洞庭。以爲之壑。故衡寶永

辰沅得免水患。惟常武當沅江之下流。岳澧值江湖之會合。長沙之益陽。湘陰。上接資湘。下濱洞庭。故歲遭浸溺。隄防之設。最宜急圖者也。

修築隄防考略。近年深山窮谷。石陵沙阜。莫不芟闢耕耨。然地脈既疎。則沙礫易圯。故每雨則山谷泥沙。盡入江流。而江身之淺澀。諸湖之湮平。職此故也。欲盡心力以捍民患。惟修築隄防一事耳。故備考古今。可經久而通行者。蓋有十焉。一曰審水勢。東洗者必西淤。下澀者必上湧。築隄者審其勢而爲之址。最難禦者。莫如直衝之勢。議者退爲曲防。故荊州虎渡穴口之隄。先年愈退愈決。而後直逼江口。以遏水衝。乃得無恙。他如順注之傾涯。則隄勢宜迂急湍之回沙。則隄勢宜峻。二曰察土宜。一遇缺口。必掘浮沙。見根土。乃築隄基。其所加挽者。必用黃白壤。三曰挽月隄。洗在東崖。則沙回而西淤。在南勝。則波漩而北塞。故往往古隄。反抱江流者。爲水所嚙。卽臨仰涯之上。勢甚孤懸。必先勘要害之地。而豫築重護之隄。四曰塞穴隙。獮屬螻蟻窠穴。秋冬水涸。徧察孔端。極探其原。而爲之防。五曰堅杵築。木杵不如石楞。石楞不如牛轆。六曰捲土埽塞。決口護城隄之法。埽以萑葦爲衣。以楊柳枝爲筋。以黃壤爲心。以穀草爲紉。因決口之淺深。水勢之緩急。而爲長短大小者也。若隄防初成。土尙未實。必以楊柳枝爲埽。橫棲於隄外。則可以禦波濤。而隄無恙。七曰植楊柳。八曰培草鱗。九曰用石甃。當衝決之要處。若非石隄。必不能回水怒。而障狂瀾。十曰立排椿。將大木長丈餘。密排植於隄之左右。聯以紉。纏結以竹葦。則風浪先及排椿。而隄可恃以不傷也。

守護隄防考略。決隄之故有三。有甚堅厚。而立勢稍低。漫水一寸。卽流開水道。而決者。有隄形頗峻。而橫

勢稍薄。湧水撼激。卽衝開水門而決者。有隄雖高厚。而中勢不堅。浪水漸透。卽平穿水隙而決者。要皆修築既疎。而防守復怠。坐致此患耳。故隄範護守之計。條議有四。一曰立隄甲。每千丈簽一隄老。五百丈簽一隄長。百丈簽一隄甲。凡隄夫十人。一應隄防事宜。官守之。而有垵處所。亦設有垵長垵夫。其法與隄甲同人。不論軍屯官莊。凡受利者。各自分隄若干丈。二曰豁重役。凡隄老隄長隄甲。及垵長垵甲。人役各用其身。卽與豁除別差。則彼得一意於隄防。三曰置鋪舍。查照漕河事例。於隄上。設置鋪舍三間。令隄長人役守之。則往來棲止。不患無所。而防護事宜。亦庶幾不致妨誤矣。四曰嚴禁令。凡有奸徒盜決。故決江漢隄防者。卽照依河南山東事例。發遣揭示通衢。以警儉俗。以上湖廣通志。

江西南昌府章江隄。在府城西章江門上下。宋仁宗時。趙概知洪州。始作石隄二百丈。以障其衝。歷久崩壞。明成化間。巡視大理卿夏時正。因江水齧岸。迫於事勢。捐官銀伐石修砌未完。宏治十二年。知府祝瀚續成之。北起龍興觀。南至南浦橋。

周公隄。在府城北德勝門外。明嘉靖四十二年。巡撫周相。因江水衝沒民居。括所屬鍍金。伐石甃岸。

譙隄。在府城南茅園楓樹。當章貢旣汝之衝。明嘉靖間。知府譙夢龍築。以上江西通志。

乾隆五年。江西豐邑沿江一帶。土石各隄險要。令南昌府同知。於伏秋汛發時。卽赴豐城防護隄工。皇朝通志。

瑞州府錦江橋隄。明正德七年。知府鄭璠。推官汪濬。於兩岸建石隄。凡二千七百七十六丈。有奇。

饒州府鄱陽東湖隄。唐建中元年。刺史李復築。以捍江水。百姓戴其德。因名邵父隄。歲久隄圯。明嘉靖三

年兵備道范輅檄知縣徐俊民築石隄三十里易名范公隄。

九江府封郭洲隄在江北綿亘三十餘里以上江西通志。

雍正六年覆准江西九江府同知給江防衝並令管理津渡事務大清會典。

贛州府春口壩在興國縣南二里許南江至此稍東折乃遂西逝故培壩西北以成東南匯瀦之勢江西通志。

望江縣方公隄在縣南門外長三里明天啓中知縣方懋德築無爲州新壩在州南舊時江流東注至

鮑魚口地勢最下順治中築四壩而屢圯民田沈江者四十餘里康熙八年知州顏堯揆築新壩八百八

十丈後大水破諸壩而境內圩田以新壩得免今名顏公壩神塘隄在州南四十里明萬歷九年築今

按以上北岸東流縣柳隄在縣西南門外明知縣蕭珮築亘二百六十丈西北達江口銅陵縣百家

墩壩在縣北十五里壩內通江村等圩之水外接大江都埂自百家墩至臙脂夾計八十餘里明萬歷

間知縣徐一科築又名徐公隄丁家洲壩在丁家洲河口都埂周其外水高於圩數尺不能潰入仁豐

諸圩賴之老龍墩壩在縣南門外繁昌縣馬家壩在縣北十五里今按以上南岸安徽通志。

江南江寧府明正統六年修築南京江岸英宗實錄先是南京江岸累決命工部侍郎吳政等修築政等

有水深未便工力請於農隙時疏江中沙洲以殺水勢然後用功至是興役請工命守備豐城侯李賢等

同吳政提督仍戒侵擾。

大勝關隄在南京浦子口明正統七年七月築英宗實錄先是江中有洲激水橫流決隄豐城侯李賢請

鑿洲引水直流。則隄可固。上可之。會詔蠲天下力役。遂不果鑿。止令築隄。通江橋一帶江岸。明正統二年修。

和州銅城閘。明永樂元年修築。上接巢湖。下接揚子江。圩岸七十餘處。爲江湖衝決者。

無爲州周興等鄉。及鷹揚鄉烏江屯。緣江圩岸。明永樂三年修。

鎮江府。宋政和六年設。以旁臨大江。無港澳。以容舟楫。聞西有舊河。可避風濤。歲久湮廢。宜令發運司濬治。

揚州府江都縣。河東邊江圩岸。明永樂元年修。

泰興縣攔江隄岸。明永樂七年。遣官相度修築。爲風濤衝激。淪入於江者。三千九百餘丈。又復大港北。自縣河南出大江。淤塞者四千五百餘丈。

泰興縣沿江圩岸。明永樂二年修築。太宗實錄。泰興縣言。沿江圩岸。東至新河。西盡丹陽界。長六千六百五十丈。高一丈五尺。頃被江水衝決。爲民患。請發民丁修築。從之。

泰興縣西南江堰。明成化十八年。揚州府同知李紱。率知縣蔡暹築。自保全鄉至廟灣港。長一萬六千九百二十五丈。廣三丈五尺。高一丈。

泰興縣增築江堰。明嘉靖十二年。知縣朱箠增築。自廟灣港至過船港。長七千六百三十丈。

儀徵河壩。明洪熙元年浚。是後定制。儀徵壩下黃泥灘。直河口二港。及瓜洲二港。常州之孟瀆河。皆三年一浚。

儀徵縣增建二閘。明萬歷五年，御史陳世寶言：儀徵江口去閘太遠，請於上下十數丈許增建二閘，隨潮啓閉，以截出江之船，盡令入閘，庶免遲滯。

響水攔潮二閘，在儀徵縣江口。康熙二十九年修砌。

廣惠通惠二閘，在江都縣。康熙五十三年重修。江防廳冊自石人頭迤南至瓜洲江口，頭閘曰廣惠，四閘曰通惠。

花園港息浪庵石工。康熙五十五年，總河趙世顯會同漕督疏請建築，奉旨著江南督撫、總河、總漕詳議奏聞，會議修築挑浚之處，一切丈尺工程，並設文武汛官河兵駐工，每年入歲搶修案內。息浪菴前護城隄岸埽工，長二百七丈。花園港至三官殿止，四閘下劉家涵洞護灘隄，長一百八十丈。花園港埽工，長四百丈。瓜洲城自北水關至西城角下首護城石工，長三百一丈。繞城河間段開挑寬深，長一千三十一丈。俱康熙五十三年建築。花園港越隄埽工，長五百二十丈，以作重門保障。瓜洲西門城西月河，長三百丈。俱康熙五十七年挑築。瓜洲正人洲引河二道，康熙五十八年開挑，第一道長五百五丈，第二道長五百二丈。儀徵江口通濟羅泗二閘，康熙五十八年重修。花園港西邱家巷挑水壩二座，并雁翅包灘裏餞工。康熙六十一年，署總河陳鵬年題請建築，共長一百八十五丈。又建築舊四閘，西龍王廟護埽工，長一百十八丈。瓜洲胡家嘴東岸護口埽工。雍正二年，河督齊蘇勒請建長一百十八丈。又建唐家莊東水草壩一座，兩岸各長二十丈。瓜洲越河自青蓮庵起，尤家碾止，長三百六十七丈。雍正八年，河督孔毓珣請挑，并於越河頭建築東水壩一座。瓜洲正人洲挑引河，長六百四十

一丈。五公灘開挑支河。長三百六丈。夾江內建築貼心壩一座。長一百五十丈五尺。兩首接築攔水土壩。長二百五十八丈。俱雍正九年河督嵇曾筠疏請挑築。以上江南通志。

瓜洲閘河。在揚州府城南四十里。康熙五十四年。因江流北徙。將廣惠閘堵閉。另浚繞城河通漕。後因花園港坍卸。繞城河運口難。以行漕。雍正六年。閉繞城河。仍開閘河。今則繞城河復開。江都縣志。

芒稻河歸江各路閘壩。高寶諸湖之水。歸入運河。邵伯以上。向從高郵。車邏。南關。五里各壩。分注下河入海。邵伯以下。向從金灣。三閘。及鳳凰。壁虎橋。灣頭閘。各路分注。由芒稻河入江。查運河入江。較入海之路。甚爲近捷。而運河之水。高於江面。通流順勢。消退亦速。若從鹽興等縣入海。路既遼遠。又沿海地面。昂於內地。所有通海河港。多被沙淤。即使疏浚極深。亦恐潮水內灌。且興鹽一帶。形如釜底。運河下水稍大。必先淹過內地。然後歸海。是入海不如入江之便。形勢顯然。康熙三十八年。恭逢聖祖仁皇帝南巡。諭旨將湖水俱由芒稻河。人字河引出歸江。如有淺處。俱令挑深。乾隆七年。臣高斌面奉皇上聖訓。將邵伯以下入江之路。酌量加增。詳勘會奏。於金灣滾壩下。東西灣地方。添建滾水壩二座。並挑引河。復將仙女廟金灣對過之越河。及通江之石羊溝。董家溝俱行增挑。其原有金灣壩下。并鳳凰橋引河。及通江之廖家溝。秦家港。白塔河。百汊港各河道。大加疏浚。并於各河頭分別建立閘壩。每年視水勢之大小。相機啓閉。以資宣洩。臣等謹按運河入江之路。本爲便捷。今河道又經加增。則高寶湖水。自足以資分洩。其邵伯運上。高郵各壩。非遇異常泛漲。無庸輕啓。臣等現在遵守辦理。高寶運河東隄以下。與興。鹽。秦。阜一帶民田。俱得豐收。而湖河入江。分洩利便。並無阻滯之虞。謹備陳原委。繪圖貼說。伏祈皇上訓示。南河成案。乾隆

十五年。河臣高晉進呈河工圖說二十條之十三。

瓜洲江工。大江源出岷山南流。經四川松潘衛。歷夔州府。出三峽。至漢陽大別。與漢水合流。經江西九江府入江南。至瓜洲江口。又東至通州入於海。先是沿江本無工程。康熙三十二年。前河臣于成龍題請將瓜洲儀徵河道交江防同知管理。五十五年。奉聖祖仁皇帝諭旨。江流日漸北徙。衝刷瓜洲城垣。必致危險。事關民生。若不豫爲籌畫。修防保護。斷乎不可。著江南督撫察勘詳論。一面動帑修築。一面奏聞。欽此。經河臣趙世顯等題請於息浪庵前建築護城隄埽工程。又花園港等處建築埽壩各工。歷年歲搶修防。至雍正五六年後。江溜北趨。直逼瓜洲江岸。逐漸塌卸。逼近城垣。甚屬危險。前河臣嵇曾筠於瓜洲沿江拋填碎石。增修埽工。共長三百三十六丈五尺。保固江岸。始獲平穩。其揚州迤下十里。爲三汊河。一通瓜洲。一通儀徵。故名三汊。自三汊河至儀徵沙漫洲江口。共五十五里。專資鹽運。并江西湖廣安徽等省漕船。由此入運。江潮吞吐靡常。易於淤淺。建設響水通濟羅泗攔潮四閘。隨時啓閉。以資鹽漕運行。臣等謹查瓜洲江面寬闊。江潮洶湧。兼之風浪澎湃。一經塌卸。衝刷最深。椿埽一時難以施工。惟在未做埽工以前。先用碎石拋擲。填平其底。既做埽工以後。復以碎石護其根基。則雖有風潮。不致輕易掣動崖岸。方能保固。城垣可以無虞。謹將瓜洲江工原委繪圖貼說。伏乞皇上睿鑒訓示。河工圖說二十條之十四。

京口江工。鎮江府京口爲江浙兩省糧船由運入江之要道。東西諸山環繞。連崗高阜。惟京口臨江一面。地勢平衍。民居稠密。向有談家洲以爲外護。雍正十一年間。江溜刷去談家洲。直逼京口。坍塌崖岸。街道民房俱有傷損。關係緊要。前河臣嵇曾筠於雍正十三年奏明照瓜洲之式。拋填碎石下埽保護。得以

平穩。現在埽工長一千一百一十八丈。臣等敬謹修防，不敢疎忽。謹將原委繪圖貼說，伏乞皇上訓示。河工圖說二十條之十五。

鎮江府京口河身正閘，張官渡閘、淩口閘、呂城閘、通江小閘、丹徒橫閘、越河閘。雍正二年，江寧巡撫何天培題請修建。鎮江府志。

新河，乾隆四十七年開。自上元縣棲霞碾駝場起，由句容縣龍潭至丹徒縣師古灘止。四十九年南巡，賜名便民港。丹徒縣志。

常州府靖江縣在揚子江中，舊爲土城。明正德元年，知縣周奇健加築。江水自東關入，東西橫貫城中。常州府志。

通州任公隄在州城西五里。宋寶元中，江濤爲患，通判任建中築，長二十里，高丈餘，以障江潮。通州志。

江防廳江防工程，上自揚糧廳屬甘泉汛灣頭閘南起，至瓜洲江工止，河長一萬三百四十四丈，兩岸無隄，亦無輒石工程。又自三汊河迤西至沙漫洲大江口止，河長一萬二千九百六十丈，兩岸並無工程，計七十二里，爲汛一。曰江防汛。乾隆五十五年，裁汰水利通判，以其事歸江防廳營管理，爲汛一。曰京口汛。江防廳本隸淮揚道。嘉慶七年，奏明與揚糧廳改隸常鎮道。江都縣縣丞分管汛地，自揚糧廳屬甘泉汛

界灣頭閘南起，至三汊河迤西，石人頭鎮儀徵縣界止，河長七千七百四十丈，計四十三里。東岸絳道自五臺山起，至揚子橋止，從前概修板工。雍正八年，起逐漸改易埽工，現在每歲搶修埽長二千一百餘丈。沙壩石閘一座，宋季建。乾隆五年修，金門寬一丈六尺，高一丈四尺，閘下河長四千五百五十丈，每

年大汛啓放。減洩漲水。由沙河港入江。今按揚州府志載。河在城東十里。宋雍熙初。淮南轉運使喬維岳。開沙河四十里。創二陡門於西河。以蓄洩水利。自運河通。揚子江陡門舊基猶存。揚子橋石閘一座。明季建。乾隆五年修。金門寬一丈。高一丈二尺。閘下河長二千二百三丈。每年大汛。啓放洩水。至深港入江。今按揚州府志載。雍正志言。揚子橋。卽古揚子津。在府城南十五里。漕河至此。分二道入江。瓜洲司巡檢。今按揚州府志載。潤州大江。本與揚子橋爲對岸。瓜洲乃江中一渚。又言瓜洲江濱。昔爲瓜洲村。揚子江之沙磧也。漸長如瓜子。故名。接連揚子江口。唐開元以後。漸爲南北咽喉之地。分管運河。上自三汊河。今按揚州府志。在城西南十五里。江都儀徵瓜洲。至此水分三支。故名。起至瓜洲花園港一帶。江口止。河長八千三百七十餘丈。乃運河達江正派。計二十四里。今按揚州府志。與地紀勝云。揚子鎮以南至江之運河。昔名伊婁河。隋以前。揚子鎮。尙臨江。至唐。江濱積沙。至二十五里。開元間。潤州刺史齊澣。奏開此河。通運道。管江工堡夫二十名。閘夫十二名。瓜洲閘河。由瓜洲通惠廣惠二閘至江口。康熙五十四年。因江流北徙。將廣惠閘堵閉。另浚遼城河通漕。後因花園港坍卸。遼城河運口。難以行漕。雍正六年。閉遼城河。仍開閘河。船由舊閘行走。乾隆十一年。將廣惠閘堵閉。仍開由閘上之青蓮庵舊越河行走。原設閘官一員。二十一年。移駐丹徒縣。專管橫越二閘。裁存閘夫十二名。交瓜洲巡檢董率。揚州府志。今按瓜洲行水金鑑載。有通惠廣惠二閘。今府志止。敘有堵閉廣惠閘。其通惠閘。或坍或拆。未載。查該閘坐落花園港。江風山月亭之側。康熙五十四年。江流北徙。坍場入江。瓜洲越河。在廣惠閘之上。雍正八年。因閘河水無關蓄。自青蓮菴起。至尤家磯止。開越河一道。長三百六十七丈。九年。於瓜洲西南正人洲。另開引河。

一道長六百四十一丈五公灘開支河長三百六丈夾江內築貼心壩一道長一百五十丈五尺又南北兩頭接築攔水土壩

瓜洲臨江工程息浪庵前埽工長二百七丈彌勒殿自西山轉角起至馬頭東轉角止長十二丈又馬頭東轉角石壩長五丈大觀樓起至息浪菴西山止沿江築隄長一百五丈息浪庵東山石馬頭下首起至東隄上首止沿江築護城隄長八十五丈花園港三官殿後起至四閘下劉家涵洞止護灘隄一道長一百八十丈瓜洲城自北水關起至西北城轉角下首止石工長一百三丈渡軍橋起至北水關止河長二百二十六丈北水關起至埽工迤南止河長三百二十五丈埽工南頭起至南關壩止河長二百四十丈南關壩起至基心橋止河長二百四十丈花園港埽工長五百三十丈瓜洲西門城西越河一道長二百丈正人洲引河二道一長五百五丈一長五百二丈花園港西邱家港挑水壩二座雁翅包灘裏餞共長一百八十五丈舊四閘西龍王廟護埽工長一百三十八丈皆康熙五十五年至六十一年節次濬築以上揚州府志

乾隆二十九年七月江水長至一丈五尺八寸瓜洲回瀾壩江灘坍陷入江九十餘丈水深四五丈至六七丈與護城隄相連距瓜洲城至十一二丈及三四丈原有之護崖埽坍塌成坑難以施工總河高晉請就灘築埽簽椿壓實並築子堰又於埽外拋填碎石三十年春聖駕南巡親臨閱視三十二年春諭總河高晉將瓜洲邇年潮汛隄工及現在護埽長落情形確查覆奏高晉奏自二十九年搶護平穩後三十年春鑿輅巡幸欽承聖訓每年霜降後將殘缺舊埽勘估次年桃汛前修竣兩年以來尙未長有沙灘三十

五年欽承諭旨以江水東坍西漲非人力所能強禦設或浸至城根不若將南面城垣稍收向內四十年六月查子港接連回瀾壩殷家莊江工場卸入江越長一百十四丈直長五十九丈裏寬七十一丈將瓜洲城西隅坍場入江直長四十一丈難以修復大學士總督高晉總河李奉翰奏准讓進補還城垣一段長九十丈其場卸兜灣之處補鑲柴工以作絳道外護碎石五十七年回瀾壩迤下埽工坍陷入江長一百十四丈越長一百三十六丈入裏寬一百三丈瓜洲舊城場卸入江長十四丈總督書麟總河蘭第錫奏准讓進六十丈補還土城長七十丈又於工尾及小南門外灘嘴用料裹護靠崖修築絳道一律拋護碎石現在每年歲搶修青蓮庵東西兩岸束水埽工運口東西兩岸埽工查子港及回瀾壩並迤下裏頭埽工以上共工長七百餘丈儀徵縣丞分管汛地自三汊河下石人頭鎮起至響水閘止河長七千二百丈計四十里兩岸無隄亦無洩水閘座間有民建木涵洞灌溉民田不通大江水道儀徵響水通濟羅泗攔潮四閘建於前明成化十年康熙四十九年重修閘河上接儀徵縣丞所管河尾起至江口止河長六百九十丈額設四閘閘夫一百二十名每名每年工食銀七兩二錢在藩庫請領三岔河至儀徵江口昔爲大江上游空重漕船要津乾隆四十年後河漸淺澀漕船皆由瓜洲進口此河爲淮南鹽船經由之道凡浚河修閘錢糧皆動運庫響水石閘一座金門口寬二丈四尺底寬二丈二尺高一丈七尺四寸計石十六層雍正十三年重建乾隆四十二年復修嘉慶十一年補修通濟石閘一座金門口寬二丈四尺底寬二丈二尺高一丈五尺六寸計石十三層乾隆三十一年重建嘉慶四年復修羅泗石閘一座金門口寬二丈四尺底寬二丈二尺高一丈五尺六寸計石十三層乾隆三十一年重建

嘉慶四年復修。攔江石閘一座。金門口寬二丈二尺。高深一丈八尺。計石十五層。雍正十三年修。乾隆二十五年及嘉慶七年復修。北岸臨江大壩埽工。長一百四十八丈。乾隆年間建。接下大蓬灣臨江埽工。長二十七丈。乾隆年間建。接下徐家牆頭臨江埽工。長四十七丈。乾隆年間建。嘉慶二十二年改砌碎石工。長四十丈。接下查家牆頭臨江埽工。長七十丈。嘉慶二十二年改砌碎石工。長五十丈。改首臨運埽工。長二十丈。乾隆年間建。新河東岸臨江埽工。長五十八丈。乾隆年間建。嘉慶二十二年改砌碎石工。長三十丈。工後至甘露港土堰。長三百四十七丈。南岸觀音庵臨江舊石工。長十三丈五尺。明季建。接下臨江埽工。長三十五丈。接下臨河埽工。長六十三丈。接下臨運輓工。長六十丈。明季建。京口運河內西石閘一座。本名京口閘。丹陽縣志載。在城西北京口港口。距江一里許。莫究其所始。嘉慶二十二年重修。金門口寬二丈一尺。高二丈。砌石二十層。額設閘夫四名。南石閘一座。在郡城南門外。今按丹徒縣志。作新閘。府志。卽滅渡舊址。明天順己卯浚漕河。作閘以殺水勢。嘉慶二十二年重修。金門口寬二丈二尺。長一丈九尺五寸。砌石十七層。新閘。今名南閘。今按丹徒縣志。有老人閘。在南門外。卽今南閘。所言似與府志所載互異。又曰丹徒鎮閘。今按新河。在鎮江府城之西。京口閘之東。南通漕河。北通大江。臨江埽工。查家牆頭之下。北有小閘。南有利涉橋。俗以橋名閘。稱爲利涉閘。府志載。天聖中開新河。注稱。宋會要。天聖七年五月。兩浙轉運副使言。潤州新河畢工。降詔獎之。丹徒縣志載。小閘在新河。康熙元年重建。按府志。無小閘名。今考小閘。於嘉慶二十二年復修。金門口寬二丈一尺。高二丈。砌石二十層。江防廳冊。餘詳見運河卷中。

中華民國二十六年十一月初版

(92183)

國學基
本叢書
行水金鑑
正續編
十八冊

每部實價國幣貳拾伍元

外埠酌加運費滙費

發行人

王

上海河南路

雲五

印刷所

商

上海河南路

務印書館

發行所

商

上海及各埠

務印書館

民政部移贈圖書

教育部

上海图书馆藏书



A541 212 0006 15308

